

ОЗОД ШАРАФИДДИНОВ

# ДОМЛАЛАР

ТОШКЕНТ «МАҲНАВИЯТ» 2009

Ўзбекистон Қаҳрамони, таниқли адабиётшунос олим ва жамоат арбоби Озод Шарафиддинов умрининг сўнгги кунига қадар қўлидан қаламини қўймаган, қалбидаги жамики эзгу туйғу-фикрларни бошқаларга илинган бағри уммон инсон эди.

Қўлингиздаги китобдан олимнинг азиз устозлари, дўстлари ва шогирлари тўғрисицдаги бири биридан қизиқ, ўқишли ҳикоя-хотира-лари ўрин олган. Уларнинг ҳар бирида ҳалқимиз маданияти, илму фани, маорифи ривожи йўлида фидокорона меҳнат қилган инсонларнинг фақат ўзигагина хос табиати, характер жиҳатлари, тақдиридаги муҳим воқеа-ҳодисалар ниҳоятда жонли тилда. Қизиқарли услубда тақдим этилади. Ҳикояларни ўқир эканмиз, кўз олдимизда нафакат муайян шахс феълу атвори, унинг ҳаётий ёхуд илмий-ижодий фаолияти, балки ҳалқимиз XX асрда босиб ўтган мураккаб ижтимоий-маданий йўл, юртимизнинг кўплаб гўшалари, у ерларда турли йилларда умргузаронлик қилган одамлар қиёфаси намоён бўлади. Шу маънода мазкур китоб ўзига хос тарихий манба сифатида ҳам муҳим аҳамият касб этади.

Мустақил юртимизда инсонни қадрлаш, жумладан, миллатимизнинг маънавий-маърифий такомилига улкан ҳисса қўшган чинакам зиёлилар хурмат-эътиборини жойига қўйишдек эзгу анъаналарни тиклаш ишига Озод Шарафиддиновнинг ушбу китоби ҳам муносиб ҳисса бўлиб қўшилиши шубҳасизdir.

Тўпловчи ва нашрга тайёрловчилар:

**М. Шарафутдинова, Ш. Тўйчиева**

III 4702620204-1  
M25(04)-09

ISBN 978-9943-04-092-2

© «Маънавият», 2009

## ФИКРЛАБ ЯШАМОҚ САОДАТИ

Танимаган-бilmagan одамга домламиз бошда андак дағал, киборроқдек кўринардилар. У кишига илк бор дуч келганда унча-мунчаси довдираб ҳам қоларди. Соғ-саломат гурсиллаб юрган чоғларидағи савлат-салобатларини айтаётганим йўқ – нимадандир норозидек бир жиддият чулғаб турган юз қиёфаси, бетакаллуфроқ туюладиган дастлабки муомала, овозни баралла кўйиб гапиришлар, яна денг – ҳеч кимни аямайдиган, урганда бир ёқли қиладиган муросасиз танқидчи деган ваҳимали ном... Гўёки бир камчилигингизни топиб шу ондаёқ сизни ҳам танқид қилиб ташлайдигандек! Лекин икки оғиз гап олишганингиздан кейиноқ бу таассурот алдамчи эканига иқрор бўлардингиз. Айниқса, домла ортиқча сипогарчиликларни четга суриб, бўлари гапни ўртага ташлаганларида, айниқса, юzlари бирдан юмшаб, мийиқларида табассум пайдо бўлгач, буткул бошқа – дилкаш, меҳрибон одамга айлануб қолардилар.

Озод ака фақат адабиётшунос ёки шоир-ёзувчилар билангира эмас, ҳаётда дуч келган турли касб кишилари билан ҳам тезгина тил топишиб, дўсту қадрдон бўлиб кетаверардилар. «Тафаккур»да бирга ишлаганимизда тақдир афғон юртида улгайтирган ватандошимиз (асли сурхондарёлик) Муҳаммад Салим Жўрабой ўғли деган тужжор мени қора тортиб, кўли бўш қолди дегунча (официял яқин жойда эди) таҳририятимизга кириб келаверарди. Аслида бошқа-бошқа оламнинг одамлари, аммо ёшлиари яқинлиги туфайлими ёки ҳар икки томондаги қизиқувчанлик хислати сабаб бўлдими, домла шу киши билан жуда қадрдонлашиб кетдилар. Хоналарида узоқ-уюқ сухбат қурав, кейин бирга-бирга тушлик қилиб келишар, гоҳо ўтириб олиб шахмат суриб қолишар эди.

Шу одам – турбатзада, кўп балоларни бошдан ке-

чирган жаҳонгашта, ўзига етгудек донишманд Мұхаммад Салим ака домламиз билан дўстлашгач, талай вақтдан бери таниш эсак-да, менга одатдагидан бошқачароқ эҳтиром кўрсатадиган бўлиб қолди. Бир сафар гап орасида «Сиз катта одам экансиз, укам, билмай юрганимизни қаранг!» деса бўладими! «Э, қўйсангиз-чи, Салим ака, — дедим хижолат аралаш, — биз бор-йўғи журнал чиқарип ўтирган бир қаламкаш-да». «Унисини билмадим-у, локин Озод домулло билан билла ишлайдигон одам кичкина бўлмайди. У киши кўп улуг инсон эканлар, авлиё, авлиё! Авлиёсидан сира кам эмас».

(Ана шундай — Озод домлага яқин юрсангиз, у кишининг назарига тушсангиз, осонгина «катта одам» бўлиб кетаверардингиз.)

Икки қадрдон бир-бирларини «ака-ака»лаб иззатлашар, борди-кецдилари ҳам бор эди. Домла Эркин Воҳидов ва Тўрабек Долимов сингари биродарлари билан Салим аканинг шаҳар четидаги кўркам боғида бир неча марта меҳмон бўлган, шахматбозлик қилишган эди. Салим ака оламдан ўтганидан кейин ҳам ўртадаги алоқа узилмади. Раҳматлининг ўғиллари домлани иссиқсовуқ кунларида йўқлаб туришди. «Салимжон ака жуда аломат, халқона бир энциклопедия эди, шу киши ҳақидаям бирор нарса ёзиш керак эди-да», деб қолардилар домла гоҳида. Умр вафо қилганида, аминманки, ёзардилар ҳам.

Кўлингиздати китоб эса — домланинг умр йўлида йўлдош бўлган, у киши кўрган-билган ва эшитган замондошлари ҳақида ёзив ултурғанларидан бир қисми. Китобда муаллиф асосан зиёлилар, мактаб ва университетда таълим берган устозлари, тенгдош дўстлари, шогирд ва укахонларидан нақл қиласи. Бунда кўпдан-кўп гаройиб ва аччик тақдирларни, ғоят моҳирлик билан чизилган портрет ҳамда характерларни кўрасиз, муайян шахс ва ижтимоий ҳаёт муносабатлари борасидаги унча-мунча қолилларга сифмайдиган, мардона зътирофлардан туғилган теран фикр ва холосаларга дуч келасиз. (Гапимизнинг исботи учун шу ўринда кўплаб кўчирма келтиришдан тийилиб турибмиз, зеро буни мақсад қилмаганмиз.)

Китобнинг ёзилиш услуби одатдаги жимжимаю баландпарвоз таърифлардан холи, ниҳоятда содда, жайдари; бир қараашда ҳатто «ўзимиз биладиган» гаплардек. Аммо ўқиётганда мароқли бир роман мисоли матндан бош кўтаролмай қоласиз. Сабаби – самимият, сабаби – ҳаққоният. Роман дедик, дарҳақиқат, қўлингиздаги китобни муаллиф ва унинг замондошлари, уларнинг чигал ва мураккаб қисматларидан ҳикоя қилувчи ўзига хос бир роман дейиш мумкин.

Ушбу китоб баҳона, домланинг таржимаи ҳоли ва шахсиятига оид ҳамда муайян давр манзараларини қамраган жуда кўп маълумотлардан ҳам хабардор бўласиз. Лекин бирор тўғрисида нақл этаётганида муаллиф тинҳор-базинҳор ўзини ҳикоя марказига олиб чиқмайди, аксинча – ўша ҳолатда йўл қўйган хатолари ёки инсоний ожизликларини очиқ-ошкор, шахсиятини асло аяб ўтирумай баён қиласеради, китобнинг бир жозибаси шундан.

Ҳали айтганимиздек, раҳматли Салим ака Озод домлани авлиёга тенглаштириб таърифларди. Бизнинг бундай даъвомиз йўқ, чунки авлиёлар ёки авлиёсифат зотлар фақат ўтмишда яшаб ўтган, ҳозирги кунда учрамайди, деган эскича қараашда юрамиз. Тўғри-да, ҳаётда Ўзингиз билан бирга юрган, бирга турган замондошингизни, гарчи у ҳар қанча улуғу мўътабар бўлмасин, авлиё атамоқقا тилингиз бормайди – ийманасиз, истиҳола қиласиз: ҳом сут эмган банда, эрта бир кун нохўяроқ бирор иш қилиб қўйса-я! Шошмай турайлик, умри поёнига етиб, оламдан ўтсин, ана кейин ўйлаб кўрармиз... Домла Шарафиддиновнинг эса на доноликки, на улуғликка даъволари бор эди. Биз билган Озод шка чинакам ҳаёт одами, ҳаётчан инсон эдилар. Унчамунча мақтову таърифларга энсалари қотарди: «Э, қўйсангиз-чи шу гапларни!»

Мудом-муттасил фикрлаб, фикрлаганда ҳам мустақил мулоҳаза юритиб яшаш устознинг бош ҳаётий шиорларидан эди. У киши теварак-атрофда кечачётган ҳар бир воқеа-ҳодисага, умум-кўпчилик аллақачон ғасдиқлаган, кўнишиб улгурган одатий қоида-тутумларга ҳим, худди илк бор дуч келгандек, гумон аралаш бир

хайрат, «Нега бундай? Нимага айнан шундай бўлиши керак?» деган каби безовта, муросасиз саволлар асосида ёндашардилар. Аёнки, ҳаётга ўта талабчан муносабат кўпроқ ёшликка, шунда ҳам айрим бир тоифагагина хос бўлади. Лекин чархи кажрафтор бора-бора бундай ўжару ўзбошимчани тараашлайди, измига солади, кўндиради, кўникутиради. Кечаги мағрур, шижоатли одам, бугун қарасангиз – синиб бўлган бир муросасоз кимсага айланибди...

Худо берган қатъиятли феъл-атвор орқасида не-не жафоларни бошдан кечирганига, кексалик чоғларида оғир дардга чалиниб, мислсиз жисмоний оғриқлар чангалида азоб чекканига қарамай, ҳаётга бирдай талабчанлик билан ёндашув, тийиксиз қизиқувчанлик, ҳар иш, ҳар бобда асл моҳият сари интилиш ҳисси умрининг сўнгги дақиқаларигача устозни тарк этмади.

Мард одам шундай яшар. Чин олим шунча бўлар.  
Ўша авлиё деганлари ҳам осмондан тушмагандир...

*Эркин АЗЗАМ*

## ДОРИЛФУНУН МЕНИНГ ТАҚДИРИМДА

Баъзан назаримда мен шу дорилфунунда туғилиб кўз очгандек, атак-чечак юришни шу ерда ўргангандек, шу ерда балоғатга етгандек ва энг сўнгги мэррага ҳам шу лорилфунун бағридан борадигандек туюлади. Ҳарҳолда, шуниси аниқки, мен бу ҳаётда нимага эришган бўлсам, ҳаммасига дорилфунун туфайли, унинг бағрида, унинг шаноҳида эришдим. Лекин қисмати дорилфунун билан чамбарчас бөвланиб кетган одам бир менми? Менга ўхшаган ўн минглаб, балки юз минглаб одамларга до-рилфунун чинакам оналик қилмадими? Қолаверса, бутун ўзбек халқининг XX асрдаги ҳаётида, қайта тикла-нишида, ривожида, миллат сифатида янги сифатлар касб этиб шаклланишида фавқулодда роль ўйнамадими? Менимча, буни Президентимиз Ислом Абдуганиевич Каримов ҳаммамидан кўра теранроқ тушуниб етди, ше-килли, ўз Фармони билан унга «Ўзбекистон Миллий университети» деган олий мақом берди.

Мен университетта 1946 йилнинг сентябрида келган ёдим. Ёнимда етуклик аттестати, чўнтағимда олтин ме-далъ, дунёнинг ҳамма илмини билиб, тадқиқ қилиб қўйгандек бурним кўтарилган, димоғим шишиган, босар-тусаримни билмайман. Мени бағрига олган дорилфунун қисқа муддатдаёқ менинг кўзимни очди – осмонлардан ерга тушириб қўйди, илм дунёси сарҳадсиз бир уммон ўканини, унинг мусаффо сувларини ҳар қанча ши-мирган билан тагига этиб бўлмаслигини менга аён қилди. Ва менга яна шуни аён қилдики, фақат мукаммал илмгина инсонга саодат йўлини кўрсатадиган муқаддас қурратдир.

Ўша йилларда университет талабаларининг таркиби жуда олақуроқ эди – аудиторияларда кечагина мак-табдан чиқсан, сочини жамалак қилиб майда ўриб оғган қизалоқнинг ёнида аллақачон 25 ёшни уриб қўй-

ган, соч-соқолига вақтидан олдин оқ оралаган, бир күли ё бир оёғи Оврупонинг қайси бир адирларида қолиб кетган йигитлар ҳам бор эди. Ўша жамалак соч қизалоқ ҳам, менга ўхшаган сўтак йигитчалар ҳам ҳали болаларча фикрлар эдик, ҳали оёғимиз остидан икки қадам нарини кўролмас эдик. Лекин шунга қарамай, уруш кўриб, Ватан олдидағи бурчини ўтаб қайтган акаларимиз билан тил топишиб кетдик.

Университет ўша пайтлардаёқ ўзининг салобатига, ички турурига эга эди. У нафақат Марказий Осиёдаги кўпгина олий ўқув юртларининг онаси бўлган, у нафақат ҳар йили ҳалқ хўжалигининг турли соҳалари учун минглаб мутахассислар етказиб берарди, балки ёшларни адолат руҳида, ҳақиқат ва эзгулик нурларига буркаб тарбия қиласди. Уларга виждон нима эканини, чин инсон қанақа бўлишини англатарди.

Бизнинг филология факультети уруш авжи қизиб, мамлакатнинг ҳаёт-мамот масаласи қил устида турган 1942 йилда ташкил бўлган экан. уни ташкил килишда В. М. Жирмунский, Д. Д. Благой, Е. Э. Бертельс, Пиксанов каби дунёга машҳур олимларнинг хизмати катта бўлган экан. Лекин ундан ҳам аввал – гарчи ҳали алоҳида факультет бўлиб ажralиб чиқмаган бўлса-да, бу ерда Ойбек, Мухтор Аvezов каби буюк алломалар дарс берган экан. Талабалик йиллари ҳақида гапирсам, гап тамом бўлмайди. Шунинг учун мен университетнинг ёшларига билим бериш билан чекланмай, уларни маънавий жиҳатдан ҳам етук ва баркамол одамлар бўлиб чиқишидаги иккита жиҳатнигина айтиб ўта қолай.

Университет, биринчидан, бизнинг миллий туруримизни щакллантирди. Биз ўзбек эканимизни, бизнинг ҳалқимиз дунёдаги энг қадимий цивилизациялардан бирини яратган эканини онгимизга сингдирди. Ҳали дунёдаги аллақанча эллар ва элатлар, қабила ва уруғлар «Туз нима, ўт нима ва лунги» нималигини билмай, бошлирига шоҳ тақиб юрган кезларда бизнинг юртимизда бобокалонларимиз сугориладиган дехқончилик бобида мўъжизалар яратгани, ўз давлатини барпо этгани, шаҳарлар, йўллар қурганини, нодир санъат асарларини вужудга келтирганини билиб олдик. Ўзбекларнинг тарихи ҳам дунёдаги ҳеч бир ҳалқникидан қолишмайдиган да-

ражада бой ва ранг-баранг бўлганини, бизнинг халқимиздан буюк алломалар, саркардалар, давлат арбоблари, файласуфлар, олимлар, санъат ва адабиёт намояндалари етишиб чиққанини билдиқ. Булар билан фахрланмай бўлармиди? Тўғри, ўша давр мафкураси айrim халқларнинг миллий гурурини шакллантиришга тиш-тирноғи билан қарши эди. Лекин, шунга қарамай, домлаларимиз ғоятда эҳтиёткорлик билан, нозик дид билан бақириб-чақирмасдан илмий ҳақиқатларни бизга сингдирар эдиларки, бунинг оқибатида фақат билимиз эмас, миллий гуруримиз ҳам ортиб бораради.

Мен айтмоқчи бўлган яна бир жиҳат шундаки, университет биз – ёшларга адолат ва ҳақиқат туйғусини сингдириди. Биз университет аудиторияларида беш йил гаҳсил кўрган бўлсак, беш йил кутубхоналарда эски ва ишиги китобларнинг чангини ютиб, игна билан қудук қазиган бўлсак, шу жараёнда муттасил фикрлашни ҳам урганиб бордик. Университет бизга фикрлашсиз инсон инсон бўла олмаслигини, фикрлаш эса ҳамма нарсани таҳдил қилиш, воқеа-ҳодисаларнинг замиридаги моҳијатга етиб бориш, ҳақиқатни кашф этиш эканини ўргатди. Бу ҳам ўша йиллар шароитида мутлақо амалга ошириш мумкин бўлмаган бир гап эди. Аксинча, ҳар хил мафкуравий дарсларда, йиғинларда, анжуманларда қулогимизга ўша даврнинг ёлгон ҳақиқатларини куйганилари-қўйган эди. Лекин фикрлаш малакаларини эгаллаған сари «Мен бахтиёрманми? Менинг халқим, элим иркин яшайлитими? Наҳотки, аравани қуруқ олиб қочиб, қўниртириб-тошириб айтилаётган гаплар рост бўлса?» деган шубҳа-гумонлар кўпчилитимизни ўртай бошлаган иди. Ўшанда гарчи бизлар Герцен ва унинг дўстлари қиби Воробьев адирларига чиқиб, Ватан озодлиги йўлини жон фидо қилишга қасамёд қилмаган бўлсак-да, ичичимиздан шу юртнинг содик фарзандлари бўлишга, унинг бахт-саодати йўлида ҳеч нарсамизни аямасликка ишқи қилиб қўйгандик.

Университетни тугатиб, аспирантурага кетдим, у ершади 1955 йилда қайтдим. Шу йилнинг сентябрь ойидан биннаб, университетнинг филология факультетига ўқитувчи қилиб қабул қилинди. Университет билан боғлиқ ғисгимнинг иккинчи босқичи бошланди. Биринчи марта

дарсга кирганим эсдан чиқмайди. Бу – IV курс, Умарали Норматовлар курси эди. Аудиторияни тўлдириб ўтирган йигит-қизлар мендан кичик бўлишса, атиги икки ёки уч ёш кичкина эди, холос. Гўё ҳаммалари: «Қани, нима каромат кўрсатар экансан?» деб ўйлаётгандек, кўзларини узмай менга тикилиб туришарди. Уларнинг сурি босди, шекилли, бир оз довдираб қолдим, кейин ўзими ни ўнглаб олдим. Аммо топиб келган гапларим дарснинг охиригача етмади – ўн беш минут олдин тамом бўлиб қолди. Нима қилишимни билмайман. Талабалар қитмирик қилиб, бир-иккита саволдан бошқа савол бермай, кўзларини лўқ қилиб ўтираверишди. Чиқиб кетай десам, пулини олиб, ишини чала қилиб кетган мардикорнинг аҳволига тушиб қоламанми, деб қўрқаман.

Хуллас, биринчи дарс ана шунака ўтганди. Аммо омадим бор экан – талабалар ҳам, қирқ йил бирга ишлишимиш керак бўлган домлалар ҳам яхши одамлар экан. Талабалар аҳволимни тушуниб, қитмирик қилишларини бас қилдилар. Домлалар эса жуда меҳрибонлик билан муомала қилдилар, муболағасиз айтиш мумкин – улар мени янги ўтказилган ниҳолдек авайлаб, парваришлаб, вояга етказишиди. Мен ишга келганимда адабиётшунослардан Фулом Каримов, Субутой Долимов, Зикриё Мирҳожиев, Ҳомил Ёкубовлар, ёшлардан эса Лазиз Қаюмов хизмат қилишарди. Кейинчалик бу жамоага Аҳмад Алиев, Бердиали Имомов, Саида Нарзуллаева, Умарали Норматов, Абдуғафур Расулов, Норбой Худойберганов, Матёкуб Қўшжонов ва бошқалар келиб кўшилди. Узоқ вақт мобайнида адабиётчилар жамоасига профессор Фулом Каримов раҳбарлик қилди. Айтиш керакки, кафедрага чинакамига илмга берилган, педагоглик касбига садоқатли, ҳалол одамлар тўпланган эдилар. Ҳар қандай майда гаплардан устун туришар ва бўғтонларга йўл беришмас, бир-бирларига чинакам меҳрибонлик ва талабчанлик билан муомала қилишарди. Кафедрада тез-тез илмий маҳсулотлар, асаларимиз, диссертациялар муҳокама қилиб турилар, бальзан бу муҳокамаларимиз кескин баҳслар билан ўтарди. Сифати паст ишларни қайтариш ҳолатлари ҳам учраб туради. Лекин уларнинг биронтаси кейин ҳам давом этадиган жанжалга, ғаразли олишувларга айланниб кетмасди. Мен 40 йил мобайнида бу

жамоада бирон марта ҳам жиддий ихтилофлар чиққанини, бир-бирига терсайишлар, бир-бирига бурун жийиришлар рўй берганини билмайман. Сира эсимдан чиқмайди – 60-йилларнинг ўртасида қафедрада реализмнинг табиати ва унинг пайдо бўлиш даври ҳақида жиддий тортишув юз бериб қолди. Айниқса, раҳбаримиз Фулом Каримов билан менинг қарашларим ўртасида кескин зиддиятлар туғилди. Домла мудирлигини пеш қилиб, менга талабалик йиллари дарс берганларини рўкач қилиб, бир-икки дўқ-пўписа билан менинг шаҳдимни қайириб ташласа бўларди. Лекин бундай қылмади. «Баҳсимиизни кенг жамоатчилик олдига олиб чиқайлик. Унда талабалар ҳам, четдан келган мутахассислар ҳам иштирок этсин» деб таклиф қилди домла. Баҳс бўлди, у анча кескин ўтди, лекин баҳсдан кейин тарафдорлар ўртасида ҳеч қандай ихтилоф, низолар келиб чиқмади. Ҳуллас, бу жамоада кўп йиллар мобайнида ҳақиқий ижодий муҳит ҳукм сурган эди. Шунинг учун ҳам бу жамоанинг илмий ишлари жуда самарали бўлди. Улар яратган илмий асарлар, монографиялар, тўпламлар, тадқиқотлар, сон-саноқсиз мақолалар бир жойга тўпланса, жуда катта кутубхона бўлади.

Бу асарлар нафақат талабалар учун қўлланма бўлган ёди, улар республиканинг илмий-маданий ҳётига ҳам сезиларли таъсир кўрсатди ва охир – пировардида университетнинг филология факультети адабий-танқидий фикрнинг марказларидан бири бўлиб қолди. Университет доирасида мунтазам равишда турли адабий анжуманлар ўтказилиб туриларди. Ҳар гал камида мингиши иштирокида ўтадиган бу йиғинлар ёшларда унтилмас таассуротлар қолдирарди. Шулар баробарида, бу жамоа ҳеч қачон ўзининг асосий вазифаси – юксак миқалали филолог мутахассислар етишириб бериш юқанини унугтан эмас. Университетдан, филология факультетидан етишиб чиққан мутахассислар турли ижодий ташкилотларда, оммавий ахборот воситаларида, национал идораларида, ҳар хил жамоатчилик уюшмаларида мұнайффақият билан хизмат қилмоқда. Нафақат Тошкентда, балки республикамизнинг бошқа жойларида ҳам «Домлажон, ассалому алайкум» деб қўлинин кўксига қўйиб, сенга пешвоз чиқаётган шогирдингни кўрганда,

рости, одам бир қоп семириб кетади ва ўтган умридан мамнун бўлиб қўяди. Адабиёт соҳасини-ку айтмаёқ қўя қолай — Одил Ёқубов, Саида Зуннунова, Абдулла Орипов, Эркин Воҳидов, Жонрид Абдуллахонов, Шукур Холмирзаев, Ўткир Ҳошимов, Эркин Аъзамов, Хайрийдин Султонов, Иброҳим Faфуров, Ойдин Ҳожиева... Рўйхатни яна ва яна давом эттиравериш мумкин.

Мен дорилғунундан бир умрлик турмуш ўртоғимни топдим. Беш йиллик талабалик йилларида эса ака-ука Маҳамад ва Матлаб Воҳидовлар, астроном Абдусалом Латипов, файласуф Эркин Юсупов ва Музаффар Хайруллаев каби қадрдан дўстлар ҳам орттирудим.

Шу ўринда яна бир фактни айтиб ўтмоқ керак. Сўнгги йилларда ёзувчилардан тўрт қишига Ўзбекистон Қаҳрамони деган юксак унвон берилди. Булардан уч қиши бевосита университетнинг филология факультети билан боғлиқ. Булар Абдулла Орипов, Эркин Воҳидов ва мазкур сатрлар муаллифи. Тўртинчи қаҳрамонимиз Саид Аҳмадга келсак, у ҳанузга қадар университетнинг филология факультетида ўқимаганига пушмон қилиб юради, шекилли. Шу фактларнинг ўзиёқ факультет жамоасининг меҳнати нечоғли самарадор бўлганини кўрсатади. Бу ўринда-ку имкони бўлса, университет олимларининг математика, физика, химия, биология, геология, шарқшунослик, тарих ва археология соҳаларига қўшган ҳиссаси ҳақида ҳам оғизни тўлдириб, ифтихор билан гапирса арзирди, ўнлаб буюк номларни келтириш мумкин эди. Аммо бунга мақоламиз ҳажми йўл қўймайди.

Мирзо Улуғбек номидаги Ўзбекистон Миллий университети ҳозирга қадар ўзининг юксак номини оқлаб келяпти. Ўлайманки, бундан кейин ҳам мустақил республикамида эркин ва фаровон демократик жамият куриш йўлида у ҳамиша олдинги марраларда бўлади.

Мен республикамиздаги олий таълимнинг бу юксак кошонаси олдида бош эгиб таъзим қиласман ва бундан кейин ҳам ҳар ишимда, ҳар қадамимда «шу дорилғунундан чиққан» деган шарафга муносиб бўлишга ҳаракат қиласман.

## ИЛК МУАЛЛИМЛАРИМ

Китобларим орасида бичими шапалоқдек келадиган юнқа муқовали бир китобча бор. Унинг қофозлари алла-қачон сарфайиб кетган, лекин бутун. Бу китобнинг ёши бу йил роппа-роса олтмиш иккига етди. У Шайхзоданинг урушининг энг оғир йилида – 1942 йилда нашр этилган ишерий тўплами. Үнга шоирнинг «Кураш нечун», «Кашитан Гастелло», «Йўқ, мен ўлган эмасман», «Берлинда суд бўлғувси» каби шеърлари киритилган бўлиб, ҳозир ҳам бу шеърлардан ўша йилларнинг оловли нафаси уриб туради, бу шеърларнинг тафти бугун ҳам юракларни кўйдирди. Бу китобча мен учун икки томонлама ардоқли – биринчидан, мен ундаги шеърларнинг бир қисмини ёд олиб, госпиталларда ярадор жангчиларга, маҳаллаларда оддий одамларга ўқиб берардим. Ёд олмагандаримни китобдан ўқиб берардим. Неча мартараб ишерларни ўқиб бўлганимдан кейин тингловчилардан кимдир ошкора, кимдир пинҳона кўз ёшларини артишини, чукур оҳ тортиб, кўнглидаги андуҳни бўшатишини кўрганман. Китобнинг мен учун ўта ардоқли бўлишига сабаб бўлган иккинчи омил шунда эди, уни менга мактабимизнинг илмий мудири, адабиёт ўқитувчимиз, синф раҳбаримиз Қурдат ака Аҳмедов ўз дасткити билан совға қилган эди. Дастхатда «Аълочи ўқувчи Оюд Шарафиддиновга эсдалик учун» деб ёзилган жўнгина сўзлар бор эди. Албатта, бугунги кунда ўқитувчининг ўз ўқувчисига китоб совға қилгани жуда жўн ва жуда оддий бир ҳодиса бўлиб кўриниши мумкин. Баъзи олимлар «китоб совға қилган бўлса қилибди-да, бунинг нимасини ёзади», деб бурун жийиришлари мумкин. Некин бунаقا хулоса чиқаришга шошилманг, азиз ўқувчим. Гап, албатта, кичкинагина бир шеърий тўпламнинг шуничаки совға қилинганида эмас. Гап шундаки, Қурдат

Аҳмедов бизга – мураббийлик қиласиган ўқувчилариға фақатгина устоз эмас, бамисоли туғишган ота, балқи ундан ҳам яқинроқ бир инсон эди. У синфдаги ҳар бир болани жуда яхши билар, ҳар бир ўқувчининг уйига неча мартараб борар, уларнинг ота-оналаригина эмас, ҳатто бувилари ва боболари билан ҳам эринмай гаплашиб ўтирас, фарзандининг мактабдаги аҳволидан, қайсири куни дарсга келмаганидан, хулқи бузила бошлаганидан, бетгачопар бўлиб қолганидан, дарсларни тузукроқ тайёрламай қўйганидан, бирга ўтирадиган ўртоғининг қаламини ўғирлаб қўйганидан гурунглашарди. Хуллас, синфдаги болаларнинг феъл-авторигина эмас, бутун ҳаёти, нималар билан нафас олайтгани, чўнтағида қанча пули боридан тортиб, ўшҳиклари қанақа йўналиш ола бошлаганингача – ҳамма-ҳаммаси унга маълум эди. Боланинг уйидами ёки мактабдами, ўкувчи тўғрисида унинг ота-оналари билан гаплашар экан, бу гурунг ҳеч қачон чақимчилик тусини олмас эди. Кудрат ака бундай суҳбатларда боланинг шахсиятига тегадиган ёхуд уни камситадиган бирон оғир гап айтмас, уларга тарбия бобида берилган маслаҳатлари ҳам малол келмайдиган, лекин қилмаса бўлмайдиган маслаҳатлар бўларди. Айни чоғда у жуда талабчан эди, кечикиб қолишга, дарс тайёрламасликка йўл қўймасди. Бирор боланинг дарс қолдириши ёхуд дарста тайёрланмай келиши фавқулодда воқеа сифатида қаралар ва Кудрат ака бу ишнинг тагига етиб, аҳволни тузатмагунча қўймас эди. Лекин бола халқи, айниқса, ўсмир чоғида, ўтиш даврини бошидан кечиришда жуда шум бўлади. Билмадим, ота-оналарнинг баҳтигами, ўқитувчиларнинг баҳтигами ёки ўзимизнинг баҳтимизгами авжи балоғатга эришаётган чоғимизда қиз болалар билан ўғил болаларни бир-биридан ажратиб ўқитиш тўғрисида буйруқ чиқди. Ўқитувчилар ҳарна ёвнинг бири кам бўлди, деб хурсанд бўлишиди. Бироқ болалар эса бутун кучини бошқа ёққа уришди. Бизнинг мактабимиз Охунгузарда бир қаватлик замонавий бинода жойлашган эди. Шундоққина биқинимизда Пушкин боғи. Боғдаги сайrlар ва сайиллар, асосан, кечкурунлари содир бўлса-да, кундуз кунлари ҳам у ерда bemalol kўngil очса бўладиган отўйинлар, футбол май-

лончилари, концерт сақналари бўларди. Биз б соат Үқинимиз керак бўлса-да, тўрт соатдан кейин ҳаммамиз ишни қочадиган одат чиқардик, дарс қолиб, паркда ғулуп синф билан футбол ўйнардик. Уч-тўрт кун бу қилингимиз жазосиз қолди – ҳеч ким сезмадими ёки сенинисе ҳам арқонни узун ташлашдими, билмайман. Аммо бир куни ҳар қанақа хавотирни йигиштириб қўйиб, чунопам ўйинга берилиб кетибмизки, асти қўяверасиз. Ўирдан кимнингдир ҳайқириб сўкингани эшитилди. Үмрида сўкинмайдиган Кудрат ака газабдан қизариб-булириб, кўзлари ёниб, ранги оқариб бизни чапараста сўқмоқда эди. Шу маҳал тўп унинг олдига келиб қолди. Синфимизнинг ифтихори эди – бунақаси ҳеч қайси синифда йўқ эди. Кудрат ака биз сира кутмаган чапластилик билан тўпни илиб олди-да, чўнтағидан паккичини олиб, коптокни чавақчаб ташлади. Копток «пис-с» идию овоз чиқаршига улгурмай бўшаши-қолди. Биз билан бирга Кудрат аканинг жияни Аҳматилла ҳам ўқириди – ўша куни ҳаммамиздан ортиқ у жазоланди – Кудрат ака Аҳматиллага бир тарсаки туширди, шекилли. Эргаси куни эрталаб синф мажлиси бўлди – Кудрат ака бизнинг шумликларимизни шундай таърифладики, биз чиндан ҳам ич-ичимиздан уялиб кетглик ва одам бўлишга ваъда бердик. Дарсдан қочишлиар тўхтади.

Лекин биз, бари бир, Кудрат акани жон-дилимиздан ижли кўрадик, уни ранжитмасликка ҳаракат қиласардик, ҳатто унга сирларимизни ҳам ишониб айтаверар эдик. Биз учун бу одамнинг гапини қайтариб бўлмайдиган устозга айлантирган омил – унинг ўз соҳасини мукаммал биладиган мутахассис эканлиги эди. Кудрат ака ўзбек адабиётини билардигина эмас, унинг гўзаллигини юракларини ҳис қиласарди ва маърузаларида шу ҳисларини бизга ҳим юқтиришга ҳаракат қиласарди. Ўзбек классик адабиёти 8 синфда ўқитиларди – ҳозир баъзан 15 ёшли болаларга классик адабиётни тушуниш қийинлик қиласади, деган гапларни эшитиб қоламан. Мен бунга мутлақо қўшилмайман – ҳамма гап қандай ўқитишда. Ахир биз ўша найтда эшитган ва ўқитилган «Сенсан севарим, хоҳи ишон, хоҳи инонма, қондир жигарим, хоҳи инон, хоҳи инонма», «Ул санамким сув ёқасида паридек ўлтирур,

гояти нозиклигидин сув билан ютса бўлур», «Чархнинг мен кўрмаган дарди балоси қолдиму, хаста кўнглум чекмаган оҳу фифони қолдиму» каби шоҳ сатрларни ҳозиргача ёд биламиз.

Кудрат ака адабиётни ўқитишда қолипдан қочар, ҳар хил чекинишларга йўл қўймас эди. Адабиётда унинг билмагани йўқ эди – биз ҳар қандай саволимизга ундан мукаммал жавоб олардик.

Бу гапларни ўқиган ҳозирги китобхонлар «нима бўпти, дарсини яхши кўрса, пишиқ-пухта тайёрлайдида» деб қўя қолишлари мумкин. Йўқ, азизлар, менимча Кудрат Аҳмедовнинг фазилатлари негизида ётган нарса шу эдик, у тутма педагог эди, унда болаларга нисбатан битмас-туганмас меҳр ва муҳаббат бор эди. Кудрат ака синфдаги ҳар бир боланинг тақдиринг ўз фарзандининг тақдиринг қарагандек муносабатда бўларди. 8-синфга ўтганда мен Ўқидаги педагогик техникумга кетдим – у ерда икки йилда диплом олиб, институтга кириш мумкин бўларкан. Мен бир йил ютмоқчи бўлдим. У ерда ўқий бошладим. Бир ой ўқидим ҳам. Бир куни дарсдан кейин уйга қайтаётсам, Кудрат ака йўлимни пойлаб турган экан. Уйга етиб боргунча бу қилган ишим чакки эканига мени ишонтириди ва мактабга қайтишга ваъда олди. Мен мактабга қайтдим ва етуклик аттестатини 14-мактабда олдим.

Кейин эса жуда кўп ўйладим – мен Кудрат акага кимман? Унга менинг қаерда ўқишимнинг нима аҳамияти бор эди. Нега у орадан бир ой ўтган бўлса-да мени излаб Эски Жувадан Ўқига борди, бир-икки соат вақтини аямай, мени мактабга қайтишга кўндириди? Вақтлар ўтди – мен Кудрат аканинг бу яхшилигини сира уннотлмайман. Кудрат ака кейин катта олим бўлиб етишди, диссертация ёқлади ва Педагогика институтида ишлай бошлади, лекин шунда ҳам бизнинг алоқамиз узилмади.

Менинг улғайишимга катта таъсир кўрсатган или устозларимдан яна бири – Собит ака Комилов эди. 8-синфда ўқиб юрганимизда бирмунча вақт бизда математикадан ўқитувчи бўлмади. Бир куни дарсга қўнироқ чалингандан кейин синфга ўрта бўйли, кулча

юзли, ияги кичикроқ, бурни пучукроқ бир одам кириб келиб, «мен сизларга математикадан дарс бераман» деб ўзини танишиди. Унинг устида уруш йиллари кенг расм бўлган телогрейка, пахтали шим, оёғига кирза этик. Кўриниши жўнгина эди-ю, лекин кўзларида чақнаб турган аллақандай қувлик учқунлари уни жўн деб қабул қилишга йўл қўймас эди. Биз кейин билдик – Собит ақа саккизта боланинг отаси экан, лекин ўшандаги қиёфаси жуда ёш кўринарди. Биз янги ўқитувчига бор ҳунарларимизни кўрсатиб қўймоқчи бўлдик – кўриб турганига қарамай, бир-биrimiz билан бор овозда гаплашишлар, партадан-партага кўчиб ўтишлар бошлиди. Бир оздан кейин латифалар айта бошладик, уларнинг ичидаги бемазалари ҳам кўп эди. Ҳар гал латифа айтилганда бор овозда кулардик ва ўқитувчининг муносабати қандай бўлаётганини билиш учун унга зимдан қараб қўярдик. Биз ўзимизнинг шумлигимиз, беписандлигимиз билан янги муаллимни биринчи кунданоқ қаъириб олмоқчи бўлгандик. Лекин янги ўқитувчи қизиқ одам экан – у бизнинг тўполонимиздан ранжиш ўрнига, жигибийрон бўлиб бақириб-чақириш, ер тениниб, бизни тергаш ўрнига, латифалар айтилганда бизга қўшилиб хохолаб кулар, энг яқин улфатларининг даврасига тушиб қолгандек ўзини жуда эркин ҳис қиласар эди. Бу аҳвол роса бир соат давом этди. Танаффусда унинг «ғалатироқ» эканини муҳокама қилдик. Кейинги дарс ҳам математика эди. Бизнинг бисотимиздаги шумликлару қитмирилклар тугаб қолган эди – энди бу ёғига «Нима қилсан экан?» деб ўйланиб турганимизда, у синфга кириб келди-да, гўё биринчи дарсда ҳеч нарса бўлмагандек, бизнинг оғиз очишимизга ҳам имкон бермасдан, «Қани, дарсни бошлаймизми, йигитлар?» дедида, қўлига бўрни олиб, дарсни бошлаб юборди. Унинг маърузаси жуда мароқли эди. Аслини олганда, бизнинг ўша кунги шумликларимиз янги муаллимга қарши йўналтирилган эмас эди – биз ҳали унинг феъли атворини, қанақа одамлигини билмас эдик, биз математика фанига қарши исён кўтаргандик. Дарҳақиқат, мактабда болаларни математикадан ортиқ қийнамайдиган фан борми? Охир-кети кўринмайдиган рақамлар, рақамлар,

рақамлар... Юракларинг сиқилиб, уларни қўшасан, айирасан, бўласан, кўпайтирасан. Кошки жўнгина рақамлар бўлса. Беш хонали, олти хонали рақамлар, миллионлар, трилионлар. Яна бунинг устига касрлар – оддий касрлар, яна аллақандай файриоддий касрлар. Қаёқдаги масалалар – дараҳтга ўрмалаб чиқаётган, лекин ярми-гача етмай, сирғаниб тушиб кетадиган қумурсқаларми-ей, ҳовузни сувга тўлдирадиган икки хил қувурми-ей, бу шаҳардан чиқсан, нариги шаҳарга қачон етиб бо-риши маълум бўлмаган поездларми-ей... Хуллас, мате-матика фанини бизга ўхшаган шумтакаларни жазолаш учун Худо атайин ўйлаб топган бўлса керак. Ҳарҳолда, биз математикани ёқтиирмас эдик, иложи бўлса, ҳамма математика дарсларидан қочишига тайёр эдик. Аммо янги муаллимнинг маърузаси ажойиб бўляпти-ку – гуё у математика устига тўшаб қўйилган аллақандай пардани кўтариб, бизга математиканинг жуда ажойиб бир дунё эканини очиб кўрсатяпти – бу дунё бениҳоя жозибадор, мароқли, унинг кўчаларига кирган одам шунаقا саргу-заштларни бошидан кечирар эканки, романларда тас-вирланган саргузаштлар уларнинг олдида ил эшолмай қолар экан.

Собит ака болаларни ҳеч уришмас эди, ҳатто уй ишларини бажармай келганларни ҳам доскага чиқа-рарди-да, «Майли, кел, икковимиз биргалашиб масалани ечиб кўрайлик» деб ишга соларди. Бир оздан кейин маълум бўлардики, муаллим масалани ечишда қат-нашаётгани йўқ, у фақат йўлини кўрсатган. Сен эса кечадан бери уриниб тищинг ўтмаган масалани бугун ўзинг ҳал қилганингни кўриб жуда хурсанд бўлиб кетар-динг, ўзингга ўзинг ҳурматинг ошарди, математикага муносабатинг ўзгаради. Хуллас, ҳаш-паш дегунча ян-ги муаллим синфдаги болаларнинг ҳаммасини ашад-дий математикапараст қилиб қўйди. Биз кейин амин бўлдик – бизнинг Собит акамиш шаҳар математиклари ичida энг билагони экан, бу ҳам етмагандай биладиган-ларини жуда қизиқарли қилиб ўкувчиларига етказа олиш санъатига ҳам эга экан.

Уруш пайтлари шароит оғир эди. Ўқитувчиларнинг маоши қанча бўлганини аниқ билмайман-у, лекин у

бола-чақа боқиши, рўзғор тебратиш учун етмаганидан ихши хабарим бор. Буни мен ўша устозимиз Собит ака миссолидан биламан – у куз пайтлари Кўктерак томон-нарга чиқиб кетадиган одати бор эди. Ўша пайтларда Кўктерак ва шунга ўхшаш шаҳар теграсидаги анчагина жойларда шаҳарликларнинг боди бўларди – улар эрта биҳорда у ерга қўчиб бориб, экин-тикин қилишар, турли мевали дараҳтларга қарашар, кузда ҳосилни йигиб олгандан кейин, уйларига қайтишар экан. Буғдойзорда ҳосилни йигиб олгандан кейин ерда бошоқлар қолганийлек, боғларда ҳам, марзаларнинг у ер-бу ерида сибими, лавлагими, шолғомми, турпми дегандек, як-ким-луккам сабзавотлар қолиб кетар экан. Собит ака ана шулардан бир қоп-ярим қоп йигиб келиб, уйда боланиқасининг нафсини қондирар экан. Лекин шунга қаримай, қийналиб кетгани ҳақида, бу адoқсиз машак-қатлир жонига теккани ҳақида бирорта одамга бирор интиборланиш, шикоят деган нарсалар бўлмас эди.

Бінъян бир нарсани ўйлаб қоламан – невараларим қотир мактабда ўқишади – уларнинг ҳаммаси ҳам бир үқув Йилига неча мартараб пул сўрашади, «Нима қиласини пулни?» дейилса, «Устозимизнинг туғилған кунига совғи олгимиз, комиссия келар экан, байрамга дастурхон гувишмоқчи экан, менга конъяк олиб бориш тушди, имтиҳон олдиши пул йигиб беришимиз керак экан» ва ҳисоблаштирилди. Бу иллат, бу тиланчилик, ҳакалак отгани нафсини бўйшлар ҳисобидан қондириш бугун мактабни инчи көн тарқатни. «Нега бундай қиласизлар?» деб оғралсан: «Нима қилийлик, бигъ ҳам тирик жон, маош етмайди», деб жиёвоб беришади. Мен бунақа жавобни ҳитинимли даррагиб бўламан, дарҳол кўз ўнгимга Қудрят оқи ёхуд ярим қони лашаги орқалаб, эгаси кўчиб кетгани боғлардан қайтпётган Собит ака келади. Нима, ушарнинг маоши старли бўлганми? Эҳ, дўсти нодонлар, дегим келади бугунги баъзи ҳаромхўр муаллимларга, ушар кўрган қийинчиликларнинг юздан бирини сизлар Қўраётганинг йўқ-ку! Очлик нима экани етти ухлаб си яларнинг тушингизга кирмаган-ку! Гап маошнинг синимаслигига эмас, гап одамнинг ўзига кучи етмай қолиншида, нафсини тия билмаслигига, қаноат туй-

гусининг йўқолиб кетганида. Ахир, ўша Собит акалар, Кудрат акалар ҳам болалардан у-бу нарсаларни тилансалар, болалар қийналиб бўлса-да, олиб келиб бермасмидилар? Лекин уларнинг бундай қилишлари мумкинлигини мен сира-сира ақлимга сифдира олмайман. Бунга уларнинг орияти, номуси, виждони йўл қўймас эди. Ниҳоят, улар ўз касбларини яхши кўришарди, болаларни яхши кўришарди, уларни виждонизликка, мунофиқликка ўргатишни тасаввур ҳам қила олишмасди.

Улар том маънода фидойи одамлар эди. Албатта, уларнинг ҳам ўзига яраша камчиликлари, қусурлари бўлган бўлиши мумкин. Лекин ўша фидойиликлари қаршиисида, ўзларининг инсоний турурларини юксак ва пок тутишлари қаршиисида бундай қусурлар сезилмай кетар экан. Бугун менда, мен билан бир синфда ўқиган дўстларимда Кудрат Аҳмедовдай, Собит Комиловдай устозлардан ўтган баъзи бир инсоний сифатлар мавжуд бўлса не ажаб! Улар оламдан ўтиб кетишиди, лекин мен ҳозирга қадар бу улуғ инсонларнинг, бизга нафақат адабиёт ёки математикадан, балки одамийликдан ҳам сабоқ берган илк устозларнинг хотираси олдида бош эгишда давом этаман.

2002

## АСПИРАНТУРА САБОҚЛАРИ

Корнелий Люцианович Зелинский аспирантурада ўқиган кезларимда менинг илмий раҳбарим бўлган эди. Илмий раҳбардан менинг умидим катта эди – менинг ўша пайтдаги фўр тасаввурларимга кўра илмий раҳбар шогирдини қўлидан тутиб, илмнинг тор ва қинғир-қийшиқ кўчаларидан олиб ўтиб, катта чароғон ва равон йўлга олиб чиқиб кўймоғи керак эди. Ва бу билан чегараланмай, у шогирдига отадек бўлмоғи, уни туғиштанидек кўриб, турмушнинг ҳамма масалаларида ғамхўрлик билан раҳнамолик қилмоғи керак эди. Лекин биз ота-боладек бўлолмадик. Умуман, ўзаро муносабатларимиз мен ўйлаганчалик тарзда кечмади ва бунга, биринчи навбатда, мен ўзим айбдор эдим.

Кириш имтиҳонларини топшириб бўлгандан кейин менга илмий раҳбар Зелинский бўлишини эълон қилишди. Мен эса бундан мамнун бўлиш ўрнига, «Биз қуёшли Ўзбекистондан келган илмга чанқоқ талабалармиз. Бизга тузукроқ домла берсаларингиз бўларди. Камида Бертельс бўлиши керак домламиз» деган маънода кичикроқ йиғилишда нутқ ирод айладим. Ўта фаросатсизлик ва анойилик билан айтилган бу гапнинг оқибати нима бўлишини ўйламабман ҳам. Бир ҳафта ўтар-ўтмас институтда катта йиғин бўлди ва унда бошланғич партия ташкилотининг котиби Силенко деган ҷанчалиш бир одам ингичка овозда «баъзи бир аспирантларимизнинг бурни ҳалитдан кўтарилиб қолибди. Биз уларнинг «спесини қоқиб қўямиз» деди. Мен «спес» деган сўзни тушунмас эканман. Мажлисдан кейин суриштириб билсан, такаббурлик деган маънони англашар экан. Биринчи мажлисдаёқ бунаقا гап эшитганим қангтиқ алам қилди. Лекин бундан ҳам ёмони шу бўлдики, бу гап бир зумда Зелинскийнинг қулоғига етиб бо-

рибди. Табиийки, у ҳам қаттиқ ранжиган ва шу-шу менга ўта расмий ва совуқ муомала қиласиган бўлиб қолди. Ҳарҳолда, у мени маълум масофагача ўзига яқинлаштирас, лекин орамизда самимий дўстона муносабатлар бўлишига йўл қўймасди. Лекин шунга қарамай, у илмий раҳбар сифатидаги вазифасини ҳалол бажарди – ҳақиқий олимлик қанақа бўлишини менинг онгимга сингдира олди.

Аста-секин мен уни яқинроқдан билиб олдим. Гарчи муносабатларимиз расмийлигича қолган бўлса-да, менинг унга бўлган эҳтиромим ошди. Корнелий Люцианович чиқиб келиши руслашган поляк зодагонларидан бўлиб, юриш-турища, кийинишида, муомалада ва ҳатто гапириш тарзида ҳам зодагонларга хос назокат ва олифталикни сақлаб қолган эди. У инқилобдан олдиноқ олий ўқув юртини битирган, билими пухта, нутқи ҳам, қалами ҳам ўтқир эди. 20-йиллардаёқ адабий фаолиятини бошлаган, қисқа муддатда конструктивистлар гурӯҳининг назариячиларидан бири сифатида танилган эди. Ўша кезлардаёқ у Маяковскийнинг айрим қирраларини ёқтирган ва у билан бир-икки очиқ ижодий баҳсга ҳам киришган эди. Ўз навбатида Маяковский ҳам қайси бир шеърида уни номини айтиб, жуда қаттиқ чандиб ўтганди. Зелинский 30-йиллардаги адабий курашларда ўтни ҳам, сувни ҳам кўрди ва обдан чиниқди. Кейин эса уруш йилларида ўзи ишлаётган илмий-текшириш институти билан у Тошкентта кўчирилди. Бу ерда у «Ал-помиш» тўғрисида, Ҳамид Олимжон ижоди ҳақида маърузалар ўқиди, мақолалар ёзди, баъзи ўзбек ёзувчилари билан дўстлашди. Шу-шу Зелинский миллий адабиётларни яхши биладиган мутахассис сифатида донг чиқарди ва Фанлар академиясининг А. М. Горький номидаги Жаҳон адабиёти институтига келадиган ўзбек аспирантларига уни илмий раҳбар қилиб тайинлайдиган бўлишиди.

– Қани, қандай мавзуда диссертация ёзмоқчисиз? – деб сўради у мендан биринчи сұхбатимиздаёқ. Мен бу гапга ҳайрон бўлдим.

– Билмасам, – дедим мен. – Мавзуни сиз берасизда. Қанақа мавзуда ишлаш менга барি.

Менинг бу гапларимни эшитиб, ўз навбатида у ҳам ҳайрон бўлди.

— Диссертация ёзмоқчи бўлган одам анча пишиб, стилиб қолган бўлмоғи керак. Унинг илмий қизиқиши тоиралари ҳам бир тўхтамга келиб қолган бўлади. Бизга келадиганлар ҳар қанча ёш бўлмасин, ўз мавзулари билан келишади.

Менинг «Ўз мавзуум» йўқ эди. Тўғрисини айтсам, илмий иш тўғрисида тузукроқ тасаввурим ҳам йўқ эди. У кезларда адабиётдан ёқланган диссертациялар ҳам бармоқ билан санаарли, бу иш эндиғина қанот ёзиб бормоқда эди. Шунинг учун мен, ҳатто, кимлар қаерда, қандай мавзуларда иш олиб бораётганидан ҳам бехабар эдим.

Бир-икки кун ўйлаб, бўлажак диссертация мавзуини аниқлагандай бўлдим.

— «Уйғун лирикаси» деган мавзууни ола қолайлик, — дедим мен Зелинскийга кейинги учрашганимизда ва қалилларимни қалаштириб ташладим.

— Майли, бўлди, — деб лоқайдигина рози бўлди раҳбарим. Институтнинг илмий кенгаши бу мавзуни таслиқлади, мавзу темир дафтарга тушди, қонуний тус олди, энди уни ўзгартириб бўлмас эди. Лекин бир ҳафта ўтар-ўтмас, маълум бўлдики, салкам уч йилдан бери Ленинградда айни шу мавзуда Минавар Салаева деган аёл диссертация ёзаётган экан. Унинг иши битиб қолибди, яқин ўртада ёқлар экан (кейинчалик шундай бўлиб ҳам чиқди). Бу гапни раҳбарга айтишим жуда уят ёди. У юзимга айтмаса-да, ичиди албатта: «Э, садқаи аспирант кет-е, ўз адабиётингда нималар бўлаётганини билмайсан-а! Шуни бир ҳафта олдин айтмайсанми?» деб ранжиши турган гап эди. Тасдиқланган мавзууни яна ўзгартириш қийин кечадиган иш эди. Бунинг учун, айниқса, раҳбар илмий кенгаш қаршисида бир неча дақиқа жуда нохуш аҳволни кечирмоғи зарур бўларди. Ноилож, Зелинский мени койишга кўп ҳам ружу қилмай, кенгаш аъзоларининг танбеҳли ва истеҳзоли қараашларига рўпара бўлишни зиммасига олди. Илмий кенгаш ғаши келиб, ёнсаси қотган бўлса-да, «Урушдан кейинги ўзбек лирикаси» деб янги мавзууни тасдиқлаб берди.

Аспирантликнинг дастлабки даврида ана шундай,

уста кўрмаган шогирддай ҳар мақомга йўргалай-йўргалай, баъзи бир илмий ҳақиқатларни «кашф» қилдим. Жумладан, ҳар қандай диссертация кириш ва хотимадан қатъи назар, уч бобдан иборат бўлмоғи керак экан. Нега икки ёки тўрт боб эмас-у, айнан уч боб, ким буни белгилаган — маълум эмасди. Лекин таомилга қараб иш қиласангиз бўлмайди. Ўтириб дарҳол иш режасини тузиб чиқдим: биринчи боб — меҳнат мавзунинг куйланиши, иккичиси — муҳаббат мавзуи, учинчиси ватан мавзуи бўлди. Раҳбарга югурдим. У ёзганларимга бепарво кўз югуртириди-да, «бўпти ишлайверинг» деб фотиха берди.

Мен ишга киришдим ва бир ой ўтар-ўтмас биринчи бобни тугатиб, машинкалатиб раҳбарнинг қўлига тутқаздим ва унинг нима дейишини сабрсизлик билан кута бошладим. Бир ҳафталардан кейин, у яна аввалгида, лоқайдгина оҳангда: «Бўлади, ишлайверинг», — деди. Бу жуда катта ғалаба эди! Мен шапкамни осмонга отиб хурсанд бўлишим, уч-тўрт кун узлуксиз байрам қилиш имумкин эди. Лекин негадир кўнгил хира, кутилган байрам кайфияти йўқ эди.

Мен ишни давом эттиришга ўтирдим. Лекин аввалги кўтаринки кайфиятдан асар ҳам йўқ, ёзишдаги енгиллик аллақаёққа ғойиб бўлган эди. Кун бўйи қимир этмай ўтириб «ишлайман» — лекин ишда мутлақо унум йўқ — бор-йўғи ярим бет, жуда ёрлақаса, бир бет ёзилади. Лекин ўша ҳам йиртиб ташлашдан бошқага ярамайди. Иш унмагандан кейин яна кайфият бузилади, турли-туман шубҳа-гумонлар юракни ўргай бошлайди. Баъзи ўртоқларим аҳволимни кўриб, «ижодий изланиш босқичига кирибсан» деб қўйишидаи. Ичимда эса чироқ ёқса ёришмайди. Мен аспирантлар ётоғида туардим. Мамлакатнинг ҳар бурчидан келган ҳар хил ёшдаги эркаклар ва аёллар. Уларнинг ҳеч қайсиси менга ўхшаб ишининг бир бобини бир ойда ёзив битиргани йўқ. Уларнинг ҳаммаси бирдай диссертация ёзишининг қийинлигидан, иши юришмаётганидан, муддати яқинлаб қолганидан зорланади. Мен эса ёзив топширдим. Бир оз ҳафсала қилсан, қолганини ҳам битириб ташлайман. Лекин бу нимаси? Енимдаги юзлаб аспирантлар ношуд-у, ёлғиз менгина шунаقا «доно»манми? Бунинг устига домламга бериб қўйган «битган» ишдан ҳам унча кўнглим тўлгани

Йўқ. Айниқса, ишни бизнинг сектордаги аспирантлардан бири – украин адабиётидан мутахассис, жуда билимдоп, зукко аёл Нина Степановна Надъярних ўқиб чиққиндан кейин шубҳаларим яна ҳам ортди. «Раҳбаринг шега «бўлади» деганини билмадим-у, бу ҳали ҳимояга ярамайди» деди у ишнинг бир вариантини қўлимга қийтарар экан. Унинг айтган ҳамма фикрлари жуда жўяли эди. Мен ўзим ҳам илмий ишнинг бунаقا бўлмаслигини, баландпарвоз гаплар, қуруқ олиб қочишлар билан бирга самараға эришиб бўлмаслигини англай бошлаган эдим. Аммо ноумид шайтон, домлам, ахир, ғиганларимни «бўлади» деган-ку! Тўғри, у ўқимасдан, шунчаки ишни варактаб чиқиб шундай деган, эҳтимол, ўқиб чиққандан кейин ҳам шу фикрида қолар. Ниҳоят, домлам ишни ўқиб чиқди ва қайси бир кунга мени инситутга чақирди. Мен бу кунни жуда интизорлик билан юриқиб кутмоқда эдим – домланинг баҳоси қандай бўлишидан қатъи назар, ишим ё у ёқлиқ, ё бу ёқлиқ бўлади-ку, ҳамма изтироблардан, гумонлардан, ўзимни кемиришларимдан қутуламан-ку! Домла билан сұхбатимиз камида уч соат давом этди-ёв. Домла ишни шу қадар синчиклаб ўқибдики, асти қўяверасиз. 120 бетлик матнинг ҳар саҳифасида камида иккита-учта муроҳаза қайд қилинган. Ҳошиядаги бу фикрлар рўйиност айтилган ва, афсуски, уларнинг деярли ҳаммаси иччиқ танбехлардан ва танқидлардан иборат эди: «Чепнуха», «Бемаъни гап», «Мақтандоқлик», «Бу фикр хато», «Мантиқ қани?» каби фикр-муроҳазалар японнинг аскаридаи қатор-қатор эди.

Сўник руҳим узил-кесил сўнди, бошим эгилди. Аспирантлик ишим барбод бўлган эди, бу яқин ўртада ҳимоя қилиш тўғрисида гап ҳам бўлиши мумкин эмас ўди. Мен учун қора кунлар бошланди. Ҳадемай аспирантлар аттестацияси бўлиши керак. Муддат тугашига бор-йўғи олти ой қолган. Диссертация йўқ. Тантана билан кавушимни Тошкентга тўғрилаб қўйишлари турган гап: Қайси юз билан Тошкентга қайтаман? Мени кутаётган оила аъзоларимга, қариндош-уругларимга, ёру биродарларимга нима дейман? Сувратим ялтироқ бўлса ҳам, сийратим қалтироқ экан дейманми?

Яна изтиробли кунлар, уйқусиз тунлар, руҳий азоб-

лар бошланди. Аммо вақт ҳар қанча шафқатсиз бўлмасин, унинг шифобахш томонлари ҳам бор – беш-олти кун ичида аста-секин одам ўзига кела бошлайди ва ҳар қандай мушкулликни бошидан кечирган бўлмасин, унинг олдида яна ўша эски ва мангу масала кўндаланг бўлади. «Нима қилмоқ керак?» Мен ҳам бу саволга жавоб излай бошладим ва домланинг ўша кунги бир гапини эсладим: «Ишингизнинг сўнгти йигирма бетида бир оз жон бор кўринади. Тил ва услуб масалаларига бағишиланган. Шунга бир уриниб кўринг!» Дастлабки карахтиликдан кейин бир оз ўзимга келгач, домланинг шу гапини ўйлай бошладим. Аммо кўп ўйлашга сира вақт йўқ – аттестация куни яқинлашиб келяпти, бирон нарса қилмаса бўлмайди. Яна шошилинч равишда ишга киришдим. Иш юришгандай бўлди. «Урушдан кейинги ўзбек поэмаларининг тили ва услуби» деган мавзуда 60–70 саҳифалик ишни битириб, аспирант дўстларимга кўрсатдим. Улар ишни маъқул қилишди. Ниҳоят, аттестация куни келди. Аспирантлик муҳлати тугашига тўрт ой қолган, бу – сўнгти аттестация. Айтишим керакки, «миллий адабиётлар сектори» деб аталмиш бизнинг бўлим зоҳиран қараганда бир-бирига унча қувушмагандек кўринса-да, аслида инсофли, ҳалол, одамшавандга ва дилкаш инсонлардан таркиб топган эди. Сектор раҳбари Михаил Кузьмич Добринин, катта иммий ходимлар Михаил Иванович Ритман-Фетисов, Мадина Искандаровна Богданова ва бошқалар нафақат яхши олимлар, балки оҳори одамлар ҳам эди. Улар икки-уч йил давомида сектор аспирантларига ҳам жуда қадрдон ва меҳрибон бўлиб қолишган эди. Шунинг учун диссертацияни тугатиб, столга қўймаганим мени аспирантурадан муддатидан олдин ҳайдаш учун тўла асос берса-да, аввалги ишларимни ҳисобга олишдими ёхуд қаттиқ раҳм қилишдими, ҳарҳолда муайян шартлар билан аттестациядан ўтказишли, домламга менга ёрдам бериш зарурлигини алоҳида уқтириши, аспирант дўстларим мен учун кафил бўлишди. Хуллас, яна қайноқ кунлар бошланди. Одатда одамлар иморат курса, ишни пойдеворидан бошлашади. Буни қарангки, диссертация ишларида буткул бунинг тескариси ҳам бўлмоғи мумкин экан. Менинг ишим шунаقا бўлди – ишни иморатнинг

томидан бошладик – аввал учинчи боб битди, кейин биринчи, иккинчи боблар ёзилди. Мавзу ҳам бутунлай ингиланди: энди иш урушдан кейинги ўзбек поэма-ларига бағишенган эди. Диссертациямни яхши ишлар қаторига кирита олмасам ҳам, аввалги ишларимдан тублан фарқ қилишини айтмасам бўлмас. Ҳарҳолда, Зелинскийнинг аччиқ сабоқлари бекор кетмаган эди, аввалги гумону шубҳалар ортда қолиб, ҳақиқий илмий тадқиқот йўлида дастлабки атак-чечак қадамларни қўйишга бошлаган эдим. Бу орада муддатидан кечикиб бўлса-да, диссертация тайёр бўлди, секторда муҳокамадан ўтди, ҳимояга тавсия қилинди. Декабрь ойларига бориб; ҳужжатларни ҳам, диссертациянинг ўзини ҳам ҳимояга мутлақо тайёр аҳволга келтириб қўйдим.

Бу орада домла билан муносабатимиз ҳам анча ўзгариб қолди. Корнелий Люцианович менга анча меҳрибонроқ бўлиб қолди, ҳол-аҳволимни сўраб-суриншириб турди, тез-тез уйига чақира бошлади. У Беговая қўчасида икки хоналик квартирада туар эди. Ётоги ҳам, меҳмонхонаси ҳам, емакхонаси билан иш кабинети ҳам шу икки хонанинг ичиди эди. Бунинг устига хоналарда буюм кўп, ийниқса, ҳаммаёқни китоб жавонлари эгаллаб олган эди. Хоналарнинг торлигини кўриб, менинг юрагим сиқилиб кетарди. Лекин Москва шароитида икки хоналик алоҳида квартирага эга бўлиш ҳаммага ҳам насиб бўлавермасди. Шаҳарда туар-жой масаласида жуда катта қаҳатчилик бор бўлиб, кўпчилик коммунал квартиralарда туар эди, яъни квартирадаги ҳар бир хонада 5 киши ёки ундан ортиқроқ одам яшар, улар умумий ошхонадан, умумий ваннадан, умумий ҳожатхонадан фойдаланишар, уйларига бир ишқдан кириб чиқишарди. Бу эса узлуксиз жанжаллар, гилашиб-тортишишлар, можароларни туғлирар эди. Зелинскийнинг Мичуринец деган шаҳарчада дала ҳовлиси ҳим бор эди – ўрмоннинг ичиди, жуда манзарали ва биҳаво жойда жойлашган эди. У ёшгина хотини ва бир кичик ўғли билан яшар, лекин олдига ёзувчилар тез-тез келиб туарди. У ҳатто бир гал мени Всееволод Иванов исган атоқли адид билан ҳам танишириб қўйган эди.

Зелинский бўш вақтларида ҳар хил антиқа ўйинчоқлар ясаш билан шуғулланарди. Жумладан, у елканли кеманинг макетини ясар эди. Кўпинча улар катта-кичик

елканлар, кўп чиройли ҳарбий кемалар бўларди. Уларни ясаб бўлгандан кейин зўр маҳорат билан уни оддий бир шишанинг ичига жойлаб қўярди. Ҳамма елканларига шамолни тўлдириб олға елаётган кемани ярим литрик шиша ичига қандай қамалганига ақл бовар қилмай лол қолардингиз. Шу кезларда, умуман, Зелинскийнинг кайфияти анча кўтаринки бўлиб қолди. Ҳарҳолда, урушдан кейинги йилларда у қандай тазиқлар ва таъқибларга учраганини билмайман-у, ҳар қалай мақолалари ва китоблари чиқмай қолган эди. Фақат 50-йиллардангина унинг асарлари босила бошлади. Жумладан, унинг Александр Фадеев ва Жамбул ҳақидаги иккита танқидий-биографик очерки эълон қилинди, кейинчалик миллий адабиётлар ривожига доир иккита катта монографияси босилди. Москванинг қалин журнallарида адабиётнинг долзарб масалаларига бағишлиланган мақолалари чиқа бошлади. Сал кейинроқ эса у Сергей Есениннинг беш жилдлик асарларини нашрга тайёрлади ва бу буюк шоир тўғрисида хотиралар аралаш яхши бир мақола ёзи. Эҳтимол, шу ижодий кўтаринкилик туфайли унинг умумий кайфияти ҳам яхшиланган бўлиши мумкин. Ҳарҳолда, шу йилларда у катта ижодий фаоллик билан иш юритди. Унинг анча ёшга борган котибаси бор эди. Бу котибага маошни Зелинскийнинг ўзи тўлармиди ёки институт ёхуд Ёзувчилар уюшмаси тўлармиди – билмайман. Лекин бир-икки кўрганим бор – Зелинский хона ичida у ён бу ён юриб туриб ёки китоб жавони олдидаги юмшоқ ўринидигида ўрнашиб ўтириб, диктовка қилар, котиба стенография усулида унинг айтганларини ёзиб оларди. Кейин уларни машинкадан чиқариб олиб келиб беради ва муаллиф бир қур кўздан ўтказиб, тегишли жойларга юборади.

Зелинский бу мени қийнамади, аввалгидай бир йилга чўзмай, фикр-мулоҳазасини тезгина бера қолди ва диссертация ҳимояга тавсия қилингач, биринчи бўлиб мени табриклади-да: «Мана энди бир неча муддат дам олиб, ўйнаб юра туинг, ҳимоя қиласиганлар кўп, сизнинг навбатингиз икки-уч ойсиз келмас», – деди.

Лекин домла айтгандай, ўйнаб-кулишга тўғри келмади. Гап шундаки, менинг муҳлатим 1954 йилнинг

1 октябрида тамом бўлганди. Яъни, шу кундан эътиборан, мен стипендия олмай қўйгандим. Босиб қўйган шулим ҳам йўқ. Уйдан ёрдам қилиб туришади-ю, лекин бу ёрдам тирикчиликка етмайди. Бунинг устига столни ҳам бўшатиб бериш керак. Хуллас, ўйнаб-кулиб, ҳордиқ чиқариш ўрнига яна елиб-югуриб тирикчилик аравасини судрамоқ керак. Бу гал ҳам дўстлар жонга ора киришди. Ёзувчилар уюшмасида ишлайдиган дўстим Пиримқул Қодиров аҳволимдан хабардор бўлгани учун менга жуда катта ёрдам берди. Москвада нима кўп – нашриёт кўп. Шулардан бири Абдураҳмонов таҳрири остида 50 минг сўзлик русча-ўзбекча луғат чиқармоқда экан. Иш жараёнида тайёр материални тақриздан ўтказмоқ талаб қилинар экан. Улар ёрдам сўраб, ёзувчилар уюшмасига мурожаат қилишган, Пиримқул мени тавсия қилган. Таҳририятдагилар аввалига менга ишон-қирамай қарашди, бироқ дастлабки тақризлардан кейинроқ орамизда ҳеч қандай губор қолмади. Мен луғатнинг ярмидан кўпрогига тақриз ёздим. Олган қалам ҳақим Москвада ҳимояга қадар бир амаллаб яшашимга имкон берди.

Ниҳоят, ҳимоя куни белгиланди – бу тўғридаги эълон ўша пайтдаги қоидага кўра «Вечерняя Москва» газетасида чиқмоғи керак. Ҳимоя 29 апрель куни бўлмоғи керак эди, мен 2 май кунига поездга билет олдим.

Одатда, ҳимоя қиласидаги диссертациялари учун ҳар хил ташкилотлардан фикр-мулоҳазалар тўплашади. ВАК<sup>1</sup> учун улар мутлақо зарур эмас, шундай бўлса-да, диссертантлар бу борада ким ўзарга пойга ўйнашади. Менинг диссертациямга бир дона ҳам отзыв (фикр-мулоҳаза ёхуд тақриз) келгани йўқ. Ишда фақат илмий раҳбар билан биринчи ва иккинчи оппонентларнинг тақризларигина бўлган, холос. Лекин гал бунда эмас. Бошқа бир жиҳатдан ҳимоям жуда гаройиб бўлди.

Одатта кўра ҳимояга битта докторлик ва битта кан-дидатлик диссертацияси қўйилар эди. Ўша куни кимнингдир (афсуски, фамилияси хотирамдан кўтарилилган) фольклор бўйича докторлик диссертацияси қўйилган

<sup>1</sup> ВАК – Олий аттестация комиссияси (муҳаррир изоҳи).

экан. Ўша докторантнинг Ленинградда мухолифлари сероб экан. Эринмаганлар «сўнгги жанг»ни ўтказмоқ учун уч кишими-тўрт киши бўлиб Ленинграддан атайин етиб келишибди.

Ҳимоя белгиланган вақтда – соат 12 да бошланди. Аввал диссертант сўзлади, кейин унинг ҳужжатлари, келган тақризлар билан таниширилди, учта расмий оппонент роса тўйиб гапириши, ана шундан кейин ҳақиқий жанг бошланди. Ленинградликлар битта-битта минбарга кўтарилиб, чунонам гапирдиларки, қўяверасиз. Улар диссертациянинг чангини қоқиб, роса аврастарини ағдариши, ишдан бирор саҳифа соғ жойи қолмади; шундан кейин диссертант ва унинг тарафдорлари ленинградликларни дабдала қилишди. Улар тутагандан кейин ленинградликлар қайтадан минбарга чиқа бошлади. Қизиқ, ҳимояда регламент деган гап бўлмас экан, худди Америка парламентидагидек минбарга чиқиб олган одам кўнглига сикқанича ёки йиқилиб қолмагунча гапираверар экан. Албатта, бошқа бирон жойда ва бошқа бирон вақтда бўлса, буларнииг бари foятда қизиқарли ва марокли бўлиши, бирон томошаталаб роса мириқиб томоша қилиши мумкин эди. Аммо мен худди игна устида ўтиргандек эдим. Биринчи оппонентим профессор Насилов бу жанг бошланиши биланоқ, «зарур бўлганда чақиарсизлар» дедиую уйига жўнаворди. Залга қарасам, Илмий кенгаш аъзоларининг сафи ҳам анча сийраклашиб қолибди. «Кворум бўлмай қолмаса гўрга эди», – деб юрагимни ҳовучлайман. Соатга қарасам, 5 дан ошибди. Биринчи ҳимоянинг охири ҳали кўринмайди. Шу пайт Зелинский яккам-дуккам томошабинлар орасидан мени топди-да, имлаб ташқарига чақирди.

– Ҳимоянгиз қоладиган бўлди, – деди у, – кўриб турибсиз, кенгаш аъзолари бунақа синовга чидаёлмайди.

Юрагим орқага тортиб кетди – яна ўн беш кун кутиш керак, яна газетадаги эълонларни янгилаш керак, яна оппонентларнинг эшиги олдида сарғайиш керак. Энг муҳими шуки, ўн беш кун туришга бир тийин пул қолмаган. Хуллас, бор дардимни домлага тўкиб солдим.

– Раҳмат, Корнелий Люцианович, – дедим унга. –

Шу йиллар давомида менга кўп яхшиликлар қилдингиз, меҳр кўрсатдингиз. Яна бир марта – охирги яхшилигингизни аямант. Мен етти ойдан бери стипендия олмайман. Икки-уч кунлаб туз totmagan кунларим ҳам бўлди. Уйни, бола-чақаларни жуда соғиндим. Мана билет, – чўнтағимдан темир йўл чиптасини олиб кўрсатдим. – Ҳимоя қилсан ҳам, қилмасам ҳам 2 май куни кетаман. Ортиқ чидаёлмайман. Ҳимоя шу бугун бўлсин – менга қилган оталигингиз шу бўлади.

– Майли, Кенгаш раиси билан бир гаплашиб кўрай, – деди Зелинский.

Мажлислар залига қайтиб кирдик. Домлам ҳайъатга бориб, раис билан нималарни дир гаплашди, кейин «масала ҳал» деган маънода узоқдан менга бош иргади. Мен бир оз тинчлангандай бўлдим. Бироқ залда кворум йўқ эди, яъни ҳимоя учун овоз берадиган 15 киши йўқ. Илмий кенгаш аъзоларидан фақат 7–8 кишигина қолган эди.

Ниҳоят, соат 6 да менинг ҳимоям бошланди. Мен 15–20 минут ўрнига роса 5 минут гапирдим. Зудлик билан уйидан олиб келинган Насилов ҳам тақризни ўқиб бориб, уйига жўнаб қолди. Иккинчи оппонентим Зоя Григорьевна Османова ҳам гапни қисқа қилди. Ниҳоят, музокаралар тўхтади. Оппонентлардан бошқа ҳеч ким гапирмади ҳам, биронта тақриз ўқилмади ҳам. Ҳисоб комиссияси тузилди. Овоз бериш ва овозларни санаш учун танаффус эълон қилинди. Қандоқ бўларкин, ахир, кворум йўқ-ку? Кенгаш аъзоларининг деярлик ҳаммаси аллақачон уйларига кетиб бўлган. Ниҳоят, ҳисоб комиссияси натижани эълон қилди: 15 кишидан 14 таси менга илмий даража беришни ёқлаб овоз берибди, битта бюллетенъ бузилибди. Ниҳоят, Москвадаги салқам тўрт йиллик мусофирилик ҳаётим тугади, ниҳоят мақсадга эришдим – мен фан номзоди. Умримдаги энг толикарли ва энг узун куни ниҳоясига етди.

Мен Тошкентга қайтгандан кейин ҳам Зелинский билан алоқани узмадим. Негаки, менинг бугунги балоғатимда бу одамнинг улуғ хизмати бор!

## ФАН ГЎЗАЛЛИК ҲИССИ БИЛАН ТИРИК

Академик Тўрабек ДОЛИМОВ билан профессор Озод ШАРАФИДДИНОВ сұхбати

**Озод ШАРАФИДДИНОВ:** — Мұхтарам Тўрабек Нўймонович, сиз билан Ўзбекистон илм-фанининг ривожланиш йўллари, истиқболи тўғрисида сұхбатлашишини кўпдан буён орзу қиласр эдик. Бугун шундай сұхбатга катта зарурият бор. Мана, республикамиз мустақил бўлди. Бу йил унинг беш йиллигини нишонлаймиз. Ватанимиз мустақил давлат сифатида янги ривожланиш йўлига киряпти, янги жамият қуриш сари боряпмиз. Бу жамият бозор муносабатларига, бозор иқтисодиётига асосланган демократик жамият бўлиши аниқ. Бу жамиятда илм-фанинг аҳамияти, ўрни қандай бўлади? Умуман, бундай саволнинг ўзи сал ноўриндай туолади. Негаки, жавоб ўз-ўзидан маълум: фан ҳеч бир замонда кераксиз, ортиқча нарсага айланиб қолган эмас. Лекин бизда дастлабки йилларда фанга, илмга нисбатан, тъбیر жоиз бўлса, эътиборсизроқдек муносабат кишини бир оз хавотирга солди. Чунончи, китоблар, илмий асарларни чоп этиш камайиб кетгани, мавзуларнинг қисқаргани... Бозор иқтисодиёти шароитида шундай бўлиши табиий — ҳар ким ўз аравасини ўзи тортиши, ўз тирикчилигини ўзи эплаши лозим. Жумладан, илм-фан ҳам. Мен шу ўринда бир нарсани мамнуният билан айтишим керак, сўнгги пайтда Президентимиз Ислом Каримов катта анжуманларда, олимлар билан бўлган учрашувларда илм-фани, айниқса, фундаментал фанларни ривожлантирмасдан туриб янги жамият қуриш, бозор иқтисодиёти муносабатларини тўлиқ шакллантириш мумкин эмаслигини жуда қатъий таъкидламоқда ва бу борада ҳукуматимиз зарур чора-тадбирларни ҳам

кўрмоқда. Бу ҳол, шубҳасиз, одамни хурсанд қилади. Сиз бозор иқтисодиёти шароитида илм-фанини қандай тасаввур этасиз?

**Тўрабек ДОЛИМОВ:** — Озод ака, мустақилликка эндиғина беш йил тўлаётганига қарамай, фанимизда анча ўзгаришлар юз берди. Албатта, бозор иқтисодиётининг ўзига хос хусусиятлари бор.

**Биринчидан,** у — фуқароларимиз, илмий ходимларимиз ва институтларимиз учун катта синов. Илгари рақобат деган гап йўқ эди. Бозор иқтисодиётининг энг зўр (у бизга ёқадими-ёқмайдими, бари бир) механизмларидан бири ана шу. Рақобат воситасида кучли, яхши, долзарб илмий ишланмалар сақлаб қолинади. Илгари долзарб ҳисобланган кўп мавзулар бугун ҳеч кимга керак бўлмай қолди. Табиийки, улардан воз кечишимиз зарур. Бу объектив ҳодиса ва албатта, қийин кечадиган жараён. Аммо ҳёт тақозоси шуки, энди янги, Ваганимизга керак бўлган, унинг устун йўналишларини тараққий эттиришга ёрдам берадиган мавзулар бўйича ишлашимиз лозим.

**Иккинчидан,** кейинги етмиш йиллик давр мобайнida бизда илмий йўналишлар ниҳоятда кўпайиб кетган эди. Фанининг бирор соҳаси йўқки, унга доир йўналиш Ўзбекистонда бўлмаса. Назарий физика дайсизми, қишлоқ хўжалигими — барчаси бўйича алоҳида соҳалар мавжуд. Аммо бугунги кунда шу йўналишлардан энг керак, энг долзарб ва фанимизни дунё миқёсига кўтара оладиган тармоқларигина сақлаб қолиниши зарур. Мана, бир мисол. Ўзбекистон олимларининг пахта нави бўйича қилаётган тадқиқотлари дунёда ғоят юксак қадрланади. Бунинг исботига бир далил келтирай. Дорилфунуннинг академик Жўра Мусаев раҳбарлик қилаётган пахта генетикиси кафедрасида Ҳиндистондан келган илмий ходимлар докторлик тадқиқотини ёқлаб кетмоқдалар. Бу тажрибаларни АҚШ, Ҳиндистон ва бошқа мамлакатларнинг олимлари қўллаб-қувватламоқда. Демак, биринчи галда мана шундай йўналишлар ривожланиши керак. Илгари эса биз уларнинг барчасига бир хилда қарап эдик, бир хилда маблағ ажратиларди. Бир хилда синовхоналар очилар ва бир хилда ускуна берилар эди. Буни биз тенглик дердик, унинг яхши самара беришига ишонар эдик.

**Учинчидан**, бозор иқтисодиёти шароитида амалий ишларга муносабат ўзгари. Илгари биз амалий ишларни бажаардик-да, синовхона регламентини тайёрлаб, ускуна ҳозирлаб, уларнинг ишлаб чиқаришга қандай татбиқ этилишига айтарли аҳамият бермас эдик. Албатта, бу масала қандай ҳал этилгани сўралар эди, аммо унинг натижаси ҳеч кимга керак бўлмаслигини ҳаммамиз яхши тушунар эдик. Энди бу жаравон охиригача бориши керак. Амалий иш бўлганидан кейин у синовхонадан чиқиб далага қандай етиб боради, қанча фойда келтиради, умуман, қўлласа бўладими-йўқми — барчаси аниқ бўлиши лозим. Масалан, дейлик, бугун республикамизда хлор топиш муаммо бўлиб қолди. Аниқроғи, у жуда кам. Лекин ҳаммага керак. Айниқса, экологиямиз учун зарур. Тўғри, хлорли моддалар ниҳоятда кўп. Уни синовхонада яратиш йўли ўзлаштириб олинган, аммо сувни қандай тозалаш керак? Бунинг учун қанча маблағ кетади? Буниси аниқ эмас. Шу боис биздан ҳар бир модданинг солиштирма оғирлигини аниқлаш талаб қилинади. Мана шуларнинг ҳаммаси кўшилиб айрим қийинчиликларни түғдиряпти.

Ҳозирги шароитнинг яна бир хусусияти шундан иборатки (уни сиз жуда яхши таъкидлаб ўтдингиз), фандаги фундаментал, менинг фикримча, энг асосий йўналишлар, яъни биринчи навбатда ривожлантирмасдан туриб олдинга силжиб бўлмайдиган тармоқлар қисқаргани йўқ. Аксинча, уларга дахлдор янги йўналишлар пайдо бўлди.

Шу пайтга қадар республикамизда ижтимоёт (социология), сиёsatшунослик; табиий фанларда микроминералогия, геодинамика каби соҳалар яхши ривожланмаган эди. Аммо улар юртимиз учун зарурлиги сабабли бу соҳаларга оид бир талай янги ташкилотлар пайдо бўлди. Чунончи, стратегик тадқиқотлар институти, бир неча социология лабораториялари, социология ёки сиёsatшунослик марказлари майдонга келди ва фанда умрини ўтаб бўлган йўналишларнинг ўрнини эгаллади.

Шу ўринда шахсий бир фикрни айтиб ўтмоқчиман. Биз илгари жуда кўп илмий йўналишларни ривожлантириб юборганимиз, уларнинг тармоғи ҳам, сони ҳам ҳаддан зиёд эди. Ҳар битта вазирлик, корхона, академия

таркибида беҳисоб муассасалар, институтлар бўларди. Беш йил мобайнида уларнинг аксарияти бирлаштирилди. Табиийки, яхшилари, самарадорроқлари саклаб қолиниши керак. Баъзи заифроқ, аҳамиятсизроқ йўналишлар ўз-ўзидан четга сурилиб қолмоқда. Шунинг учун ҳам, баъзан, бизнинг назаримизда, одамлар фандан кетиб қолаётганга ўхшайди. Шундай жараён чиндан ҳам бор. Фан фидойиси бўлмаган, қийинчиликка чидай олмаган кишилар ишини топиб кетмоқда. Тўғри тушунинг, бундай «мутахассис» ва «олим»ларга халақит бермаслигимиз керак. Албатта, бу жараён енгил кечмайди. Аммо у бўлиши зарур, объектив жараёндир. Бир мисол келтираман. Дунёда бир неча минг фундаментал фан йўналиши бор. Ўзбекистонда эса шулардан 70–80 фоизи мавжуд. Биз кўпинча кичик бир иш қиласак ҳам, фундаментал тадқиқот деб юрар эдик. Яъни ўша мўътабар тушунчани ҳам анча саёзлаштириб қўйган эдик. Ҳуллас, бозор иқтисодиёти даврида фан, албатта, ривожланади, унинг янги соҳалари пайдо бўлади ва пайдо бўлмоқда. Масалан, маркетинг, менежмент, давлат бошқаруви. Булар биз учун янги фан, янги соҳа бўлиб, энди оёққа туриб келмоқда. Биз илгари иқтисодиётни фақат сиёсий ва хўжалик иқтисодиётидан иборат, деб билар эдик. Бугунги кунда кредит, молия, баҳони тақсимлаш, макроэкономика, микроэкономика соҳалари таркиб топиб, иқтисод фанининг гуркираб ривожланишига асос бўлмоқда. Бинобарин, хавотирга ўрин йўқ, чунки эскисига қараганда самаралироқ янги тармоқлар тараққий этиши табиийдир. Бунинг тасдиги ўлароқ яна бир мисолни ёслашимиз мумкин. Фанлар академиясининг умумий мажлисида республикамиз Президенти Ислом Каримов «Академия фондига»ни ташкил этиш таклифини айтди ва тез фурсатда шундай жамғармага асос солинди. Ҳозир унинг иши анча кўзга кўриниб қолди. Лекин ундан пул олишнинг ўзи бўлмайди.

Илгари биз маблагни қандай олар эдик? Мавзуни ўзимиз белгилаб тадқиқот юритар ва у ҳақда ҳисобот ёзардик, сўнг шунга яраша маблағ олиб ғазнамизга қўйиб қўяр эдик. Бугун ундай эмас. Энди кўпроқ иш натижаси муҳим. Фундаментал фанми, амалий ишми, баридан

бир, энг аввало, натижа зарур. Усиз силжиш бўлмайди. Яна ижтимоий йўналишдаги бир талай фанлар, хусусан, адабиётшунослик, психология, тарих каби илм тармоқлари мавжудки, улар учун, Президентимиз айтганидек, биринчи навбатда давлат ва ҳар хил жамғармалар маблағ ажратади, қўллаб-кувватлади. Шу боис, уларнинг ривожидан ҳам ташвишланишга ҳожат йўқ.

**О. Ш.** — Академия жамғармасини тилга олдингиз. Албатта, у фанга жуда катта мадад беради. Лекин чет элда бу борада бошқача йўллар ҳам топиляпти, шекилли? Мен бу ўринда ўқиганларимга асосланиб гапираман. Масалан, Рокфеллерники сингари компаниялар қошида лабораториялар, ҳатто институтлар ташкил қилинган. Компания уларга мавзуулар белгилаб, тадқиқ эттиради ҳамда барчаси учун зарур маблағ ажратади. Бизда ҳам энди шундай тажрибалар қўлланса, яъни фақат жамғармаларга, ҳозир кенг урф бўлиб кетган ҳоммийларга қараб қолинмаса керак? Бевосита ишлаб чиқариш эҳтиёжига яраша ишлайдиган, мазкур эҳтиёждан келиб чиқиб, ўшаларнинг маблағи билан фаолият юритадиган, уларнинг манфаатини кўзда тутадиган фан йўналишлари ҳам ривожланиши мумкинмикан?..

**Т. Д.** — Бу масала бозор иқтисодиёти даврида фанни бошқариш муаммосига бориб тақалади. Умумий муаммо шу. Албатта, бозор иқтисодиёти шароитида мана шунақа ташкилотлар, йўналишлар муҳим ўрин тута бошлайди. Бу гап, айниқса, амалий фанга тегишли. Бу борада республикада бир талай яхши тажрибалар юз кўрсатмоқда. Чунончи, ҳозир нефть ва газ корпорацияси ўзининг иккита маҳсус институтига эга. Улар Нефть геологияси институти ва Лойиҳалаш институти деб аталади. Илгари бу институтлар бутун собиқ Иттифоққа хизмат қилган бўлса, энди фақат Ўзбекистоннинг нефть саноатини ривожлантириш, нефть конларини қайтадан ўрганиш ва ёқилғи саноати истиқболларини аниқлаб бериш билан шуғулланмоқда. Охирги икки-уч йил ичida бу институтлар жадал ривожланмоқда. Корпорациянинг, демакки, республиканинг манфаатларидан келиб чиқилган ҳолда мазкур институтлардаги мавзуулар йўналиши ҳам жиддий ўзгаришларга учради. Масалан, уларнинг мавзуу режаларидан Мингбулоқ, Кўкдумалоқ, жанубий ва гар-

бий Ўзбекистондаги нефть истиқболини ўрганиш масалалари муҳим ўрин эгаллаб, уларни тадқиқ этиш натижасида аксарият конлар тўрт-беш минг метр чукурликда жойлашгани аниқланди; конларнинг умумий ҳажми қанча, улардан қанча маҳсулот чиқиши мумкин, деган масалаларга аввалги замонлардагидек умумий тарзда эмас, балки аниқ ёндашишга уринишлар бўлди. Бу масалалар юзасидан жуда аниқ ҳисоб-китоб қилинган, исботланган лойиҳалар тайёрланди. Президентимиз айтган республикамиз нефть мустақиллигини таъминлаш ишига бу институтлар қўшган улуш жуда каттадир. Бундан ташқари, Ўзбекистонда бир талай бошқа жамғармалар ташкил қилинган. Мен бу иш билан бир оз шуғулланганим учун шуни айта оламанки, ҳозир жамғармалар кўпайиб боряпти, лекин уларнинг орасида қурдатлилари кам. Қурдатли жамғармалар орасида мен Ўзбекистон Фан ва техника қўмитаси қошидаги Республика фундаментал фанлар жамғармасини мисол сифатида кўрсатишим мумкин. Бу жамғарма уч йилдан бўён фаолият юритади, шу давр мобайнида юздан ортиқ фундаментал тадқиқот учун маблағ ажратди. Бундай шароитда ишлашнинг асосий тамойили рақобат ҳисобланади. Ишни баҳолашда эксперталар муаллифни танимайди. Улар фақат ишга, илмий натижага баҳо беради. Шу сабабли мутлақо кутилмаган одамлар ҳам жамғармадан катта маблағ олди. Уларнинг аксарияти ёшлар, илгаридан ишлаган йирик олимлар. Бу ерда ҳар бир ишланмага холисанлилло баҳо берилади. Эксперталар ишларни уч бор яширинча экспергизадан ўтказадилар, яъни имкон борича холисликка интилиш бўлади. Шу йилнинг 23–24 январигача жамғарма яна бир талай лойиҳаларни қабул қилди. 1994, 1995 йил танловида Тошкент Давлат дорилфунунидан қўйилган лойиҳаларнинг йигирмаси галиб деб топилди.

Умуман, мана шундай жамғармалар, ҳомийлар билан қалин алоқада ишлаш борасида ҳали бизда етарлича тажриба йўқ. Фикримга далил сифатида бир мисол келтирай. Бугунги кунда чет мамлакатлар республикамизга, умуман, барча ҳамдўстлик давлатларига оз миқдорда бўлса ҳам ёрдам кўрсатишга мўлжалланган жамғармалар ташкил этган, аммо биз улар билан яхши алоқа боғлай

олмадык. Бунга лоқайдылгимиз ҳам, билимсизлигимиз ҳам, уларнинг ишлаш йўриқлари билан нотанишилигимиз ҳам сабаб бўлган. Шунга қарамасдан, Ўзбекистон Фанлар академияси ҳам, институтлару университетлар ҳам жамғармалардан аста-секин фойдалана бошлаяпти. Ҳомийларга келганда шуни айтиш керакки, ҳали улар маблағ жиҳатидан унча катта ёрдам бера олмайти. Аммо бу соҳада ҳам баъзи ижобий ишлар мавжуд. Масалан, Ҳамжиҳатлик жамғармаси воситасида университетимизга социология учун пул ажратилган. Баъзи жамғармалар кўмагида олимларимиз Канадага, Чикагога, Иллинойсга, Олмонияга бориб, уч-тўрт ой ишлаб, тадқиқот ўтказиб келмоқдалар. Бу ишлар ҳали илк тажриба бўлгани боис, ҳозирча кўнгилдагидек ривожлангани йўқ. Аммо у бошқа мамлакатларда асосий йўналишлардан бири ҳисобланади, чунки давлат ҳамма фанларни, барча йўналишларни бир хилда таъминлай олмайди. Бу — **биринчиси.** **Иккинчиси** — амалий фанлар соҳасида ҳали ўз кучимииздан яхши фойдалана олганимиз йўқ. Йирик олий ўқув юрти бўлган Тошкент Давлат дорилфунунининг ҳам атиги 7 миллион 200 минг сўмлик хўжалик шартномаси бор. Ваҳоланки, бу ерда 12 факультет, 42 лаборатория фаолият юритади, уларда 600 нафар илмий ходим ишлайди. Бошқа олий ўқув юртлари билан қиёслаганда, бу рақам анча катта миқдор ҳисобланади. Лекин жаҳон андозалари, ҳатто Россиядаги кўрсаткичлар билан солиштирганда ҳам унинг анча камлиги аён бўлади. Демак, бу соҳада ҳали имкониятлар жуда кўп. Биз бевосита буюртмачи билан ишлашни ўрганишимиз керак. Биз унинг талабидан келиб чиқишимиз, ўз билиммизни унга «сота» билишимиз лозим. Ҳолбуки, билим товар экан, биз ҳали уни сотишни ўрганганимиз йўқ.

**Учиинчи** йўналиш мавзуларни ҳозирги шароитга мувофиқлаштириш билан боғлиқ. Агар Фанлар академияси, бизнинг университет ва бошқа олий ўқув юртлари мавзу режаларини қараб чиқсангиз, бир-бирига яқин, ўхшаchlари жуда кўп эканини пайқайсиз. Масалан, республикада биргина геология соҳаси бўйича олтита институт бор. Яна учта олий ўқув юрти шу йўналиш билан шуғулланади. Бу — жуда катта куч. Аммо Давлат

геология ва минерал хомашё құмитасининг буюртмаси асосида ишлайдиганлари битта ёки иккита. Шунга күра, режалаштиришни мұкаммаллаштириш бүйіча бизнинг имконияттарымиз ҳам, салохиятимиз ҳам бекітсіз. Ніхоят, яна бир мұхым мұаммо — маош масаласи. Мен ҳақиқий олим тирикчилик учун әмас, фан учун ишлаши тарафдориман. Унинг катта маош олишини хоҳлардым. Аммо у ҳақиқий олим ёки мутахассис бұлса! Күп кузатышлар, суҳбатлардан сүңг шунга иқрор бўлдимки, бизнинг фанимиз баъзи соҳаларнинг савияси, ривожланиш даражаси бүйіча бошқа мамлакатларни издан қолишмайди. Улар жаҳон андозалари, хусусан, Франция, Олмониядаги фан тараққиети даражасида. Шунинг учун ҳам у юртлардаги мутахассислар мамлакатимизга ва аксинча, бизнинг олимларымиз у юртларга бориб ўзаро алоқадорликда ишлаб турибди. Аммо биздаги техникавий асос сусайиб қолган. Улардаги ноёб асбоб-ускуна бизда йўқ. Уларда пул катта. Маош ҳам катта. Бизда эса кам. Лекин биз улардек ишлай оламизми? Америкалик илмий ходимнинг кундалик ўртача иш вақти 14 соатга teng. Мен буни ўз кўзим билан кўрганман. У ердаги илмий ходим мұассасада 7–8 соат ишлаб кетиши билан чекланмайди, балки идорадан ташқарида тадқиқотни давом эттириб, иш кунини 14 соатга етказади. Биз 14 соат ишламаймиз-да. Шунинг учун бўлса керак, маошимиз анча кам. Буюртма билан ишлайдиган ташкилотларда эса бошқачароқ манзара кўзга ташланади. У ерда буюртма, иш ва маош бирбирига узвий boglaniб кетади. Уларнинг маоши чет эллардагига анча яқинлашиб қолди. Ҳозир бизнинг дорилғунундаги айрим профессорлар тўрт-беш минг сўмдан маош олмоқда. Албатта, бундай маош буюртмачининг розилиги билан тўланади.

**О. Ш.** — Масаланинг яна бир томони бор. Ким бўлишидан қатын назар — олимми, меҳнаткашми — меҳнатига яраша ҳақ олиши керак. 14 соат бўлмаса ҳам, озгина тадқиқот юритса, олим оғир заҳмат чекади ва ўша меҳнатнинг самараси минглаб одамларнинг ҳожатини чиқаради, уларни қаноатлантиради. Шунга кўра, тадқиқотчининг маоши бундан ҳам кўп бўлиши мумкин.

Бизнинг кўз ўнгимиизда — бу ҳол совет давридан бошланган — олимларнинг мавқеи анча туша бошлади. Бир замонлар, аниқроғи, 30-йилларда ўқиган одамнинг, олимнинг обрўси, ҳурмати жуда баланд эди. Одамлар уларга сажда қилмаган тақдирда ҳам гапига кулоқ соларди, фикри билан ҳисоблашарди. Секин-секин, олимлик фаолияти кам самара бергани учунми, унинг қадри ҳам, фикрининг қиммати ҳам сусая борди. Чет элларда олимнинг қадри гоятда баланд. Бунга эришиш йўллари қандай бўлар экан?

Т. Д. — Ҳақиқий олимнинг обрўси, жамиятда тутган ўрни ҳар доим юқори бўлиб келган. Чунки обрў факат пул билан белгиланмайди. Озод ака, бу — масалага қандай ёндашишга боғлиқ. Агар биз ҳамма олий маълумотли, унвонли мутахассисларни олим деб ҳисобласак, сизнинг мулоҳазаларингизга қўшилса бўлади. Аммо ҳамма олим бўлавермайди-ку! Биз буни яхши биламиз... Шундай экан, ҳақиқий олимнинг обрўси баландлигича қолаверади.

Менинг фикримча, аввал бир нарсани аниқлаб олишга тўғри келади. Биз бир вақтлар «олим» деб атальувчиларни кўпайтириб юбормадикми экан? Чўнтағида номзодлик қофози бўлган ҳар одам «олим» ҳисобланаверар эди. Шу билан бирга, ундей қофози бўлмаган, лекин катта тадқиқотлар қилган баъзи мутахассислар эса олим саналиши қийин эди. Бу ўринда сиз билан бизга жуда яқин бўлган бир сиймони эслагим келади. Субутой Долимовдек йирик тадқиқотчи Муҳаммадризо Оғаҳийнинг олти жилдлик асарлар тўпламини нашрга тайёрлаганидан кейингина мажбур бўлиб номзодлик ишини ёқлади. Ахир, у шундан олдин олим эмасмиди? Биз совет даврида дипломга, унвонга сажда қиласидан бўлиб қолдик. Мана шу ҳол олимликнинг қадри тушишига сабаб бўлди. Менинг фикримча, ҳеч бир мамлакатда ҳақиқий олим, улар яратган илмий мактаб кўп бўлмайди. Бизда эса тўрт-бешта номзод тайёрлаган олимни ҳам илмий мактаб яратди деб ҳисоблаш расм бўлиб қолган. Бундай ҳайбаракаллачилик натижасида «илмий мактаб» деган нарсанинг ҳам обрўси пасайиб кетди. Менимча, энди бозор иқтисодиёти даврида илм аҳлининг ҳам сараги саракка, пучаги пучакка ажralади. Ҳақиқий илм

соҳибига кун сайин эҳтиёж ортиб бораверади. Бу жа-раёнда обрў, маош деган нарсалар ҳам ўз-ўзидан ҳал бўлади, ҳал бўлганда ҳам оқилона ҳал бўлади. Чунки уларни ҳақиқий рақобат белгилайди.

**О. Ш.** — Чиндан ҳам, бу — жуда муҳим масала. Олимнинг қадрини кўтариш, унинг ҳақиқий ўрнини белгилаш ишнинг самараси учун ниҳоятда муҳим аҳамиятга эга. Лекин бу масаланинг ҳал қилинишига халақит берадиган жиҳатлар ҳам борми, дейман-да. Масалан, илмий ишни юзага чиқаришда кўнгилсиз ҳоллар кўпдек кўринади. Назаримда, бугунги кунда илмимизнинг жуда ҳам гуркираб ривожланиб кетишига халақит бераётган нарсалардан бири ўтмишдан қолган хунук мерос ҳисобланади. У шундан иборатки, совет даврида бизда олимлар, илмий ходимлар жуда кўпайиб кетган эди. Раҳбарлар, назорат қиладиган идоралар, режалаштирадиган, текширадиган, буйруқ берадиган ташкилотлар ундан ҳам ортиқ эди. Бошқача айтганда, совет бюрократиясининг илмдаги сояси ривожланишига жуда халақит бериб қолган эди. Ҳозир шу иллатдан бутунлай кутулдик, дея оламизми? Агар кутулмаган бўлсак, ундан халос бўлиш учун қандай йўлдан кетиш лозим бўлади?

**Т. Д.** — Умуман, бюрократия, хусусан, илмий бюрократия жуда кенг тарқалган нарса. Бу ҳол фақат бизнинг мамлакатимиз учун хос эмас. Мен 60–80-йилларни яхши биламан. Ўша вақтларда туман, шаҳар, республика партия қўмиталарида фан бўлими бўларди. Уларнинг ҳаммаси билан ҳисоблашиш зарур эди. Бундан ташқари, фан бўлими Министрлар Совети қошида ҳам фаолият юритарди. Ҳозир кўп нарсалар ўзгарган бўлса ҳам, бюрократия бор. Биргина дорилғунун мисолида кўрадиган бўлсак, айтиш мумкинки, ҳозир ҳам уни, айниқса, фанни текширадиган, ҳисоб талаб қиладиган одамлар, ташкилотлар йўқ эмас. Илмий бюрократиядан ҳеч ким юз фоиз кутулган эмас. Уни камайтириш мумкин, вақти-соати билан чегаралаб турилса, зиён қилмайди.

Қолаверса, бозор иқғисодиёти тамойилларини илмга, ҳаётта татбиқ этиш воситасида уни камайтириш мумкин бўлар. Фақат бу ерда бюрократ билан фан ташкилотчисини фарқлаш керак.

Ташкилотчилар эса ноёб, кам учрайдиган одамлар.

Бизда ҳозир шу ташкилотчилар қандай йўл билан танланади? Кўпинча обрўли, ишини биладиган, фанда ўзини кўрсатган, докторлик илмий даражасини олган мутахассислар, айниқса, шундай ёшлар раҳбарлик лавозимларига кўйилади. Фақат, улар иш юрита оладими, одамлар билан мулоқот қилишни биладими, муайян фаннинг истиқболини кўриш иқтидори борми каби саволларга жавоб топиш учун ҳали бизда имтиҳонлар ва тестлар яхши ўйланган эмас. Бундай одамлар раҳбарликка маълум даражада тасодифий равишида кўйилади. Албатта, уни тайинлашда ҳар томонлама ўрганадилар — келиб чиқиши, инсоний хусусиятлари, бошқа фазилатлари аниқланади, лекин айрим ҳолларда ташкилотчилик қобилияти камроқ ҳисобга олинади. Мен республикамида янги ташкил этилган Давлат ва жамият қурилиши академиясидан кўп нарса умидворман. Бу академия раҳбар тайёрлаш борасидаги илк олий ўқув юрти ҳисобланади.

Фарбда ташкилотчиларни, хусусан, фан ташкилотчиларини аниқлаш катта бир йўналишни ташкил этади. Бу ерда ташкилотчиларни танлаш учун бир талай тестлар, тестга тайёргарлик босқичлари ва ёзма ишлар мавжуд. У ерда илмий лавозимга мутахассис тайёрланар экан, унинг ташкилотчилик қобилиятига, айниқса, катта аҳамият берилади. Ўлайманки, бу тамойил беш-үн йил мобайнода бизда ҳам қарор топади. Ўшанда ҳозирги айрим бюрократлар ўз-ўзидан четга сурилиб қолади.

Иккинчидан, бюрократиянинг кенг ёйилиши бизнинг илгариги онгимиз билан боғлиқ. Советлар даврида ходимнинг ташаббусига йўл берилмас, у бирор ишга қўл ургудек бўлса, аввало, юқоридагиларга ёқиш-ёқмаслигини ўйлаб кўрар эди. Шунинг учун ҳам кўп яхши ташаббуслар ёруғ дунёни кўрмай юраклар тубида қолиб кетар эди. Раҳбар илмий ходимларни ана шундай заифликдан кутқариши керак.

**О. Ш.** – Тўрабек Нўймонович, сухбатимиз асосан фундаментал фанлар ҳақида кетяпти. Лекин мен адабиётшунос сифатида гуманитар соҳа тўғрисида ҳам жиндак гаплашсак, деган эдим. Ўша, кечаги ўтмишда фанларни сунъий равишида соҳаларга, ўналишларга, табақаларга бўлиш юзага келган эди. Кўпинча аниқ фанлар

анча баобрў, юксак самарадор сифатида тасаввур қилинган. Гуманитар соҳа дейилтганда эса, иккинчи дараҷали, унча зарур бўлмаган фанлар тушунилган. Бундан ҳам даҳшатлиси шундаки, бизнинг ўзимиз, яъни гуманитар соҳа вакиллари бунга кўпроқ айбормиз, чунки бизнинг ўзимиз бу илмларнинг ривожланишини анча сусайтириб келдик. Агар ўзбек адабиётшунослиги ёки тарихчилигини оладиган бўлсак, жуда бақувват олимлар бор. Улар исталган масалада жаҳон олимлари билан баҳслаша олади. Лекин, буни қарангки, ўзбек адабиётшунослиги ёки тарихшунослиги дунёда тан олинган эмас. Бу соҳадаги илмий гуруҳларни дунё билмайди, билган чоғда ҳам эътироф этмайди. Бунинг сабаби нимада экан? Бош сабаб, яъни илмни фожиага етаклаб келган асосий омил шундаки, илмимиз бошдан-охиргача бир мафкурага бўйсундирилган эди. Биз бу мафкуранинг номақбул жиҳатларини билардик, албатта, аммо хизматини бажармоққа мажбур эдик. Ҳар қандай тадқиқотимиз ҳам оқибатда ўша мафкуравий қарашларни тасдиқлашга хизмат қиласр эди. Шу тариқа натижанинг олдиндан маълумлиги илмнинг қадр-қимматини йўққа чиқариб қўйди. Биз қайси ёзувчи ҳақида гапирмайлик, ижодининг мазкур мафкурага хизмат қиласдиган жиҳатини мақтардик-да, бошқа хусусияти – ҳақиқий санъати, бадиияти билан ишимиз бўлмас эди. Энди вазият ўзгарди. Бугун 70 йилдан зиёд вақт мобайнида шаклланган қарашларни янгилашимиз зарур. Энди ҳақиқий санъатнинг моҳиятини ўзлаштириб, шу асосда янги тадқиқотлар яратишимиш керак. Бу – биринчидан. Иккинчидан, энди, Президентимиз айтганидек, Ўзбекистон – келажаги буюк давлат, деган ғояни амалга ошириш керак. Бу – факат шиор эмас, балки фаолият бўлиши лозим. Бу борада илмий ходимлар, айниқса, гуманитар соҳа вакиллари фаол бўлмоғи керак. Энди биз санъатимиз ва адабиётимиз ўтмишда ҳам буюк бўлганини, ҳозир ҳам буюк намояндалари борлигини дунёга намойиш қила билишимиз лозим. Бунинг учун аксарият илмий асарларимизни қайтадан ёзиб чиқишимиз керак бўлади. Табиийки, бу иш жуда мураккаб, охир-пировардда янги қадрлар билан боғлиқ бўлган муаммо...

**Т.Д.** — Тўғри, гуманитар фанларни иккинчи даражалироқ, нозарурроқ қилиб кўрсатиш ўтмишдан қолган иллатлардан биридир. Илгари биз социалистик реализм таълимоти, коммунистик мафкура тамойилларига мослашган эдик. Лекин ўша вақтларда ҳам қадимшунослик, матншунослик яхши ривожланган. Билишимча, гуманитар фанларни камситган одамларнинг қарашлари, фикр доираси ўта тор, биқиқ бўлган.

**О.Ш.** — Фанни мафкура тизгинига солиш билан боғлиқ гап матншуносликка ҳам тегишилди, чунки ўтмишда бадиий матнни нашрга тайёрлаш жараёнида «Худо», «Оллоҳ» сингари сўзлар ҳеч ўйламасдан ўчириб кетилаверган.

**Т.Д.** — Ҳа, шундай бўлган ва бу жуда катта фожиа эди. Шукурки, энди бундай нохуш ҳоллардан қутулдик. Боя тўғри айтдингиз, бугун илмни қадрлайдиган янги авлодни вояга етказиш зарур. Бу ўринда тадқиқотчилар тайёрлаш масаласини эслаш жоиз бўлади. Ҳозир оз бўлса-да, тадқиқотчиларимиз бор. Фақат, уларнинг илмий ишларини чоп этишда сусткашлик сезилмоқда. Биз тадқиқотларимизни дорилфунун босмахонасида нашр этамиз. Лекин илмий тадқиқотни хорижда чоп эттиришнинг мashaққати кўп. Биласиз, у ерда журналлар ҳар қандай мақолани ҳам нашр этавермайди. Агар биз теран тадқиқотлар юритсак, худди физиклар ва химиклар каби, асарларимизни четда ҳам бемалол чоп қўлдираверар эдик.Faқат, гуманитар соҳа вакилларининг хориж билан алоқаси заифлашиб кетгани бир оз халақит бермоқда. Энди алоқалар ҳам секин-секин изга тушмоқда. Бир мисол: АҚШдан Ричард Хокинс деган тадқиқотчи келиб, бугун университетимизда дарс берялти. Мана шундай тажрибани кучайтириш керак. Аслида, бундай алоқаларни ривожлантириш учун имкониятлар жуда катта, чунки чет эллардаги аксарият университетларда шарқшунослик факультетлари бор, уларнинг барчаси Ўрта Осиёга иштиёқманд. Алоқалар заифлигининг сабаби эса чет тилларни билишга боғлиқ. Бу ҳолдан қутулиш йўли, менимча, илмий тадқиқотчилар тайёрлашни ривожлантиришга бориб тақалади. Бултур биз Тошкент Давлат университетининг гуманитар факультетларига

элликка яқин аспирант қабул қилдик. Бир ўринга учтўрттадан даъвогар тўғри келди. Албатта, аспирантура нинг ҳам ўзига яраша муаммоси бор. Биринчидан, аспирантларга бериладиган маош жуда кам. Агар олий ўкув юртини битиргандан кейин бир-икки йил ишлаб аспирантурага келган, бир-иккита боласи бўлган илм толиби бу пулга яшайман деса, табиийки, қобилияти ва акл жавҳарининг 60 фоизини тирикчиликни йўлга кўйишга сарф этади. У самарали тадқиқот юритиши учун эса жону танини илмга фидо этиши талаб қилинади.

**Иккичидаи**, илм-фанни равнақ топтириш учун биз бир талай янги журналлар таъсис этишимиз зарур кўринади. Албатта, Ўзбекистонда адабиётшуносликка оид катта-катта нашрлар мавжуд. Аммо Farbdagi журналлар даражасидаги нашрларимиз йўқ.

**Учинчидаи**, гуманитар фанларсиз жамият ҳаётида силжиш бўлмайди. Шунинг учун ҳам, эсингизда бўлса, 80-йиллар охирига келиб гуманитарлаштириш деган масала кун тартибига кўйилган. Аммо у гуманитарлаштириш ҳам коммунистик мафкура тақозо этган даражада амалга оширила бошланди ва ижобий самара бермади.

Биз ўкув режаларимизга жуда кўп сунъий фанларни киритганимиз. Масалан, фалсафа ўқитилгани ҳолда этика, эстетикадан ҳам дарс берилади. Табиий факультетларда ҳам адабиёт, шеърият, мусиқа билан боғлиқ фанлар ўқитилса бўлмайдими? Талабаларда гўзаллик сезгиси, камолот туйғуси уйғотилар, яъни чинакам гуманитарлаштириш юз берар эди. Мана, биз театршуносликдан деярли бехабармиз. Талабаларимиз ҳам шундай. Тошкентдаги Ҳамза номидаги, Аброр Ҳидоятов номидаги театрлар билан дорилғунун шартнома тузган. Шартномага кўра, мазкур театрларга пул ўтказилган, улар бизга ҳар ойда тўртта спектакль қўйиб бериши керак. Лекин кўп талабалар у спектаклларга бормайди. Кулогидан тортиб олиб бориш нокулай — зиёли одамга ярашмайди. Уларнинг ўзида театрга эҳтиёж, гўзаллик туйғуси бўлмагач... Бундай туйғуни ҳали уйғота олганимиз йўқ. Ахир, фан гўзаллик ҳисси билан тирик. Фан — гўзалликдир. Бунинг учун эса, боягидек дарслар ғоят зарур.

Мен ўзим ва яқин ҳамкасабаларим гуманитар фанларга ҳеч қачон иккинчи даражали деб қараган эмасмиз. Аксари йирик олимлар ўз соҳасидан ташқари, адабиёт ва санъатта ёки улар ҳақидағи фанларга бениҳоя қизиқкан. Чунончы, менинг устозим Иброҳим Ҳамробоев ниҳоятда яхши расм соладилар. Яна күп олимлар китоб йигади. Университетимизнинг аввалги ректори Шавкат Олимов қадимги құләзмаларни ғоят севади, уларни үқиши ҳам билади, катта нодир кутубхонаси бор. Бу – олим одамға хос фазилат, чунки шундай құшимча машғулоти бўлмаса, у ўзини маънавий жиҳатдан қашшоқлашгандек, савияси пасайиб қолгандек ҳис қиласи.

**О. Ш.** – Бизга савияси юксак илмий тадқиқотчилар даркор. Демак, аспирантурани ва тадқиқотчиликни ривожлантириш зарур. Фақат улардан аввалги босқич – олий маълумотли мутахассислар тайёрлаш жараёнини ҳам эътибордан четда қолдириб бўлмайди. Бу борада Тошкент Давлат дорилфунуни катта тарихга, бой тажрибага эга. Бу ерда шундай мутахассислар йигилганки, уларни бемалол илмий зиёлиларимизнинг пешқадами деса бўлади. Бинобарин, бу илмий даргоҳга ўкув ишларини юритишда қандайдир даражада мустақиллик берилсамикан? Университет жамоаси шундай мавқега кўра нимани ўқитиш ва қандай ўқитиш масаласини ўзи ҳал этса. Ўшанда боя сиз айтган ортиқча, вақтни ўғирлайдиган фанларга ўрин қолмаган бўларди. Масалан, биз филология факультетида жуда күп нарсани ўқитамиз, лекин тилларни мукаммал ўргатишнинг иложини тополмаймиз. Талаба бу факультетда беш йил ўқиб, филологиянинг асоси бўлган биронта тилни мукаммал билib олмайди. Ҳолбуки, у форсийдан, арабийдан, инглизча ва тилшуносликнинг асоси бўлган лотинчадан тўлиқ хабардор бўлиши зарур. Ҳозирги мутахассисларимиз эса буларнинг ҳеч қайсисини тўқис билмайди. Ортиқча фанлар кўпайиб кетгани сабабли уларни ўқитиш ва ўрганиш учун вақт етмайди.

Ёки яна бир масала – адабиётшунос бўламан деган одам, шубҳасиз, бадиий асарни синчилаб ўқиши керак. Бир вақtlар ўкув режасида ўқилиши кўзда тутилган асарлар камроқ эди. Хусусан, биз ўқиган замонда XX аср ўзбек адабиётига оид асарлар 20–30 китобни таш-

кил этар эди. Уларни талаба зарур муддатда бемалол ўқиб чиқа оларди. Ўшандан бўён ярим аср ўтди. Эллик йил мобайнида минглаб китоблар пайдо бўлди, жуда кўп бадиий асарлар ва адабиётшуносликка оид тадқиқотлар майдонга келди. Энди уларнинг барчасини ўқиб чиқиш учун кўп вақт керак. Талаба эса ортиқча фанлар босими остида қолгани сабабли ҳамма асарни ҳам ўқиб чиқолмайди. Ҳатто энг зарурларини мутолаа қилишга ҳам вақт топа олмайди. Энди, менимча, унча зарур бўлмаган фанлардан воз кечишга тўғри келади. Негаки, бояги асарларни ўқимасдан туриб яхши ада-биётшунос бўлиш мумкин эмас. Бунга эришмоқнинг бир йўли сифатида мен Тошкент Давлат дорилфунунига, боя айтганимдек, қандайдир даражада мустақиллик бе-рилишини орзу қиласр эдим. Майли, у «Миллий университет» дейиладими ёки бошқа ном билан аталадими, ҳар қалай, озгина бўлса-да, мустақил иш юритиш ҳукуқига эга бўлса. Кейин шунга яраша тайёрланадиган мутахассислар малакасини, савиясини, дипломнинг қадр-қимматини оширишни талаб қилиш зарур бўлади. Ўшанда яна кўплаб муаммолар ҳам ҳал бўлиб кетади-гандек кўринади.

Т. Д. — Университетимизда муаммолар чиндан ҳам кўп. Университет ўз номи билан «Давлат университети» деб аталади. У бир йилда давлатдан 140 миллион сўм маблағ олади. Ўқув режаларини, дастурларини белгилаш ишига ҳеч ким аралашмайди. Демак, сиз айтиётган тадбирларни амалга ошириш ўз кўлимизда. Вазирлик ёки Вазирлар Маҳкамаси ўқув режалари тушибга, қандай машғулотлар ўтилишига, соатлар тақсимотига умуман аралашмайди. Вақти белгилашдаги нуқсонлар эса, 80-йилларнинг мероси, 36 соатлик ҳафта жорий этишдек нохуш тадбирнинг қолдиги, холос. Биз бундан сира кутула олмаяпмиз. Ҳозир ўқув режаларининг барчаси қайтадан кўриб чиқилянти. Албатта, шу қайта қуриш жараёнида тилларни ўқитишни мукаммаллаштириш ма-саласи кўпроқ ҳисобга олинса яхши бўларди. Чиндан ҳам, мактабда ва олий ўқув юргида 15 йил тил ўқитилганига қарамай, талабаларимиз чет тилида гапиролмайди. Бизда асли чет тилини ўқитиш услуги ниҳоятда яроқсиз. Ҳанузгача магнитофон, лингофон, аудиовизуал хона-

лардан фойдаланиш ўрнига, тилларни маъруза йўли билан ўргатишига ҳаракат қиласиз. Муайян тилда эркин гаплашишига эмас, балки унинг грамматикасини яхшироқ ўзлаштиришига кўпроқ ургу берилади. Айрим факультетларда бу борада сал силжиш ҳам юз бермоқда.

Энди филология факультети хусусида гапирадиган бўлсак, мавжуд андозадан тўғри фойдалана билиш зарурдек туюлади. Унга кўра, талаба ўқиш давомида муайян тилларни, шу билан бирга, бошқа фанларни ҳам ўқиши зарур. Лекин бу андоза 36 соатлик ўқув ҳафтасига асосланади. Чет элларда эса талаба кунига 6 соат эмас, 12 соат илм билан машғул бўлади. Улар асосий вақтни мудом кутубхонада ўтказади. Вақтнинг бир қисми ўқитувчи билан мулоқотга сарфланади, аудиториядаги дарсларга эса бор-йўги 4 соат ажратилади. Бизда бўлса, асосий машғулотлар аудиторияда кечади. Талаба кутубхонада жуда кам бўлади. Дарсхонада ҳам, асосан, ўқитувчи маъруза қиласиди, талаба ёзади. Бу жуда катта камчилик бўлиб, уни бартараф қилиш учун мухторият ҳам, автономия ҳам шарт эмас. Фақат ўқув режалари ва дастурлари тузсак, вақтни тақсимлашдаги йўриқни ўзгартирасак, бас. Лекин бугунги кунда бундан ҳам жиддий муаммо бор: кўп фанлар бўйича янги, мукаммал дастурлар, дарсликлар, қўлланмалар, китоблар етишмай қолди. Ўзбекистон мустақилликка эришганига беш йил тўлаётган бўлса-да, аксари дастур ва дарсликлар эскилигича турибди. Бу нуқсон, айниқса, гуманитар фанлар борасида аниқ кўзга ташланмоқда. Масалан, ҳанузгача сиёсий иқтисод фанидан янги дарслик яратилмаган. Эски китоблардаги айрим сўзлар ўзгартирилиб, ўрнига «бозор иқтисодиёти», «маркетинг», «менежмент» сингари атамалар қўшилиб, яъни номига янгилангандек қилиб ўқитилмоқда. Ўзим маъruzаларга кириб, неча бор гувоҳи бўлдим. Шу боис, Олий таълим вазирлиги университет зиммасига бир йилда 87 дона дастур ва дарслик чоп этиш мажбуриятини юклади. Қисқа муддатда шунча қўлланма яратиш ҳали кўрилган ҳодиса эмас. Фақат, бу мажбурият ижобий ва самарали натижада бериши учун дарслик бўйича ишловчилар меҳнати яхши рағбатлантирилиши лозим. Чунки дарслик ёзищдек қийин иш бўлмаса керак, у муайян дастур асосида яратиладиган

салмоқдор илмий асар ҳисобланади. Муаллифдан катта билим, меҳнат, матонат ва тажриба талаб этади. Унда илм-фаннинг энг сўнгги ютуқлари ўз ифодасини топган бўлиши зарур. Табиий фанларда бу иш бирмунча осон кўчади, чунки уларда муайян событ анъана ва тажрибалар, муштарақликлар ҳамда ўзгармас асослар мавжуд. Гуманитар фанларда эса янги дарслик ва дастурлар яратиш жараёни анча қийин кечади.

Менимча, ўкув юртимиз ҳақиқий миллий дорил-фунунга айланиши учун яна бир-икки муаммони ҳал этиш лозим бўлади. ТошДУнинг бошқа университетлардан фарқи бўлса-да, ҳали у чинакам миллий дорил-фунун мақомига ета олгани йўқ. Дарсларимизнинг савияси, илмнинг аҳволи, аудиторияларимиз, жиҳозларимиз, биноларимизнинг бутунги ҳолати ҳозирча у даражага этишга имкон бермайди.

**О. Ш.** — Сиз миллий дорилфунун худди Ўзбекистон Президенти ҳузуридаги Давлат ва жамият қурилиши академияси даражасида бўлишини орзу қиласиз-да?

**Т. Д.** — Ҳа, мен худди ўшандай бўлишини истайман. Faқat ТошДУнинг ўрни ҳам, салоҳияти ҳам бошқа. Бунинг учун ҳозир қилинаётган ишлар бир оз олга силжиши керак. Бу борада салоҳият ва имкониятларимиз бениҳоя кўп. Бу йил ўқитувчиларимизни рағбатлантириш учун маҳсус жамғарма ташкил қилингани бунинг исботидир. Бу жамғармадан ҳозирча илк бошланмасига 40 ўқитувчига ёрдам кўрсатилди. Жамғармани ташкил этишда Президент девони, Молия вазирлиги муайян ташаббус кўрсатди. Биз фақат шунинг ўзи билан чекланиб қолмай, маблағ топишнинг бошқа йўлларини ҳам излашимиз керак.

Чет тилларни ўқитишида чиндан ҳам муаммолар мавжуд. Қишлоқдан келган бола хорижий тилни деярли билмайди. Шаҳарлик ўкувчи эса оз бўлса-да, билади. Шунга кўра, уларга бир хилда дарс ўтиш тўғримикан?..

Хуллас, юқоридаги каби муаммолар кўп. Аммо биз уларни ҳал қила бориб, илм-фандада ҳам олга силжиймиз. Шу боис, муаммодан чўчимаслик керак, балки уни бартараф этиш пайида бўлиш лозим.

## ОДАМЛАР НАҚШИ

Ҳаёт оқимида алланечук ички адолат ва қонуният бор – ярамас одамларга дуч келиб, чеккан азиятларинг, тортган изтиробларинг, беадад ўқинчу надоматларинг эвазига сени кўнгина яхши одамларга ҳам рўпара қилалиди. Улар бениҳоя дилкаш, хушфеъл, ўзининг инсоний қадр-қимматини юқори қўядиган, шунинг учун сени ҳам иззат-хурмат қилиб қадрингга етадиган одамлар бўлишади. Сен улар билан суҳбатлашаётганинга гўё бутун жисми жаҳонинг алланечук ўтрикларга тўлаётганини ҳис қиласан, гўё ўзлигингдан бир баҳя ўсгандай бўласан.

Бундай одамлар шунаقا баркамол табиатга эга бўладики, уларнинг ёнида беихтиёр кўп нохушликларни унугасан, инсон зотига хос кемтиклар, кусурлар, иллатлар ва ёвузликлар кўз ўнгингдан нари кетади. Бундай ҳолларда ўзингни ана шундай олижаноб, гўзал, баркамол инсонлар тоифасига мансублигингдан гууруланиб кетасан киши. Бундай одамлар қалбингга наврўз кунларининг илиқлигини олиб киради, сенга байрам кайфиятини баҳш этади. Шунинг учун бўлса керак, буюк америка ёзувчиси Эрнест Хемингуэй бундай одамлар билан мулоқотни «сенни бир умр тарқ этмайдиган байрам» деб атаган ва айни шу номда хотиралар китобини эълон қилган эди. Худди шу байрамлар инсон ҳаётига теран маъно баҳш этади. Агар бу дунёда «инсон баҳти» деган нарса мавжуд бўлса, у ана шундай бўлаклардан таркиб топса керак.

Ҳаётим йўлларида мен кўп яхши одамлар қатори Саъди Ҳасанович Сирожиддиновга ҳам рўпара келганман, кўп марта у киши билан мулоқотда бўлганман. Ҳозир у киши оламдан ўтиб кетдилар, лекин ҳар гал Саъди акани эсласам, кўнглим чироқ ёққандай ёришиб кетади. Саъди ака мени бир умр тарқ этмайдиган байрамларимдан бўлиб қолди.

Саъди ака менинг ҳаётимга бир латифанамо воқеанинг қаҳрамони тарзида кириб келган. Бу 50-йилларнинг бошларида рўй берган эди. Ўшанда мен Москвада аспирантурада ўқир эдим. Биз билан бирга самарқандлик Жўра ака Ҳожиметов ҳам ўқир эдилар. Жўра ака ҳозир Самарқанд дорилфунунининг профессори, республикамизда таниқди одамлардан бири. У киши ўша кезларда ҳам гавдали, думалоқ қоринлари ўзларига ярашган, бошларидан шляпани қўймайдиган, қўйинг-чи, жуда савлатли, аспирантдан кўра бирор обком секретарига кўпроқ ўхшаб кетадиган одам эдилар. Табиати очик, феъли қувноқ, теварагидагилар билан бир зумда тил топишиб кетадиган, дунё-тақдири ҳақида ҳар хил бўлар-бўлмас гаплардан кўра бир жуфт ҳазил-мутойибани, латифани афзал кўрадиганлардан эдилар.

Аспирантуранинг сўнгги йили бўлса керак, Жўра ака поездда Москвадан Тошкентга таътилга йўлга чиқибдилар. Купедаги ҳамроҳлари орасида ўрта бўй, қора қош, қора кўзли, жуда хушмуомала, ғоят одобли бир йигитга дуч келибдилар. Йигит кўзларига ёш кўриниб кетганми ёхуд унинг хушфөълигини ўзидан улкан илм соҳибига мўтебёна эҳтиром деб қабул қиласланларми, ҳар қалай, орадан кўп ўтмай, Жўра ака бояги йигитта иш буюрибдилар:

— Қани, ука, катталарнинг хизматини қиласангиз яхши бўлади. Ажаб эмас, сиз ҳам бир кун эмас, бир кун бизга ўхшаб, илм соҳиби бўлиш даражасига етсангиз. Туринг, битта аччиқ чой дамлаб келинг-чи.

Йигит чаққон туриб, чой дамлаб келибди. Ундан кейин иккинчи иш буюрилибди, учинчи, тўртинчи... Қўйинг-чи, у пайтларда поезд Тошкентга салкам тўрт суткада етиб келарди — шу муддат мобайнида йигит Жўра аканинг ҳамма хизматини қилиб, роса кўнглини олибди. Ниҳоят, поезд Тошкент вокзалига келиб тўхтабди. Жўра ака қараса, перронда бир тўп машхур олимлар. Улар тўрт кун давомида Жўра аканинг хизматини қилиб келган ўша ўрта бўй, қора қош, қора кўз, қора-магиз йигитни кутиб олгани чиқишиган экан. Буни куриб ҳанг-манг бўлиб қолган Жўра ака аллакимдан: «Бу ким ўзи, нега уни шунчалик иззат-икром билан қарши олишяпти?» — деб сўрабди. У киши елкасини қисиб жавоб берибди: «Наҳотки танимасангиз? Дунёга донғи кетган

ўзбек олими, математик Саъди Ҳасанович Сирожиддинов-ку. Москвадан докторлик диссертациясини ёқлаб келяпти».

Йўл-йўлакай илм йўлида нималар қилиш ҳақида унга панд-насиҳатлар қилиб келган Жўра ака буни эшишиб дами ичига тушиб кетибди, хижолатдан терга ботиб, тезроқ вокзалдан гойиб бўлишнинг тадоригини қилибди. Шу-шу кейинчалик яна неча йиллар давомида Сирожиддиновга рўпарама-рўпара келолмай юрибди.

Мен: «Бу воқеа чиндан ҳам бўлғаними-йўқми?» – деб кейинчалик Жўра акадан сўрадим. У кула-кула баъзи тафсилотларини эслаб, чинлигини тасдиқлади. Бир ўрни келгандা Саъди акадан ҳам сўраганман. У киши мийигида кулган-у: «Ҳа, энди ўтган ишлар-да», деб қўя қолган эди.

Мен бу воқеани эшифтанимдан кейин анча вақтгача Саъди аканинг камсукумлиги, камтарлигига ҳайрон қолиб юрдим. Ахир, ўзингиз ўйланг, математика соҳасида оламшумул кашфиёт қилиб қўйган, ёш бўлишига қарамай, докторлик диссертациясини ҳимоя қилган одам бир оғиз бу ҳақда ҳамроҳларига шипшишиб қўймаса-я. Бор-йўғи бир аспирантнинг хизматини қилишни ўзига эп кўрса-я. Тўғрисини айтсам, авваллари мен бу ишда алланечук ясамаликни ҳам кўрдим. Бу ҳам шухрат ортиришнинг бир йўли бўлса керак, деб ўйладим. Бироқ, Саъди Ҳасанович бизнинг дорилфунунга ректор бўлиб келгач, у билан яқинроқдан мулоқотда бўла бошладим. Шунда кўрдимки, камтарлик бу одамда тугма бир хислат экан, янада аникроқ айтсам, яшаш тарзи экан, бу одам умуман бошқача бўлиши мумкин эмас экан. У домлалар билан ҳам, талабалар билан ҳам бирдай муюмала қиласар, факультетларга ўзи кириб келаверар, кафедрада ўтириб, домлалар билан бемалол сұхбатга киришиб кетаверарди. Бирон ибора билан ёхуд бирон қилиғи билан «мен ректор, сен менинг измимдаги одамсан» деган маънони билдиримас эди. Айни чоғда, у талабчанлигини кўймас, ишга доир гапларини шундай айтар эдики, уларни адо этмасликнинг сира иложи бўлмас эди.

Саъди Ҳасанович ректорлик қилган кезларда талабаларни паҳта теримига олиб чиқиши жуда авж нуқтасига кўтарилиган эди. Кўпинча талабалар декабрь охиригача далада қолиб кетарди. Баъзан далада паҳта қолмас, ҳатто

номига бирон оқарған чигитни топиб бўлмасди. Бундай ҳолларда шароит оғирлашгандан-оғирлашиб борарди. Интизом бузила бошларди, норозилик кучаярди. Биз домлалар ҳам бунақа бемаъниликларнинг боисини түзукроқ тушунтиришга ожиз қолиб, кўп хуноб бўлардик. Бунақа пайтларда катта раҳбарлар, асосан, дўқ-пўписага ўй берар, нимаики бўлса, «партибилетинг билан жавоб берасан», «қўлингдан келмаса, бўшатиб қўй, ўрнингда ишлайдиганлар сон мингта», деб писандада қилишарди. Бу писандалар ҳақоратдан ортикроқ туюларди.

Мен кўпинча штаб бошлиғи бўлардим. Бирон марта Саъди аканинг бунақа маъмурий қўмондонлик методи билан иш юритганини билмайман. Ҳолбуки, унга осон эмасди. Дорилфунун катта жамоа. Ҳар қалай, яхши ишлар билан бирга кўнгилсиз ишлар ҳам бўлиб туради. Бундай чоғда ректорни райкомга олиб бориб ҳам, горкомга олиб бориб ҳам қисув остига олардилар, ундан каттароқ жойларда унга фоят оғир ботадиган гаплар қилишарди.

Лекин шунда ҳам Саъди ака аламини сира-сира бошқалардан олмасди, ўзининг камтарона ва инсоний иш усулини сира ўзгатирмасди.

Бир куни, адашмасам Сирдарёдаги Акмал Икромов номли совхозда эдик, шекилли, вақт алламаҳал бўлиб қолганди, ташқарида машинанинг гуриллаган овози эшитилди, сал ўтмай, хўжалик ишлари бўйича мутасаддимиз доцент Саттор Ҳайдаров мени туртиб уйғотди.

— Туринг, домла келдилар.

Шоша-пиша ташқарига чиқдим. Саъди ака райком бюросидан чиқиб, тўғри бизнинг олдимизга келаверибдилар.

— Филологларни меҳмондўст деб эшигтанмиз. Кеч бўлса ҳам келавердим. Узр.

Домла ўзини яқин олиб келавергани учун бошимиз осмонга етди. Дарров дастурхон ёздик. Ўчоққа олов қала-дик. Ҳайдаровнинг бунақа ишларга суюги йуқ эди. Ҳашпаш дегунча нималарнидир жиз-биз қилиб келди. Кўйинг-чи, шу кўйи сұхбатимиз З ларгача чўзилиб кетди. Мажлисдан хуноб бўлиб келган Саъди ака секин-аста цехраси очилиб, охири жуда дилкаш кайфиятда кетди. Ўшанда гаплашмаган мавзу қолмади ҳисоб. Адабиёт ҳақида ҳам, сиёсат ҳақида ҳам, яна бошқа кўп масалалар ҳақида ҳам хўп мириқиб гаплашдик.

Ўша кезларда муайян доираларда менинг тўғримда ҳар хил гаплар юради. Ҳарҳолда, мен нима сабабданdir «ўзбошимча, тўғри йўлдан озадиган, қуюшқондан чиқиб кетаверадиган, сиёсий жиҳатдан ишончсизроқ» бир одам сифатида шуҳрат топган эдим. Баъзи бир раҳбарлар ҳатто орқаворатдан мени «миллатчи» деб атаганлари ҳам қулогимга чалинган эди. Афтидан, Саъди акага ҳам менга нисбатан ҳүшёр бўлиш кераклиги кўп уқтирилган эди. Хуллас, Саъди ака ўша тунги суҳбат давомида бу гаплар мутлақо асоссиз, туҳмат ва иғводан иборат бўлганига ишонч ҳосил қилди, шекилли. Бундан кейин ҳам мен турли-туман йиғинларда ёхуд мақолаларда кимгадир ёқадиган ёхуд ёқмайдиган гапларни айтиб юбораверишдан ўзимни тийганим йўқ.

Афтидан, бундай пайтларда муайян идораларда менинг иштирокимсиз мен тўғримда жиддий гаплар бўлар, бундай ҳолларда ректорга мени тергаб туриш кераклиги тўғрисида кўрсатмалар ҳам бериларди, шекилли. Ҳар қалай, Саъди ака мени бир неча марта «тергаган».

— Ҳа, яна нима қилиб кўйдингиз? — деб сўрарди Саъди ака мени кабинетига чақириб.

Мен унга бор гапни айтиб берардим. Саъди ака юқорининг «сири»ни очмас эди-ю, «Ҳаҳ, шунга ҳам шунча ваҳимами?» деб энсаси қотгансимон, менга насиҳат қиласарди.

— Ҳеч тўполонни кўймас экансиз-да. Ундей десам, тўполонсиз жуда зерикib кетса керак одам.

У пайтларда турли-туман «ғоявий хатолар» қилиб Марказий Кўмита қарорларига номи тушган одамнинг бирор куракда турмайдиган баҳона билан ёки, умуман, баҳонасиз, дорилфунундан қисиб чиқарилиши жоиз ҳодиса ҳисобланар ва ҳеч кимда таажжуб уйғотмас эди. Дорилфунунда менинг паттамни қўлимга тутқазишгани йўқ. Бу ишда Саъди Ҳасановичнинг роли бўлганми-йўқми, айта олмайман. Негаки, у киши бунақа масалалар ҳақида менга сира гапирган эмас. Аммо менинг «ёру биродарларим» теварак-атрофимда кўп ивирсиб, мендан «шикоятлари»ни аямай юрган кезларда, Саъди ака «қўйинглар, бунақа гапларни» деб уларнинг попукларини пасайтириб қўйган бўлсалар, ажаб эмас.

Саъди Ҳасановичнинг олим сифатидаги фаолиятига

менинг тишим ўтмайди, лекин мен унинг қизиқиш доираси ғоятда кенг бўлганига неча марталаб ишонч ҳосил қилганман. Айтиш керакки, аниқ фанларнинг вакиллари ўртасида гуманитар илмларга, адабиётга, фалсафага, тарихга мутлақо менсимай қарайдиганлари ҳам тез-тез учраб туради. Уларнинг назарида адабиётга, санъатга қизиқиш, бадиий асар ўқиши — хижолатли иш, умрни зое кетказиш билан баробар. Бунга нима дейиш мумкин? Эҳтимол, адабиёт ва санъатнинг ўзида ҳам айб бордир, айрим олимларнинг бунақа муносабати бутунлай асоссиз эмасдир. Аммо, битта-яримта тухум палағда чиқиб қолса, шуни баҳона қилиб, одам умр бўйи қўймоқдан возкечмайди-ку.

Ҳарҳолда, мен ҳар қандай олим учун адабиёт ва санъат сув билан ҳаводек зарур нарса деб ҳисоблайман. Саъди ака адабиётни жуда-жуда сурорди. У айниқса, шеъриятни яхши кўрарди. Абдулла Орипов ва Эркин Воҳидов шеърларини битта кўймай ўқиб борарди. Учрашиб қолганимизда, албатта, уларнинг кейинги шеърлари ҳақида фикримни сўрар, ўзининг фикрини айтар ва ҳатто баъзи бир ғализликларни танқид ҳам қиласарди.

Саъди ака, айниқса, классик шеъриятни яхши кўрарди. Унинг столи устида Алишер Навоий, Заҳиридин Бобур, Абдураҳмон Жомий, Ҳофиз Шерозий асарларини кўп кўрганман. У киши тожик тилини мукаммал билганлари учун классикларнинг ғазалларини мағиз-мағизигача англаб, маъно товланишларини ҳис этиб, шарҳлаб берарди. Лекин, назаримда классиклар ичida ҳам баъзи шоирларни Саъди ака ҳаммасидан ортиқроқ кўрарди. Булар Фузулий ва Насимиий эди. Фузулий жилларини мендан олиб ўқигандилар. Насимиийни ҳам мендан илтимос қилдилар:

— Факультетингизнинг домлаларидан бирида Насимиининг девони бор экан. Шуни топиб беринг, бир ўқиб чиқай.

Суриштириб топдим — девон эгаси Саттор Ҳайдаров экан. Раҳматлик қўли очиқ одам эди-ю, лекин китобга ўлгудай зиқна эди. Бироқ бу гал китобни Саъди Ҳасанович сўраганини билиб тихирлик қилмади. Китоб Саъди Ҳасановичнинг қўлида олти ойча туриб қолди. Сўраш-

нинг иложи бўлмади. Охири мен ҳам, Саттор ҳам умидни узиб қўйган эдик. Домла чақириб қолдилар. Китобни узоқ ушлаб қолганига узр айтгач, таассуротини ўртоқлашди:

— Бундаги теранликни қаранг, фалсафани қаранг. Одам зотининг тафаккури ҳам шунчалик юксак бўладими? Айни чоғда, бундаги нафосатдан баданлар жимирлаб кетади-я.

Саъди Ҳасанович адабиётта муҳаббатини факультетга ҳам кўчирган эди. У факультетта тез-тез келиб турад, унинг ҳамма ишларидан, ҳамма муаммоларидан хабардор эди. Бирор домла унинг олдига арзу ҳол билан кирса, иши битмай чиқмас эди. Факультетга нима ёрдам керак бўлса, домла қўлидан келса, сира аямас эди.

Яна Саъди Ҳасанович факультетда бўладиган адабий йиғилишларга, учрашувларга, тўй анжуманларига қатнашишни яхши кўрарди. Бунақа ишлардан бехабар қолдирсак, хафа бўлардилар. Йиғин бошланишида келиб, баъзан уч-тўрт оғиз гап айтар, баъзан ҳеч нарса демай, нотиқларни тинглай-tinglai чиқиб кетарди.

Саъди Ҳасановичнинг яна бир сифатини айтмасам бўлмайди. Мен у кишининг Фанлар академиясидаги фаолиятини чуқур билмайман. Шуни биламанки, дорилфунун у киши учун янги соҳа бўлди. Шунинг учун бўлса керак, Саъди ака ишни дорилфунуннинг ўзига хос томонларини ўрганишдан бошлади. Дорилфунун билан таниша бошлаган сари у кишида бир-биридан улугроқ режалар пайдо бўла бошлади. У киши биринчи навбатда дорилфунунни миллийлаштиришни кучайтиришни ўйлардилар. У кишининг нияти бўйича дорилфунун нафақат юксак малакали кадрлар тайёрлаб бериши керак, айни чоғда энг илғор, эркин, халқчил, миллатпарвар тафаккурнинг ҳам маскани бўлмоғи лозим эди.

Аммо, минг афсуски, шу режаларни амалга оширишда Саъди Ҳасановичга имкон беришмади. Ҳар хил даражадаги партия арбоблари, айниқса, Сатинга ўхшаган келгинди одамлар Саъди Ҳасановичга қарши ошкора хужум бошлашди. Комиссиялар устига комиссиялар юборилди, қай бир партия йиғилишида дорилфунунга кўйилган айблардан бири шу бўлдики, гўё бу ерда ма-

ҳаллий кадрлар 50 фоизни ташкил қилиб қолибди, бошқа миллат вакиллари анча қисилица қолибди. Шунинг учун бу миллатчилик уясига тезда зарба бермоқ даркор экан. Шунда бир одам топилмадики, туриб айтса: «Эй ўртоқ, маҳаллий миллат вакиллари 50 фоиз бўлса, бу жуда ҳам оз-ку. Ахир, бу дорилфунун маҳаллий миллат вакилларидан кадр тайёрлаш учун очилган-ку. Бошқа миллат вакиллари ўқийман деса, бутун мамлакатда юзлаб, балки минглаб дорилфунунлар, институтлар бор, ўқий беради. Аксинча, ҳозирги аҳволда маҳаллий миллат вакиллари қисилица қоляпти».

Ҳеч ким бундай демади ва орадан кўп ўтмай Саъди Ҳасанович ишдан олинди. Кейин у оғир касалга чалинди. Мен Саъди акани сўнгти дафъа вафотидан икки ҳафтача аввал хастахонада кўрган эдим. Хонада Саъди ака бир ўзлари экан. Жуда озиб кетибдилар. Кўзлари ичига ботиб кетибди. Ёноклари туртиб чиққандай. Ранги бениҳоят сўлгин. Мени кўришлари билан аввал бир оз саросимага тушгандай бўлдилар — афтидан, мени йўқлаб келади, деб сира кутмаган кўринардилар. Бироқ бу саросималик бир лаҳза давом этди, холос. Бир зумда ўринларидан турдилар, чехраларидағи ҳоргинлик ифодаси йўқолиб, яна бардамлик ранглари пайдо бўлди. Яна самимий жилмайиб, мени муборакбод қилдилар:

— Келинг, келинг, Озоджон. Қалай, ҳали ҳам ҳамма ёқда тўполон қилиб юрибсизми?

Анча гаплашиб ўтиридик. Назаримда, Саъди ака кўп ақыли одам бўлгани учун ҳам тузалмас касалга чалинганидан, умридан саноқли кунлар қолганидан хабардор эди. Лекин, шунга қарамай, бирон оғиз шикоят айтгани йўқ, бирон калима ўз аҳволидан норози бўлиб гапиргани йўқ. Суҳбат давомида бу дунёнинг ўткинчилиги, бевафолиги ҳақида гап бўлди, холос.

Орадан кўп ўтмай, Саъди ака оламдан кўз юмди. Лекин унинг хотираси ҳамон биз билан яшяяпти.

Ҳа, одамларнинг нақши деса арзийдиган одам эди у.

## ОЛИМНИНГ СУРАТИ ВА СИЙРАТИ

Одамки бор, унинг сурати сийрати учун ниқоб вазифасини ўтайди. Одамки бор, унинг сурати ва сийрати бир-бирига монанд, улар ўртасида ажаб бир уйғунлик бор. Бундай одамларни нуроний одамлар деб айтишади — уларнинг чехрасидан нур ёғилиб турганга ўхшайди. Бу нур бир қараашда дабдурустдан кўзга ташланмайдиган, лекин одамнинг бутун хулқ-атворида, хатти-ҳаракатида, гап-сўзларида сезилиб турадиган фазилатлар нури.

Бу гал шундай инсонлардан бири тўғрисида ҳикоя қилиб бермоқчиман.

Яқинда Шарқнинг буюк мутафаккир шоири Жалолиддин Румийнинг «Маънавий маснавий» деган ажойиб китоби ўзбек тилида босмадан чиқди. Назаримда бу китобнинг чоп этилиши сўнгги йиллардаги адабий-маданий ҳаётимиздаги катта воқеалардан бири эди. Шундоқ экан, «Жаҳон адабиёти» журналида бу китобга батафсил тақриз бериш керак. Хўш, ким ёзади бу тақризни? Халқимизда: «Чумчук сўйса ҳам қассоб сўйсин» деган доно гап бор. Ўйлай-ўйлай, кўп йиллик қадрдан дўстим Шоислом Шомуҳамедовга кўнғироқ қилдим. У китоб чиққанини эшитган экан-у, ҳали қўлига олиб кўриб чиқмаган экан. У «аввал китобни ўқиб чиқиб, кейин узил-кесил жавоб беришини» айтди. Мен тақриз ёзилишига комил ишонч билан кунларни санай бошладим. Ниҳоят, бир-икки ҳафта ўтгач, телефон жиринглади. Гўшакни кўтардим.

— Озоджон, китобни топиб ўқиб чиқдим. Бениҳоя зўр китоб экан. Дини исломнинг моҳиятини билмоқчи бўлган одам, албатта, уни ўқиб чиқмоғи керак. Журналингизда китобга тақриз ҳам бериш керак, албатта, фақат... — «фақат»ни эшитиб, юрагим «шиғ» этиб кетди.

— Фақат китоб бошдан-оёқ тасаввуф масалаларига бағищланган экан. Биласиз, мен тасаввуф билан маҳсус шуғулланган эмасман. Бу китобга тақриз ёзишга кучим етмайди!

Ана холос! Бир кам саксонга кирган, камида эллик йиллик умрини шарқшунослик илмига, форс адабиётини ўрганишга бағищлаган, бу борада 80 дан ортиқ китоб чиқарган, машҳур профессор, филология фанлари доктори, Хизмат кўрсатган фан арбоби, Халқаро Фирдавсий мукофотининг лауреати, ўнлаб шогирдларнинг устози, чинакам аллома одам шундоқ деб ўтиrsa-я! Бу қандоқ бўлди? Буни нима деб тушунмоқ керак? Шоислом ака қай бир масалаларда билимлари «чалароқ» эканини тан оляптими? Узининг ожизлигини эътироф этяптими? Шоислом акани яхши билмаган одам шундай деб ўйлаши мумкин. Ҳолбуки, аҳвол бутунлай аксинча — бу жавобда унинг чинакам олимлиги ҳам, мардлиги ҳам акс этган. Фақат ҳақиқий олимгина илм чўққиларига поясма-поя кўтарилиб борар экан, илм уммонининг ҳақиқатан ҳам ҳудудсиз эканлиги, унинг поёнига етиб бориш амримаҳол эканига амин бўлади. Фақат ҳақиқий олимгина ўзининг билимлари билиши керак бўлганлари олдида кичик бир зарра эканини антлаб етади. Буюк файласуф Сукрот кексайиб қолган кезларида «Шунча йил яшаб, мен ҳеч нарса билмаслигимни билдим, холос» деган экан. Яқинда бир журналист Сукротнинг бу гапига танқидий қараш керак, деган фикрни айтди. Йўқ, танқидий қарашнинг ҳожати йўқ. Чунки бу ўринда Сукрот ўзининг билимсизлигидан хабар бераётгани йўқ, балки илм дунёсини тўлалигича кўра олгани сабабли ўзининг билганлари заррадек кўринганини айтяпти, холос. Фақат иodon одамгина, фақат илм тоғининг этагига энди қадам қўйган одамгина ўзини ҳамма илмни тўлалигича ўрганиб олган олим деб ҳисоблайди. Унинг назарида дунёда у «билимаган, билиб таҳқиқини касб қилмаган илм қолмаган». Ўзиди йўқ фазилатни сотиб кун кўришини, мақтанчоқликни, жездан бўлса ҳамки бошида бишум тожи ярқираб туришини яхши кўрадиган одам учун

«билмайман» деган сўзни айтиш ҳар нарсадан оғирроқ бир фожиа, чунки бундай деса унинг миси чиқиб қолади. Ҳақиқий олим учун эса «билимдан» деган сўзни кўллаш канчалик табиий булса, «билмайман» деб айтиш ҳам шунчалик табиийдир.

Менинг Шоислом Шомуҳамедов билан яқиндан танишувим 1957 йилда содир бўлди. Шу йили Тошкентда ҳозир Faafur Fулом номи билан аталаётган Адабиёт ва санъат нашриёти ташкил қилинди. Нашриёт директори Насрулло Охундий мени адабиётшунослик бўлимида ишлашга таклиф қилди. Мен билан бирга шарқ бўлимида ишлаш учун Шоислом Шомуҳамедов ҳам таклиф қилинган экан. Биз қисқа муддатда жуда иноқлашиб кетдик. Шоислом ака мендан саккиз ёш катта эди — у урушга бориб келган, кейин университетда ўқиган, бир неча йил амалий ишларда ишлаб дурустгина тажриба орттирган эди. У ҳам мен каби аввал нашриётларда ишлаб кўрмаган бўлса-да, адабиётни яхши кўргани ва яхши билгани, ақл-заковати ва идроки юқори бўлгани сабабли биринчи кунлардан бошлабоқ бутун умри нашриётда ўтган одамдек ишга киришиб кетди. Унинг ишчанлиги, қаловини топиб қорни ҳам ёндира олиши, ҳамиша бир-биридан яхши ва самарали режаларга, ниятларга тўлиб-тошиб юриши янги нашриётнинг кўпчилик ходимларига ибрат бўлди. Гап шундаки, Шоислом ака ишга келганида кенгтина хонада битта ёзув столию уч-тўртта стул билан кичик муҳаррирдан бошқа ҳеч нарса йўқ эди. Бу бўлимда ҳали биронта китоб чиқарилмаганидан ташқари, захирасида биронта асарнинг қўл-ёзмаси ҳам йўқ эди. Бинобарин, нашриётнинг шарқ адабиёти бўлимини том маънода йўқдан бор қилмоқ керак эди. Бунинг устига, ҳали йўқ қўл-ёзмалардан бир йил ичida, яъни 1958 йил мобайнида йигирматача китоб нашр этмоқ зарур эди. Бу шунчаки оддий кундалик вазифа эмас, бажармаса бўлмайдиган, жуда катта маданий-сиёсий аҳамиятга эга бўлган давлат топшириғи эди. Гап шундаки, 1958 йилда Тошкентда Осиё—Африка мамлакатлари ёзувчиларининг Биринчи конференция-

сини ўтказиш ҳақида қарор қабул қилинган ва ўша кезларда ҳамма ижодий уюшмаларнинг ва бир қатор вазирликлар ҳамда давлат қўмиталарининг ҳамма фаолияти шу Конференцияга тайёргарлик ишларига сафарбар қилинган эди. Шоислом аканинг ишчанлиги, ташкилотчилик қобилияти, масъулият туйғусининг ўткирлиги худди шу даврда яққол кўринди. Нашриётда араб, форс, ҳинд, турк, хитой, япон, Африка адабиётлари билан шуғулланадиган мутахассислар йўқ эди. Шоислом ака нафақат нашр қилинадиган асарлар режасини тузиб чиқди, балки бу нашрларни амалга оширадиган таржимонлар ҳамда муҳаррирлар жамоасини ҳам барпо этди. У ҳақиқатан ҳам одамларни яхши билар, ким қандай ишга қобилияти борлигидан яхши хабардор эди. У одамларга ишонар эди. Натижада, шарқ бўлими атрофида Fafur Fулом ва Миртемир каби буюк таржимонлар, Чустий ва Муинзода каби форс-тожик адабиётининг билимдонлари, ҳиндшунос Наби Муҳамедов ва туркшунос Миёл Ҳакимов каби мутахассислар, Рустам Комилов ва Мирзиёд Мирзоидов каби тажрибали муҳаррирлар тўпланди. Шоислом ака ҳатто бирон олис жойда адабиётни, тилни биладиган, қўлида қалами бор одамни эшитиб қолса, эринмай ўша жойга қидириб борар ва ўша одамни топиб, ишга олиб келмагунча тинчимас эди. Масалан, Муртазо Ҳайдаров билан шундай бўлганди. Бу одам бақувватгина журналист бўлиб, Холос газетасида муҳаррирлик қиласарди. Шоислом ака уни шу ишидан бўшаб, Тошкентга келишга ва шарқ бўлимида ишлашга кўндира олди. Муртазо ака бу ерда бир неча йил муваффақият билан меҳнат қилди. Шу аснода бу одамнинг адабиётни яхши биладиган мутахассисгина эмас, одамлар билан тил топишиб кета оладиган дилкаш инсон экани ҳам маълум бўлди. Назаримда, бу жамоа аҳил бир оркестру Шоислом ака унинг моҳир дирижёри. Уларнинг меҳнати билан Конференцияга аталган китоблар ўз вақтида нашрдан чиқди — ўзбекларнинг юзи ёруғ бўлди. Икки қитъадан келган Африка ва Осиёнинг шоирларию адиллари ўзбекларнинг лафзли одамлар эканига яча бир карра

ишонч ҳосил қилишди. Шарқ бўлимиининг саъй-ҳаралатлари кейинги йилларда ҳам давом этди. Натижада ўзбек китобхони шарқ халқларининг юзлаб ноёб асарлари билан ўз она тилида танишиш имконига эга бўлдилар. Бу ерда ўша кезларда нашр этилган асарларнинг ҳаммасини тилга олишнинг иложи йўқ, албатта. Лекин баъзи бирларини эсламай ҳам бўлмайди. Масалан, худди шу йилларда Шарқни бутун дунёга донг таратган «Минг бир кеча» (арабчадан «Алиф лайло ва лайло») эртаклари саккиз жилда босилди, буюк ҳинд адаби, ўз маҳорати билан Чўлпонни қойил қолдирган Рабиндрнат Тҳокурнинг саккиз томлик куллиёти чоп этилди. 200 жилдлик «Жаҳон адабиёти кутубхонаси» деб аталган машҳур серияда ижодига алоҳида жилд багишланган Абулқосим Фирдавсийнинг буюк «Шоҳнома»си уч жилда узбек китобхонига тақдим этилди. Бу китобларнинг барчаси жуда кўплаб нусхаларда босилганига қарамай, бир зумда кўлма-кўл бўлиб кетганди. Бундай дурдона асарларнинг босиб чиқарилиши, шак-шубҳасиз, ўзбек халқининг бадиий тафкурини бир баҳя оширадиган, унинг маданий ривожида чукур из қолдирадиган ҳодисалар сирасига киради.

Шоислом ака нафақат бу ишларга бош-қош бўлди, уларни уюштириди, балки ўзи ҳам таржимон сифатида шарқ адабиётини тарғиб қилишга анча ҳисса кўшиди. Шуниси ҳам борки, у Шарқнинг машҳур асарларини нашр эттиришда ҳар гал қандайдир янгиликка интилар, китобларнинг жозибадорлиги юксак бўлишига, китобхон қўлида чўғдай ёниб туришига эришишга ҳаракат қиласарди. Мана, буюк шарқ булбули Ҳофизнинг ғазалларини олайлик. Бу китобнинг ўзбек тилида чиқишининг ўзи-ку ҳар бир ўзбек учун улуг бир туҳфа. Лекин Шоислом ака бу билан қаноатланмайди. У китобнинг бир бетида ғазалнинг ўзбекча таржимасини беради-да, иккинчи бетида унинг форсча матнини арабча ҳусни-хатда беради. Тиши ўтадиган одам таржимани аслиёт билан таққослаб, керакли холосани чиқариб олаверади. Ёки Умар Хайём рубоийларини олайлик. Аввало айтмоқ керакки, ўзбеклар илгари ҳам бу шоир рубоийларини дил-диздан севиб ўқишиган. Тўғри, урушдан аввалги

Йилларда унинг рубоийлари жуда кам миқдорда таржима қилиниб, «Гулистан» журналида эълон қилинганди. Мухлислар уларни чинакам шеърият дурдоналари деб қабул қилишган ва янги таржималарни муштоқлик билан кутишарди. Шоислом ака дадиллик билан Хайём рубоийларини таржима қилишга киришди, сўнг уларни бир неча марта нашр қилдирди. Ҳозир аниқ эсимда йўқ, лекин уларнинг умумий тиражи миллион нусхадан ҳам ошиб кетган бўлиши керак. Шу нашрлардан бирида ҳам ўзбекча таржима, ҳам русча таржима, ҳам арабча ҳуснинатда ёзилган форсча асл матн берилган. Бу китобларнинг ҳаммаси бугун кундузи чироқ ёқиб толиб бўлмайдиган нодир нашрларга айланган.

Бу гапларни ўқиган одам: «Ҳа, нима бўнти? Авжи ишлайдиган навқирон пайти. Файрати мўл. Ишласа ишлабди-да» деб қўя қолиши мумкин. Лекин бунақа лоқайдгина қўл силташга шошилманг, дўстим. Гап шундаки, Шоислом ака шу йиллар мобайнида узлуксиз равишда дорилфунунда, дарс беришда ҳам давом этган, шогирд аспирантларга раҳбарлик қилган, ўзи номзодлик ва докторлик диссертацияларини ҳимоя қилган, замонавий ва мумтоз эрон адабиёти тўгрисида ўнлаб йирик-йирик тадқиқотлар, монографиялар эълон қилган, кўп-лаб халқаро илмий конференциялар ва симпозиумларда маърузалар билан қатнашган. Яна булардан орттириб, оиласида яхши эр ва яхши ота сифатида раҳнамолик қилган, қанча-қанча дўстлари билан қалин муносабатларини бирор кун ҳам сусайтирган эмас. Нима, унинг жони мингтамиди? У ҳам умрининг ярмини сайру сафоларда, роҳату фароғатда ўтказса бўлмасмиди? Мен замондошларимиздан анча-мунчасини биламан. Уларнинг ичидаги ёшлари ҳам етарли. Жонини койитишини истамайди. Қўлинни совуқ сувга ургиси келмайди. Иш соат 9 да бошланса ҳам шошмай, аста-аста соат 11 ларга етиб келади — транспорт ёмон ишлармиш. 12 да тушликка чиқади. Соат 2 ларда тушликдан қайтиб, соат 4 ларда ишдан кетиш тадоригини кўра бошлайди. Мабодо, вакътироқ келиб, кечроқ кетгандаги ҳам, тайинли бир иш қилмайди — ўзига ўхшаган битта-яримта бекорхўжани

топиб олиб, валақлаш билан кунни ўтказади. Мен ҳайрон қоламан, тушунолмай хуноб бўламан — биродар, ахир, азиз умрингнинг, ҳар дақиқаси олтиндан қиммат умрингнинг кунлари, ойлари, йиллари беҳуда ўтяттику? Улардан ҳеч қанақа из қолмаяпти-ку? Майли, жамият учун ишламаёқ кўй — жамият сенга ўхшаган битта-яримта такасалтангни боқиб олишга кучи етади, лекин шу беҳуда ўтган кунинг ўзингга нима берди? Фикрларингга янги фикр қўшилдими? Ҳисларинг жиндай бўлса-да бойидими? Билиминг уфқлари кенгайдими? Пулингни беҳуда совурсанг ёки йўқотиб қўйсанг алам қиласди, лекин пул топиладиган нарса, аммо умрчи? Ахир шоир айтганидек, умрнинг ҳар дақиқаси, ҳар сониясини шоҳ сатрлар-ла безаш зиммангдаги энг олижаноб, энг муқаддас вазифанг эмасми? Гап айланниб, яна масъулият масаласига келиб тақаляпти. Шоислом ака умрини фақат ўйин-кулгига, фақат кайфу сафога бағишкаётлас эди. У ўзини катта ҳарф билан бошланадиган ИНСОН деб биларди ва инсонлиги учун зиммасига улуғ масъулият юкланганини ҳис қиласди. Билмадим — бу туйгу Шоислом акада қачон пайдо бўлган — болалик йилларида ёки оловли фронт хандақларида жон олиб-жон бериб душман билан олишиб юрган кезларида? Бу туйгу қалбига китоблардан ўтганми ёхуд ота-оналарининг насиҳатидан, устозларининг тарбиясидан сингганми? Ҳарҳолда, нима бўлганда ҳам унда ўзининг бу дунёдаги ўрни учун, қолдирадиган изи учун масъулият туйғуси кучли эди ва йиллар ўтган сайин бу туйгу кучайгандан кучайиб борди. Яна бир қизиқ гап бор: биз Шоислом ака билан кўп гурунглашар, ҳар хил масалалар тўгрисида баҳслашар, ҳатто баъзан қизишиб тортишиб ҳам кетардик. Орага ҳар хил масалалар тушарди. Лекин Шоислом аканинг бирор марта ҳам «мен бу ишларни ҳалқ учун, ватан учун қильяпман» деганини эшигтан эмасман — у нимаики қисса ҳаммасини бақириб-чақирмай, кўкрагига уриб мақтанимай, ҳеч кимга писанда қилмай бажаарди. Азим дарёлар шовқинсиз оқади, ҳақиқий олимлар ҳам баландпарвоз гаплардан, карнай-сурнайларнинг fat-футидан узокроқ юришади. Илмий доираларда баъзан «фалондай

китоб яратиш керакмиди» дегандай гап қўзғолиб қолса, айримлар «йўқ, йўқ, бу бир кишининг қўлидан келмайди, буни бутун институтгина бажара олади» дейишади. Бу гапнинг чинлигига ишонадиганлар Шоислом аканинг 60 йил мобайнида қилган ишларини — таржималари, илмий асарлари, бадиий ижоди, муҳаррирлиги, ўқиган маъruzалари, илмий ишларга раҳбарлиги — бари-барини сарҳисоб қилиб чиқишича нима дейишар эдийкин? Ҳа, Шоислом аканинг шу пайтгача ўтган умрининг мазмунини бир сўз билан таърифлаш лозим бўлса, бунга «мехнат ва яна меҳнат» деган сўздан кўра мосроқ ибора топилмаса керак.

Менинг мулоҳазаларимни ўқиб китобхон: «И-е, Шоислом аканинг бутун умри меҳнат азобида ўтган бўлса, унчалик ҳам мақтанарадиган жойи йўқ экан-да! Ахир, инсон фақат меҳнат қилиш учунгина бу дунёга келмайди-ку!» дея ажабланишлари мумкин. Йўқ, бундай хулоса чиқарилса, Шоислом акани расмият чопонига бурканиб олиб, ҳаётнинг мафтункор жиҳатларидан ташқарида турадиган бир қуруқ одам сифатида тасаввур қилинса тўғри бўлмас эди. Аксинча, у бутун вужуди билан ҳаётни яхши кўрадиган, унинг рангдор ва гўзал хислатларини нозик ҳис қила оладиган, ҳазил-мутойибани ёқтирадиган, турмушнинг кўпгина икир-чикир муаммоларини қувноқ табассум ва киноя билан енга оладиган, топқирлик ва ақл-заковат билан ўз турмушини жозибадорроқ қила оладиган бир одам. Одамлар одатда тез-тез мураккабликларга учраб турадилар ва уларни енгиб ўтиш чораларини излаш ўрнига тақдирдан ёхуд ўзгалардан шикоят қилишга тушадилар. Шоислом аканинг ҳаёти шундан далолат берадики, одамнинг турмуши, ҳаёт йўли қандай бўлиши биринчи навбатда одамнинг ўзига, унинг ақл-заковатига боғлиқ. Биринккита мисол келтираман: Шоислом ака ҳарбий мактабни битириб, кичик командир бўлиб фронтга кетади. Ўшанда у бор-йўғи 20 ёнда бўлган, ҳали тузукроқ тажрибага эга ҳам эмас. Лекин биринчи қадамданоқ взводга командир бўлди, яъни бу взводдаги ўзига ўхшаган ёш жангчиларнинг ҳаёти учун жавобгар.

Аксига олиб, унинг взводига 15–20 чоғлиқ грузинлар тушиб қолган. Уларнинг ҳаммаси қишлоқдан келган, рус тилини чалакам-чатти биладиган йигитлар экан. Уларга бошчилик қилиш учун, биринчи навбатда, уларнинг ишончини, меҳрини қозонмоқ керак. Хўш, қандай қилиб бунга эришиб бўлади? Излаганга омад ёр деган гап бор. Шоислом акага тасодиф ёрдамга келади. У бир вақтлар нима муносабат биландир бир грузинча калимани ёдлаган экан. Бирдан шу калима эсига тушиб қолади: «Бақақи тисқалси ги-ги хот». Бу — «ботқоқда бақа куриллайди», деган шунчаки омади бир гап экан. Лекин грузин йигитлар сира кутилмаган бир вазиятда она тилларида янграган иборани ёшига ўзбек лейтенантининг оғзидан эшитиб ҳанг-манг бўлиб қолишади. Бир зумда солдатлар билан командир ўртасида инсоний яқинлик пайдо бўлади — тилни яхши билмайдиган йигитлар ҳамма гапни тушуна бошлайди.

Иккинчи воқеа бундай бўлган: фашистлар билан жуда қаттиқ жангда Шоислом акага ўқ тегади. Уни госпиталга олиб кетишади. Ўқ елкага теккан бўлиб, кўл осилиб қолгандай аҳволда эди. Врачлар қўлни кесиб ташлашга қарор қилишади. Ҳуд-бехуд бўлиб ётган Шоислом ака «ампутация» деган сўзни эшитиб қолади ўзин-жаҳди билан «Кестирмайман!» деб жанжал қилади. Буни кўриб, врачлардан бири «Ҳа, майли, ёш экан, кўли битиб кетар» дейди ва қўлни кесмайдилар. Дарҳақиқат, ёш организм кучини кўрсатади — бир қанча вақтдан кейин яра битиб кетиб, кўл ёнга қолади. Бу воқеала ҳам Шоислом акага тасодиф ёрдамга келган. Лекин болаликданоқ унинг ҳар нарсага қизиқувчанилиги, ҳар нарсанинг тагига етиб, англаб олишга ундейдиган синчковлиги бўлмаганда тасодиф ҳам ёрдам беролмаган бўларди.

Шоислом ака дўстликни яхши кўрадиган, дўстларга садоқатли инсон. У дўстона гурунгларни ёқтиради, дўстликдан манфаат изламайди, у оддий одамлар билан ҳам, замонасининг энг етук алломалари, адibu шуаролари билан ҳам бемалол тиллаша олади. Унинг қадрдон дўстлари ичida академик Обид Содиқов, академик Саъди

Сирожиддинов, адиблардан Одил Ёқубов ва Пиримкул Қодировлар бор эди. Шоислом ака жуда дилкаш одам. У дўстларининг кўнглини олишга, меҳрини қозонишга янги-янги имкониятлар ва йўллар қидиради. Унинг Кўкчада тумордеккина ҳовлиси бўлар эди. Ҳовли тор бўлса ҳам, унда ҳамма нарса саришта, жой-жойида эди. Болалар улғайиб, хоналар етишмай қолгач, Шоислом ака бир болохона қурди ва у ерни ўзига «кабинет» қилиб олди. Мен меҳмон бўлиб борганимда шу хонада вақт ўтказар эдик. Чунки бу ерда ҳар хил китоблар, шу жумладан, хорижий шарқ мамлакатларида чиққан бири биридан ноёб ажойиб нашрлар бўларди. Шоислом ака, назаримда, Умар Хайёмни бошқача бир меҳр билан суръ ва шунинг учун иш кабинетида бу буюк инсоннинг руҳини барқарор қилишга интиларди. Китоб жавонларида шоирнинг рус, инглиз, француз, эстон, ҳинд, турк, ўзбек ва форс тилларида чиққан китоблари терилиб туради. Бир куни Шоислом аканикига бориб, кабинетга кўтарилидим. Ёзув столининг ёнида ўртачароқ катталикда бир хум (!) пайдо бўлибди. Унинг усти сирланмаган, лекин арабча чиройли ёзувда Умар Хайёмнинг бир рубоийси ёзиб кўйилибди. Ҳайрон бўлиб, Шоислом акага қарадим.

— Ота-боболаримиз шунаقا хумларда шароб ичишган. Биз ҳам шу удумни қилайлик-да...

Шоислом ака хумнинг олдига бориб, унинг ичига кўлинни тиқди-да, икки шиша оқ мусаллас олди. Хайём рубоийларини ўқий-ўқий мусалласдан нўш қилмоқнинг гашти бошқача бўлар экан.

Ана, кўрдингизми — «Бу тақризни ёзишга кучим етмайди» деган ибора менинг бу ажойиб инсон ҳақидаги ўйларим, мулоҳазаларимни уйғотиб юборди. Мен шунча мулоҳазалар оқибатида битта жўнгина хулосага келаман — Шоислом ака бу ҳаётда кўп нарсага эришди — унвонлар, илмий даражалар, мукофотлар, дўсту ёронлар, фарзандлар, невара-чеваралар... Энг муҳими — элнинг ҳурмати, халқнинг ардоғи. Нималарга эришган бўлса ҳаммасини ўзининг ҳалол меҳнати, ақл-идроқи, заковати, тиниб-тинчимаслиги туфайли топди. Албатта,

у ҳам ҳаётда мураккабликларга дуч келган, лекин бундай пайтларда нола чекиб, фифони фалакка етиб, шикоятлар қилмаган, балки тишини тишига кўйиб чора излаган, имкониятлар топган. Шоислом аканинг ҳаёт йўли — «Ҳаётдан ғурбат излаган ғурбат топгусидир, ҳаётдан ҳикмат излаган ҳикмат топгусидир» деган доно бир гапнинг тўғрилигини тасдиқлайди.

Менинг мулоҳазаларим билан танишган одам: «Войбу! Мақтов жуда кўпайиб кетибди-ку!» дейиши мумкин. Худо ҳаққи ишонаверинг — бу гапларимнинг ичida бирорта ҳам ёлғони йўқ, ҳаммаси чин. Мен Шоислом акани мақтамоқчи эмас эдим, лекин шунга қарамай, мақтов бир озишиб кетган бўлса на чора? Бунинг унчалик зарари йўқ бўлса керак. Шоислом ака жиндай мақтovга димоги шишиб кетадиган ёшдан ўтган. У муборак саксон ёшини қораламоқда. Келинг, дўстлар, бу мақолани бизга замондош бўлган буюк бир инсоннинг тўйига аталган арзимас бир тўйхат деб қабул қиласизлар.

2004

## ГЕОГРАФИЯ ИЛМИНИНГ САРДОРЛАРИДАН БИРИ

Мен дорилғунунга келиб биринчи таниган домлам Нўъмон Долимов бўлган эди. Бу воқеа 1946 йилнинг ёзида содир бўлди. Июль ойларининг бошида мен дорилғунуннинг қабул комиссиясига ҳужжатларимни топшириб чиқиб кетаётган эдим. Кенг залдан ташқарига чиқиб улгурмасимдан орқамдан кимдир «Хой бола!» дейя чақириб қолди. Мен ким кимни чақираётганини аниқлаш учун теваракка алангладим. Мендан бир оз нарида барвастагина одам менга тикилиб турарди.

- Мени чақиряпсизми? — деб сўрадим ҳайрон бўлиб, бу нотаниш одамдан.
- Ҳа, сени... Бери кел... — деб олдига чақирди у киши.
- Ўқишга ҳужжат топширдингми? Қайси факультетга?

Мен жавоб бердим. У киши яна мени қаерда туришим, қаерда ўқиганим, кимнинг фарзанди эканим тўғрисида сўраб-суриштириди-да, кутилмаганда:

- Жангтоҳга бориб тургинг келмаяптими? — деб сўради.

Савони қаранг — Жангтоҳга бориб тургинг келмаяптими, эмиш. Нега энди келмас экан — жуда келади-да. «Жангтоҳ» деганлари Пушкин номидаги дам олиш ва истироҳат боғи эди. У бизнинг уйимиз ёнгинасида жойлашган эди. Мактабда ўқиб юрганимизда бўш вақтимиз бўлди дегунча шу боққа югурадик. Сердарахт, анвойи гуллар очилиб ётган, бир ёнида чоғроқ кўли бор, бир ёнида Кайковус аригининг бир ирмоги оқадиган, иккичунта текис ва озода майдони бор бу гўзал масканда ўйнашни, дам олишни қайси бола ёмон кўради дейсиз? Парк кундуз кунлари бепул бўларди — бемалол кириб

чиқавериш мумкин эди, кечқурунлари – ҳар хил аттракционлар, кино-театр, қироатхона ва шахматхоналар очилганда пуллик бўларди. Кириш ҳақи унчалик катта бўлмаса-да, ҳархолда биз – болаларга оғирлик қиласди.

Мен домланинг таклифига қизиқиб қолдим.

– Албатта, боришни истайман. Аммо қандай қилиб? Домла тушунтириди:

– Мен Нўймон Долимовман. География факультетида ишлайман. Ҳозир қабул комиссиясининг аъзосиман. Университетга ўқишга келаётган болалар кам. Одамлар ўргасида тарғибот ишларини олиб бориш керак. Сенга бир плакат, битта стол ва бир стул берамиз. Ҳар куни кечқурун парк ичидаги ўтириб, олдингта келган ёшлиларга дорилфунун тўғрисида маълумотлар берасан. Бу маълумотлар плакатда ёзилган. Тушунмаган жойингни мендан сўраб оласан. Албатта, паркка киришга текин рухсатнома ҳам берамиз.

Мен жуда суюниб кетдим. Бу қораҷадан келган, кўзларининг тагида салқи ҳалқалари бор, кўринишидан жуда баджаҳлга ўхшаб кўринадиган бу одам менга жуда ёқиб қолди. Гапни айлантириб ўтирмасдан дарров рози бўлдим.

Эртаси куни машинада стол-стул билан плакатни паркка элтиб бериши. Уни кўл бўйидаги йўлчалардан бирининг ёнига ўрнатиб, навбатчиликни бошладим. Одатда қоронги тушгандан кейин кўча-кўйда саланглаб юришимга рухсат бермайдиган ойим бу гал фоятда масъул вазифага тайинланганимни кўриб, индамади. Шу тарзда бутун ёз бўйи ҳар оқшом паркка текин тушар, баъзан ёнимда битта-яримта ўртоғим бўлар, ўқишга киришни хоҳлаб, маълумот сўраб келувчиларга қўлимдан келганича аҳборот бериб ўтирдим. Бироқ – хоҳ ишонинг, хоҳ ишонманг – ўқишга киришни истайдиганлар деярли йўқ эди. Конкурс деган нарсадан ному нишон ҳам йўқ. Битта ўринга бир кишидан одам йигилса, бу жуда яхши натижа деб қабул қилинар эди. Ўша йили менга ўхшаб ўқишга чақириш билан шуғулланган одам яна икки-уч йилдан кейин олий ўқув юртига кириши амримаҳол бўлиб қолади, ҳар ўринга 5–6 тадан бола талабгор бўлади деса, бунга ишониш жуда қийин эди.

Билмадим, менинг маслаҳатим билан неча киши ўша йили ўқишга ҳужжат топширдийкин? Лекин мен астойдил топширилган вазифани бажаришга ҳаракат қилдим ва фаолиятимни сентябргача давом эттиридим.

— Раҳмат, сенга, — деди Нўймон ака сентябрнинг бошида. — Энди ишни тўхтатсанг ҳам бўлади.

— Хўп, — дедим мен. — Фақат плакат билан столстулни олиб келиш керак эди-да.

— Сен уларни уйингга олиб бориб қўя тур. Машина топилса, вакти-соати билан олиб кетамиз.

Мен шундай қилдим. Лекин уларни олиб кетишга фурсат бўлмади, шекилли. Орадан бир йил ўтди, 1947 йилнинг қиши бошланди. Уйдагилар шундоқ ҳам тор уйимизга ортиқча нарса олиб келганим учун мени койишдан чарчамас эдилар. Мен буюмларни олиб кетишларини сўраб Нўймон акага икки-уч марта мурожаат қилдим. Уларнинг олиб кетилишидан дарак бўлмади. Мен ўқиб юрган кезларимда ёзув столим йўқ эди. Аллақачон университетнинг столи ва стулидан унумли фойдалана бошлаган эдим. Плакатга эса тез-тез худбинлик билан кўз ташлаб қўярдим, холос.

1947 йилнинг қиши анча совуқ келди. Қишлиқ пойафзалнинг тайини йўқ. Охири, бир жуфт маҳси олиб беришди, лекин пайтава олишнинг имкони бўлмади. Уйдан ҳам бу ишга ярайдиган икки-уч метр материал чиқмади. Бувим билан келишиб плакатни бузадиган бўлдик. У пишиқ бўздан қилинган эди. Бўзни ёғоч рамкадан ажратиб олдик, бўёқли ҳарфлар кетгунча яхшилаб ювдик. Карабсизки, бир жуфт қулинг ўргилсин пайтава тайёр бўлди. Мен икки-уч йил Нўймон аканинг номига раҳматлар айтиб, иссиққина пайтавани оёққа ўраб, қишини ўтказдим. Нўймон ака кейин бирон марта ҳам на плакатни, на стол билан стулни сўради. Университет ходимлари уларни рўйхатдан ўчириб ташлаган бўлса керак. Шундан кейин бир неча йилгacha муносабатимиз салом-аликдан нарига ўтмади. Тўғрироғи, университетда рўпара келиб қолсак, албатта, мен салом беришни канда қилмас, у қиши эса шунчаки номига бош иргабгина алик олиб қўя қолардилар. Афтидан, мени бутунлай унутиб юборган бўлишлари ҳам мумкин.

Шуни айтмоғим керакки, мен ўрта мактабда ўқиб юрган кезларимдаёқ география фанини жуда яхши кўрардим. Ҳар хил хариталарни топиб келиб, бутун курраи заминни, ундаги тоғлар, саҳролар, пасттекисликлар, ўрмонлар, кўллар, дарёлар ва денгизларни бирма-бир айланиб чиқардим, у жойларда юз бериши мумкин бўлган саргузаштларни хаёлимдан кечирардим. Айниқса, дунёда ном чиқарган катта шаҳарларда кўпроқ тўхташни, у ердаги одамлар ҳаётини тасаввур қилишни ёқтирадим. Бунга асосий сабабчи – бизнинг география ўқитувчимиз эди. Ҳамиша соқолини қиртишлаб олиб, сочини орқасига қаратса силлиқ қилиб тараб, фоятда ораста кийиниб юрадиган бу одам ўзини жуда сипо тутарди. У кишининг исми Боқижон aka эди. У баъзи бир ўқитувчиларга ўхшаб, болаларга ёқиш учун ҳар хил маза-бемаза гапларни галиравермас ва бачканга қилиқларга йўл қўймас эди. У болаларнинг кўнглини олмоқ учун бутунлай бошқача йўл тутарди. У иккинчи марта дарсга кирганда ўзи шахсан иштирок этган бир денгиз сафари тўғрисида гапириб берди. У ниҳоятда сўзга чечан экан. Сув тагидан чиқиб турган қоя-тошлар, маҳаллий қабилалар билан бўлган қонли жанглар, қор босган совуқ довонлар ва яна аллақанча нарсалар тўғрисида ҳикоя қилди. Бир неча соат давомида биз унинг гапларига маҳлиё бўлиб, оғзимизни очганча мароқ билан тинглар эканмиз, биз ўзимиз ҳам аввал ўша кеманинг ичидагидек, кейин қуруқликда саёҳатчилар билан бирга юргандек ҳис қилдик. Ҳикоя давомида Боқижон aka кўзимизга бошқача кўриниб кетди – энди у ҳеч нарсадан қўрқмайдиган, ҳар қандай чигалликни еча оладиган топқир ва мард одам бўлиб кўринди бизга, факат ҳикоя охирлагандагина у сафар ҳикоясининг қаҳрамони ўзи эмас, машхур денгизчи Вакко де Гама эканини айтди. Лекин биз ўқувчилар муаллимнинг ҳақиқий қаҳрамон ўрнига ўзини кўйиб гапирганига хафа бўлмадик, негаки, ҳикоянинг ўзи фоятда жозибадор чиқкан эди. Ўшанда Вакко де Гама деган бир оз русчага ўхшаб кетадиган гаройиб фамилияли денгизчига жуда қизиқиб қолдим ва қидира-қидира 30-йилларнинг ўртасида «ЖЗЛ» («Ажойиб одамлар ҳаёти») деган туркумда босилган бир

китобни топдим. У рус тилида эди. Лекин мазмуни, умуман, таниш бўлгани учун рус тилида ўқиш унча қийин бўлмади. Маълум бўлдики, Васко де Гама, Магеллан, Христофор Колумб каби дунёning машхур сайдхонларидан бири бўлган экан ва айниқса, Африка қитъасини тўла-роқ тасаввур қилишда катта роль ўйнаган экан.

Ўшандан кейин жўкрофий адабиётларига қизиқиб қолдим ва айниқса, туркий мамлакатларнинг шаклшамойили ҳақидаги китобларни йигадиган бўлдим. Булар орасида Мирзаевнинг «Марказий Тяньшан музликларида» деган китоби (уни Бадахшоннинг маркази – Хорак шаҳрида харид қилган эдим) Туркий тиллардаги топонимлик атамаларга бағишлиланган китоби foятда қимматли.

Хуллас, мен Нўймон Долимовнинг туғма географ эканини, кўп йиллардан бери география факультетига раҳбарлик қилиб келишини билганимдан кейин шундай одам билан танишлигимдан, бир вақтлар унинг бир корига яраганимдан жуда фахрланиб кетдим. Мен, албатта, Нўймон аканинг олим сифатидаги иқтидори қандай эканига баҳо беролмайман – бунинг учун менда маънавий ҳукуқ йўқ. Шундай бўлса ҳам айтаманки, у жуда яхши, сара географлардан бўлгани аниқ. Уни география факультетидаги ҳамкаслари жуда ҳурмат қилар ва унинг тўғрисида оғизларидан бол томиб гапиришар эдилар. Бундан ташқари республикамизнинг бир қанча вилоятларида, шаҳар ва қишлоқларida кўпгина ўқитувчиларни учратганманки, улар ўзлари Нўймон аканинг кўлида ўқиганларини фаҳр билан ҳозирга қадар сўзлаб юришади. Мен, албатта, студентлик йилларимда у киши билан тенгма-тенг мулоқотда бўлган эмасман. Ҳатто ҳаддим сиғиб, у кишига бемалол гапиришга ҳам ботина олмас эдим. Лекин шунга қарамай, ёшлигим ва фаросатсизлигим туфайли бир марта у кишининг дилига қаттиқ озор берганман. Воқеа бундай бўлган эди: аниқ эсимда йўқ – учинчи курсдамидик ёки тўртингчидан – студентларни пахтага сафарбар қилишди. Мен нима сабабдандир уч-тўрт кун кечикиб боргандим. Кеч қолганимни оқлаш тариқасида 4–5 кишилик ошга масаллиқ ҳам олиб боргандим. Пахтада бизнинг факультетда ҳар

доимтидек ошпаз Эркин Юсупов эди. Эркиннинг қўлига масаллиқни тутқаздим-да, «кечқурун бир чўқим ош қиласан» дедим. Эркин рози бўлди, фақат талабаларга кечки овқатни бериб бўлгач, ошга уннашини айтди. Биз Боёвут совхозида эдик. У пайтларда совхозда электр ҳам, водопровод ҳам, газ ҳам йўқ эди. Қоронғи тушиши билан бирор тарелкага жиндай ёғ қуйиб, пахта пилик ёқилар, уни нимжон ёруғида деярлик ҳеч нарсани кўриб бўлмасди. Газ бўлмаганига кўра ўтин ҳам йўқ эди – ўтин ўрнига похол ёқиларди. Сувни эса шу яқиндаги ҳовуздан олиб келинарди – ундан зах ҳиди анқиб турар, таъми ҳам тахир бўларди. Буниси ҳам майли-я, ҳар гал челякда сув тортганда, унинг ичидаги уч-тўрт қурбақани олиб ташлаш лозим бўларди. Баъзан қоронғида кўрмай қолсангиз, улар гўшт билан бирга ҳил-ҳил пишарди. Қизиқ, талабалар шунаقا гўштни есалар: «Бу нима?» деб сўраб ҳам ўтирас эдилар. Ҳарҳолда, ўша йили биронта одам Эркиндан шикоят қилиб оғиз очгани йўқ. Кўйинг-чи, қоронғида туртиниб, тимирскиланиб юриб, бир амаллаб ошни дамладик. Қозонга товоқ ёпилиши билан Эркин менга қараб: «Боринг, домлани чақиринг» деди. Талабаларга ўша кезларда Зикриё Мирҳожиев раҳбар бўлиб келганди. У икки юз метрлар наридаги баракда турар экан. Аниқроғи, баракда эмас, унга туташтириб қурилган узунгина энсиз бир хонадан унга жой қилиб беришибди. Хонада эшиқдан бошқа ёруғ тушадиган дераза ёки туйнук-пуйнук йўқ. Хонанинг тўрида ёғочлардан апил-тапил сўрига ўхшаш бир нарса қурилган, унинг устига қалин қилиб похол тўшалган экан. Ҳамид Олимжоннинг машхур мисраларини ўзгартириб «бунда похол ҳар нарсадан мўл, то ўлгунча шу ўлкада қол» деб юборгинг келади. Кўлбола сўрида икки киши ётар, иккинчи одам Нўймон Долимов экан. Эсимда йўқ – ўша йили география факультети бизнинг факультет билан бир жойга тушганду, унинг бошлиғига ҳам шу ердан жой берилганими? Мен Нўймон акага салом бердим, сўнг Мирҳожиевга юзландим:

– Домла, бир чўқимгина ош қилган эдик. Юринг шуни бирга тановул қиласиз.

Зикриё aka ҳам кўп ялинтирмай, ўрнидан қўзғала

қолди. Албатта, ўзбекчиликнинг энг ибтидоий қоидасига биноан, бунақа пайтда хонадаги иккинчи одамни ҳам тақлиф қилиш керак. Акс ҳолда, одоб доирасидан чиққан бўласан. Мен эса – билмадим, нима ўйга бордим экан – Нўъмон акага «Қани, сиз ҳам бирга юринг» демадим. Ошнинг камлигини ўйладимми ёки ҳар қалай Нўъмон акадан ётсирадимми – индамай Мирҳожиев билан бирга чиқиб кетаверибман. Қайтиб келишимиз биланоқ, Эркин:

– Нўъмон ака қани? – деб сўради.

Мен нима дейишни билмай талмовсираб қолдим.

– Боринг, нима қилиб бўлса-да, домлани ҳам олиб келинг. Уят бўлади! – деди Эркин катталардек насиҳатомуз оҳангда.

Мен феълимнинг торлиги ва фаросатсизлигимдан ўқиниб, қоронғида туртина-туртина орқага қайтдим. Домла аллақачон похол устига солинган қанор қопда кўрпага ўралиб ётиб олган экан. «Домла, юринг, сиз ҳам бормасангиз бўлмас экан» дедим. Нўъмон ака бир оз зарда аралаш:

– Йўқ, ўзларинг бемалол еяверинглар, менинг жиндай ишим бор, – дедилар.

– Қоронғида қандай иш бўлиши мумкин? Тулинг, юра қолинг, ҳамма кутиб ўтирибди, – дедим.

Яна бир оз ялиниб-ёлборганимдан кейин, ниҳоят, домла боришга рози бўлди, сўнг этигини кийди, тело-грейкасини елкасига ташлади. Биз яна қоронғида туртина-туртина ўчоқ боши томон йўл олдик. Кейин ош сузилди, ўртага қўйилди, гурунглашиб ўтириб уни паққос туширибмиз.

Ошдан кейин яна бир оз гурунглашиб ўтириб, жойжойларимизга тарқалишдик. Эрталаб туриб, бир-биримизга қарасак – во ажаб – кеча ош еганларнинг ҳаммасининг тумшуғи, лаблари, икки лунжи қоп-қора. Қора бўлганда ҳам совуқ сувда ювса кетмайдиган дараҷада қора. Ҳар биримиз қандайдир бир олабўжига ўхшаймиз. Кеча похол ёқиб, овқат пиширганда, у куйиб кулга айланар экан-да, оловнинг тафти билан бир оз юқорига кўтарилиб, кейин ҳаммаси қозонга қайтиб тушаркан. Натижада ош буткул қорайиб оқ-қора ёғга пи-

ширилгандай бўлибди. Биз эса ош ейиш баҳонасида қоронгида тумшуқларимизга қора мойни сураверибмиз. Уни кетказгунча бир-икки кун роса ҳаммага масхара бўлдик.

Мен бу гапларни гапириб берар эканман, Нўъмон акани Зикриё ака билан бирга даврага таклиф қилмай, у кишининг дилини оғритганимни яна бир бор эслатиб қўймоқчи эмасман. Кўриниб турибди – бунақа фаросатсизликнинг мақтанағидиган жойи йўқ. Лекин бу ишда Нўъмон аканинг битта жуда ажойиб ва ноёб фазилати намоён бўлди. Домла ўша куни ранжиганларини яширган бўлиб, мендан бир оғиз таъна қилмадилар. Нафакат ўша куни, ундан кейин ҳам кўп йиллар мобайнида бу қилмишимни юзимга солмадилар, мени изза қилмадилар. Мен, албатта, аллақачон бу қилмишимга пушаймон эдим, ўзимни койиб, ич-этимни еб юрардим. Домла яна бир бор мени хижолатга қўйишни истамадилар. Назаримда, бу – олижанобликнинг, кечиримли бўлишнинг ўрнак олса бўладиган намунасиdir. Албатта, домла оғриган дилидаги губорни бир амаллаб тарқатиб юборган бўлишлари керак, лекин бу ишни мени койиш, менга танбеҳ бериш ҳисобига қилмаганлар.

Шунда ҳаётнинг яна бир ҳақиқатини англашим – ҳеч қаҷон одамнинг феъл-атвори тўғрисида, фақат шаклу шамойилига, ташқи кўринишита қараб, узил-кесил баҳо бериш мумкин эмас экан. Нўъмон ака юзидан ҳар қанча қаҳри қаттиқ одамдек кўринимасин, моҳияттан бағрикенг, бошқаларнинг дилини тушунадиган ва одамларга хайриҳоҳликка тўла бир инсон экан. Кейинчалик мен унинг назокати ва меҳрибонлигига бир неча марта гувоҳ бўлдим.

\* \* \*

Нўъмон Долимов тўрт оғайнининг тўнғичи эди. Улар – Субугой Долимов, Султон Долимов, Акбар Долимов ва Нўъмон ака – ҳаммалари ўқиган, илмнинг юксак погоналарини эгаллаган эдилар. Уларнинг ёшлари бир-бирларига яқин эди. Ўзаро жуда ҳам аҳил, иноқ эдилар, ҳамиша бир-бирларининг аҳволларидан хабардор бўлиб

туришар, бир-бирларига меҳр-муруватларини аямас эдилар. Чиллаки чиллакини кўриб чумак уради, деган гап бор. Афтидан, чиллакитина эмас, оға-инилар ҳам бир-бирларидан ўннак олиб, бир-биридан баҳра олиб, бир-бирига суяниб, бир-бирига кўмаклашиб чумак уради, шекилли. Ҳарҳолда, тўрт оғайни Долимовлар Тошкентда кўпчиликка ибрат қилиб кўрсатса арзийдиган одамлар эди. Уларнинг ўғил-қизлари ҳам оталари изидан кетишишди ва жамиятимиэга кераклиги одамлар бўлиб етишишишди. Мен улар ўртасидаги иноқликни, меҳр-муҳаббатни кўрганимда бунинг илдизлари нимада экан деб кўп ўйга толардим. Айниқса, уларнинг ҳаммасида мавжуд бўлган меҳрибонлик, назокат қаёқдан пайдо бўлган экан? Мен уларнинг оиласидаги яқинроқ бўлганимдан кейин бунинг сирини англагандай бўлдим. Феъл-автори ҳар хил бўлган бу оға-иниларни мусиқага, санъатга муҳаббат бирлаштириб турар экан. Улар қалбларида бойликни санъатдан олар эканлар. Уларнинг бири географ, иккинчиси филолог, яна иккиталари тиббиёт одамлари бўлишларига қарамай, ҳаммалари баравар даражада санъат шайдоси эди. Улар фарзандларига ҳам бу муҳаббатни юқтира олишган. Улар дугор чалишар, танбур чертишга ҳам уста эдилар. Мабодо бирон асбони чалишмаса, қўлларида талинка билан ҳам хиргойи қиласверар эдилар. Оиласидаги йиғинларда, тўй-гаштакларда ҳаммалари бўй-бастларига қараб ўтириб олишарди-да, созларини бир-бирига ҳамоҳанг қилиб созлашарди, кейин бирлари бошчилик қилиб қўшиқ бошларди, қолганлари унга жўр бўлишарди. Қўшиқлар асосан Алишер Навоий, Фузулий, Бобир, Оғаҳий, Амирий, Ҳазиний каби классикларнинг шеърлари билан айтиладиган қўшиқлар. Алоҳида-алоҳида олгандага уларнинг ҳеч қайсисида у қадар кучли овоз йўқ эди, лекин ака-укалар биргаликда қўшиқлардаги паст-баланд жойларни жуда яхши олишар, авжини ҳам жуда ўринлатишар, энг нозик зам-замаларини ҳам кишини ҳаяжонлантирувчи даражада ифодалаб беришарди. «Худо бераман деган одамига қўшқуллаб беради» деб шуни айтсалар керак-да. Классик куйлар, сўзларидаги ҳикматлар ҳар қандай одамни ҳам элитиб қўярди. Уларни тинг-

лаган одамлар юраклари ҳар хил губорлардан покланыётганига, куй билан таналари яйраётганини ҳис қиласар ва кўпроқ мурувват ва мушфиқлик бандаларига айланиб бораётганини ҳис қилишарди. Бу меҳр ва мурувват, мушфиқлик ва меҳрибонлик, албатта, уларнинг ўзларининг қалбидан ҳам жой олганди. Масалан, биронта яқинлари, таниш-билишлари бирон ёрдамга муҳтож бўлиб қолса, улар албатта ёрдам беришарди.

Нўймон ака ана шундай ажойиб фазилатларга эга бўлган, уларни укаларига, фарзандларига, жиянларига юқтира олган ва ҳаммамизга яхшилик муҳиби бўлишни мерос қолдирган комил инсон эди.

2007'

## ТОҲИРИЙ КИМ ЭДИ?

Тоҳирий домла педагогика фанидан дарс берар эди. У пакана бўйли, миқти гавдали, боши катта, тепакал одам эди. Вазни бирмунча оғир бўлса-да, ҳаракатлари чаққон, юришлари бардам эди.

У дарсга киргандан кейин кўп ўтмай, ҳаммамизнинг меҳримизни қозониб олди. У ўзбек тилини жуда яхши билар, ҳар бир сўзни чертиб-чертиб, дона-дона қилиб талаффуз этарди. Унинг сўз бойлиги жуда катта, кўпинча жуда мавҳум ва мураккаб тушунчаларни ҳам оддий сўзлар билан тўла-тўқис ифодалаб берарди. У бизни педагогика дунёсига олиб кирди, бу борада кўзимизни очди. Бу дунё ҳам курашларга бой дунё экан, унинг тарихини ҳам кўпгина ғояларнинг драматик тўқнашувлари, айрим мутафаккирларнинг аламли ва Фожиона тақдирлари ташкил қиласр экан. Биз биргина «педагогика» сўзининг замирида шунча тарих, шунча кураш, шунча тақдирлар ётганини кўриб, лол қолганча бу фаннинг қонун-қоидаларини ўзлаштиридик.

Тоҳирий домла ўз соҳасини мукаммал билар эди. Ҳар бир маъruzalarda унинг айтганидан кўра, билгани – айттолмай қолиб кетаётган гапидан кўпроқ экани сезилиб турарди. Фақат унинг маъruzalariда, тўгрироги, педагогика фанининг дастурида битта нуқсон бор эди – унда шарқ педагогикасига бир соат ҳам ўрин ажратилмаган эди. Шарқ мутафаккирлари, шоирлари ва файласуфлари инсон тарбияси тўғрисида, комилликка эришиш йуллари ҳақида ўрта асрларда ҳам, ундан кейин ҳам шу қадар кўп мулоҳазалар юритишган, концепциялар яратишган эканки, уларнинг кўпчилиги бугун ҳам заррача қимматини йўқотган эмас. Тоҳирий домла буларни билмаган бўлиши мумкин эмас, аммо улар тўғрисида гапириш имконига эга бўлмаган. Бу гапларга орадан анча йиллар ўтиб, ўзим ҳам педагогик фаолият

билин шуғуллана бошлагандан кейингина озми-кўпми ақлим етадиган бўлди.

Талабалик йилларида эса ҳар бир домланинг оғзидан чиққан гапи ҳақ, илм деганлари бундан ортиқ бўлмайди, деб юра берганмиз. Тоҳирий домла жуда зиёли одам эди. Унинг савияси кенг, билимлари нафақат педагогика соҳасида, балки бошқа соҳаларда ҳам фоятда чуқур эди. У ҳаётнинг кўп томонлари ҳақида бемалол фикр юритар, турли-туман замонавий қарашлар билан баҳслашар ёки уларни маъқуллар эди. Баъзан, у бевосита педагогик муаммоларни нарироққа суриб қўйиб бўлсада, бизга инсон ҳаётининг мазмуни, яшашдан мақсад каби «мангу» масалалар ҳақида гапириб кетар, бу гаплар бизни ўйлантириб қўяр ва биз дарсдан кейин ҳам улар тўғрисида ўзаро жангларни давом эттирас эдик. Хуллас, Тоҳирий домла тафаккуримизнинг поясма-поя ўсиб боришига катта таъсир кўрсатди.

Бир куни домла курсимиздан икки-уч талабани уйига таклиф қилди. У киши ҳозирги Дарҳон маҳалласининг атрофларида, дабдурустдан топиш анча қийин бўлган бир тор кўчанинг охирроғида турад эканлар. Эскироқ икки табақали эшикдан ичкарига — ҳовлига кирилади — унда оврупоча тарҳ асосида курилган шинамгина уй бор экан. Домла дастурхон ёзди, бизни тансиқ таомлар билан сийлади. Анча вақтгача суҳбатлашиб ўтирди. Албатта, бу уйда бизни ҳаммадан ортиқ қувонтирган нарса китоблар бўлди. Китоб жуда кўп эди. Ҳар хил, ранг-баранг, катта-кичик. Домла китобга қизиқаётганимизни кўриб, жавоннинг аллақаеридан бир китоб олди.

— Бир сизларга мақтаниб қўяй — домлаларинг чакана одам эмас! Мана шу китобни аканг қарагай таржима қилган.

Бу Горькийнинг «Артамоновлар иши» деган романи эди. Роман 30-йилларнинг ўрталарида босилганди. Кейин билсак, домла бошқа ҳеч нарса таржима қилган эмас экан, лекин шундай бўлса ҳам, домлага ихлосимиз ортди. Кейин биз ҳам «домламиз роман таржима қилган», деб мақтаниб юрадиган бўлдик.

Баногоҳ домланинг бошига оғир кулфат тушди. Бу фожиали воқеа ё 1949, ё 1950 йилда рўй берди. Ўша пайтда уруш тугаб, мамлакат аста-секин изга туша бор-

ди. Дўқонларда ҳар хил буюмлар кўпайиб қолди. Илгари фақат озиқ-овқат билан қизиққан одамлар энди бошқа нарсаларни ҳам харид қила бошлишди. Жумладан, одамларга хусусий мулк сифатида машиналар сотила бошланди. Лекин одамлар ҳали машинанинг маъносини тушуниб етмаган бўлсалар керак, ҳалеганда уларни харид қила-вермадилар. Машиналар дўқонларда bemalol туриб қолди. Тоҳирий домла биринчилардан бўлиб машина харид қилди ва уни ўзи ҳайдай бошлади. Бу ҳам қай бир даражада янгилик эди. Унинг машинаси «Победа» русумли ўзимизда янги чиқарила бошлаган машина эди. Ҳар гал бўёқларини ялтиратиб, силлиққина юриб келиб, университет эшиги олдилда аста тўхтаганида ва ундан севимли домламиз дўмбоққина гавдасини лапанглатиб тушиб келганида, уни кўриб жуда севинар ва унинг чапдастлигидан яна бир бор гурурланиб қўярдик.

Фалокат кутилмаганда рўй берди – домла қамалиб қолибди – у машинасида кетаётисиб, бир кекса корейс чолни уриб юборибди-ю, чол ўша жойнинг ўзида жон берибди. Тергов ишлари бир-икки ой давом этди. Кейин уни суд қилишадиган бўлишди. Бошқаларга ибрат бўлсин учунми ё ҳукукий билимларни тарғиб қилиш учунми – уни дорилфунунга олиб келиб, студентлар иштирокида суд қилмоқчи бўлишди. Белгиланган куни, белгиланган вақтда одамлар ўртасида «Чёрный ворон» номи билан машҳур бўлган қамоқ машинаси дорилфунун эшиги олдига келиб тўхтади. Бир гуруҳ талабалар уни қарши олди. Милиционер машинанинг орқа томонидаги эшигини очди. Унинг ичида бир метрча нарида ўқлоғидек йўғонликдаги темирдан яна панжара ясалган экан. Унинг ҳам эшигига каттагина қулф осилган. Домла ана шу темир қафас ичида ўтирибди. Бир маҳал у бизни кўрди, шекилли, ўрнидан турди ва панжара олдига келиб, қулочини икки томонга ёйганча, бизга таллингандай бўлди.

Воқеа авжи ёз фаслида рўй бермоқда эди. Кун жуда иссиқ. Қамоқхона машинасининг устидаги темир қафаснинг биронта ҳам тешиги йўқ. Машинанинг борти ҳам, панжаралари ҳам қўл тегизса куйдирадиган дараҷада қизиб кетганди. Домла қафас ичида яланғоч бўлиб олган – устида кенг ва почалари узун трусиқдан бошқа ҳеч нарса йўқ. Бутун баданидан шаррос тер қуюлади.

Бадани мисдек ялт-юлт қиласи. Назаримда у темир қафасга қамалган, ноиложликдан ўзини қаерга уришни билмаётган арслонга ўхшарди.

Кейин суд бошланди. Нобуд бўлган чол ичган экан, кўчадан ўтишда қоидани ҳам бузган экан. Аммо суд буларнинг ҳеч қайсисини инобатга олмади. Чунки машина урмасдан аввал чолгача бўлган масофа зудлик билан тормозни босиб, машинани тўхтатиб олишга етарли экан. Шунинг учун машина ҳайдаган одам, яъни домла тўла айблор, деб топилди ва беш йил қамоқ жазосига хукм қилинди. Нима бўлганда ҳам, домланинг бошида шу кўргилик бор экан, қамоқнинг қозонига насибаси қўшилган эди – туппа-тузук дарс бериб, кўча-кўйларда кечагина мағрут қадам ташлаб юрган одам кўз очиб юмгунча жиноятчи бўлди-қолди.

Бу орада мен ўқишига кетдим. Қайтиб келганимдан бир-икки йил ўтиб-ўтмай, домлам ҳам ўша борса-келмас жойлардан муддатини ўтаб келди. Келгандан кейин яна дорилфунунга, ўқитувчилик ишига тикланди. Домла қайтиб келгач, яна аввалгидай кўтаринки руҳ ва илҳом билан маърузалар ўқишида давом этдими ёки шашти пасайиб, дарсларидан ҳам путур кетдими-йўқми – билмайман. Табиийки, мен домланинг кейинги дарсларига кирганим йуқ. Лекин шундай бўлса ҳам унинг юриштуриши, феъл-автори, авзойига қараб қаноти қайрилганини, аввалги шиддати қолмаганини, ичиди, руҳида нимадир ўзгарганини пайқаш қийин эмас эди. Ҳарҳолда, қамоқ, холангизнинг уйи эмас, у ҳар қандай соғлом одамнинг рангини бемалол заъфарон рангта бўяй олади.

Шундан кейин мен бир неча муддат мобайнинда ўзим билан ўзим овора бўлиб, домла билан тез-тез учрашиб туриш имкони бўлмади. Йиллар ўтиши билан ҳаёт ҳам ўзгара борди. Ниҳоят, ошкоралик ва қайта куриш йиллари келди. Мен бир-икки йил ўқитувчилик қилиш билан бирга, факультетда бошланган партия ташкилотининг қотиблиги вазифасини ҳам бажаришимга тўғри келди. Ўзимиз ўтказадиган мажлислар камлик қилганидай, менга ўхшаш қотиблар зиммасига ойда икки марта дорилфунун партия қўмитасининг мажлисида ҳам иштирок этиш вазифаси юкланган эди.

Партком мажлислари одатда партияга қабул масала-

сидан бошланар эди. Навбатдаги мажлислардан бирида ломла Тоҳирийни партияга қабул қилиш масаласи қўрилди. Одатда бундай қабуллар расмий тарзда амалга оширилар ва партком аъзолари номигагина бир-иккита савол бериш билан чекланиб, «қабул қилинсин», деб қўя қолар эдилар. Лекин бу гал бошқача бўлди – ҳаммани бир савол қизиқтириб қолди – ахир етмишларни қоралаб қўйибсиз, шу пайтга қадар қаерда эдингиз? Нега ариза бермадингиз?

— Мен шу пайтга қадар ўзимни партияга нолойиқ, номуносиб деб ҳисоблардим. Шунинг учун ариза берган эмасман.

Домланинг бу жавоби ҳаммани ҳанг-манг қилиб қўйди. Бутун мажлис аҳли шивир-шивир гапларини йигиштириб, бутун вужудлари қулоққа айланиб, савол-жавобларни тинглай бошлашди.

— Партияга номуносиб бўлганингиз нимада кўринар эди?

Ўша кезларда партиявий мунофиқлиқ ўзининг авж пардаларига кўтарилди. Ахир, партия аъзоси бўлиш учун тўлдириладиган анкета ҳам очиқдан-очиқ пулга сотиладиган бўлди – бундан ортиқ риёкорликни тасаввур ҳам қилиш мумкин эмас. Домласи тушмагур, билмадим, бу гапларнинг ҳаммасидан бехабар эканми, ҳали ҳам партия олдида рост гапириш керак, деган ақидага амал қиласар эканлар.

— Партияга нолойиқлигим шунда бўлган эдик, мен то сўнгги пайтларга қадар миллатчилик ғояларига сингинар эдим!

Тўсатдан партком мажлисида бомба портлагандай бўлди – ахир, «миллатчилик» деган сўз партия тилида ёлғиз айтилмас эди, унга албатта, «буржуа» деган сифат қўшиб айтиларди ва «буржуа миллатчилиги» деган гап партиянинг энг ашаддий душмани ҳисобланарди. Ахир, партия етмиш йилдан бери ана шу миллатчиликни тагтомиригача, энг сўнгги нусхаларигача қизиган омбир билан юлиб ташлашга ҳаракат қилиб келмадими? Орамиздан миллатчилик йўқ бўлсин, мафкурамиз соғлом бўлсин, деб миллионлаб одамларнинг ёстигини қурутмадими? Энди бўлса, мана оқибат – дорилфунуннинг

ишонган домлasi «мен миллатчиман» деб ошкора кўкрагига уриб ўтирибди. Бунақаларни дарҳол йўқотиш керак. Аҳвол жиддий тус олди. У ер-бу ердан домлани қораловчи гаплар эшитила бошлади. Мен ҳам сўз олдим:

— Мен студеңтлик давридан бери домлани биламан. Бу одам бизга на дарсда, на дарсдан ташқари, на кейин бирга ишлаган пайтларда ҳам бирон оғиз миллатчилик руҳида гап айтган эмас. Биз унинг самимийлигини қадрлашимиз керак. Модомики, «мен ўша иллатдан холи бўлганимдан кейин партияга ариза бердим», деяётган экан, унга ишониб, сафимизга олишимиз керак.

Яна бир-икки киши шу маънода гапирди. Ниҳоят, партком аъзолари қийинчилик билан бўлса-да, Тоҳирий домлани партияга олиш ҳақидаги қарорни тасдиқлади.

Можаронинг ҳаммаси кейин — шаҳар партия қўмитасида бошланди — Тоҳирий домланинг ҳужжатлари етиб келиши билан шаҳар қўмитасидагилар дорилфунун парткомини ўртага олиб талаша бошлашли.

— Ана, кўрдиларингми! Дорилфунун миллатчилар уясига айланиб кетган. Биз хушёрлик қилмаганимизда, партия сафига ниқобланган душман кириб оларди. Ана унда кўрардингиз! Бу масала жуда жиддий, сиёсий масала. Мафкура билан ҳазиллашиб бўлмайди...

Шунга ўхшаш шаллақилик билан айтилган гаплар ҳар хил катта-кичик партия ташкилотларида салкам ярим йил давом этди-ёв. Кейин қайси бир амалдорнинг бир аёл билан дон олишувлари тилга тушиб, дорилфунун масаласи бир оз унут бўлди.

Тоҳирий домла эса ўшандан кейин ўнгарилмади — бу ажойиб инсон одамлар учун хизмат қилди, улар учун кучини, қалб қўрини аямади, қанча-қанча талабаларнинг қалбини илм нуридан мунааввар қилди. Аммо жамиятда унинг меҳнатлари қадр топмади. Шоир айтиганидек, «пешонасини силашга бир меҳрибон кўл... нондек арзанда» бўлди. Бироқ, бари бир шундоқ одамларнинг яшагани туфайли бу олам тенгсиз гўзал.

## ТИЛШУНОСНИНГ ТИЛСИМЛИ ҚИСМАТИ

Турсун Иброҳимов бизга «Тилшуносликка кириш» фанидан дарс берарди. У қотмадан келган, бўйдор, бармоқлари мусиқачиникига ўхшаш узун-узун ва нозик эди. У ҳали 40 га кирмаган эди. Шундай бўлса-да, соchlari бутунлай оқариб кетган, уларнинг ичидаги биронта ҳам қора тола кўринмасди. Домла ҳамма вақт соч-соқолини қиртишлаб олиб юрар, кийимлари ҳам қишин-ёзин жуда ораста бўларди. Домланинг ўзи ҳам истараси иссиқ одам эди. У кам куларди, бироқ бирор муносабат билан жилмайиб кўйса, шунда ҳам кўзидаги мунг йўқолиб кетмас, табассуми ҳам алланечук ғарибона ва аянчли кўринарди. Лекин биз талабалар журъат қилиб, бу мунгнинг сирини сўрай олмасдик. Домла маъруза ўқигандаги мавзудан чиқмас, ҳар хил олди-қочди гапларни гапирмас, талабаларни ҳам ўтлаб кетишига йўл қўймас эди. Маърузани эса у жуда чиройли ўқирди. Бизнинг гуруҳимиз кичкина – бор-йўғи 11 киши эдик. Шунинг учун домла маърузани бемалол ўтириб ўқийверарди. Деярлик унинг ҳар бир гапи биз учун янгилик эди, шунинг учун мароқ билан тинглар, домлага кўп савол берар ва ҳатто, баъзан баҳслашиб ҳам турадик. Домла саволларга батафсил жавоб берар, баҳслашишдан ҳам қочмас эди. Шу тариқа биз тилнинг нима эканини, қандай пайдо бўлишини, қанақа туркумлар ва оиласаларга ажрашини ва яна аллақанча ажойиб нарсаларни билиб олдик. Одатда тил зерикарли фанлар сафига киради, аммо Турсун Иброҳимов унинг замирида бир дунё сиру асрорлар борлигини бизга кўрсатиб берди. У пайтларда тилшуносликка кириш бўйича ўзбек тилида дарслик ҳам, қўлланмалар ҳам йўқ эди. Шунинг учун биз қизиқишимизни қондирмоқ учун рус тилидаги адабиётларга мурожаат қилдик ва бу ҳол бизнинг тилшунослик бобидаги билимларимизни кенгайтириши билан бирга, завқ-шавқимизни ҳам орттириди. Жуда

яхши эсимда – ўша кезларда мен Успенскийнинг «Слово о словах» китобини ўқиб чиқиб, бу ажойиб китобни бир умрга яхши кўриб қолган эдим.

Турсун Иброҳимов маъruzаларни яхши ўқир, талабаларга муомаласи яхши эди, лекин дарс тугаши билан дарҳол ҳеч нарсага қарамай, факультетдан чиқиб кетарди. Домла дарсдан ташқари вақтларда ҳеч ким билан гаплашиб ўтиришни истамасди. Бу ҳам биз учун бир сир эди. Унинг нега бундай қилишини билишни истардик, лекин буни ҳам сўрашта журъат қилмасдик. Домла 1-курсдаёқ маъruzalарини тамом қилди, шу билан у бизга бошқа кирмаслиги керак эди. Аммо 50-йилларнинг бошида тилшунослик бобида шунаقا катта можаролар бошланиб кетдики, бутун мамлакатда бўлгани каби бизда ҳам тилшуносликка кириш фанини бутунлай бошқатдан ўқитишга тўғри келди.

Биринчи курсда Турсун Иброҳимов ўқиган курс «Марксча тилшунослик» деб аталарди. Бу ном остида бизга академик Маррнинг тилшунослик бобидаги «Марксистча» таълимогини ўқитишар эди. Биз танқидий фикр юритишга ўрганмаганимиз учун бизга нима дейилса, ҳаммасини чин ҳақиқат деб қабул қиласа ва тўтиқушдек такрорлаб юрадик. Академик Марр кавказ тиллари бўйича жаҳондаги энг йирик мутахассис ҳисобланарди. Лекин бу унга камлик қилган шекилли 30-йилларнинг ўртасида бу соҳада янги таълимот яратишга аҳд қилибди ва яратибди ҳам. Бу янги таълимоти ҳамма олий ўкув юртларида ўқитиладиган бўлибди.

Гап шундаки, 1938 йилда Сталиннинг таҳрири остида «ВКП(б) тарихи. Қисқа курс» деган китоб нашрдан чиқди ва бу буюк асарни етти ёшдан етмиш ёшгача бўлган ҳамма мақтаб-мақтаб ўрганишга киришди. Китобнинг бир боби марксистик диалектикага бағищланган эди. Бу бобни бошдан-охир Сталиннинг ўзи ёзган эди. Табиийки, бу қисм кўкларга кўтариб мақталди, жаҳон фанининг оламшумул ғалабаси деб баҳоланди. Академик Марр шу бобда айтилган диалектика қонунларини олиб, ҳеч нарсани ўзгартирмай, тўппа-тўғри тилшуносликка татбиқ этган. Шунга кўра: 1. Тил – синфийдир. Ҳар қандай синф ўз тилига эга бўлади. 2. Тил – қарама-қаршиликлар бирлиги ва курашидан иборат.

3. Тилдаги миқдор ўзгаришлари сифат ўзгаришларига олиб келади. 4. Тил портлашлар йўли билан ривожланади, деган илмий хуносага келади. Бундай назарияни кўпдан-кўп одам қабул қиласган ва Маррни ҳам марксист тилшунос деб кўкларга кўтариш бошланган. Бироқ мамлакатда бу таълимотнинг ўта сохталиги, ғайрииммий эканлиги, диалектика қонунларини тилга бунақа кўр-кўрона татбиқ қилиб бўлмаслигини тушунган одамлар ҳам бор экан. Ниҳоят, улар сира қўрқмасдан, Маррни чайқовчилигини ошкор қилувчи «Правда» газетасида грузин тилшуноси Чекобованинг катта бир мақоласи эълон қилинди. Унда Маррнинг таълимоти шундай қаттиқ танқид қилинган эдик, унинг соғ жойи қолмаган эди. Грузин олимни жуда пишиқ мантиқ борасида Маррнинг қараашлари мутлақо хато эканини исбот қилиб берган. Мақола мунозара қабилида эълон қилинган эди. Орадан кўп ўтмай, мунозарага Сталин аралашди ва у Чекобовани ёқлаб чиқди. Сталин тилнинг синфий бўлиши мумкин эмаслигини кўрсатиб берди. Дарҳақиқат, ҳеч қайси бойлар ва камбағаллар бир-бирларини тушунмайдиган бошқа-бошқа тилларда гаплашмайди, тил – ижтимоий ҳодиса, у бутун ҳалқ учун алоқа куроли бўлиб хизмат қиласди. Тиллар портлаш ёки сакраш йўли билан ҳам тараққий этмайди, ахир, тарихда бирон марта бирон революциядан кейин бирор-бир янги тил пайдо бўлиб қолган эмас-ку.

Хуллас, биз шу қадар жўн, шу қадар оддий ва шу қадар табиий нарсаларни хаёлимизга ҳам келтирмаганимизга хижолат бўлиб, Сталиннинг қараашларини қабул қилишдан бошқа иложимиз қолмаган эди. Бу воқеа бизга бўлар-бўлмас нарсага марксизмни суқиширавериш керак эмаслиги бобида жуда яхши сабоқ бўлганди. Лекин масала шу билан хотима топгани йўқ. Томошанинг каттаси кейин бошланди. Ҳамма олий ўкув юртларида ва илмий муассасаларда Сталиннинг мақолалари ўрганиб чиқилди. Ўрганиш жараёнида эса уларга ўрнашиб олган яширин ёки ошкора маррчилар фош қилина бошланди. Энг катта машмаша СССР Фанлар академиясининг Тилшунослик институтида содир бўлди. Энг катта маррчилар ўша ерга ўрнашиб олишган экан.

Мажлисларда уларнинг энг майда, энг арзимас гуноҳларигача танқид қилинди ва улар ўта шафқатсизлик билан ишларидан ҳайдалди. Маррчиларга муносабат байни халқ душманларига муносабатдай тус олди. Бироқ ҳеч ким «Ахир у пайтларда маррчи бўлмасликнинг ўзи мумкин эмас эди-ку! Маррга қарши лом-мим деб оғиз очган ҳар қандай одамнинг суроби тўғирлаб қўйиларди-ку?» деб сўрайдиган одам топилмади. Хуллас, маррчилар қаторига бизнинг домламиз Турсун Иброҳимов ҳам кўшилди. 42 ёшга кирган, яъни анча-мунча ҳаётий тажриба орттирган, илм соҳасида каттагина бойлик йигиб улгурган, балоғат палласига қадам қўйган домла ишдан кувилди, унинг тирикчилиги жуда ночор аҳволга тушиб қолди. Уни жазоловчи органлар чақириб сиқувга олдилар, лекин ҳар қалай қамамадилар.

Ўрта Осиё Дорилфунунидан кетишга мажбур бўлди. Тасаввур қилинг – ҳеч қанақа гуноҳ иш қилмаган, айбисиз, ҳалол, виждонли бир одам мутлақо даромад манбаидан маҳрум қилинса?

Тўғрисини айтганда, мен домланинг кейинги ҳаётидан, аламли саргузаштларидан унчалик хабардор эмасман. 1955 йилларда Москвадан қайтиб келиб, филология факультетига ишга кирганимда, домла ортиқ бу ерда ишламас эди. Унинг кейинги қисмати тўғрисида биринкита одамдан суриштирган бўлдим, лекин ҳеч кимдан тайинли бир гап чиқмади. Шу билан кейин ўзим билан ўзим овора бўлиб кетдим. Домла кўзидағи тубсиз мунг билан, жиндай одамовилиги билан бот-бот хаёлимда пайдо бўлиб қолар, у киши билан боғлиқ ёрқин хотиралар кўнглимда уйғонарди-ю, яна бир оздан кейин кундалик ташвишлар хаёллар йўлини тўсиб, мени эски изга солиб юборар эди. Фақат 80-йилларга келгандагина мен домланинг кўзидағи мунг сирини англагандай бўлдим.

\* \* \*

80-йилларда менга бир неча муддат Ўзбекистон давлат архивида ишлашга тўғри келди. Кунлардан бирида ҳужжатларни титкилаб ўтириб, бир қофозга дуч келдим. Бу қофоз Турсун Иброҳимов тўғрисидаги алла-

қандай маълумотнома эди. Унда Турсун Иброҳимовнинг 1938 йилда қамоққа олингани, сўроқлар давомида уни маҳфий аксилинқилобий ташкилотга аъзо бўлган 20 ёки 25 киши устидан маълумот бергани, кейин судда бу кўрсатмалардан воз кечгани, ниҳоят унинг отувга хукм қилингани ва ўлим камерасида бир ойга яқин ёлғиз ёттани айтилган эди. Бу гапларда ҳеч қандай мантиқ йўқ. Албатта, қонхўр органлардан бирор мантиқни кутиш асло мумкин эмас. Бундан ташқари Турсун Иброҳимовнинг бирваракайига 25 кишининг номини айтиб, улар устидан қораловчи материал берганига ҳам сира ишониб бўлмайди. Агар бу гап тўғри бўлса-да, маҳфий ташкилот маҳфий эмас, ошкора бўлган экан-да. Хуллас, бу қоғоз менда унчалик ишонч туғдирмади. Мен бу қоғоздан фақат бир нарсани билиб олдим: Турсун Иброҳимов ҳам юз минглаб ватандошларимиз каби шўро турмаларининг қозонидан «насибасини» еб чиққан экан-да! Демак, унинг кўзларидаги мунг, юзининг заҳиллиги, одамлардан ўзини олиб қочиши бежиз эмас экан-да? Нега бундай бўлдийкин? У турмада ўтказган бир йил-бир ярим йиллик умри давомида қандай азоб-уқубатларга рўпара келдийкин? Унинг бошига тушган қайси ёвузлик, қайси қора кунлар авжи қирчиллама йигитлик ёшида унинг соchlарини оппоқ қордек оқартириб юбордийкин? Бу саволларга профессор Наим Каримовнинг «Ўзбекистон овози» газетасида 2003 йил 14 август куни босилган мақоласидан қисман жавоб топдим. Наим Каримов Турсун Иброҳимовнинг тергов иши билан танишиб чиққан ва иш мукаммал маълумотларга эга бўлмаса-да, ундан айрим фактларни келтирганки, бу фактлар домла сиймосини бир қадар тўлароқ тасаввур қилишимизга ёрдам беради.

Турсун Иброҳимов 1908 йилда Самарқанд вилоятининг Булунғур туманига қарашли бир қишлоқда таваллуд топган. (Афсуски, қишлоқнинг номи ҳам, қандай оиласда таваллуд топгани ҳам айтилмаган.) Олий маълумотли. (Уни қаерда ўқигани ҳам аниқ эмас. Аввал Самарқандда, кейин Ленинградда ўқиган деб тахмин қилиш мумкин — сўроқ вақтида терговчи ундан Поливанов ва Самойлович каби олимлар тўғрисида қораловчи кўр-

сатмалар беришни талаб қилганга ўхшайди.) 1929 йилдан Тошкентта кўчиб ўтади ва Фанлар академияси қошидаги Тил ва адабиёт илмий текшириш институтида илмий ходим бўлиб ишлайди. Қисқа муддат ичидагачагина рисолалар ва илмий тадқиқот асарлари эълон қилинади.

1938 йил 28 апрелда қамоққа олинади. Махфий Контрреволюцион миллатчилик ташкилотининг фаол аъзоси сифатида айбланади. Ҳатто, бу ташкилотга Сафо Зуфаров ва Назир Иброҳимовларни жалб қилган деб, унинг миллатчилиги «далилланади». Афтидан, Турсун Иброҳимов турмада сўроқ жараёнида мислсиз қийноқларга дучор қилинган. Уни аёвсиз калтаклаганлар, бир неча кунлаб карцерларга согланлар, ухлагани кўймаганлар, оч қолдирганлар. Турсун Иброҳимовнинг ўзи ўша пайтда берган кўрсатмаларидан бирида уни «конвойер» усулида азоблашганини айтади. Бу усулга кўра маҳбус оёғидан шифтга осиб қўйилар ва шу аҳволда 4–5 соат осилиб турар экан. Бундай азоб бир эмас, бир неча кунда такрорланиб тураг экан. Унинг оёқлари шишиб, юриб бўлмайдиган ҳолатга келиб қолган. У ҳатто оёғига пайпогини ҳам кия олмай қолган.

Биз баъзан қатағонга учраган одамлардан гина қилиб, уларнинг турмада баъзи бир одамларнинг номини айтиб, терговчига «компрамат» берганидан ўпкалаймиз. Шу баҳона унинг номини қорага чиқаришга уринамиз. Мен одамларнинг хиёнаткорлиги, сотқинлигини жуда ёмон кўраман ва гап-сўзсиз уларни қоралайман. Шу билан бирга Турсун Иброҳимов каби аждарнинг комига тушиб қолиб, даҳшатли қийноқларга дучор қилинган одамларнинг аҳволини ҳам тушунмоқ керак, деб ўйлайман. Қани энди қатағон қилинганларнинг ҳаммаси мегин иродали бўлса, ҳар қандай қийноқларга дош беролса... Аммо инсон инсон-да! Унинг кўпчилиги жисмоний зўравониклар, қийноқлар кучайса, руҳан таслим бўлади, ёлғон гапириб бўлса-да, азобдан кутулиш йўлини ўйлайди. Ўша эски гап: «Золим агар жафо қиласа, Олло дегил!» Турсун Иброҳимов эса зиёли эди, у жисмоний қийноқлар тўғрисида инквизиция тўғрисидаги китобларда ўқиган бўлса ўқигандир, лекин «баҳтли» со-

вет замонасида ўзим шахсан унга рўпара қеламан, деб етти ухлаб, тушида ҳам кўрмаган. Шунинг учун терговчининг ваҳшиёна зулмларига чидаёлмаган бўлса, бунинг учун уни қоралашдан аввал бир оз ўйлаб кўрмоқ, иложи бўлса, ўзингни унинг ўрнида тасаввур қилиб кўрмоқ зарур. Бунинг устига Турсун Иброҳимов суд пайтида ўша ёлғонларнинг ҳаммасидан қайтибди-ку. Бу иши ҳам уни анча-мунча оқлашга хизмат қиласди. Айни ана шундай қилмоқ учун, «мен жисмоний зўравонлик ва зулм туфайли шундай дейишга мажбур бўлдим» демоқ учун ҳам катта жасорат ва мардлик керак. Ўлим камераси-чи? Мен бунақа камерада ўтирган эмасман, лекин буюк француз адаби Виктор Гюгонинг «Клод Ге» қиссасини ўқиганман. Унда ҳар соат, ҳар дақиқа сайин музхонага ўхшаш тўрт девор ичидаги ўтириб, «тиқ» этган товуш эщтилса, «ана жонимни олгани Азроил келяпти» деб ваҳимага тушиш, юраги така-пука бўлиш жуда-жуда оғирлиги ишонарли кўрсатиб берилган. Турсун Иброҳимов шунча қийноқлардан кейин ҳам яна ўз қасбига қайтган ва болаларга сабоқ беришда давом этган. Демак, ўлим камераси ҳам уни бука олмаган, синдира олмаган, фақат унинг кўзига мунг бергану одамларга бўлган ишончини сусайтирган, холос. Шўро замонида яшаган одамларнинг баъзилари ҳозир ҳам «Оҳ, у замонлар...» дегандай ўша йилларни қўмсаб қоладилар. Бундайлар ўйламайдики, инсоният тарихида ҳеч қачон бундай иккюзламачи, мунофиқ давлат бўлган эмас. Зулм ҳеч қачон бу даражада ҳаддан ошган эмас. А. Солженициннинг «Архипелаг Гулаг»и чет элларда босилгандан кейин бир мухбир: «Ҳозир Совет Иттилоғида нечта сиёсий маҳбус бор?» деб савол берган эди. Солженицин ҳеч иккиланмасдан «Икки юз эллик миллион киши» деб жавоб берган. 30-йилларнинг ўртасида эса қатағон аланглари гуриллаб ёниб ётганда давлат зулмидан азият чекмаган биронта ҳам оила қолмаган бир шароитда Сталин партиявиий съезд минбаридан бутун дунёга ҳайқирди: «Энг сўнгги совет кишиси ҳам энг мақтаган, энг олдинги буржуа одамидан бир бош юқори туради, чунки совет кишиси капиталистик зулм кишаларидан буткул озод бўлган инсондир!»

Бу сўзлар айтилгандан кейин кўпгина совет кишилари уни ҳақиқат билиб, гердайиб юришди. Ҳолбуки, қатағоннинг энг авж палласи 1937 йилга тўғри келганидан кейин яна бир неча йилларгача тўхтагани йўқ. Турсун Иброҳимов 40-йилларда яна иккинчи марта қамоқقا олинади. Бу гал ҳам у яна бир неча муддат турма азобини тортади. Бироқ Наим Каримовнинг айтишича, домланинг бу галги қамалиши ҳақида тайнинли бирор маълумот йўқ. Ҳатто унинг қачон озод бўлгани ва қачон ишга қайтгани ҳам маълум эмас. Шу ўринда табиий бир савол туғилади – қудратли совет ҳокимиятининг бу камсукум ва қамтарин инсонда қандай хусумати бор эдики, у шўрликни бу қадар мислсиз қийноқларга дучор қиласан? Ахир у бирон жойда, бирон марта шўро ҳукуматига қарши бирон оғиз ёмон гап айтмаган бўлса, бирон иншоотни портлатмаган бўлса, давлатнинг бирор сирини ўғирлаб, чет эллик жосусларга сотмаган бўлса. У бақадри имкон дарсини бериб, рўзгорини тебратиб юрган бир инсон бўлса. Табиатан қонунга хилоф иш қилиш қўлидан келмаса. Аксилинқилобий ташкилотга яқин йўламагани бошқалардан кўра терговчиларга яхши аён бўлса. Негаки, ишда буни тасдиқлайдиган бирон-бир факт бўлмаса. Ахир, ўз фуқаросини бекордан-бекорга қийнаган, эзган давлат ҳеч қачон халқ ўртасида обрў топмайди-ку. Шундоқ экан, ўша йиллардаги қатағонларнинг юз минглаб одамларнинг ёстигини курилган қиргин-баротнинг сабаби нимада? Албатта, совет ҳукуматининг Турсун Иброҳимовда ҳеч қанақа хусумати йўқ эди. Турсун Иброҳимов бу ҳукуматта нисбатан мутлақо душманлик кайфиятида эмас эди. Лекин у зиёли, зиёли бўлганда ҳам истеъодди, фикрлайдиган зиёли эди. Фикрлаш эса таққослаш дегани, таққослаш албатта бошқа оламни тақозо қиласди. Иштонсиз одам чўпдан қўрқар экан. Ўз пойдеворининг пишиқ-пухта эмаслигини, арзимаган шамолга ҳам чидаётмай, қулаб тушиши мумкинлигини яхши билган совет доҳийлари ҳеч нарсадан қўрқмасалар-да, фикрлайдиган зиёлилардан ўтдан қўрқандай қўрқсан ва уларни заарсизлантиришга ҳаракат қиласан. Шунинг учун қаерда туғилганидан, қайси ўлкада улғайганидан, қайси миллатта ман-

сублигидан қатъи назар, барча зиёли зотини гаҳ деса кўлга қўнадиган бинойи қушга айлантиришга ҳаракат қилган. Бунинг эса энг осон йўли тоталитар давлатда зўравонлик ва террор йўли билан ҳаммани кўркув бандасига айлантириш, бутун мамлакатда эса қўркув салтанатини барпо этиш бўлган. Шу тариқа Москва «зиёлини қурит» дея буйруқ берган бўлса, органларнинг жойлардаги гумашталари эса конкрет одамларни ўзлари тузилган рўйхатлар бўйича йўқотиш ҳаракатига тушган. Бу мудҳиш иш шу қадар катта моддий ва маънавий зарар етказганки, унинг ўрнини ҳозиргача ҳам битириб бўлинган эмас. Беихтиёр Чўлпоннинг «Кишан, гавдамдаги излар ҳали ҳам битгани йўқдир» деган сўзи эсга тушади.

Қирғин-барот сиёсатининг жами мантиқизлиги шундаки, унинг ўқлари биринчи навбатда энг истеъодди, энг ёрқин одамларга қарши қаратилган эди. Одам истеъодди бўлса бас, шунинг ўзи шўро ҳокимияти ва унинг шоввоз югурдаклари назарида энг катта гуноҳ эди. Турсун Иброҳимов бўлса ўоят истеъодди эди. Мен бу гапни унинг ўзим тинглаган маърузаларигагина қараб айтиётганим йўқ. Умуман, у 30-йилларнинг бошида тиљунослик илмининг ёрқин юлдузидай порлаб чиқди. Турсун Иброҳимов «Тил ва орфография масалалари», «Ўзбек тилида феълнинг ясалиши», «Ўзбек адабий тили орфографияси бирлиги учун», «Ўзбек тилининг қорақалпоқ шеваси» каби мақолалари унинг салоҳияти нечоғлиқ юқори бўлганидан далолат бериб турибди. Ким билади – агар бу инсоннинг қанотлари қайрилмаганида унинг парвозлари қанчалик юқори бўларди. Ким билади дейсиз – биз бу камтарин ва камсукум олим сиймосида кимни йўқотдик экан?

Турсун Иброҳимовнинг аламли тақдирини ўйласам, ўтган асрда мамлакатимиз бошидан қанчалик қора кунлар ўтганини ўйлаб, кайфиятим бузилади.

Турсун Иброҳимовлар эркин ва бемалол фаолият кўрсатмоқлари учун шароитга эга бўлганда, эҳтимол, бугунги авлод кўп нуқсонлардан холи бўлармидик ва аллақачон дунёнинг етук миллатлари қаторидан ўрин олармидик.

## ЯНГИ АДАБИЁТШУНОСЛИГИМИЗНИНГ ТҮНГИЧ ВАКИЛИ

Биз университетда ўзбек адабиётини биринчи курснинг ярмидан бошлаб ўқий бошлаган эдик. Унгача адабиётшуносликка кириш, ўзбек халқ оғзаки ижодиёти каби фанларни ўқидик. Ўзбек классик адабиёти тарихи бир неча қисмларга бўлиб ўқитилар экан. Унинг биринчи қисми – «Қадимий давр ўзбек классик адабиёти»ни профессор Абдураҳмон Саъдий ўқимоги керак эди. У пайтларда факультет ҳали ёш – эндиғина унинг ташкил қилинганига 5 йил бўлган эди. Шунинг учун факультетда фақат биттагина профессор бор, биз талабалар эса умуман, ҳали тирик профессорни кўрмаган эдик. Шу сабаб ҳаммамиз унинг қанақа бўлишини, қандай дарс беришини тезроқ кўришга қизиқиб, унинг дарсини сабрсизлик билан кута бошладик. Ниҳоят, биз кутган кун етиб келди – кўнғироқ чалиниб, эшик очилди-да, аудиторияга унча янги бўлмаса ҳам, ҳали оҳори тўкилмаган, бир-икки жойига бўр тегиб, сал-пал оқарганини ҳисобга олмагандга шинамгина костюм-шим кийган барваста одам кириб келди. У чиндан ҳам ҳақиқий профессорларга ўхшаш ғоят салобатли эди. Гавдаси йўғон, елкаси сезилар-сезилмас букчайган, тўртбурчакрок кўрина-диган бошидаги сочи оппоқ, кўзида кўзойнак, икки бети қип-қизил бир одам эди. У тийрак кўzlари билан ўтирганларга бир-бир қараб чиқиб, ўзини таништириди.

– Менинг исмим Фабдураҳман, фамилиям Саъдий. Мен сизга ўзбек классик литературасининг историясидан дарс берайн.

Шундай деб, у ўзбек тилига русча ва татарча сўзларни аралаштириб, маъruzасини бошлади. Унинг овози йўғонгина эди. Маъruzасини босиқлик билан ўқирди. Баъзан бирон парчани ўқиб бермоқчи бўлиб қолардида, анча уриниб қолган чарм папкасидан ҳир қанча

қоғозларни оларди. Кейин уларни бир-бир титкилаб кўздан ўтказиб чиқарди, агар буларнинг ичидаги излагани топилмаса, папкадан яна бир даста қоғозларни олиб титкилашга тушарди. У қоғозни топгунча, биз тишимизни тишимизга кўйиб, ўз хаёлларимиз оғушида сайд қиласардик. Ниҳоят, қоғоз топиларди, Саъдий домла уни тез-тез ўқиб берарди-да, маърузани давом эттирас эди. У ўзбек адабиётининг туркий халқлар адабиёти таркибиға киришини, шунинг учун кўп ёдгорликлар, айниқса, қадими тарихга мансуб ёдгорликлар – ҳамма туркий халқлар учун муштарак эканини гапирди. Шунинг учун ўзбек адабиётини ҳам Ўрхун-Энасой ёдгорликларидан бошлаган маъқул эканини айтди. Шундан сўнг академик Радлов ҳақида, унинг толмас саёҳатчи ва кашфиётчи экани тўғрисида гапирди. Сўнг Ўрхун-Энасой дарёлари бўйидаги тошбитикларни Радлов кашф этганини айтди. Бу-ку бизга аён бўлди-я, лекин Ўрхун дарёсининг қаерда эканини билмаганимизча қолавердик. Тахминан, Осиёда бўлса керак, деб ўйладик. Лекин битикларнинг ўзини домла анча батафсил тушунтириди. Қадимда туркий халқларнинг ўз ёзуви бўлган экан, бояги тошбитиклар ҳам арабча ёзувдан анча фарқ қила-диган ёзувда тошга ўйиб ёзилган экан. Улар қадимги туркий хоқонларига бағишланган, баъзиларида хоқонлар улувланади, баъзиларида эса уларнинг вафот этган саналари тўғрисида маълумотлар берилади. Тошбитикларнинг айримларидаги ёзувлар шеърда битилган экан. Саъдий домла уларнинг бадиий хусусиятлари ҳақида анча гапирди, бу шеърлар халқ қўшиқлари оҳангидага ёзилганини уқтириди. Кейин гапини аниқроқ тушунтириш учун қайси бир халқ қўшиғидан икки сатр мисол келтирди-да, уларнинг оҳангига «рита-рита-рита» қўшиғини эслатди. Кейин тошбитиклар худди шу оҳангга тушишини кўрсата бошлади. «Рита-рита»ни у уч-тўрт қайтарди, кейин битикдаги шеърий парчани ўқиди:

Йигирма кун ўлтуриб,  
Бу тошға бу тонға қўб.  
Кулли тегин битидим,  
Кулли тегин битидим.

Кейин яна шеърий парча оҳангига мослаб, «рита-рита-рита-там» бошланди. Бу гал энди росмана қўшиқ айтаётгандай, куйни баланд овозда айтарди. Сўнгра куй маромига бир қўлини силкита-силкита айтди. Кўп ўтмай, бу қўл ёнига иккинчиси қўшилди. Энди улар ҳавода силкинмай, раққосаларнинг қўлидай икки томонга ёйилиб, бир юқорига кўтарилиб, бир пастга тушиб ҳаракат қила бошлади. Куй тобора тезлашиб борарди. Домла ҳам энди турган жойида тинч туролмай, оёқларини ҳам тапир-тупур ерга ура бошлади. Бу орада биз ҳам чапак чалиб, қўшиққа жўр бўлдик. Буни кўриб, домла доска олдидаги майдончада «рита-рита»га росмана рақсга туша бошлади. Энди унинг куйлаши гавдасига мос келмайдиган енгиллик касб этган эди. Домла оёқларини ерга уриб-уриб, тиззалаб ўтириб-туриб, хаёлан ясалган саҳнада чаппар уриб ўйнарди, оғзидан эса тобора тезлашиб бораётган «рита-рита»ни қўймас эди. Бу аҳвол камида ўн беш дақиқа давом этди. Домла қизариб, бўғилиб кетди. Нихоят, у стол ёнидаги курси олдига келиб, гурс этиб унга ўтириди ва пешонасидан, юзидан оқаётган терларини дастрўмоли билан арта бошлади. Шу пайт дарс тугаганини билдириб қўнгироқ чалинди. Профессор Саъдий ўзбек адабиётидан иккинчи семестрнинг охиригача маъruzалар ўқиди. Лекин биринчи кундаги рақси бошқа такрорланмади. Шундай бўлса-да, Саъдийнинг дарслари анча қувноқ ва завқли ўтарди. Биз бу камтар ва хокисор домлани яхши кўриб қолдик. Домла бизга Алишер Навоийгача бўлган ўзбек адабиёти тарихидан анча яхши маълумот берди. Тўғри, бу маърузалар назарий жиҳатдан унча теран эмасди, лекин фактларга бой бўларди, домла ҳар хил қадимий китоблардан олинган маълумотларни биз билан барабар баҳам кўрарди. Шундай бўлса-да, биз ўзбек адабиёти тарихининг ilk босқичидан том маънода олий маълумот олдик, деб айта олмайман. Мен бу гапни Саъдий домлага таъна қилиб ёки уни камситмоқчи бўлиб айтаётганим йўқ. Аксинча, домла имкон қадар билган нарсларини бизга сингдиришга ҳаракат қилган ва бунга анча-мунча муваффақ ҳам бўлган. Мен бу ўринда ўша пайтдаги ўқув тизимининг фариблиги ва нокулайлигини

айтмоқчиман. Гап шундаки, у пайтларда умумий тарихимиз ҳам, адабиёт тарихи ҳам ҳали дурустроқ ўрганиб чиқилгани йўқ эди. Айрим шоирлар ижодининг бойлиги, маҳоратининг юксаклиги (масалан, Лутфий) ҳақида кам гапирилар эди. Бундан ташқари ўзбек адабиётига анча-мунча менсимай қараларди. Мавжуд ёдгорликлар кам ўрганилгани важидан етарли даражада ўз ўрнига кўйиб ёритилмас эди. Биргина мисол келтираман. Юсуф Хос Ҳожиб деган шоирнинг «Кутадғу билиг» деган асари бор. Тўғри, биз ўқиган кезларда бу асарнинг матни маълум эди-ю, лекин ҳали тадқиқ қилинмаган, изоҳлар яратилмаган, таҳлил қилинмаган эди. Унинг айрим парчалари 1941 йилда чоп этилган Ўзбек адабиёти тарихи хрестоматиясининг биринчи жилдига киритилган эди. Кейинчалик яна ўн йилларча вақт ўтгандан сўнг унинг бир бўлаги кичкинагина рисола тарзида эълон қилинди. Албатта, бу парчаларга қараб, асарнинг салмоғи ва маданий ёдгорликлар тизимида тутган ўрни тўгрисида дурустроқ тасаввур ҳосил қилиш мумкин эмас эди. Кейинчалик, маълум бўлдики, туркий халқларнинг муштарак ёдгорлиги бўлмиш бу буюк асар ўша пайтларда бизга тушунтирганларидек, шунчаки дидактик характердаги асар эмас, чинакамига юксак сифатларга эга бўлган бадиий асар экан ва у ўзининг қиймати жиҳатидан қадимий давр туркийлар ҳаётининг бадиий қомуси бўлиб, жаҳон адабиётининг энг сара ёдгорликлари қаторига кирап экан. Уни ҳеч иккисига майдан «Маҳабхарата», «Шоҳнома», «Сад ҳақида қўшиқлар» каби дурдона асарлар қаторига қўшиш мумкин. Бу ҳақиқат XX асрнинг 80-йилларига келгандагина маълум бўлди. Бу ўринда қардош уйғур адабиётшуносларининг жуда катта хизматини таъкидламоқ керак. Уйғур автоном республикаси Ижтимоий фанлар Академияси таркибидағи тиллар тадқиқоти институти 1983 йилда «Кутадғу билиг»ни нашрга тайёрлаш бўйича таҳrir ҳайъатини белгилайди. Бу ҳайъат икки йил меҳнат қилиб, китобни 1984 йилда нашриётида босиб чиқарилади. Китоб Миллатлар адабиёти нашриётида босиб чиқарилади. Бу китобнинг дунё юзини кўриши барча туркий халқларининг маданий ҳаётида жуда катта воқеа бўлди. Китоб фақат ҳажми катталиги билангина эмас, мазмунининг теранлиги,

бадиий хусусиятларининг юксаклиги билан ҳам эътиборга лойиқдир. Кўриниб турибдики, бу асар ўқитилмаганида профессор Саъдийнинг мутлақо айби йўқ. Мен бу ўринда турли сабабларга кўра талабалик йилларида ўтмишдаги маданий бойликларимизни тўла ўзлаштириб олмаганимиз тўғрисида гапиряпман. Билимимиздаги бу кемтикликни кейинчалик ҳар қайсимиз ўзимизча мустақил битиришга ҳаракат қилдик. Профессор Саъдийнинг дарслари эса ўзига хос беғубор ва бетакрор дарслар сифатида хотирамизга ўрнашиб қолди. Домланинг ўзи ҳам бизга «ҳақ йўли»ни ўргатган устоз-муаллим сифатида хотирамизда қолди. Мен дорилғунунни битиргандан бир неча фурсат ўтгандан кейингина Саъдий тўғрисида узоқ-юлуқ бўлса-да, баъзи бир маълумотларни йиғишга муваффақ бўлдим.

\* \* \*

XX аср бошларида Татаристонда жуда катта маданий-маърифий кўтарилиш юз берди. Адабиёт, санъат ва маориф соҳаларида Абдулла Тўқай, Фотиҳ Карим, Заки Валиди Тўғон каби атоқли арбоблар етишиб чиқди. Улар ўртасида фақат Татаристонда фаолият кўрсатмай, бошқа қардош туркий халқлар ўртасида ҳам маданий-маърифий ишларни авж олдириш ғоялари тарқатила бошланди. Шунда 20-йилларнинг бошларида Ўзбекистонга бир гуруҳ татар зиёлилари ихтиёрий равищда сафар қилдилар. Булар орасида Абдураҳмон Саъдий ҳам бор эди. Афсуски, мен Саъдий сиймосини батафсил ўрганишни ўзимга вазифа қилиб олганим йўқ – мен ўша давр матбуотини ўрганишда чиқиб қолган баъзи материаллар асосида айтдим. Шунинг учун унинг Ўзбекистонга қачон ва қайси шаҳарга келгани, қаерларда ишлагани, қандай асарлар эълон қилгани тўғрисида тўла маълумотга эга эмасман. Менга фақат шуниси маълумки, у 20-йилларнинг бошиданоқ вақтли матбуотда жорий ўзбек адабиёти тўғрисида мақолалар эълон қила бошлаган. Шуниси алоҳида эътиборга моликки, у биринчилардан бўлиб, ёш ўзбек шоири Чўлпон тўғрисида мақола эълон қилди. Бу мақолада у Чўлпоннинг «Ёш ўзбек шоирлари» тўпламида чиққан ва вақтли матбуотда босилган бошқа

шеърларини асос қилиб олган. Абдураҳмон Саъдий мақоласининг энг қимматли томони шундаки, у Чўлпоннинг фавқулодда истеъод эгаси эканини таъкидлайди ва 1918 йилдан бери ижод майдонида биринчи ўринни ҳеч кимга бермай келаётганини айтади. Саъдий Чўлпонни романтик шоир деб атайди ва шу ернинг ўзида унинг романтикаси ўзига хос хусусиятларга эгалигини, яъни шоир шахсий туйгуларини эмас, ижтимоий кечинмаларни куйлашини кўрсатади. Шунингдек, Саъдий мақоласида шоирнинг яна бир муҳим хусусиятини, унинг шеърларида рамзийлик (символика) кучли эканини қайд қиласди. Чўлпон шеърларидаги қайнашларни, тўхтовсиз эҳтиросларни таърифлаш учун Саъдий ёрқин образли таққослар топади. Масалан, у Чўлпон шеъриятидаги жўшқинликни Туркистон тизмаларидан чиққан «ёнар тоқ»ка, яъни вулқонга ўхшатади. Лекин Саъдий Чўлпон шеъриятининг моҳиятини тўғри очган ҳолда, ўз услубида мавхум тушунчалар ва ифодаларга кенг ўрин берганки, бу мақолани тушуниб олишни қийинлаштиради, ундаги баъзи бир асосий фикрларни ихчам ва лўнда англаб олишга халақит беради. 20-йилларда Саъдий фақат такризларгина ёзган эмас, у бир қатор қўлланмалар ҳам яратган. Жумладан, адабиёт назариясидан яратган қўлланмаси шулар жумласидандир. Бироқ у пайтларда марксизм-ленинизм қонун-қоидалари адабиёт илмига ҳали сингдириб улгурilmagan эди. Шунинг учун Саъдийнинг китобида адабиётнинг келиб чиқиши, оламни акс эттиришдаги ўзига хослиги, бадиий образнинг моҳияти ва ҳоказо каби фалсафий-назарий масалалар етарли ёритилмаган ёки нотўғри ёритилган эди. 20-йилларнинг бошида босилиб чиққан бу китоб, ҳар ҳолда, ўз даврининг маҳсули бўлиб, адабиёт назарияси бобида янги даврда қўйилган биринчи қадам эди. Кейинчалик, бу китобда олдинга сурилган бир қатор фикрлар субъектив идеализм тегирмонига сув қуяди, қаттиқ танқид қилинади. Бу воқеалар 30-йилларнинг бошларида юз берган эди. Ўшанда совет адабиётининг асосий методи социалистик реализм экани тўгрисидаги шиор майдонга ташланган ва шу муносабат билан бутун мамлакатда реализм масаласида деярли икки йилга чўзилган мунозара бошланган эди. Бироқ бу мунозара

чукур илмийликдан маҳрум, олдинга сурилаётган концепциялар ҳам фоятда мавҳум ва чигал, оддий китобхон уларни англаб олиши қийин эди. Аспирантурада ўқиб юрган илк йилларимда (1951) мен бу мунозара материалларини ўзлаштиришга ҳаракат қилганман, лекин тишим ўтмаган.

30-йилларнинг бошида бунақа мунозара бизда – Ўзбекистонда ҳам бўлиб ўтганди. Кейинчалик унинг материаллари «Тил ва адабиёт соҳасидаги илмий тадқиқотлар» деган ном билан босилиб чиққан. Ана шу китобда Ўйғуннинг ҳам «назарий» масалаларга бағишланган катта мақоласи бор. Ўйғун ўша кезларда, яъни 30-йилларнинг биринчи ярмида Тил ва адабиёт институтида аспирант ҳамда илмий ходим бўлиб юрган бўлиши керак ва бояги мақолалар хизмат юзасидан ёзилган бўлиши мумкин. Ҳарҳолда Ўйғуннинг мақоласи ҳам санъат ва адабиётнинг гносеологик масалаларига бағишланган бўлиб, фоятда мавҳум ва анча-мунча чалкаш эди. Ўйғун мақоласида «Саъдийнинг объективизми», «Саъдийнинг субъективизми» каби сарлавҳалар қўйиб, масалани ёритишига ҳаракат қиласи. Аммо мен ҳар қанча тиришиб-тортишмай, на Саъдийнинг «объективизми» билан «субъективизми», на Ўйғуннинг нима демоқчи эканини англадим. Мақоладан олинган конспектлар ҳануз қофозларим ичida ётибди, лекин улардан ҳеч наф кўрганим йўқ. Фақат ўшандаги англағаним шу бўлдики, Саъдий марксизмдан фоят узоқ турадиган одам, унинг ёзганларидан фойдалан кўра зарар кўп. Шундан кейин Саъдий анча вақтгача илмий иш қилишни ёки мақолалар билан жорий адабий ҳаётга аралашиб туришни йиғишириб қўйганга ўхшайди. Бундан кейин домла кўпроқ бевосита амалий ишлар билан, яъни педагогик фаолият билан шуғулланишга аҳд қилган бўлиши мумкин. Яқинда Фарғона Давлат дорилғунунининг профессори Йўлдошли Солижонов билан сұхbatлашиб қолдим. Унинг айтишича, 30-йилларнинг ўрталарида Саъдий домла Фарғонада ишлаган экан. Саъдий домла ҳаётидаги бундан кейинги «тарихий» воқеа 1946 йил билан боғлиқ бўлган.

1946 йил умуман совет мамлакатидаги энг муҳим бурилиш йилларидан бири бўлган эди. Уруш тамом бўл-

ганига эндиғина бир йил бўлган. Бутун мамлакат харобалар ичида. Урушнинг оғир оқибатлари ҳар қадамда сезилади. Одамларнинг усти юпун, юзлари заҳил. Кўча-кўйларда дўконлар олдида узундан-узун навбатда туришлар. Ноң карточка билан берилади. Очлик силлани куритган. Шундай шароитда уруш майдонларидан солдатлар уйига қайта бошлаган. Уларнинг қайтиши жуда катта шодиёналарга сабаб бўлмоғи керак эди. Шундай бўлди ҳам, уларнинг шаънига карнай-сурнайлар чалинди, тўйлар қилинди, шеърлар ёзилди. Лекин кўп ўтмай масаланинг миси чиқа бошлади. Фронтдан қайтаётганлар Оврўпа мамлакатини кўриб қайтишаётган эди. Бу жангчиларда «советча гуур» ҳар қанча кучли бўлмасин, Оврўпадаги ўзгача ҳаёт, саришталик, уюшқоқлик, фаровонлик улардаги ифтихорнинг шохини синдирамай кўймас эди. Айниқса, ўз юртидаги очлик, қашшоқлик уларни кўп нарса тўғрисида ўйлашга мажбур қилмай кўймасди. Хуллас, замини бўшашиб қолган коммунистик мафкурани мустаҳкамлаш керак эди. Бунинг учун кечиктириб бўлмайдиган, кучли таъсир кўрсатадиган тадбирлар кўрмоқ керак эди. Шундай шароитда аввал «Звезда» ва «Ленинград» журналлари тўғрисида ВКП(б) Марказий Комитетининг қарори чиқди. Орадан кўп ўтмасдан, «Драматик театрларнинг репертуарлари» ва «Катта ҳаёт» кинофильми тўғрисидаги қарорлар чиқди. Бу қарорларнинг мазмунидаги бош масала «дунёнинг ҳар қандай жойидагидан кўра бизнинг социалистик ҳаётимиз яхши» ва жамики санъат аҳлининг вазифаси шу ҳаётимизни мақтаб, кўкларга кўтариш ҳамда унинг афзаллиги ҳақидагиояни миллионлаб ўқувчилар оммасига сингдириш» масаласи эди. Қарорларда бу вазифани «ёмон» бажараётган Анна Ахматова, Михаил Зощенко каби ижодкорлар жуда қаттиқ танқид қилинган эди. Шундан сўнг бу қарорларни жойларда ишлаб чиқиши бошланди, шаҳар, вилоят, республика фаолларининг йигинлари ўтказилди, матбуотда сурункасига зиёлиларни қоралайдиган мақолалар босилиб турди. Улар, яъни зиёлилар оғир аҳволнинг асосий сабабчилари қилиб кўрсатилар эди. Совет тарғиботининг бир ғалати хусусияти бор эди: агар марказда бирор салбий ҳодиса

ёки бирон касб-кордаги катта одам танқид қилиниб қолса, жойларда ҳам, албатта, шундай ҳодисалар ва одамлар топилиб, умумхалқ олдида шармандаю шармисор қилиниши, йўқ гуноҳи учун тавбасига таянтирилиши лозим эди. Партия органлари бунақа йифинларда кимнинг пўстагини қандай қоқиш кераклигини ҳал қиласр эди. Шундай қилиб, 1946 йилнинг ўрталарида Тошкентда ВКП(б) Марказий Комитетининг идеология масалаларига бағишлиган қарорларини муҳокама қилиш учун катта анжуман тўпланди. У расман шаҳар фаолларининг йифини деб аталаради. Залда республика нинг ҳамма атоқли маданият арбоблари ўтирибди. Ҳайъат столи теварагида ўтирган партия раҳбарларининг ҳаммаси қовоғи солик, хўмрайган, гўё жиндай тишларининг оқини кўрсатишса, мавқелари бутунлай пасайиб қоладигандай. Улар бамисоли бутун дунёга зарда қилаётгандай, қаҳр билан залдагиларга хўмрайиб ўтиришибди. Ниҳоят, мажлис очиқ деб эълон қилинди. Мажлисни очган одам аввал роса баланд пардаларда бир йил бурун фашистлар устидан қозонган ғалабамизни кўкларга кўтариб мақтади, кейин доҳий Сталиннинг генийлиги тўғрисида жуда баландпарвоз гаплар айтилди, унинг фамхўрлиги остида санъат ва адабиётимизнинг гуллаб-яшнаётгани таъкидланди. Сўнгра мафкура соҳасидаги партия қарорларига уланди. Шундан кейингина залдаги одамларга сўз берила бошланди. Табиийки, уларнинг нутқлари ҳам юқоридаги схема асосида курилганди. Фақат нутқнинг кичикроқ бир қисми ўзбекистонлик бирор маданият арбобининг ижодида бальзи нуқсонларни танқид қилишга бағишлинарди. Бу танқидлар кўпинча асоссиз бўларди, лекин бу ҳеч кимни қизқитирмас эди. Бундай мажлисларда иштирокчилар «Яна кимни уришаркин?» деган қизиқиши билан мажлиснинг ҳар бир янгилаҳасини кутиб ўтиришарди. Ниҳоят, сўз профессор Абдураҳмон Саъдийга берилди. Домла минбарга чиқиб, кўзойнагини артиб, тақиб олди-да, тайёрлаб келган ва қайсиdir бир партия назоратчисининг кўзидан ўтган нутқини қоғозга қараб ўқий бошлади. Домласи тушмагур гоявий-назарий нуқсонлари учун калтак еявериб зада бўлиб қолган бўлса керак, бу гал

жуда зўр «гоявий» чиқиши билан обрўйини тиклаб олишни ният қилган бўлса керак. Ҳуллас, у баъзи асарларни «гоявий» жиҳатдан чунонам танқид қилдики, бунга чидашнинг сира ҳожати йўқ эди. У қайтадан чиқа бошлигаган «Шарқ юлдози» журналида босилган бир-иккита шеърни қаттиқ «урди». Улардан бирида «Аму бўйларида сайр қилиб юрар йигитлар-қизлар» деганга ўхшаш мисра бор экан. Домла шу мисрага ёпишиб олиб, бутун залга пўписа қила кетди: «Бу нима деган гап? Шеърда қайси Аму ҳақида гап кетяпти? Ўтмишдаги Амуми ёки совет давридаги Амуми? Унинг бўйида юрган кимлар? Ўтмишдаги ёшларми ёки совет ёшларими? Совет шоири бунаقا мужмал шеър ёзиши мумкин эмас!»

Залдагиларнинг кўпчилиги вульгар социологизм руҳида тарбия топган бўлсалар-да, домланинг бу иддаосига чидаб тура олмадилар. Кейинги нутқлардан баъзи бирларида Саъдийнинг ўзи бунаقا ашаддий бир томонлиги учун қаттиқ дакки еди. Чиндан ҳам у «губернатордан кўра ҳам ортиқроқ коғир бўлиш» қабилида иш тутган эди. Шундан кейин Саъдий домланинг юлдози қайта порламади. Унинг ўша мажлисдаги чиқиши бир латифа сифатида айтиб юрилди, лекин ундан ташкилий хўлосалар чиқарилмади.

50-йиллардан бошлаб умрининг охиригача домла Самарқанд университетида хизмат қилди. 1946–1950 йилларда бизга адабиётдан дарс берган домлаларимиздан бирининг сиймоси тахминан шундай эди. Мен – яна такрор айтаман – бу хотирани домлага таъна қилиб ёз-ётганим йўқ. Абдураҳмон Саъдий ҳам ўз замонасининг маҳсули эди ва ундаги фазилатлар ҳам, нуқсонлар ҳам шу ҳолат билан изоҳланади. Ҳар нима бўлганда ҳам, Абдураҳмон Саъдий Татаристондаги иссиқ жойини ташлаб, Ўзбекистонга келган экан ва ҳаётининг анчагина қисмини бу юртга бағишилаган экан, бу ишда муайян доирада бўлса-да, фидойиликнинг белгиларини кўрмаслик мумкин эмас.

## ИЗЗАТГА МУНОСИБ ОТАХОН ИЖОДКОР

Достоевский ўзига замондош рус ёзувчилари ҳақида «биз ҳаммамиз Гоголнинг «Шинел»идан чиққанмиз» деган экан. Ҳозир самарали ижод қилаётган ўзбек мунаққидлари ва адабиётшуносларининг кўпчилиги Иззат Султоннинг «Адабиёт назарияси»дан чиққан десак, кўп ҳам муболага бўлмас. Мен ўзим адабиётнинг алифбесини шу китобдан ўрганганман. Лотинча ёзувда босилган кулранг муқовали бу китоб билан биринчи марта мактабда ўқиб юрган чоғларимда танишгандим. Ўшанда шу китоб туфайли қаршимда намоён бўлган ажиб ва сеҳрли дунё олдида лол бўлиб, бундай асарни ёзган одам девдай барваста, оппоқ соқоли кўкрагини тутган, юзидан нур ёғиб турган донишманд бир қария бўлса керак, леб ўйлагандим. Йиллар ўтиб, Иззат Султон билан яқиндан танишиш баҳтига мусассар бўлдим ва кўрдимки, болаликда ўйлаганларим унча тўғри эмас экан. Иззат аканинг кўкрагини қоплаган соқоли ҳам, девларниридай барваста қадди-қомати ҳам йўқ эди. Бунинг устига, мингларча одамга адабиётдан сабоқ берган машхур китобини у ўттизга тўлар-тўлмас –авжи томирларида ёшлиқ файрати гупуриб турган кезларда ёзган экан. Лекин ўттиз йиллик мулоқотларимиз давомида Иззат ака ҳақидаги болалик тасаввуримнинг тўғри жиҳатлари ҳам борлиги маълум бўлди. У ижод соҳасида шу қадар кўп ва хўб ишлар қилганки, Иззат Султонни адабиётимизнинг девқомат арбобларидан десак арзийди. Шу ишлари билан у кўпдан бери адабиётимиз оқсоқоллари сафида. Билимларининг кенглиги ва теранлиги, адабиёт ҳақида адолатли ва ҳаққоний фикрлар айтишга қодирлиги, зукколиги ва донишмандлиги учун кўпчилигимиз Иззат акани устоз билиб, унга қўл берганмиз, этагидан маҳкам тутганмиз.

Шарқнинг буюк шоири Саъдий «Одам умрининг ўттиз йилини илм ўрганиб, ўттиз йилини саёҳат қилиб, яна ўттиз йилини орттирган билимларини халқа улашиб ўткармоғи керак», деган экан. Иззат Султон бу доно ўгитга бир оз бошқачароқ амал қилди – Саъдий айтган муддатнинг келишини кутиб ўтирумай, йигирма ёшидан бошлабоқ ўзида бор билимни, иқтидорни халқа хизмат қилиш йўлига бағишлади. Унинг матбуотдаги биринчи мақоласи 30-йилларнинг бошида пайдо бўлган эди. Шундан бери ярим аср мобайнида у теран бир эътиқод ва ўткир қалам билан маданиятимиз равнақи йўлида хизмат қилиб келмоқда. Айни чоқда у ўз устида муттасил ишлашдан, узлуксиз равиша билимларини чуқурлаштиришдан тўхтагани йўқ. У ўзбек адабиётшунослари ичida биринчилардан бўлиб филология фанлари доктори деган юксак илмий даражага сазовор бўлди, ЎзССР Фанлар академиясига муҳбир аъзо қилиб сайланди. Санъат ва адабиёт соҳасидаги катта хизматларини тақдирлаб, республика ҳукумати унга «Ўзбекистонда хизмат кўрсатган санъат арбоби» ва «Ўзбекистонда хизмат кўрсатган фан арбоби» деган фахрий унвонлар берди. 1970 йилда эса Иззат Султон Беруний номидаги республика давлат мукофотини олишга сазовор бўлди. Бу унвонлар, даражалар ва мукофотлар Иззат аканинг ярим асрлик илмий ва ижодий фаолияти нечоғлиқ самарали кечганини яққол кўрсатиб турибди.

Иззат Султон камдан-кам одамларга насиб бўладиган бир хислатга эга – унинг шахсиятида олим билан санъаткор бирлашиб кетган. Муҳими шундаки, у ҳар икки соҳада ҳам халқа манзур бўладиган, ривожимизга ёрдам берадиган асослар яратиб, ижоднинг юксак пиллапояларига кўтарила олган.

Иззат Султоннинг адабиётшунос олим сифатида яратган асарларини, мақолаларини номма-ном санайман деся, бутун бошли бир китоб бўлади. Лекин гап сонда эмас, албатта. Мен мазкур мақолада Иззат Султоннинг олим сифатида ҳаммамиз учун ибрат бўладиган айrim фазилатлари ҳақида гапиришни маъқул кўраман.

Иззат Султоннинг илмий асарларини ўқир экансиз,

даставвал, уларнинг бир хусусиятига диққатингиз жалб бўлади. Иззат ака нима тўғрисида ёзмасин ва танқидчиликнинг қайси жанрида ёзмасин, ҳар гал масаланинг ўзак томонини марказга қўяди, давр учун, адабиёт учун муҳим бўлган проблемаларни қаламга олади ва уларнинг ижобий ҳал қилинишига йўл очиб беради. Иззат Султонни ўзбек адабиётшунослигининг отахон арбобига айлантирган асосий сифат – унинг асарлари ҳамиша теран фикрларга бой бўлади. Олим адабиёт фактларини жуда яхши билади, лекин ҳеч қачон уларни куруқ санаш билан ёхуд уларга шунчаки изоҳ бериш билан чекланиб қолмайди. У бирон конкрет асарга тақриз ёзадими, адабиётнинг бирор жанрига обзор берадими, проблематик мақола ёзадими, бари бир, адабиёт ҳақида чуқур фикрлар айтишга, фактлар ва ҳодисаларнинг моҳиятини очишга ҳаракат қиласди. Йиллар давомида Иззат Султоннинг бу хислати такомиллаша борди ва мунаққидни иттифоқ миқёсида танилган олимлардан бирiga айлантируди.

Иззат Султоннинг принциплари унинг илмий фаолиятидаги яна бир муҳим хислатни вужудга келтирган – бу олимнинг илмий қизиқиши доирасининг бениҳоя кенглигиdir. Иззат Султон фақат ўзбек совет адабиёти (ҳозирги замон ўзбек адабиёти) ҳақидагина эмас, классик адабиёт ҳақида ҳам ажойиб асарлар яратган олим. У, айниқса, Алишер Навоий ижодини чуқур ўрганади ва навоийшуносликда ўз сўзини айта олди. Унинг «Мезон ул-авzon» ҳақидаги тадқиқоти ёхуд «Навоийнинг қалб дафтари» деган ғоят оригинал илмий иши авторнинг адабиётимиз тарихи бобидаги билимлари нечоғлиқ теран эканидан далолат беради. Иззат аканинг бу хислати ҳақида гапиряпман-у, хаёлимда ҳозирги танқидчиларнинг бошқа бир хислати намоён бўляпти. Кейинги пайтларда танқидчилар ўз мутахассисликларини тобора торайтириш йўлидан боряпти. Бир танқидчи фақат шеърият билан, иккинчиси фақат наср билан, учинчиси фақат драматургия билан шуғулланади. Лекин шундай бўлса-да, катта адабиётшуносларимизнинг, шу жумладан, Иззат Султоновнинг кенглиги замон адабиёти соҳасида ҳам, классик адабиёт соҳасида ҳам ўзини сувдаги

балиқдек эркин ҳис қилиши кўпроқ ёқади. Ҳар икки соҳада ҳам илмни бойитадиган теран тадқиқотлар яратиш қобилияти жуда ноёб ва ибратли қобилиятдир.

Бироқ Иzzат Султоннинг илмий қизиқиш доираси фақат шу билан чекланмайди – у рус адабиёти, қардош халқлар адабиёти, жаҳон адабиёти ҳақида ҳам кўплаб мақолалар ёзган. Буларнинг барчасида у гўзалликнинг муҳтор вакили сифатида қалам тебратади, буюк ва нодир асарлардаги эстетик бойлиқдан ўзбек китобхонини баҳраманд қилишга интилади. Бу жиҳатдан ҳам Иzzат аканинг илмий-танқидий фаолияти ҳаммамиз учун ғоят ибратлидир. Гап шундаки, ўзини мұнаққидлик касбига боғлаган одам, адабиётшунослик илми билан шуғулланувчи шахс ҳеч қачон фақат олим бўлибгина қолмайди. У, айни чоқда, бадиий адабиётдаги мужассам гўзалликнинг, ҳудудсиз бойликнинг оташин тарғиботчisi, эҳтиросли ташвиқотчisi ҳам бўлмоғи керак. Халқни шу бойликларнинг эгаси қилиш, унинг қалбida гўзаллик гулларининг чаман бўлиб очилишга ҳисса кўшишдан ҳам улуғроқ баҳт борми? Иzzат Султон ана шундай тарғиботчилик ва ташвиқотчилик фаолиятини ўзи учун энг фахрли иш деб биладиган олимлардан. Энг муҳими шундаки, у адабиётни тарғиб қилас экан, бу ишда ҳам ўзининг ажойиб ғоявий эътиқодига содик қолади ва адабиёт ёрдамида бугун бутун инсоният ҳаётидаги тобора катта аҳамият касб этаётган нарсаларни – халқлар дўстлиги ва қардошлигини, гуманизмни кенгроқ жорий қилишга интилади.

Иzzат Султон фақат олимгина эмас, илмнинг забардаст ташкилотчиларидан ҳамдир. Аввало, у олим сифатида ўнлаб юксак малакали фан номзодлари ва фан докторларини етиштируди. Кўп йиллардан бери эса А. С. Пушкин (ҳозирги Алишер Навоий) номидаги Тил ва адабиёт институтида адабиёт назарияси секторига мудирлик қилмоқда. Секторнинг ижодий колективи Иzzат Султон раҳбарлигига катта ишларни амалга оширимоқда. Шундай ишлардан бири икки томлик «Адабиёт назарияси»нинг бунёдга келиши бўлди. Ҳозир эса бу колектив ўзбек танқидчилиги тарихини яратиш соҳасида иш олиб боряпти.

Иzzат Султон икки томлик, кейинроқ уч томлик «Ўзбек совет адабиёти тарихи» китобининг Москвада чоп этилишида ҳам етакчи роль ўйнади. Ниҳоят, Иzzат Султоннинг Москвада нашр этилган олти томлик «Қўп миллатли совет адабиёти тарихи» деган фундаментал китобида ҳам муҳаррир ва муаллиф сифатида иштирок этганини айтиш керак. Булардан ташқари, адабиётимизнинг муҳим масалаларига бағишлиланган бот-бот бўлиб турадиган Бутуниттифоқ ва ҳалқаро илмий анжуманлардаги иштирокини, ташкилотчилик ролини эсласак, унинг илмий фаолияти нечоғлиқ кўп қиррали эканига амин бўламиз.

Буларнинг барчаси Иzzат Султон ижодининг бир палласинигина ташкил қиласди. Унинг иккинчи палласи эса Иzzат аканинг драматурглик фаолиятидан таркиб топган. Бу палладарнинг қайси бири оғирроқ деган савонни бермай кўя қолайлик. Менимча, уларнинг иккови ҳам баравар. Иzzат Султоннинг танқидчилик ва адабиётшунослик соҳасидаги ишлари қанча салмоқли бўлса, унинг драматургик фаолияти ҳам адабиётимиз ривожида шунчалик салмоқقا эга. Иzzат Султон драматургия соҳасидаги изланишларни давом эттириб, кейинчалик Ўйғун билан ҳамкорликда «Алишер Навоий» драмасини яратди. Ўзбек китобхонига бу драманинг қандай асар эканини гапириб ўтиришнинг ҳожати йўқ – бу асар адабиётимизнинг фахри, саҳнамизнинг кўрки бўлиб қолди. Минглаб одамлар асардан катта-катта парчаларни ҳозир ҳам ёд билишади. Қолаверса, шу асарда яратилган Алишер Навоий образи кейинчалик буюк шоир ҳақида яратилган асарларда бош қаҳрамон образини баҳолашда мезондек бўлиб қолди. «Алишер Навоий» драмасидаги эҳтиросга тўла оташин монологлар, ўткир диалоглар, асар композициясининг пухталиги, тилининг рангдорлиги муаллифларнинг маҳорати балоғат чўққисига кўтарилиганидан далолат беради.

Умуман, Иzzат Султоннинг драматик ижодида тарихий воқеалар марказий ўрин тутади. Юқорида айтилганлардан ташқари яна «Номаълум киши» драмаси ҳам, «Истеҳком» ҳам, «Шоир қалби» ҳам ўтмиш воқеаларига бағишлиланган. Гарчи бу асарлар тарихий мавзуда ёзилган

бўлса-да, бугунги кунда муҳим салмоққа эга бўлган ғоялар ифодаланади. Иzzат Султон ўтмиш сабоқлари орқали бугунги одамлар қалбига яхшилик, эзгулик, қардошлик уруғларини сепади.

Албатта, Иzzат Султоннинг драмалари фақат ўтмиш ҳақидагина эмас. Унинг «Имон» ва «Билмайин босдим тиканини» драмалари бевосита бугунги кунга, бугунги одамларга бағишиланган. Асарда инсон ҳаётининг негизи виждоний поклик, ҳалоллик экани ҳақидаги фикр яхши очилганди. «Имон» ўша йиллардаги ўзбек драматургиясида янги воқеа бўлганди – унда психологик драманинг ҳамма белгилари мавжуд бўлиб, муаллиф чинакам ҳаётий тўқнашувлар орқали қаҳрамонларнинг юксак маънавий қиёфасини очади. «Билмайин босдим тиканини» драмаси ҳам маънавий-ахлоқий проблемаларга бағишиланган. Бу асарда драматург ҳаётий материал асосида инсон шахсининг эрки, муҳаббат, виждон, ҳалоллик каби масалаларни ўртага ташлайди. Иzzат Султоннинг ҳар иккала драмасини томошабинларга манзур қилган омиллардан энг муҳими шундаки, уларда инсоний жозиба кучли. Муаллиф ўз қаҳрамонлари характеристини яратишида схематизм иллатидан халос бўлишга эришган. Саҳнада қаҳрамонлар нутқ сўзламайди, томошабинга ваъз-насиҳат айтмайди, балки жонли одамларнинг зиддиятларга тўла, мураккаб ҳаётини бошларидан кечиради. Шунинг учун ҳам уларнинг тақдирни бизни қизиқтиради, ташвишлари бизни ҳам бефарқ қолдирмайди.

Иzzат Султон ярим аср мобайнида илмий ва ижодий фаолиятини жамоат ва давлат ишлари билан чамбарчас қўшиб олиб борган олимдир. У меҳнат фаолиятини 30-йилларда «Совет Ўзбекистони» газетасида бошлаган эди. Шундан кейин у А. С. Пушкин (хозирги Алишер Навоий) номидаги Тил ва адабиёт институтида илмий ходим, директор ўринбосари, директор бўлиб ишлади. Уруш йилларида ЎзССР Радиоэшиштириш Давлат Комитетининг Раис ўринбосари бўлди. Урушдан кейин эса бир неча йил мобайнида Ўзбекистон ССР Министрлар Советининг Раис ўринбосари, Ўзбекистон Ёзувчилар Союзининг секретари вазифаларида хизмат қилди. 50-йилларнинг бошида у Москва Давлат университетининг

**ПО**

*Озод Шарафиддинов*

СССР халқлари адабиёти кафедрасида ўқитувчилик қилди. Сўнгти йилларда Иззат Султон Тил ва адабиёт институтида адабиёт назарияси секторига мудирлик килмоқда. Яқинда у олий ўкув юрглари учун «Адабиёт назарияси» дарслигини ёзиб тутатди.

Иzzat Sulthonning ana шундай кўп қиррали ҳаётини бир жумла билан ифодалаш зарур бўлса, уни «халқقا бағишланган умр» деб атап мумкин эди. Бу эса ижодкорга ҳамиша ёшлик шижаотини, янги илҳом, янги кудратни инъом этувчи манбадир.

1983

## АЛВИДО, УСТОЗ!

Иzzат Отаконовиc Султонов оламдан кўз юмди. Одатда бундай пайларда марҳумнинг унвонларини айтиб, унинг қилган хизматлари таъкидланади. Лекин мен бундай қилмоқчи эмасман. Негаки, бу инсоннинг унвонларию даражалари, рутбаларию ишлаган мансаблари, олган мукофотларию нишонлари санай бошланса, бир катта дафтар бемалол тўлади. Мен Иззат Султонни аддийгина қилиб олижаноб инсон, забардаст олим, меҳрибон устоз деб атасам, эҳтимол унинг сиймосини бир даражага чизиб берган бўлармидим? Мен салкам 50 йил бу инсоннинг қанотига юрдим, у билан қўшничилик қилдим, сафарларга бордим, мунозараларда гап талашидим, ундан жуда кўп нарса ўргандим. Иззат Султон адабиётшунослигимизнинг пешвоси эди. Айни чоғда адилларнинг ҳам, шоирларнинг ҳам, мунаққидларнинг ҳам устози эди. Машхур адаб Достоевский ўзига замондош рус ёзувчиларини назарда тутиб, биз ҳаммамиз Гоголнинг «Шинел»идан чиққанмиз, дея лутф қилганди. Ҳозирги ўзбек ёзувчиларининг ҳам кўпчилигини Иззат Султоннинг «Адабиёт назарияси»дан чиққан, деб атасак хато бўлмайди. «Адабиёт назарияси» чиққанда Иззат Султон 30 ёшда эди. Шундан кейин бу китоб ҳар қанча норасоликларига қарамай, мактаб ўқувчиларига ҳам, олий ўкув юрти талабаларига ҳам, ижодкорларга ҳам, оддий китобхонларга ҳам хизмат қилди. Шунинг ўзи Иззат Султоннинг ўзбек маданияти ривожига кўшган жуда катта ҳиссаси бўлади. Лекин у фақат бу соҳа билан чегараланиб қолгани йўқ. Унинг истеъодиди том маънода кўп қиррали эди. У замонавий адабиёт билангина эмас, мумтоз адабиётимиз билан ҳам, жаҳон адабиёти билан ҳам жiddий шугулланган эди. Жумладан, «Навоийнинг қалб дафтари» деган китоби нафақат илмий теранлиги билан, балки юксак эмоционал оҳангларда ёзилгани

билин ҳам навоийшунослик илмида янги саҳифа очди. Унинг драмалари, айниқса, «Алишер Навоий» драмасининг ҳароратли ёлқинидан таъсиранмаган бирор ўзбек бормикан?! Ундаги ёлқинли монологларни ҳозир ҳам одамлар жўшиб-тошиб айтиб юришади.

Иzzat Султон устоз сифатида ҳам ёш адабиётчиларни тарбиялашда жуда катта жонбозлик кўрсатган. Унинг раҳбарлигига кўплаб фан номзодлари, докторлари етишиб чиқди. У ҳаётни севадиган, теран заковат эгаси эди. Унда юмор туйғуси кучли эди. У жиддий илмий баҳслар бораётган давраларда ҳам шундай зукколик билан иш тутардики, ҳазил-мутойибалари, ўткир иборалари, лутфлари кейинчалик тиллардан тилларга ўтиб юрарди.

Иzzat Султон 91 ёшда вафот этди. Бу катта умр. Ўлайманки, бундай самарали умрни Оллоҳ унга ҳар бир фазилатлари учун ва шўролар даврида чеккан азиятлари учун инъом қўлган бўлса керак. Ҳа, у ўша даврда бир неча мартараб оқ калтак-қора калтак қилинган эди, илмий ва ижодий доиралардан суреб қўйилган эди. Уни ҳам бир вақтлар салкам миллатчига чиқариб қўйишганди, лекин у қамалгани йўқ. Қамалмаган бўлса-да, қатағон қиличининг тазиикларидан жиддий руҳий жароҳатлар олгани аниқ. Бир гал Иzzat ака 37-йил тўгрисида менга шундай ҳикоя қўлган эди: «Ўша кезларда ҳар куни эрталаб газетани очиб, ўзимнинг фамилиямни излар эдим. Ҳалқ душманига айланиб қолмадимми, миллатчи қаторига қўшиб қўйишмадими? Шуни билиш керак эди. Менинг исм-шарифим чиқмаганини кўриб, бугунги кун тинч ўтаркан-да, деган қониқишига келардим. Нима гуноҳим борлиги, нима айб иш қилиб қўйганимни билмайман-у, лекин қамалишим аниқлигини билардим. Ҳатто идорага бир сидра кўрпастўшак, кийим-кечак ҳам олиб бориб қўйган эдим...» Бундай психологик хуружлар ижодкор юрагида битмас чандиқлар қолдириши муқаррар. Унинг ижодида баъзан учраб қоладиган замонасозликлар, эҳтимол, шу чандиқлар таъсирида пайдо бўлгандир. Лекин шу мураккабликларга қарамай, Иzzat Султон 91 йиллик умрини ҳалол ўтади. Мен аминманки, унинг асарлари билан бирга бизга мерос бўлиб яхши номи ҳам қолади.

Алвидо, устоз!

## БАРКАМОЛ ИНСОН

Ҳар қандай олий ўқув юртининг шон-шухрати, биринчи навбатда, у ерда дарс берадиган олимларга, оддий тил билан айтганда, домлаларга боғлиқ. Мен университетта талаба бўлиб, уруш тамом бўлгандан кейин – 1946 йилда келганман. Мен танлаган филология факультети жуда ёш эди. У урушнинг энг оғир йилида – 1942 йилда ташкил топган ва ҳали ўзининг биринчи қалдирғочларини учирма қилганича йўқ эди. Аммо шунга қарамай, ёш факультетнинг ўзига яраша довруғи бор эди. Факультетга тақдирнинг тақозоси билан ўша вақтдаги энг етук адабиётшунослар ва тилшунослар тўплланган эди. Тилшунослардан Аюб Фулом, Мурод Шамс, Фахри Камол, Турсун Иброҳимов, Теша Салимовлар; адабиётшунослардан Абдураҳмон Саъдий, Зикриё Мирҳожиев, Ҳамид Сулаймон, Субутой Долимов, Ҳомил Ёқубовлар факультетнинг пешқадам домлалари эди. Булар ичida Фулом Каримов алоҳида ажralиб турар эди.

Шундай қилиб, мен Фулом Каримов билан биринчи бор талабалик йилларимда танишган бўлсан, кейинчалик бирга ишладик. Шунчаки бирга ишладик эмас, домланинг умрлари охиригача жуда яқин дўстона муносабатларда бўлдик. Гарчи мен Фулом Каримовнинг қўлида аспирант бўлган бўлмасам-да, ўзимни у кишининг шогирди деб аташга маънавий ҳаққим бор, деб ўйтайман. Чунки мен домладан педагоглик ва олимлик соҳасидагина эмас, одамийлик соҳасида ҳам жуда кўп нарса ўрганганман. Домла бизга дарс берган йиллари ҳали навқирон йигит эдилар. Қотмадан келган, бўйдоргина, очиқ чехрали, кўзи ҳамиша маънодор боқиб турадиган бу домлани биз яхши кўриб қолдик. Кейинчалик, ўйлаб қарасам, домла ўша вақтлардаёқ шундай сифатларга эга

эканки, бу сифатлар педагог бўлиб бирон иш қиласман деган ҳар қандай инсон учун жуда зарур сифатлар экан. Домла бизга XIX аср ўзбек адабиётидан кўп маърузалар ўқиган.

Хаммаси бўлиб, бир йил-бир ярим йил ўқитганлар. Лекин бирор марта дарс қолдирмаганлар. Дарс қолдириш у ёқда турсин, бирор марта дарсга кечикиб ҳам келган эмаслар. Қўнғироқ чалиши билан эшик очилиб, домла кириб келар, портфелидан қофозларни олиб, минбар устига ёяр, думалоқ гардишли кўзойнагини филофидан олиб, бурнининг устига кўндирап, бир кўзойнак орқали қофозларига қараб, бир кўзойнакнинг устидан аудиторияга назар ташлаб, босиқ овозда маърузани бошлар эди. Бир зумда талабалар сув қўйгандек жимжит бўлиб қолар, фақат дафтарлар саҳифасида югураётган қаламларнинг шитир-шитири эшитилар эди. Мен ҳозирга қадар домланинг маърузаларини мароқ билан эслайман. Чунки ҳар гал дарсда биз XIX аср ўзбек адабиётининг илгари бизга номаълум бўлган қирраларини, рангларини билиб олардик. Кўз ўнгимиздан Муқимий, Фурқат, Завқий, Аваз Ўтар каби шоирларнинг изтиробларга тўла ҳаёти, изланишлари бир-бир кинолентасидек ўтар, биз улар яратган асарларнинг чинакам бадиияти ҳақида, гўзалликлари тўғрисида теран тасаввур ҳосил қиласлар эдик. Энг муҳими шунда эдик, домла фақат шу шоирлар ҳақидагина маълумотлар бериш билан чекланмай, ўша давр адабиётининг портретини бутун ранглари ва зиддиятлари билан кўз ўнгимизда гавдалантиришга ҳаракат қиласлар эди. Маълумки, ўша йилларда ҳаётимизнинг ҳамма соҳасида коммунистик мафкуранинг тазиик жуда кучли эди. Айниқса, 1946—1948 йилларда мафкура соҳасидаги машҳур ва машъум қарорлар чиққандан кейин бу тазиик янада кучайган эди. Табиийки, олий ўкув юртларида ўқитиладиган адабиёт дарсларининг дастурлари ҳам мафкуравий талаблар асосида қайта ишланган эди. Бу талабларга кўра, фақат демократ деб ҳисобланган ижодкорларгина дастурга киритилар, шунда ҳам уларнинг ижодидаги зиддиятлар ҳақида гапирилмас, қолган ижодкорлар эса, реакцион, мистик ёзувчилар сифатида қораланар ва

уларнинг асарлари мутлақо ўрганилмас эди. Бундай дастурлар асосида ўқитилса, талабаларнинг ўзбек адабиёти ҳақидаги тасаввури, албатта, бир томонлама ва чўлтоқ бўлиб қолар эди. Албатта, Фулом Каримов ҳам ўз даврининг одами сифатида мафкура тазиикига қарши очиқ бош кўтара олмас эди. Лекин шунга қарамай, маърузаларида кўпгина шоирларнинг реакционлиги, мистиклиги ҳақида гапирган ҳолда, айни чоқда уларнинг ижодини мисоллар билан кенг таҳлил ҳам қиласар эди. Жумладан, Хомуший деган шоир ҳақида гапириб, унинг мазмундан кўра шаклга берилганлигини таъкидлаб, шеърларидан мисоллар келтирган. Лекин бу мисоллар шундай эдик, уларнинг оқибатида Хомуший бизнинг тасаввуримизда шаклбоз шоир сифатида эмас, ўйноқи, оҳангдор, юморга бой шеърлар яратган шоир сифатида тасаввур қолдирган.

Унинг, «Ана хусну, ана қадду, ана қомат, ҳой-ҳой» деган мисралари ҳануз хотирамда. Ёки Муқимий ҳақида гапирганда Муҳий ижодини ҳам анча батафсил ёритиб ўтардилар. Натижада Муҳий ҳам ўша давр матбуотида айтилгандек реакцион шоир эмас, катта бир инсон бўлиб гавдаланарди. Бундай мисолларни жуда кўплаб келтириш мумкин. Буларнинг бари домланинг ўз ишини чин юракдан севганини, ўзининг хизмат бурчига вижданан қараганини ва ўз соҳасини жуда чуқур эгаллаганини кўрсатади. Бу сифатлар том маъноли зиёли одамга хос бўлган сифатлардир. Домла умрининг охиригача ҳам шу ақидаларга содик қолди. Домла анча кексайиб қолганда нафақага чиққан эди. Албатта бутун ҳаётини фанга бағишилаган Фулом Каримовдай тажрибали, билимдон одам билан бутунлай хайр-маъзур қилиш факультет жамоаси учун жуда оғир эди. Шунинг учун домлани маслаҳатчи сифатида ишлаб қолишига кўндиридилар. Бу лавозим шундайки, унда ишлайдиган одам дарсга кирмайди, маъруза ўқимайди, унинг факультетга келадиган қатъий куни белгилаб қўйилмайди. Бир-икки ҳафта келмай қолса ҳам ҳеч ким ундан гина қилмас эди. Домланинг уйи дорилфунундан узоқ эди. Лекин шунга қарамай, у киши маслаҳатчи бўлгани учун ҳар ҳафтада факультетга келар, икки-уч соат ўтириб домлалар би-

лан гурунглашар, мажлисларда қатнашар, аспирантлар ва дипломантларга маслаҳатлар берар эдилар. Домла 30 йилдан ортиқроқ Ўзбек адабиёти кафедрасига раҳбарлик қилдилар. Аввалига кафедрада ишлайдиган одамларнинг сони унчалик кўп эмас эди. Йиллар ўтган сайин уларнинг сони кўпайиб борди. Баъзи раҳбарлар бўладики, улар негадир тор кўнгил билан фаолият олиб борадилар, яъни ўzlари раҳбарлик қилаётган жамоанинг кенгайишини ҳам, ўсишини ҳам истамайдилар. Бунга зимдан тўсқинлик қиладилар. Фулом Каримовда бундай одат мутлақо йўқ эди. Аксинча, у ташабbus кўрсатиб, Ўзбек адабиёти кафедрасидан янги-янги жамоаларнинг ажralиб чиқишига бош-қош бўлган. Шунинг оқибатида факультетда Ҳозирги замон ўзбек адабиёти, Адабиёт назарияси, Ўзбек адабиёти тарихи каби кафедралар пайдо бўлди.

Раҳбарлар бор – қўллари остидаги ходимларнинг иммий ўсишига гайирлик қиладилар. Иложи бўлса жамоаада ёлғиз ўzlари фан доктори бўлсалар-у, қолган кандидатлар ҳамиша қўллари кўксида унинг хизматини қилсалар. Фулом Каримов тинимсиз равишда ўз жамоасидаги олимларнинг докторлик ишларини қилишларига ғамхўрлик қиласар эдилар. Қўлидан иш келадиган домлаларни чақириб олиб, уларнинг диссертациялари мавзуларини аниқлашга ёрдам берар, диссертация устидаги ишларини назорат қилиб тураг, диссертация ҳимояларини ўtkазишга ёрдам берар эдилар. Шу тарзда кафедрада Л. Қаюмов, У. Норматов, Б. Қосимов, А. Ҳожиаҳмединов, Ш. Юсупов каби ўқитувчилар ўз вактида докторлик диссертацияларини муваффақият билан ёқладилар. Фулом Каримов қўли остидаги ходимларга ғамхўрлик қиласар экан, бу ишни беминнат қиласарди. Бирор хатти-ҳаракати билан яхшилик қилаётганини писанда қилмас эди. Адашмасам, 1957 йилда бўлса керак. Мен университетда домла бўлиб ишлаётганимга эндиғина 4–5 йил бўлган, холос. Фулом Каримов билан ўртамиизда кафедрага аспирант олиш тўғрисида гап бўлди.

— Битирган талабалардан бирон дурустроғи борми? Кимни тавсия қила оласиз? — деб сўраб қолдилар домла. Мен бир оз ўйлангач, жавоб бердим:

— Бешариқда Рапқон деган қишлоқдан Умарали Норматов деган йигит бор. Шуни чақирирсак ёмон бўлмас.

— Дарвоқе, уни яхши биламан, яқинда дорилфуннни битириб кетган эди. Матбуотда бир-икки мақолоси ҳам босилди, шекилли. Майли, чақириринг уни.

Мен Умарали Норматовни чақирирдим. У келиб аспирантурага кириш имтиҳонларини топширди. Кейин Умаралига ким раҳбар бўлади, деган масала қўзғалди. Шунда Фулом Каримов эътиrozга ўрин қолдирмайдиган бир тарзда кесиб гапирдилар.

— Ўзингиз ҳам анча-мунча пишиб қолдингиз, энди Умаралига илмий раҳбар бўласиз.

Мен ҳанг-манг бўлиб қолдим. Бироннинг илмий ишига раҳбарлик қилиш етти ухлаб тушимга ҳам кирмаган эди. Ахир бунинг учун озмунча билим керакми? Унинг тоғдай оғир масъулиятини айтмайсизми?

— Йўқ, йўқ, домла. Мен сира ҳам раҳбар бўлолмайман. Бу иш қўлимдан келмайди.

Фулом Каримов қўзойнагининг тепасидан таъна билан менга тикилди.

— Нималар деяпсиз, қўлингиздан келмаслигини билиш учун аввал бу ишни қилиб қўриш керак. Сиз иккilanмай ишни бошлайверинг. Зарур бўлса ҳаммамиз ёрдам берамиз.

Домланинг қатъий гаплари менда ўзимга ишонч уйғотди. Мен розилик билдиридим. Бахтимга аспирант ҳам укувли, зийрак ва ҳаракатчан эди. Ҳар қалай уч йилда ишни муваффақият билан ҳимоя қилди. Шундай қилиб домланинг ташаббуси ва рагбати билан мен аспирантга илмий раҳбарлик қиласиган бўлиб қолдим. Шундан кейин домла кўплаб марта мени докторлик ишим устидага ишлашга ундалилар. Мен ҳар гал ана қиласман, мана қиласман деб, ваъдалар бериб кутулиб кетардим. Охир пировардида домланинг қаттиқ жаҳли чиқди. Менга зарда билан силтаб-силтаб гапирдилар ва ниҳоят, ҳафсалари пир бўлди, шекилли, бу масалада мендан қўлларини ювиб қўлтиқларига урдилар. Ҳар қалай айтганимни қилмади, деб кек сақлайдиган одатлари йўқ эди. Орадан бирмунча вақт ўтгач, биз яна аввалгилик апоқ-чапоқ бўлиб кетдик.

Фулом Каримов яхши мактаб кўрган олим эди. У киши дунёга танилган Евгений Эдуардович Бертельснинг шогирди бўлганлар. Ойбек,Faфур Фулом каби олимлардан жуда кўп нарса ўргангандар. Бертельс домлага юқтирган сифатлардан бири шунда эдики, илмда мутакаббирлик қилиш домлага ёқмас эди. Домла ҳар бир илмий муаммога босиқлик билан ҳар томонлама холис ёндашишга ҳаракат қиласарди. Кафедрада доимо тури шаҳарлардан келган кандидатлик ва докторлик диссертациялари муҳокама қилиниб турар эди. Албатта, уларнинг ичидаги бақувватлари бўлгани каби жуда хомлари ҳам тез-тез учраб турарди. Бақувват ишларни атайин камситиш одати бўлмаганидек, кафедрада хом-хатала ишларга ҳам мақтовли тақризлар бериш одати йўқ эди. Лекин хом-хатала ишга кескин руҳдаги салбий тақриз берилса, бу диссертация муаллифига жуда қаттиқ зарба бўлиши мумкин эди. Шунинг учун бундай ҳолларда Фулом Каримов ўша муаллифнинг ўзини тақлиф қиласар, у билан якка-ёлғиз сұхбатлашиб, ишининг нуқсонларини батафсил кўрсатиб берар ва ишни тақризсиз муҳокамадан олиб кетишига кўндирап эди. Натижада хом-хатала иш қилган олим қўпчилик ўртасида изза бўлиш азобидан кутулиб қолар, кейинчалик эса ишини қайта ишлаб, маромига етказгач, яна янгидан кўтариб келарди.

Фулом Каримовда баҳслашиш маданияти ҳам жуда юксак эди. У, кўпинча, адабиёт назариясида янгилик бўладиган мулоҳазаларни ўртага ташларди. Бу фикр-мулоҳазалар кўпинча самарали бўлар, баъзан эса эътиrozлар ҳам тугиларди.

60-йиллар ўртасида бўлган бир воқеа сира эсимдан чиқмайди. Ўшанда талабалар, аспирантлар ва илмий ходимлар иштирокида ўзбек адабиётининг ижодий методи масаласида катта мунозара ўтказилган эди. Бу мунозара кафедранинг ташабbusи билан ўтказилган бўлиб, унда Фулом Каримов асосий докладчи бўлди. Домла Навоийнинг «Лайли ва Мажнун» достонини кенг таҳлил қилиб, ундаги бир қатор эпизодлар реалистик характерга эга эканлигини таъкидладилар ва шу асосда Навоий ижод реалистик ижод экани ҳақидаги тезисни илгари сурдилар. Бу тезисни кенгайтириб, ўзбек классик

адабиёти бошдан-оёқ реалистик адабиёт бўлган, деган фикрга келиш ҳам унчалик қийин эмас эди. Мунозарада мен сўзга чиқиб, бу тезисни рад этдим. Бутунжаҳон адабиёти ҳамиша романтика билан реализмнинг омухтаглигига асосланган, деган фикрни олдинга сурдим. Албатта, ўша баҳс давомида бу масала ҳал бўлгани йўқ. Бу масала, ҳатто, ҳозир ҳам мунозарали муаммо бўлиб келмоқда. Лекин мен бу ерда бошқа бир гапни таъкидламоқчиман. Фулом Каримов нима бўлганда ҳам менинг раҳбарим, бошлиғим, устозим эди. Албатта, бундай одамга қарши гап айтиш одобдан эмас, анча хижолатли иш. Шогирднинг бундай шаккоклиги ҳар қандай устозга ҳам оғир ботиши турган гап. Мен буни яхши билардим, албатта. Лекин шунга қарамай, илмий мунозара бўлгани учун ўз фикрларимни очиқ айтишга журъат қилган эдим. Домла бирон оғиз гап билан ҳам ўзининг ранжиганини билдирамади. Ундан кейин ҳам бирон марта, шундай қилган эдингиз, деб юзимга солмади ва умуман, йиллар мобайнида менга бўлган муомаласини заррача ўзгартирамади. Менинг илмий раҳбар сифатидаги биринчи ишим муваффақиятли бўлган бўлса, бунинг асосий сабаби Фулом Каримовдан ибрат олганим бўлди. Мен ҳам Фулом Каримовнинг ўз шогирдларига меҳри-бончилигини кўриб, у кишига ўхшашга аҳд қилиб қўйган эдим. Фулом Каримов ўз аспирантларига қанчалик меҳр билан муомала қилганини кўрсатувчи бир мисол келтирай. 50-йилларнинг бошларида Шариф Юсупов ўзбек шеъриятида Сталин образи билан боғлиқ бир ишга қўл урди. У бир неча йил қаттиқ меҳнат қилди. Аммо ишини ёқлаб улгурмасдан ҳаммаси барбод бўлди. 1956 йилда партиянинг XX съездиде Сталин шахсига сифиниш қаттиқ танқид қилингандан кейин бу мавзу устида илмий иш қилишнинг имкони қолмади. Шариф Юсуповнинг уч йиллик меҳнати бекор кетди. У мавзуни ўзгартириб, янгидан иш бошлашга мажбур бўлди. Иккича уч йил ўтириб, бу ишнинг ҳам хомаки вариантини ёзив битирди. Энди уни илмий раҳбарга кўрсатиб, унинг фотиҳасини олмоқ керак эди. Шундан кейин диссертация ёзган одам учун оғир кунлар бошланади. У истиҳола қиласи, баъзан эса қўрқали ҳам, негаки, бирон

инсофсизроқ домла бўлса, «кўтар ишингни, менинг бекорчи вақтим йўқ» деса, тамом. Бирорга шикоят қилиб бўлмайди. Мен аспирантурада ўқиганимда илмий раҳбарим илмий ишингизга бир ҳафтадан кейин келаверинг, деди-ю, диссертациям тўғрисида аниқ бир гап айтмади. Мен кутишни бошладим. Ниҳоят, бир йилдан кейин ишимни қайтариб берди-да, бўлмайди, деди.

Хуллас, Шариф Юсупов ишини домлага берганидан сўнг, икки кун ўтгач Фулом Каримов уни уйига таклиф қилганда, Шариф Юсупов жуда ҳайрон бўлди. Лекин бормасликнинг сира иложи йўқ. У кўрқа-писа қалтираб домланинг остонасидан кириб борганида, домла уни очиқ чехра билан кутиб олди:

— Келинг, келинг. Ишингиз менга маъқул бўлди. Жиндай тузатишлари бор.

Шариф Юсуповнинг елкасидан тоғ ағдарилгандай бўлди.

Домла, адашмасам, 70 ёшга кирганида унга «Хизмат кўрсатган фан арбоби» деган фаҳрий унвон бериши. Ўша даврдаги бюрократ тузум шароитида унвон олиш керак экан. Унвон билан боғлиқ ҳужжатлар камида еттита партия органидан ўтмоғи керак. Уларнинг ҳар бири «бўлади» ёки «бўлмайди» деб ўзининг ҳукмини чиқариши керак. Айниқса, шаҳар партия комитети ва партия марказий комитетидан ўtkазиш керак. Бу жойлардаги мукофот ҳужжатларига қўл кўядиган одам тирхишлиқ қилиб туриб олса ёки «хужжатни кейин кўраман» деб ташлаб қўйса, тамом — иш чўзилиб кетади ёки умуман мукофот берилмайди.

Ҳужжат тайёрлашда яна бир нозик томони бор экан — унда бу масала юқорида, яъни Марказий Комитетда ким билан келишилгани ёзилган бўлиши керак. Фулом Каримовни мукофотга тавсия этиш масаласи Шароф Рашидов билан келишилган эди. Мен бир йигинда у кишининг олдига бориб: «Шунака қилмоқчимиз, нима дейсиз?» дея сўрагандай бўлган эдим. Шароф Рашидов: «Мен у кишини жуда яхши биламан. Арзиди. Қўллайман» деб маъқуллаган эдилар. Кейин билсан, у киши билан энг охирида келишилар экан, унгача эса тарғибот ва ташвиқот ёхуд фан бўлимининг бошлиғи

билин келишмоқ зарур экан. У пайтларда энг майдада ишларда партия белгиланган ишларга қаттиқ риоя қилас, ундан бир қадам ҳам чекиништа йўл кўйилмас эди. Райком, горком, кейин Марказий Комитетда: «Рашидов билан келишилган», деган ёзувни ўқиб, раҳбар ўртоқлар ҳайрон бўлишди, тартиб бузилганидан ранжишди, ҳатто менга танбеҳ ҳам беришди, лекин улар Рашидовнинг ўзидан сўрай олмас, шу билан бирга, ҳужжатларни қайтара олмас эдилар. Шундай бўлса ҳам, бу иш дарров бита қолмади, анча югур-югурлардан кейингина ҳужжат Шароф Рашидовнинг кўлига бориб етди. Рашидов ортиқча сўзламай, фармон чиқаришга буйруқ берди. Биз – домла, унинг шогирдлари ва дўстлари ҳам жуда хурсанд бўлдик. Лекин унвондан ҳам бошқа яна бир нарса бизни жуда хурсанд қилган эди – Шароф Рашидов мукофот билан чекланмай, Фулом Каримовга юбилей муносабати билан шахсий мактуб ҳам йўллаган эди. Унда домланинг хизматлари анча батафсил саналган ва юксак баҳоланган эди. Шу билан бирга, мактубнинг кўп жойларидан Биринчи котибнинг Фулом Каримовга шахсий эҳтироми яққол сезилиб турар эди. Фулом Каримов жуда хурсанд бўлди ва мамнунлигини ўз нутқида эҳтирос билан баён этди.

Фулом Каримов тўғрисида гапирганда унинг ўз дўстларига, ҳамкасбларига алоҳида самимият ва ғамхўрлик билан қараганини ҳам таъкидлаш керак. Фулом Каримов кафедра жамоасининг миқдоридан қатъи назар ҳаммалари жуда аҳил ва иноқ бўлиши керак деб ҳисоблаган.

Албатта, кафедрада ишлаганларнинг ҳаммаси ҳар хил қаравшларга эга бўлган, ҳар хил савиядаги, ҳар хил феъл-атвордаги одамлар эдилар. Уларнинг бошини бирбирига қовуштириш жуда ҳам мураккаб иш эди. Албатта, домла бу борада бирортамизга ҳам насиҳат қилиш билан шуғулланмас эди. Ҳеч қайсимизни чақириб олиб, олдига ўтқизиб кўйиб «тарбиявий соат» ўтказмас эди. Лекин ўзининг ҳатти-ҳаракатлари билан шахсан намуна бўлиб, ҳаммамизни аҳил ва иноқ бўлишга рағбатлантирап эди. Бир йили таътил вақтида Фулом Каримов Субутой Долимов билан бирга Оқтошдаги санаторийдаги олишга кетишиди. Орадан бир ҳафта ўтар-ўтмас

Тошкентда қолган кафедра аъзоларидан бир гуруҳини айттириб юбордилар.

У. Норматов, А. Алиев, Ш. Юсупов, мен, яна бир-икки киши Оқтошга чиқиб бордик. Буни қарангки, ўша кезларда Оқтошда қўй арzon эканми, ҳарҳолда Фулом ака билан Субутой ака бир қўйни олиб қўйишган экан.

«Бу қўйни иккаламиз қийналиб еб юрамизми? Ундан кўра кафедрадаги бошқалар ҳам қийналишсин-да», деб бизни йўқлатишиган экан. «Қўйни еб тугатгунча биз ҳам роса қийналдик».

Лекин, мен умримда роҳат қилиб ўтказган кунларни кам эслайман. Тоғ ҳавоси, шарқираган сувлар, дўстлар суҳбати, шоҳмот, тансиқ овқатлар. Ўшанда Оқтошда фақат бир кун бўлган бўлсак ҳам бир неча кунга етадиган ҳордиқ олган эдик. Табиийки, бир неча кунга етадиган бундай ҳордиқдан кейин одамларнинг бирбирига бўлган меҳри товланади.

Фулом Каримов бундай дам олишлар ва сафарларнинг жуда кўпчилигига ташаббускор бўлган. Масалан, бир неча марта Иссиккўлда жуда ажойиб кунларни ўтказган эдик. Икки-уч марта Паркент тоғларига чиқиб, чодир қуриб ётган кунларимиз бўлган. Айниқса, бир сафаримиз сира ҳам эсимдан чиқмайди. Бу сафарни Фулом Каримовнинг таклифи билан унинг шогирди Ортиқбой Абдуллаев уюштириди. Унинг отаси Абдулла ака Хумсонда кўп йиллар мобайнида колхозга раислик қилган, кўпни кўрган одам эдилар. Шу киши етакчилигида Угам дарёси ёқалаб, кўч-кўронимизни икки-уч эшакка ва битта отга орттириб икки кун юқорига ўрмалаб кетдик. 30—40 чақиримча юргандан кейин Угам ёйилиб оқадиган жуда хушманзара бир жойга етиб бордик. Теварак-атрофида ҳеч ким йўқ. Фақат бир неча чақирим нарида адир тепасида қозоқларнинг бир неча ўтови оқариб кўринади. Ҳаммаёқ кўм-кўк майсазор. Шу майсазорнинг ичига Угамнинг бир қисми суқилиб кирган экан. Угам дарёси жуда тез оқар дарё. Музликлардан тушиб келгани учун ҳамиша совуқ. Лекин бояти майсазор ичига ёриб кирган бир чақиримча келадиган 15—20 метр кенглиқдаги сув илиққина экан. Бунинг устига дарёдаги жамики балиқ шу сувга келиб роҳат

қилас экан. Челакни ботирсангиз 2–3 та балиқ илинади. Шу ерни қўналға қиладиган бўлдик. Фулом Каримов, С. Долимов, А. Алиев, А. Ашрапов, Абдулла ака, Ортиқбой ва мендан иборат жамоа табиатнинг шу сўлим гўшасида роса 17 кун ҳордиқ чиқардик.

Бир йили биз университетдаги геолог дўстларимизнинг таклифи билан дам олишга Оқсоқ ота тоғларига бордик. Борган жойимиз Тошкентдан унча олис эмас – бор-йўғи 30–35 километр келади. Геолог дўстларимиз бизга студентлар яшайдиган жойдан яrim чақирим наридаги бир масканни бандлашибди. Жойимиз Оқсоқ ота дарёсининг бўйида. Дарёning ўнг қирғоги бўйлаб қалин жийдазор олисларга чўзилиб кетган. Фақат улар ёввойи жийда эди. У ошқозонни даволашда яхши дори ҳисобланар экан. Унинг мевалари кўплигидан новдалари осилиб қолган. Биз кўнган жойда Оқсоқ ота торайиб кичкинагина шовва ҳосил қилибди. Шовва кичикроқ бир ҳовузга қўйлади. У ер одамнинг бўйнидан келади. Суви тиник. Унча муздек ҳам эмас. Хуллас, суткасига 24 соат чўмилса бўладиган жой. Геолог дўстларимиз бизга чодир, газ плитаси, каравотлар беришди. Ниҳоят, кеч бўлди, биринчи тунни ўтказдик. Мен жуда эрта уйғондим. Аллақачон тонг отган бўлса ҳамки, ҳали бизнинг лагерда ҳам, геологлар лагерида ҳам ҳеч қандай ҳаракат бошлангани йўқ эди. Бир маҳал қарасам, Фулом ака енгил кийимда юқори томондан аста келяпти. Кўлида қопга ўхшаган бир нарсани кўтариб олган. Ҳайрон бўлиб у кишини кузатишда давом этдим.

— Разведкага бордим. Юқорида йилқичилар бор экан. Уларнинг меҳмони бўлдим. Мана, саночда қимиз берив юборишди. Эртадан бошлаб, отда ўзлари олиб тушиб турадиган бўлишди. Битта қўй ҳам гаплашиб келдим.

— И-е, домла, анча уринибсиз-ку! Битта-яримтамизни уйғотмабсиз ҳам, бирга бораидик.

— Ҳаммаларинг жуда ширин уйқуда эдинглар, кўзим киймади.

Дам олиш кунлари бошланди. Эрталабки нонуштадан кейин ҳар хил ишлар бошланар эди. Қимизни ачитиб қўймаслик керак. Айниқса, сўйилган қўйнинг гўштини эҳтиёт қилиш керак. Қаёқдандир ингичкароқ аргамчи топиб келдик. Гўштларни тузлаб кечаси арқонга илиб,

шабадалатиб қўйдик. Кундузи эса гўштни дока билан ўраб, пашшадан асрардик. Буларнинг ҳаммасига домла жуда уста экан – у киши бош-қош бўлиб, айтиб турди, биз бажардик. Шундай қилиб, бутун бошли қўйдан бир парчаси ҳам бекор кетмади.

5–6 кун ўтгандан кейин домла бешбармоқ қиласиз, деб қолдилар. Мен ҳамир ёйишни фақат хотинлар қила-диган иш деб ўйлаб юрардим. Домла ҳамир ёйишни ҳам боплар эканлар. Шундай ҳамир қилдиларки, унга ҳар қандай хотин ҳам ҳавас қисса арзугудай. Ҳамирни бешбармоққа мослаб кесар эканлар, Субутой акани ҳам ишлашга таклиф қилдилар. Субутой ака бунақа ишларга укувсизроқ экан. Ҳадеганда, пичоққа қўли келавермади. Кесган ҳамирлари қингир-қийшиқ бўлиб чиқди. Фулом Каримов у кишини койишга тушди:

— Агар хотин киши бўлганингизда эрингиздан гап эшитавериб имом жинни бўлиб кетар экансиз-да, домла!

Субутой домла нима дейишини билмай гапни бошқа ёққа буришга ҳаракат қиласи.

Кундузлари тушликдан кейин «бассейн»имизда чў-миламиз. Уни эни келса 4 метр келади. Икки томонда сувдан юқорироқда тошлар орасида канарлар бор экан. Бу канарларда илонлар яшар экан. Улар кавакларида бир-бирларига чирмашиб ётиб, бизнинг чўмилиши-мизни томоша қилишарди. Биз бошидан улар билан «Мен сенга тегмайман, сен менга тегма» деб келишиб олган эдик. Ҳар қалай дам олишимизнинг охиригача томонлардан ҳеч қайсиси бу аҳдни бузмади.

Қўйинг-чи, мен шу сафар давомида Фулом аканинг ҳамма ишга укувли, ўта камтар ва камсуқум инсон эканига яна бир карра амин бўлган эдим. Бундай сафарлар умрбод унуптилмайди. Фулом Каримов бениҳоя бағри-кенг, серсаҳоват, қўли очиқ одам эди. Унинг уйига меҳмон бўлиб боргандагина эмас, шунчаки бирон юмуш билан бориб қолганингизда ҳам домла ичкарига олиб кирад, албатта, дастурхон ёзар ва бир зумда домланинг рафиқаси Маъғират опанинг санъати туфайли дастурхон тансиқ нозу неъматларга тўлиб кетарди. Обдан меҳмондўстлик одатини бажо қилгандан кейингина домла нима иш билан келганингизни суриштиради.

Домланинг ҳовлисида ҳар хил мевалар ичиди бир туп

гирос ҳам бўларди. Гирос пишганда домла кафедрагиларнинг ҳаммасини гирос сайлига таклиф қиласар эдилар. Табийки, бундай ҳолларда гирос баҳона зиёфат жуда қуюқ бўларди. Баъзан зиёфат жуда авжига чиққан кезларда домла бирдан ҳаммага мурожаат қилиб, «Шошманглар, ҳозир бир нарса кўрсатаман», — дердилар-да ертўлага тушиб кетар эдилар. Бир оздан кейин у ердан 20 литерлик шиша идишда тўла қўлбола мусалласни зўрга кўтариб, лапанглаб чиқиб келар эдилар.

— Мусалласни ўзим солғанман. Қани, таъмини кўринглар-чи!

Зиёфат мусалласнинг кучи билан яна давом этарди.

Кейин-кейин кафедрадаги домлаларнинг ҳаммаси гиросга мазахўрак бўлиб қолиши. Энди домла эслатмаса ҳам май ойи бошланиши биланоқ, домлага эшитадиган қилиб ўзаро гап қотишарди.

— Мана, гирослар ҳам пишиб қоляпти, гирос сайли ҳам келиб қолди. Бу гапларга жавобан домла яна ҳаммани сайилга таклиф қиласарди. Лекин охири нимадир бўлди, шекилли, домла бунақа гапларга жавобан:

— Энди бўлди, гирос қариб қолган экан, кесиб ташладим, — деб кулдилар.

Ҳозир баркамол одамларни тарбиялаш тўғрисида кўп гапирадилар. Баъзан шундай таассурот қоладики, гўё илгари баркамол одамлар бўлган-у, энди уларни йўқбор қиласидар. Албатта, бундай қараш тўғри эмас. Ҳаётда ҳамиша бундай баркамол одамлар бўлган. Фулом Каримов мана шундай одамлардан бири эди.

Албатта, у ҳам инсон бўлган, яъни инсон сифатида муайян қусурлардан холи бўлган эмас, лекин ишга муносабатда, ҳамкасларига муносабатда, яқин дўсту ёронларига муносабатда бенуқсон одам эди. У виждонли, ҳалол, лафзли одам эди. Бир сўз билан айтганда, ҳалқимиз бундай одамларни жаннати деб айтишади.

Фулом Каримов узоқ яшаб бандаликни бажо келтирди. Яқин одаминг бу дунёни тарқ этса, бир ёнинг бўшаб, хувиллаб қолар экан. Домлани кўп ўйлайман, у кишининг қилиқларини, ҳазилларини эслаб тураман. Ҳар қалай, нима деганингизда ҳам ярим асрлик умримизни бир факультетда бирга хизмат қилиб ўтказдик. Қанчадан-қанча яхши кунларни, оғир кунларни ҳам

кўрдик, қувончлар ва ҳасратларни баҳам кўрдик. Кунларнинг бирида ўйлаб қарасам, ярим аср бир факультетда ишлабмиз-у, лекин бирон марта ҳам орамизга дилхиралик, совуқчилик тушмабди. Фақат иккимизнинг орамизда эмас, кафедраларимизда на ифво, на фийбат, на тухмат деган нарсалар, жанжал кўтарилимабди. Кафедра аъзолари ўзаро сан-манга боришилмабди. Бўлмаса уларнинг ҳаммаси ҳам қўзичоқдай ювош одамлар эмасди, ҳар бирининг ўзига яраша характеристи, иззат-нафси бор эди. Ичимида сиркаси сув кўтармайдиганлар ҳам бор эди. Лекин ярим аср давомида бирон марта бирон масалада ишкал чиққани йўқ, бирон марта кафедрамизда янграган овоз ташқарида шовқин-сурон бўлиб эшлилгани йўқ. Ҳеч шубҳа йўқки, бу Фулом Каримовнинг энг катта хизматларидан эди. Билмадим – у раҳбарлик санъатини мукаммал эгаллаган эди, десак, тўғри бўлармикан? Аниқроғи, у одамлар билан муомала санъатини, одамгарчилик санъатини эгаллаган эди. Шунинг учун ҳаммамиз ҳам у кишининг қошида бемазалик қилишга, бир-биримизга овозимизни кўтаришга ҳайиқар эдик. Мен кўрганман – бир қатор институтларда узлуксиз давом этадиган «мажаллий жанглар» бўлиб турарди, баъзан зарба кучайиб бутун институтни қамраб оларди, битта-иккита бетавфиқ, сурбет, виждонсиз одам ҳеч нарсанинг андишасини қилмай, бутун кафедрани ёки факультетни зирқақшатарди. Улар шундан ҳузурлансалар ҳам ҳеч гап эмас, аммо бошқалар-чи? Улардан тинимсиз азият чекувчи одамлар учун ишга келиш, кафедрага қадам кўйиш, ўша сурбетларнинг башарасини кўриб, гапини эшитиш жуда катта азоб эди. Улар бўйнидан бойлангандек ишга келиб-кетишарди. Худога минг қатла шукурки, биз шу азобни кўрмай ўтдик. Биз ишга байрамга келгандек келмасак-да, факультетни, кафедрамизни иккинчи уйимиз деб билардик. Бу ерда ишлаш нашъали эди. Шунинг учун мен Фулом Каримовдан ҳаммамизга бош-қош бўлиб, бизни аҳил ва иттифоқ бир жамоага айлантиргани учун минг бора миннатдормиз!

## МЕРГАНЛИКДАН АКАДЕМИКЛІККА

Мен биринчи курсга келганимда Матёқуб Күшжонов иккінчи курс талабаси эди. У дарров дікқатимни ўзига тортди – ўрта бўйли, гавдали, чехрасидан ақл ёғилиб турган, истараси иссиқ бу йигит гуруҳидаги талабалардан камида 7–8 ёш катта, унинг гап-сўзидағи салмоқ, юриш-туришидаги вазминлик, туйғуларини босиқлик билан мийифида кулибгина ифодалаши, ҳаётий тажрибаси катта эканидан, талаба бўлса ҳамки, кўпни кўрганлигидан далолат бериб турарди. Агар рус гуруҳида ўқиганида унга, албатта, «Старик» деб лақаб қўйган бўлишарди.

Кўшжонов факультет комсомол ташкилотининг котиби экан. Комсомол сафига турмоқ учун унга бориб учрашдим. У хушфеъллик билан менинг қаерда ўқиганим, оиласам, жамият ишларига ғтирирок ҳакуқда сўраб-суриштирди. Кейин жамоат ишларида фаол иштирок этишга унади.

Афсуски, мен мактабдаги ўқитувчимиз Қудрат Аҳмедовнинг даъвати билан ўқиш билан баробар тўртинчи синфларга дарс ҳам бера бошлаган эдим. Бу жуда кўп тайёргарлик кўришни, кўп китоб ўқишини тақозо қиласар эди. Мен Кўшжоновга узримни айтдим. Кўшжонов бир зум ўйланиб турди-да, кейин:

— Майли, бўлмаса. Бу ишингиз яхши. Лекин факультет жамоасидан бутунлай ажralиб қолманг, — деди.

Одатда комсомол котиблари уларнинг фикрига зид бўлса, бирон гапга жуда қийинчилик билан кўнадилар, ҳар қандай қилиб бўлса-да, ўз фикрларини ўтказишга ҳаракат қилишади. Кўшжоновнинг унақа эмаслиги, осонлик билан фикримни маъқуллагани менга ёқди.

Кўшжонов университетга менга ўхшаб, тўғри мактаб партасидан туриб келган эмас эди – у тўрт йил уруш-

да – Ленинград остонасида, Волга дарёси бўйидаги ўрмонларда обдан жанг қилиб келганди. Кўшжонов фронтда мерган бўлган экан. Мен ҳарбий хизматда бўлмаганман-у, лекин биламан – ҳарбий хизматнинг биронта ҳам осон тури йўқ. Лекин шундоқ бўлса-да, назаримда, мерганлик энг қийин турларидан бўлса керак. Унда соатлаб, ҳатто баъзан бир неча кунлаб пистирмада қимир этмай ётишинг керак бўлади. Бехосдан ҳаракат қилиб ёки маскировкани ҳафсаласизлик билан қилиб, ўзингизни ошкор қилиб қўйсангиз панд еб қолишингиз ҳеч гап эмас. Бироқ фақат чидам ва бардош билангина иш битмайди. Мерган одам фоятда зийрак ва кузатувчан бўлмоғи керак. Масалан, кеча анати ерда ҳамма нарса текис эди, бугун кичикроқ дўнглик пайдо бўлиб қолибди. Нимага шундай бўлдийкан? Унинг ёнига бориб пайпаслаб кўролмайсан, демак, узоқдан кузатиш керак. Баъзан 5–6 соатлаб ундан кўз узмасдан кузатмоқ керак. Хуллас, бунинг тагига етиб, шунга яраша эҳтиёт чорасини кўрмоқ керак. Бунинг учун ўткир кўз керак. Майли, бу сифатларнинг ҳаммасига эгасан ҳам дейлик. Аммо қиши бўлса, совуқнинг дастидан дараҳтларнинг шох-шаббалари, таналари ҳам қисирлаб ётган бўлса-чи? Қандай чидай оласан? Пистирмани тарк эта олмайсан. Ноилож чидаш керак. Албатта, бунақа синовларга бизга ўхшаган одамлар чидай олмайди. Кўшжонов урушга келмасидан олдинроқ бунақа мاشаққатларни кўп кўрган ва уларга чидашга ўрганган эди.

Матёкубнинг болалиги жуда оғир замонларга тўғри келган. Матёкуб 7–8 ёшида қишлоқда «Улуғ бурилиш» бошланди. Қулоқлар тугатилиб, колхозлар тузила бошлиди. Бу жараён ўта шафқатсизлик ва зўравонлик билан амалга оширилди ва ўн минглаб бегуноҳ одамларнинг ёстигини куритди. Бир қатор олғир қонхўр, мол-дунёга ва бойликка ҳирс қўйган одамлар бирлашиб, ўзларини «большовой» деб эълон қилишди-да, халқни талашгла, ерларини тортиб олишга, ўзларини бадарга қилишга киришишади. Улар бу ишларни ўта зулмкорлик билан амалга оширадилар. Масалан, динга қарши кураш баҳонасида Мулла Иброҳим ва унинг ўғли мулла Ис-

моилни мутлақо бегуноҳ бўлишига қарамай элу юртнинг кўз ўнгидаги отиб ташлашади.

Матёқубга хат-савод ўргатган мулла Турсунни эса экинини жиндай сув бостириб юборгани учун қамашади. Бир амаллаб очарчилик балосидан қутулгандан кейин Матёқуб овчилик билан шуғуллана бошлади. У пайтларда Хоразмдаги тўқайзорларда, унинг теваригидаги ўрмонларда ов мўл бўлар эди. Бу бир қадар рўзгор тебратишга, қорин тўйгазишга ёрдам берарди. Укувли, зийрак бола бўлгани учун Матёқуб уста мерган бўлиб етишади, осмондаги күшни кўзидан урадиган овчи сифатида донг чиқарди. Уруш бошланиши билан Матёқуб фронтга жўнайди ва тўрт йиллик жангдан сўнг голиб жангчи сифатида ватанига қайтади. Матёқуб жанг майдонини тарқ этиб, университетга ўқишига келганида, унинг уст-бошидан порох ҳиди тарқаб туради. Энди тиришқоқлик билан бой берилган йиллардаги йўқотгандарини қайтаришга киришди. Жамоат ишлари билан бирга у китоб устида кўп ўтирас, кечаги мактаб болаларидай ҳеч нарсада қолишимай билим олишга тиришар эди. Ниҳоят 1950 йилда университетни муваффақият билан тугатди. Уни дарҳол Марказий Комитетнинг тарғибот ва ташвиқот бўлимига ишга олишди. Биз кам кўришадиган бўлиб қолдик. Кейин Москвада учрашдик ва мулоқотларимизни тиклаб олдик. Бу ишда бизга Пиримқул Қодиров яқиндан ёрдам берди. У ҳам аспирантурада ўқир эди, бироқ Ёзувчилар уюшмасининг раҳбарияти унинг ижодкор эканини ва рус тилини яхши билишини инобатга олиб, уюшмага ўзбек адабиёти бўйича маслаҳатчи сифатида таклиф қилишди. Кейинчалик Пиримқул бу ишда салкам ўн йил ишлаб қолди. Табиийки, Москвага келадиган ижодкорларнинг ҳаммаси Пиримқулнинг ҳузурига келар, у уларнинг ишларини битиришга ёрдам берарди. Пиримқулнинг ишлайдиган жойи, айниқса, ўзбек ўшларининг ўзига хос мактабига айланниб қолганди. Пиримқул Матёқуб билан мени уйига таклиф қилди. У Большая Полянка кўчасидаги уйда бир хонани ижарага олган эди. Хона тор – ётоқ ҳам, тамадди қиласидаги жой ҳам, ишлайдиган кабинет ҳам, болалар ўйнайдиган жой ҳам, меҳмон

кутадиган маскан ҳам – ҳаммаси шу биргина тор хонада эди. Уйнинг кенг бўлгани яхши албатта, лекин биринчи навбатда кўнгил кенг бўлмоғи керак. Пиримқулнинг ана шу торгина хонасида Тошкентдан борган қанчадан-қанча одамлар меҳмон бўлмади, дейсиз. Биз ҳам Матёқуб билан Пиримқулнинг рафиқаси Сафияхоннинг пазандалик санъатидан кўп марталаб баҳраманд бўлганмиз ва бу тор ўйда қанчадан-қанча ижодий сұхбатлар, баҳслар қилганмиз.

Кунлардан бирида Матёқуб мени ётогига таклиф қилди. У ўша кезларда янги ташкил қилинган Ижтимоий Фанлар академиясида аспирант эди. Бу муассасада партияниң тарғибот ва ташвиқот ишларида раҳбар бўлиб ишлайдиган ёки мафкура масалаларида маърузалар ўқийдиган юксак малакали ходимлар тайёрланар эди. Бу ерга ўқишига кириш осон эмас – Марказқўмнинг йўлланмаси керак, шунда ҳам қабул комиссияси обдан текшириб кўриб, ўнтадан бир кишини қабул қилас, Матёқуб уруи қатнашчиси бўлгани ва бир неча муддат Марказқўмда хизмат қилгани учун осон қабул қилиши. Академия билан ётоқ бир бинода жойлашган, жуда бежирим ва чиройли эди. Унга албатта руҳсатнома билан кириларди. Мен бу муҳташам иморатга биринчи бор кирганимда оғзим очилиб, анграйиб қолган эдим. Олдиндаги эшикдан ичкарига кирасиз – иморатнинг бўйига тенг келадиган жуда узун, кенг, ёруғ бир бино. Зарур бўлса бу ерда ҳар хил кечалар, бал-маскарадлар ҳам ўтказиш мумкин. Бу катта хонага бошдан-оёқ гиламлар тўшалган. Деворларда рус ва оврўпа усталарининг суратлари. У ер-бу ерда оқ мармар ҳайкаллар. Шифтда биллур қандиллар. Деворлар ёнига чарм қопланган диван ва креслолар қўйилган. Деразаларда ҳарир пардалар. Улардан тушган ёруғлик хонага ажойиб бир тароват баҳш этиб турибди. Ҳуллас, бу ер қадимги рус зодагонларининг иморатларидан, қасрларидан ҳеч нарсаси билан қолишмас эди. Аммо мени бу ҳашаматлардан ҳам кўпроқ мафтун этган нарса – кираверишдаги китоб магазини, мўъжазгина дўкон бўлди. Китобга лоқайд бўлмаган одам бу ерга кириб қолса, ўзини худди Алибобонинг хазинасига тушиб қолгандек ҳис қилиши

муқаррар эди. Чунки шу дўконда Москва нашриётлари чоп этадиган янги китобларнинг ҳаммасини топса бўларди. Янги китоб бир кун, кўпи билан икки кун ичидаги сотилиб кетар, кейин уни топиш ғоятда мушкул эди. Фақат Ижтимоий Фанлар академиясининг дўкончаси каби маҳсус рухсатномалар билан кириладиган дўконлардагина таңқис китобларни бемалолроқ топиш мумкин эди. Мен ҳар гал Матёкубни книга келганимда, унинг хонасига киришдан аввал, ўн-ўн бешта китобни харид қилиш учун ажратиб қўярдим. Лекин уларни силаб-сийпаб, варақлаб кўриб, яна қайтариб берардим – кармон қургур унча семиз эмас эди.

Матёқуб ёлгиз ўзи бир хонада туар эди. Умуман, бу ерда ҳар бир аспирант алоҳида хонада яшар, хона яхши жиҳозланган, шинам эди. Биз неча мартараб бу хонада ўтириб, соатлаб сұхбат қуарар ва баҳслашар эдик. Баъзан Матёқуб бизнинг ётогимизга келар, лекин узоқ ўтирмас эди, чунки биз кўпинча бир кишилик хоналарда икки-уч киши туар, хонада биронта ортиқча стул кўйишнинг иложи бўлмасди. Шунинг учун кўпинча бир оз ўтиргач, кўчага чиқиб кетар эдик. Кўчамиз торгина бўлиб, жуда камқатнов ва тинч эди. Биз турадиган жойдан бир оз нарида каттагина ҳовуз бўлиб, унинг атрофига скамейкалар қўйилган ва бу ерда ҳар хил ошиқ-маъшуқлар билан бизга ўхшаган девонаваш толиби илмлар кўп бўларди. Биз кўпинча бадиий адабиёт ҳақида баҳс қиласди. Менимча, бу баҳсимиз ҳозирга қадар ҳам бир ёқли бўлгани йўқ. Фақат теран ғоявий мазмун, ҳаётийлик юксак маҳорат билан чамбарчас бирлашиб кетгандагина чинакам санъат асари вужудга келар экан. Бу баҳсларимиз биз учун бамисоли бир илмий семинар-дек қадрли эди. Улар ёрдамида биз ўқиганларимизни уқиб олишга, битталаб мияга жойлашга ҳаракат қиласдик.

Кейин – 1955 йилда мен Тошкентга қайтдим, Матёқуб аспирантлик муддати тамом бўлмагани учун яна бир неча муддат ўзининг шоҳона ётоқхонасида қолди. Адаш-

масам, у 1957 йилда Тошкентта қайтди ва университетда ўқитувчилик қила бошлади. Лекин у университетда кўп ишламади. Гарчи у қисқа муддатда маънодор ва чукур маърузалари, ўзининг феъл-автори билан талабаларнинг хурматини қозонган бўлса-да, соғлиги яхши эмаслиги туфайли университетдан кетди. Афтидан, бир неча йил бурун фронтда қор қўйнида соатлаб пистирмада ўтирганлари таъсир қилди, шекилли. Москвада тунни тунга, кунни кунга улаб китоб ўқиганлари, диссертация устидаги ишлагани оқибатида асаблари чарчаган бўлиши мумкин. Матёқубнинг турмуш ўртоғи Риммахон жуда яхши врач – у эрини жуда авайлаб парвариш қилади. Матёқуб врач дўстларига ҳам мурожаат қилади – уларнинг маслаҳатларини эшитиб, турли-туман дорилар ичишга берилмади, бир дўстимизнинг ибораси билан айтганда, у «ичини аптекага айлантириб» юбормади, муолажанинг бошқа йўлини танлади. Анҳор бўйида қишин-ёзин чўмила бошлади. Оқар сув Матёқубнинг ҳамма дардларини ювиб кетади. Матёқуб бу машғулотни яқин-яқинларгача ҳам давом эттириди. Бу орада у ишдан кетиб, Тил ва адабиёт институтига ўтиб, тадқиқот ишлари билан шуғуллана бошлади. Соғлигини йўлга кўйиб олгач, у яна жуда фаоллик билан ишлай бошлади. Бу ўринда шуни мамнуният билан ва бошқа ёш адабиётшуносларга ибрат қилиб айтмоқ керакки, у ўзбек олимлари ичida энг сермаҳсул ижод қилган олимдир. Юзга яқин китоб ва рисолалар, бир неча юз мақолалар бу фикримни яқзол исботлайди.

1957 йилда давлат адабиёт нашриёти ташкил топди. Кейинчалик у Fafur Fулом номи билан иш юритди. Назаримда, бу нашриёт ўзбек халқининг маънавий юксалишида фавқулодда роль ўйнади. Нашриётнинг биринчи директори Насрулло Охундий мени адабиётшунослик ва адабий танқид бўлимига ишга таклиф қилди. Мен рози бўлдим. Ишга келганимнинг биринчи кунлари менинг ихтиёrimda иккита ёзув столию бўмбўш китоб жавони бор эди, холос. Мен ишни Матёқубнинг «Ойбек асарларида характер яратиш маҳорати» деган китобини нашрга тайёрлашдан бошладим. Бу

китобни тўғри танлаган эканман – унинг чоп этилиши ўша йиллардаги адабий ҳаётимизда катта воқеа бўлди.

У пайтларда ўзбек китобхони ҳам, ёзувчилари ҳам бунақа китобларга ўрганмаган эдилар. Танқидий асарларимиз фақат қуруқ фактлардан иборат бўларди... Бундай асарларда деярли салмоқли фикр бўлмасди, фикр бўлмагандан кейин таҳлил ҳам бўлмасди. Уларда дабдабали сарлавҳалар кўйиларди.

Масалан, ижобий қаҳрамон проблемаси олинарди-ю, олим-адабиётшунос ёки ёзувчининг инсон образини яратишдаги маҳорати ёхуд ўзига хос сирларини тадқиқ қилиш ўрнига совет кишиси қандай бўлмоғи керак, у асарда қандай тасвирланган, деган масалага ўтиб кетарди. Бу эса кўпинча ўринсиз насиҳатгўйликка олиб келарди.

Матёкуб ўзбек адабиётшунослигида – айтиш мумкинки, биринчи марта адабиётнинг образли табиатини англаган ҳолда, унинг хусусиятига яқинлашиб иш кўрарди. У бадииятнинг асосий қуроли бўлмиш характер проблемасини марказга қўйди.

Санъат асарининг марказидаги муаммоси инсон муаммосидир. Асарнинг бадиий даражаси, муаллифнинг шу муаммо ичига қанчалик чукур кириб боргани, қандай янги жиҳатларини кашф этгани билан белгиланади. Тадқиқотчи эса бу муаммони характер масаласини таҳлил қилиш орқали ўрганади. Шундай қилиб, айтиш мумкинки, характер муаммоси асардаги санъаткорлик даражасини аниқлашда асосий вазифани ўтайди. Кўшжоновнинг «Ойбек асарларида характер яратиш маҳорати» деган китоби ўзбек адабиётшунослигида янги бир йўналишни бошлаб берди ва бу ҳолат атоқли ёзувчиларнинг ҳам эътиборини жалб этди. Ойбек, Абдулла Қаҳҳор, Асқад Мухтор каби адиллар уни ҳар жиҳатдан кўллаб-куватладилар.

Бир куни мен Матёкубнинг қарашларидаги баъзи бир ўринларга қўшилмаслигимни айтганимда, Абдулла Қаҳҳор менга насиҳат қилиб, танбех берган эди: «Майдачуйда арзимас масалалар юзасидан жўжахўроздай тор-

тишиб, гина-кудурат қилиб юрманглар. Бундан фақат адабиёт зарар кўради. Икковларингни ҳам ўз йўлларинг бор, шу йўлдан бораверинглар».

Устознинг бу ўгити кейинчалик менга жуда катта фойда келтириди.

Матёкуб қандайдир бир фантастик ижод қилишда давом этди. Қисқа муддатда унинг «Ойбек маҳорати», «Абдулла Қаҳҳор маҳорати», «Абдулла Қодирийнинг бадиий маҳорати»га бағишлиланган фундаментал асарлари дунёга келди. У қисқа муддатда докторлик диссертациясини ҳимоя қилди, «Республикада хизмат кўрсатган фан арбоби» деган фахрий унвонга сазовор бўлди, Республика Давлат мукофоти билан тақдирланди, Ўзбекистон Фанлар академиясининг академиги қилиб сайланди. Кейин у Тил ва адабиёт илмий-текшириш институтига директор лавозимига тайинланди ва бу лавозимда ҳам жуда самарали меҳнат қилди. Институт жамоаси айни шу йилларда ўнлаб монографиялар ва тўпламлар эълон қилди. Бироқ ҳаётнинг ажабтоворлигини қаранг! Матёкубнинг обрўси ортиб, мартабаси кўтарилигани сари унинг душманлари ҳам кўпая бошлади, уларнинг ҳам олимга қарши қаратилган хатти-харакатлари жонланиб кетди.

Хуллас, 80-йилларнинг бошига келиб, институтни кетма-кет комиссия босди. Бу комиссиялар ўша пайтлардаги катталар номидан иш юритар эдилар. Улар институт фаолиятидан жуда «катта» нуқсонларни топдилар ва институт миллатчилар уясига айланиб қолгани, халқ-қа ёт буржуа гояларини тарғибот қилувчи асарлар яраттилаётгани тўғрисида бонг уриб айюҳаннос солдилар. Улар турли бўхтон ва тухматлардан фойдаланиб, рақибларини ағдарсалар, уларга шикаст етказсалар бўлгани эди. Бу шўролар замонида кең тарқалган «мафкуравий кураш» усулларидан бири эди – бу усул Қўшжонов масаласида ҳам ганд бермади. Қўшжоновни партиявий жазога мустаҳқ қилишди.

1991 йилда Ўзбекистон ўз мустақиллигини эълон қилди. Қўшжонов бу даврда янги куч, янги ғайрат билан ишлашга киришди, у чинакам қирчиллама йигитларга хос ғайрат билан шундай меҳнат қилдики, бунга ҳар

қанча ҳавас қилса арзиди. У болалик йиллари ҳақида «Дагиш» деган асар, замондошлари тўғрисида хотиралар яратди, бундан ташқари яна бир қанча китоблар чоп эттириди. Менимча, мустақиллик йилларида бунчалик кўп ва хўб меҳнат қилаётган бошқа адабиётшуносни топиш қийин.

Мен ҳаёт йўлларимда кўп ҳолларда бирга юрган, ҳаммаслак, ҳамдард, дўст, яхши инсон Матёқуб Қўшжоновнинг бундан кейин ҳам адабиётшунослигимизнинг байроқларидан бири бўлиб қолишини истайман.

Хорманг, мерганликдан академикликка қўтарилган дўстим!

2006'

## ХАЁЛЛАР БАНДАСИ

Солиҳ Қосимов дорилғунунда кўз очиб кўрган домлаларимиздан бири эди. Жиккаккина, қорамагиз,чувак юзли, ўткир қирра бурунли бу одам ўша қезларда ёш бўлса ҳам «бўладиган» адабиётшунос сифатида танилган эди. Ўша қезларда, яъни 47–48-йилларда унинг С. Азимов ва Убайдуллаев билан биргаликда ёзган бир мақоласи тилларга тушибди. «Звезда» ва «Ленинград» журналари ҳақида партиянинг қарори чиққан. Адабиётда ва санъатда шафқатсиз синфий кураш ишлари авжига чиққан, «ғоявийлик» учун кураш шиори остида қанчадан-қанча ёзувчи ва шоирларнинг «миси чиқарилиб, беллари синдирилаётган» қезлар эди. Шундай шароитда С. Қосимов ҳам, унинг шериклари ҳам ғоявий курашнинг содиқ солдатлари сифатида майдонга чиқдилар.

Юқорида зикр этилган мақола ёзувчи Парда Турсуннинг «Ҳақ йўл» қиссаси ҳақида эди. Парда Турсун 30-йилларда адабиётта кириб келган бўлиб, гоҳ-гоҳида кичикроқ ҳикоячалар ёхуд репортажга ўшаган очерклар ёзисб юрас, ҳали бирон-бир салмоқли асар билан ўзини кўрсатмаган эди. «Ҳақ йўл» унинг биринчи йирик асари бўлиб, автобиографик жанрда ёзилган ғарибгина қисса эди. У етим боланинг саргузаштлари орқали 20-йилларнинг охири ва 30-йилларнинг бошидаги ўзбек қишлогининг ҳаётини акс эттирганди. Партиянинг «тарихий» қарорида Анна Ахматова ва Михаил Зощенко ижодидаги «ғоясизлик ҳоллари, синфий нуқтаи назарнинг йўқлиги, «буржуа объективизми» позициясига оғиб кетилгани, совет воқелигининг оламшумул ютуқларини тасвирлашга етарлича эътибор йўқлиги» қаттиқ танқид қилинган эди. Ўша пайтнинг таомилига кўра, собиқ марказда айтилган бундай гаплар ҳамма миллий республикаларда ҳам кенг акс садо бермоғи, миллий ада-

биётлардаги ўшанга ўхшаган иллатларни аямай фош қилиб, ҳар қандай ёзувчининг ҳам таъзирини берib қўйиш керак эди. Парда Турсун камсукум, ночоргина, касалманд одам эди – уни урадиган сиёғи йўқ эди, бирор ҳазиллашиб «пуф» деса, ростдан қулаб тушиши ҳеч гап эмасди. Лекин начора – қуюннинг ўртасига тушиб қолди ва ҳушёрликни қўлдан бермаган, «ғоявийлик» байробини баланд кўтарган шоввоз танқидчилари миз уни чунонам урдиларки, бирон соғ жойини қолдирмадилар. Бунақа калтак еган, тавқи лаънатлар юки остида абжафи чиқарилган ёзувчи ёзувчи бўлганигагина эмас, умуман, онадан туғилганига ҳам минг пушаймон бўлса керак.

Орадан кўп ўтмай, бу учта мунаққид Салье деган одамни уришди. Бу ногирон, қўлтиқтаёқда зўрга судралиб юрадиган одам араб, форс тилларини яхши билар, саккиз жилдли «Минг бир кеча»ни рус тилига арабчадан ағдаррган ва Шарқ адабиёти ҳақида ҳам анчагина асарлар ёзган одам эди. Ўша кезларда ўзбек классик адабиётидан дарсликлар яратилмаган, катта тадқиқотлар қилинмаган ва ҳатто ўртacha мақолалар ҳам анқонинг уруғи эди. Шундай шароитда «Звезда Востока» журналининг учтами-тўртта сонида унинг ўзбек адабиёти тарихига бағишланган катта тадқиқоти эълон қилинди. Бу асар ўша пайтда кўпгина адабиёт муҳлисларининг, айниқса адабиёт ўқитувчиларининг жонига ора кирганди. Аммо бу шўринг қургур муаллиф ҳам жуда «жиддий» ғоявий хатоларга йўл қўйган экан-у, ўтмишдаги ўзбек шоирларининг кўпчилиги Ҳофиз, Сайдий, Румий, Фаридиддин Аттор, Жомий, Хайём қаби форс-тожик классикларидан таъсиранланган, дебди. Илгари – биз омилар ҳам худди шундай деб ҳисоблаб юрардик. Лекин кейин билсак, бу гирт жиноят экан. Бунинг нақадар оғир иллат, кечирилмас ғоявий хато эканини бизга яна ўша учта шоввоз мунаққидлар очиб беришди. Улар бу гал Сальени космополитизмда, Фарбга сажда қилишда айблаб, жуда кескин танқид қилишди. Шундан кейин кўп йиллар мобайнида Сальенинг номи матбуот саҳифаларидан ўчиб кетди. Бизнинг учта шоввоз мунаққидимиз эса «ўзбек танқидчилигининг «уч оғайнни ботирлари»

деган лақабни орттиришди. Биз – талабалар эса ўша кезларда ҳали кўзи очилмаган кучук болаларига ўхшардик – ҳаёт ҳодисаларини, теварагимиздаги воқеаларни чуқурроқ таҳлил қилишга, очиқ кўз билан кўришга иқтидоримиз етмасди. Бизнинг назаримизда кимда-ким бирорни қанча қаттиқ урса, мажақлаб ўрнидан туролмайдиган қилиб ташласа, ўша одам зўр эди. Шунинг учун ҳам биз кичик жуссали домламизнинг бу қадар шиддаткор, бу қадар фидойи, бу қадар зўр эканига қойил қолиб, ҳамиша унинг теварагида гирдикапалак бўлганимиз-бўлган эди.

Лекин ётироф этмоқ керакки, Солиҳ Қосимов фақат шунаقا «шов-шувли» мақолалари билангина донг чиқарган эмасди. Унинг жиддий, салмоқли, теран мақолалари ҳам кўп эди. У адабиёт назариясидан анча хабардор, XX аср ўзбек адабиётини, айниқса, жадидлар ижодини яхши билар, жаҳон адабиётини тузуккина ўқиган ва уқсан одам эди. Ҳарҳолда унинг билимдонлиги, салмоқлаб ўқийдиган маънодор маърузалари бизга маъкул келар ва биз улардан анча озиқланар эдик. У талабалар билан ака-уқадай унчалик яқиндан муомала қиласа-да, босиқ, оқил, ўзини тутиб олган одам сифатида анча ҳурмат қозонган эди. Эҳтимол, шу сифатлари учун бўлса керак, тезгина кўтарилиб кетди – Тил ва адабиёт институтининг директори бўлди, бу институтда йирик-йирик тадқиқотларга раҳбарлик қилди, муҳаррир бўлди. Шўро даври таҳдидлари шароитида жадид адабиёти, унинг айрим намояндалари ҳақида холис, ижобий гаплар айтишга журъат эта олди.

Лекин ана шу фазилатларнинг ҳаммасига қарамай, домланинг баъзи бир гаройиб, янада аниқроқ айтса, галатироқ томонлари ҳам бор эди. Мен бу «томонлар»ни унинг нуқсони ёхуд бирон-бир жиддий кемтиклиги дея олмайман. Бу «томонлар»нинг бошқаларга нафи тегмаганидек, зарари ҳам йўқ эди. Лекин нима учун домлада бу хислат пайдо бўлган, унинг манбаи қаерда, сабаблари нимада, деган саволларга жавоб топиш амримаҳол эди. Аммо ақл-идроқи жойида, эсли-хушли, ҳар жиҳатдан соғлом фикр юритадиган одамнинг бирданига ҳавоий хаёллар дунёсига шўнғиб кетишини, хаёлий манзаралар ва муносабатлар асирига айланиб қоли-

шини, кейин эса ярим соат ўтар-ўтмас яна аслига қайтиб, яна ўша-ўша жиддий ва салобатли одам бўлиб қолишини тасаввур қилиб бўлмасди. Шуниси қизиқки, домла ҳавоий гапларни ҳикоя қиласар экан, бу гапларнинг чин эканига, ҳаётда худди шундай содир бўлганига унинг ўзи астойдил ишонар, юзидаги бирон ифодадан ёки кўз қараашларидан унинг ёлғон гапиравтганини сезиб бўлмасди. Сиз унинг гапларига ишоняпсизми-йўқми – унинг учун бари бир эди. Ҳавоий гаплар бошланиши билан у бу гапларнинг сехрига маст бўларди-ю, назаримда, бу реал дунёни тарк этиб, ўзи ҳикоя қилаётган воқеалар ва вазиятлар ҳавосидан тўйиб-тўйиб, мириқиб нафас оларди.

Мен ундаги бу хислатни – кейинроқ, талабаликни битириб, ўқитувчилар сафига қўшилганимдан кейин билдим. Чамаси 1955 йил эди, шекилли.

Ўкув йилининг бошланиши муносабати билан офицерлар уйининг чоғроқ боғасида сайил уюштирилди. Вазият жуда тантанали. Бое яхшилаб безатилган. Чироқлар кўзни қамаштириб порлайди. Қандайдир оркестр чаляпти, ёшлар рақс тушяпти. Қайдадир турли ўйинлар, ҳаваскорларнинг чиқишилари. Кафелар, музқаймоқлар... Биз Солиҳ aka билан бирга ҳар хил гаплардан гурунглаша-гурунглаша хиёбонда аста сайд қилиб юрадик. Шунда тўсатдан Солиҳ aka гурунг мавзусидан чиқида, жуда жўн бир воқеани айтиётгандай, хотиржам гапириб қолди:

– Эргага Москвага кетяпман.

Домла шу топда бу гапни нима сабабдан айтди? Мен унга нима жавоб бермоғим керак? Ҳарҳолда мени огоҳ қилиб кўйиш учун айтмаган бўлса керак. Мен нима дейишимни билмай, бунаقا пайтларда айтиладиган бир сўзни айтдим.

– Бахайр... – Бу сўзда савол оҳанги ҳам йўқ эмас зди.

– Вячеслав Михайлович чақиртирибдилар.

Мен ҳайрон бўлдим:

– Қайси Вячеслав Михайлович?

– Қайси бўларди? Нечта Вячеслав Михайлович бор ўзи? Молотов-да!

Ҳанг-манг бўлиб қолдим. Молотов-а! Сиёсий бюро

аъзоси! Сталиннинг энг яқин сафдоши! Мамлакат раҳбариятида иккинчи ё учинчи ўринда туради. Бу одам, умуман, Тошкентни кўрганми-йўқми – Худо билади. Шундоқ экан, бу ердаги дорилфунунда ишлайдиган оддий бир ўқитувчини қаердан билсин? Шу топла домла кеча кўчадан юз минг сўм топиб олдим, деса ишонишин мумкин эди, лекин Молотовнинг чақираётганига ишониб бўлмасди. Унга ишонмаётганимни ошкор билдириб, кескинроқ оҳангда дедим:

– Молотов сизни нима қиласар экан?

Менинг ишонмаётганимга домла парво ҳам қилмади. Яна аввалгидай жуда яқин бир қариндоши ёхуд бир кўрпани тепишиб катта бўлган оғайниси ҳақида гапираётгандай бамайлихотирлик билан давом этди:

– Мени маслаҳатчи қилиб олган. Адабиёт масалаларида консультация олмоқ учун тез-тез чақириб туради. Аслида бир ой олдин боришим керак эди. Боролмаганимни, онам бетоб эканини айтдим. Кўп яхши одам-да. Дарров тушунди. «Майли-майли, онангизга қаранг! Тузалиб кетгандаридан кейин келарсиз. Дори-дармонми, пул-мулми керак бўлса, тортинманг, бемалол кўнғироқ қилаверинг. Врачлар керак бўлса, айтинг, дарҳол юбортираман», – деди. Мен «раҳмат» дедим. Энди фурсати келди, шекилли. Аzon туриб кетаётирман.

Домла бу гапларнинг мутлақо ҳақиқат эканига заррача шубҳа қилмай, менинг ҳам унга ишонаётганимга чиппа-чин ишониб, жуда хотиржам гапиради.

Мен нима ҳам дердим – «Сафарингиз бехатар бўлсин», дея оқ фотиҳа беришдан ўзга иложим қолмади.

Бу ҳол менга жуда қаттиқ таъсир қилди. Тўғри, мен аввалилари ҳам айрим одамлар ана шунаقا хаёл отини орқа-олдиларига қарамай савалаб, хаёлий қасрлар яратишга мойиллигини, ундаги саргузаштларини роҳатланиб ҳикоя қилиб беришларини билардим. Ҳатто бундай одамларни кўрган ва ҳикояларини эшитган ҳам эдим. Масалан, таникли академик олим Муҳаммаджон Ўрозбоевнинг отаси шунаقا ҳикояларни айтишга ўч эди. Бу одам бир вақтлар Ўзбекистон Марказий ижроия кўмитасининг раиси қилиб сайланган, Москвадаги мажлисларга бот-бот қатнаб турган, Худо билсин, ўша мажлислардан бирида Ленинни кўрган бўлса ҳам бордир.

Лекин бу воқеани у жуда ҳам рангдор қилиб, соғ ўзбекона оҳангларда, гапининг ҳаммаси бошдан-оёқ ёлғон эканига парво ҳам қилмай гапириб берган эди: «Бир куни Ленин катта мажлис қилди. Ленин мажлис ахлига қараб, «Шарқни қандоқ кўтарамиз?» – деб савол ташлади. Ҳеч кимдан садо чиқмади. Шунда мен: «Ҳой, Ленин болам, тур ўрнингдан!» – дедим. Ленин: «Лаббай, отажон!» – деб ўрнидан турди. Мен ҳайъат столини кўрсатиб, «Қани, шу столни кўтар-чи!» – дедим. Ленин «Ҳўп бўлади, отажон!» – дедиу енг шимариб ишга тушди. У аввал столнинг бир четидан ушлаб кўтарди, стол кўтарилимади. Кейин иккинчи учидан кўтариб кўрди – бўлмади. Ниҳоят, ўртасидан кўтармоқчи бўлди, яна бўлмади. «Шошма!» – дедим унга ва тўғри саҳнага чиқиб, столнинг бир учидан тутдим. «Қани, Ленин болам, нариги учидан ол-чи!» Баравар кўтардик – стол кўтарилиди. «Ана, кўрдингми, Ленин болам. Шунақа! Шарқни бу томонидан сен, нариги томонидан мен кўтарамиз!»

Бунақа ё соғлом хаёлпарастликнинг, ёхуд алланечук носоғлом хаёлот кучининг самараси бўлмиш ҳикояларни болалик кезларимда Тошкентнинг Эски Жувасида, Чорсусида, Жанггоҳида, катта-кичик бозорларида юрганимда кўп эшигандим. Лекин уларни айтадиган одамлар ҳар қанча ёқимтой кишилар бўлмасин, чаламуллароқ, ўқимаганроқ одамлар бўларди. Мен Молотов ҳақидаги ҳикояни замонавий мулла одамдан, зиёлидан эшишиб ҳанг-манг бўлиб қолгандим. Бу гапларни ичимга сифтиромай, бир куни Асқад Мухторга ёрилдим. У ишонмади.

– Кўйинг-е, Озоджон! Бунақа гапларни тўқиманг! Эшигтан кулоққа ёмон-а! Шундоқ ўқимишли, зиёли одам бундай бўлиши мумкин эмас.

Мен тилимни тишлаб қолавердим. Бир-икки ойдан кейин Асқад аканинг ўзи гапириб қолди:

– Гапингиз рост экан. Маршал Говоров домлангизнинг энг қалин дўсти экан. Мен ҳайрон бўлдим – нега Жуков эмас ёки Василевский эмас-у, айнан Говоров? Албатта, бунақа саволга ҳеч ким жавоб беролмас эди. Бу ёғини суриштирманг. Чидасангиз шу, чидамсангиз, ана, катта кўча.

Говоров ҳақидаги ҳикоя ҳам жуда гаройиб эди. Улар

қаочон, қаерда танишиб қолишиган, қандай дўст бўлишиган — маълум эмас. Лекин домла ҳар гал Москвага борганди ё Қозон вокзалида, ё Внуково аэропортида домлани Говоровнинг ўзи шахсан кутиб оларкану тўғри дала ҳовлисига олиб кетар экан. Дала ҳовли дегани ҳам қандоқ денг — нақ француз президентининг боғидан қолишимас экан. Боғда маршал домлани бир-икки кун роса меҳмон қилиб, юқориларда бўлаётган гаплардан хабардор қилиб қўяр экан, ҳатто, керак бўлиб қолса, баъзи бир мундоқроқ ё эскирганроқ ҳарбий сирларни ҳам айтиб бераверар экан. Хуллас, маршал домланинг кўнглини олиш учун роса унинг атрофида ҳалак бўларкан.

Ниҳоят, домла ҳам маршалнинг яхшиликларига жиндай жавоб бўлсин деб, уни «Ўзбекистон» ресторанига таклиф қилибди. Ресторанинг олдида ичкари кирмоқчи бўлган одамлар тирбанд экан. Эшик ичидан занжирланган. Унинг ойнагига «Жой йўқ» деган эълон осилган. Домла эшикни қоқибди. Анчадан кейин кўзлари қизарган, юзи шишиб кетган, жиякли костюм-шим кийиб олган дарбон эшикни очибди ва навбатда тургандарнинг гала-ғовурига қарамай, домла билан маршални ичкарига олибди. Ресторандаги ўтириш маршалга жуда ёқибди. Айниқса, сомса, лағмон, манти. Ўзбекларнинг пазандалигини мақтаб, жиндай-жиндай ичиб ўтиришиб, анча қизиб ҳам қолишибди. Шу пайт атлас кўйлак кийган бир официантка уларнинг столига келиб, яна бирон нарса хоҳлаш-хоҳламасликларини сўрабди. Бу қиз чиндан ҳам жуда хушрўй бўлган-у, меҳмонларнинг диққатини торгтанми ёхуд меҳмонлар ўзлари қизиб қолганлари учун жиндай шўхлик қилишганми — маълум эмас. Хуллас, маршал тили тутила-тутила «Солиҳон, жуда меҳмонбоп қиз экан-да» дебди. Буни эшитиб домланинг қаттиқ ғаши келибди, ўзбек қизларига тил теккизиш керак эмаслигини писанда қилгандай, домла дебди:

— Бизнинг қизларга кучингиз етмайди, маршал!

Маршал хижолат чеккандай бўлибди-ю, билдирамабди. Жиндай озурдалик билан дебди:

— Шунақами? Майли, бўлмаса. Кетдик. Эрталаб Кримга — менинг дала ҳовлимга жўнаймиз.

Шундай қилишибди. Эртасига маршалнинг самолётида Кримга етиб боришибди. Домла қай кўз билан кўрсинки, улар дала ҳовлиният эшигидан кириб борар экан, ичкаридан ўнта атлас кўйлак кийган, бири-биридан гўзал нозанин қизлар чиқиб келиб, уларга таъзим билан салом беришибди. Шунда маршал домлага қараб:

— Қалай? Бизнинг кучимиз етарканми-йўқми? — деб сўрабди.

Домланинг дами ичига тушиб кетибди.

Биз — ҳамкаслар домланинг бу хислатига бора-бора кўнишиб қолдик, унинг гаройиб ҳикояларининг чини қайси, ёлғони қайси эканини таҳлил қилиб, нима мақсадда бунақа қилишини англамай хуноб бўлардик. Лекин зътироф этиш керакки, домла ҳадегандা тилига эрк беравермас, ҳавои ҳикояларини бошимизга ёғдира-вермас эди. Мен билган сўнгги воқеа 1958 йилнинг ёзида бўлди.

Ўша йили Тошкентда Осиё ва Африка ёзувчи-ларининг биринчи конференцияси ўтадиган бўлди. Унга жуда қизғин тайёргарлик бормоқда эди. Мен билан Солиҳ Қосимов иккимиз «Ўзбек адабиёти» деган маълумотнома тайёр бўлгач, уни инглиз, немис ва француз тилларида босиб чиқариш учун иккимизни Москвага хизмат сафарига жўнатишди. Бу ишдан Москвада бирон-бир натижа чиққани йўқ, биз бир ҳафта меҳмонхонада бир хонада турдик, кейин Солиҳ aka Тошкентга қайтди. Мен уч кун ўтгандан сўнг қайтдим. Бу ерда тил ва адабиёт институтидаги ҳамкасабалар мени ўраб олиб саволга тутишди. «Ростми? Нима воқеа рўй берди?»

Маълум бўлишича, сафардан қайтиб, институтга келгач, домла у ердагиларга эртароқ қайтганини тушуни-тириб берибди: «Горький кўчасидан кетиб борардим. Бир маҳал битта машина келиб ёнгинамда тўхтади. Қарасам, яқинда Москвага КПСС Марказқўмининг котиби бўлиб ишга ўтган Нуриддин Акрамович Муҳиддинов машинадан қараб турибди».

— Ҳа, Солиҳон! Нима қилиб юрибсиз бу ёқларда? — деб сўрабди. Домла хизмат сафарига келганини айтибди. Муҳиддинов уни машинага ўтқазибди-да, уйига

олиб бориб, дастурхон ёзибди. Зиёфат охирига етгач, бир оз таъна оҳангида дебди: «Тошкентдаги конференция жуда катта воқеа бўлади. Мен сизга ишониб бу ерга ишга келган здим. Сиз бўлсангиз, бу ёқларда юрибсиз. Дарҳол изингизга қайтинг. Тошкентга борибоқ, конференцияга раҳбарлик ишини олинг!» Шундай қилиб, домла муддатидан олдин сафардан қайтибди.

Нима дейишим мумкин? Институтдаги дўстларим мендан Москвадаги воқеалар бўлган-бўлмаганини ажрим қилиб беришимни кутиб туришарди. Ахир, мен Солиҳ ака Москвадан қайтгунича ундан бир қадам ҳам ажralганим йўқ. Бирор жойга борсак, бирга бордик, овқатлансанак, бирга бўлдик – хуллас, унинг мендан яrim кун эмас, яrim соат ажralишга ҳам имкони бўлгани йўқ. Шунинг учун кўчада юксак рутбалик одамнинг машинасига рўпара келиб қолгани, юмшоқ айтганда, ҳақиқатдан узоқ эди. Кейинчалик ҳам қайси зарурият юзасидан домланинг бундай қилганини ўйлаб тагига етолмадик. Эҳтимол, психологлар бундай ҳолатни инсон психикасининг бирон жиҳати билан изоҳлаб берар. Биз эса баъзан буни оддий бир маиший ҳолатдан қидирдик. Солиҳ ака камдан-кам учрайдиган бўйдоқлар сирасига мансуб эди. У жуда кеч уйланди. Нима учун шундай қилганини ҳеч ким билмайди. Биз ўзимизча, домланинг ҳавоий орзуларига бандалиги қай бир даражада шу билан изоҳланармикин, деб ҳам ўйлаганмиз.

Мана, орадан анча йиллар ўтиб кетди. Домла ҳам оламдан кўз юмдилар. Мен бу гапларни эслаётган бўлсам, бу билан домланинг бирор нуқсонини элга ёйиш, одамларни бундан хабардор қилиб қўйиш ниятим йўқ. Мақсад — домлаларнинг ҳам инсон эканини ва инсонга хос бўлган барча фазилатлару нуқсонлар уларга ҳам бегона эмаслигини кўрсатишдир.

2001

## ЗИКРИЁ МИРҲОЖИЕВ ЖУМБОГИ

Бизга дорилғунунда ўзбек совет адабиётидан маъруғаларни Зикриё Мирҳожиев ўқиган эди. «Ўзбек совет адабиёти» деганимиз 1917 йилдан кейин яратилган адабиёт бўлиб, ўша кезларда бу тарих бор-йўғи 35 йиллик муддатни қамраб оларди. Табиийки, бу тарих ҳам бир шуқтада тўхтатиб қўйилмаган, бир тўлқин отиб, бир сокин ҳаракатланаётган жонли жараён эди. Бундай қисқа муддат ичидаги яратилган асарлар ҳам бармоқ билан сашарли эди, масалан, бор-йўғи тўрт-бешта роман, бешолтида қисса, тилга олишга арзимайдиган ўн беш-йигирмата ҳикоя, яна ўнтача драма мавжуд эди, холос. Бунинг устига бу тарих ўзининг қисқалигига қарамай, у яна сунъий равишда қисқартирилган, ундан кўпгина ёзувчи ва шоирлар халқ душманлари сифатида чиқариб ташланган эди. Абдулла Қодирий, Чўлпон, Фитрат, Фулом Зафарий, Элбек, Боту, Усмон Носир ва яна шунга ўхшаш ўнлаб адибларнинг номи тарихдан бутунлай ўчириб ташланган, асарларини ўқишига эмас, қўлга олиш ҳам қатъян тақиқланган, бунинг устига, жадид ёзувчилари ҳам қувғинда эди. Уларнинг биронтасининг ижоди ҳақида маъруза ўқилмас, биронта асари таҳлил қилинмас эди. Бу китобларни ўқиб кўрмоқчи бўлган одамнинг ҳамма уриниши беҳуда кетарди. Хуллас, таъқиблардан ва қатлиомлардан омон қолган ҳукмрон мафкура талабларига озми-кўпми тўғри келадиган ёзувчилар ижодидангина иборат бўлган адабиёт тарихи — агар уни «адабиёт тарихи» деб аташ мумкин бўлса, бениҳоя ғариб ва ўта чўлтоқ бўларди.

Иккинчидан, «Ўзбек совет адабиёти» деганимиз тарих билан, тўғрироғи, партия тарихи билан чатиштирилган ҳолда ўқитиларди, яъни бевосита адабиётга ўтишдан аввал ижтимоий-сиёсий даврларга тавсиф берилар,

нижада, инқилобнинг оламшумул аҳамияти, ҳарбий кмунизм, янги иқтисодий сиёсат, мамлакатни саноатлаштириш, қишлоқ хўжалигини коллективлаштириш, «сталинча» беш йилликлар ва ниҳоят, уруш ҳақидаги гаплар адабиёт ҳақидаги гаплардан бир ярим-икки ҳисса ортиқроқ бўларди. Бундай аҳвол фақат олий ўкув юртларидағина эмас, ўрта мактабларда ҳам, ўша даврнинг атамаси билан айтганда, тўлиқсиз ўрта мактабларда ҳам мавжуд эди. Адабиёт ўқитищдаги бундай схема марказдаги схемадан айнан нусха кўчириш асосида вужудга келган бўлиб, адабиётни ўқитищда учига чиққан вулгар социологизмни туғдирав, бунинг оқибатида эса адабиётда мавжуд бўлган жамики нафосат ва гўзаллик маҳв этилар, у сиёсатнинг бир бўлаги ва маддоҳи сифатидагина талқин қилинарди. Бу ўринда ҳам собиқ шўро тузумининг ақл бовар қўлмайдиган гаройиботларидан бирини кўрамиз — «вулгар социологизм» 30-йилларнинг бошида заарли, реакцион, гайриилемий метод сифатида қаттиқ қораланганд, бу ҳақда Қарорлар қабул қилинганд, мақолалар ёзилган, мажлислар қилинганд бўлса-да, амалда 40-йилларда бемалол яшашда ва адабиёт ҳақидаги тасаввурларни заҳарлашда давом этмоқда эди.

Зикриё Мирҳожиев бизга ана шу фандан дарс берарди. Аммо маъruzаларида ўзбек адабиёти ҳақидаги ҳақиқатнинг юздан бирини ҳам айтиш имконига эга эмасди, шўроларнинг адабий сиёсати туфайли бу адабиётнинг чўлтоқ ва гариб бўлиб қолганини айтольмас эди, аксинча, асил асарлари қувиб чиқарилиб, уларнинг ўринини ўртамиёна ва ҳатто паст савиядаги, бироқ мафкура чилдирмасига шох ташлаб хиром қилгувчи асарлар билан тўлдирилган адабиётни шўро сиёсатнинг «зўр тантанаси» сифатида биз — талабаларнинг онгига сингдирмоғи даркор эди. Зикриё Мирҳожиев жуда хушсурат одам эди. Биринчи марта дарсга киргандай қуниг ташқи қиёфаси, шакли шамойили ҳаммамизни ром этган эди. У ўттиз тўрт-ўттиз беш ёшлиарда бўлиб, бўйи ўртадан баландроқ, қомати тик, жиккаккина эди. Унинг қомати ҳар қанча келишган бўлмасин, спортчиларнинг қоматига унча ўхшамас эди. У алланечук

қувватдан, чайирликдан маҳрумдек кўринарди. Боши бир оз чўзинчоқроқ, диккайиб турган соchlари қалин ша қора, қошлари ҳам, йирик-йирик кўзлари ҳам тим-қора. Кўзларига тикилиброқ қарасангиз, уларда алланечук тубсиз теранлик борлигини, аллақандай интиҳосиз гусса уларга соя ташлаб турганини кўрадингиз. Айни чоғда унинг чехрасида тажантлик ҳам зухур этиб туар, тез-тез нимадандир асабийлашиб, бўлар бўлмас нарсаларга сиқилаверадиган одамдай кўринарди. Кейинчалик бу тахминимиз тўғри эканига ишонч ҳосил қилдик. Зикриё ака эзмаликни ёқтирамайдиган, анчамунча камгал, ҳуда-беҳудага кулавермайдиган одам якан. Зикриё ака талабаларни хушламас эди, десак унча тўғри бўлмас. У ҳар қайси талабага ўзига яраша муюмала қилас, лекин ҳеч ким билан оғиз-бурун ўпишиб кетмас, улар билан ўзининг орасида ҳамиша маълум бир масофани сақлаб туришга ҳаракат қиласди. Умуман, унинг теварагида аллақандай иҳота ҳудуди бор эдики, бу ҳудудни домла давлат чегарасидай ҳушёрлик билан кўриқлар, у ерга бирон бегона одамнинг қадам босишига йўл қўймас эди.

Зикриё ака биринчи дарсни талабалар билан танишишдан бошлади — ҳаммани бир-бир ўрнидан турғазиб исми шарифини, қайси вилоят ёки шаҳардан эканини, ота-оналари кимлигини сўраб-сuriштириди, талабанинг қизиқиши доирасини аниқлайдиган саволлар берди, кейин маърузасини бошлади. Лекин мен кейинчалик бу танишув домлага нима зарури борлигини тушунолмай, анчагача ҳайрон бўлиб юрдим, негаки, домла кейинчалик бирон марта ҳам биронтамизни номимиз ё фамилиямизни айтиб чақирмади, уларни эслаб қолган-қолмаганини ҳам билолмадим. Ҳарҳолда, Зикриё аканинг бир ажойиб одати бор эди — у ўғил болаларнинг ҳаммасини «Мамадали» деб, қизларни эса «Ойниса» деб чақирарди. Ўша кезларда Ҳамза номидаги театрда бир комедия қўйилган эди, унинг бош қаҳрамонлари Мамадали ва Ойниса деб аталарди. Билмадим, бу қаҳрамонлар Зикриё акага ёқиб қолганмиди ёки бошқа бирон сабабданми, ҳар қалай, ҳаммани орқасидан ҳам, юзига ҳам шу номни айтиб мурожаат қилаверар эди. Баъзи-

баъзида эса ўғил болаларни «Мамадали» дейиш эсидан чиқиб қолиб, тўғридан-тўғри «қора бола» деб чақирарди. Домланинг бунақа муносабати аввал ғалатироқ туюлган бўлса ҳам, кейинчалик ҳаммамиз ўрганиб кетдик. Унинг бундай муомаласи ҳеч кимга малол келмас эди, чунки биз буни ўзига хос ҳазил, енгил мутойиба деб қабул қиласарди.

Зикриё ака филология фанлари номзоди эди. Бугун «фalonчи фан номзоди» деган гап ҳеч кимни ажаблантирумайди. Аммо у вақтларда, 40-йилларнинг охирида, урушдан кейинги дастлабки йилларда аҳвол бошқача эди. Филология фанлари номзодлари бутун Ўзбекистон бўйича йиғишириб келганда ё тўртта ёки бешта чиқарди. Бунинг устига, негадир фан номзоди савлатидан от ҳуркадиган ўрта ўшлардаги дуркунгина одам бўлмоғи керак, деб ҳисобланарди. Зикриё ака эса ҳали ёш, бунинг устига бақувват от тугул, бирон қирчангини ҳам ҳуркита оладиган сиёғи йўқ эди. Умуман, талаба ҳалқи кўп ғалати бўлади — у ўзи билиши керак бўлган фан соҳасини билмаса билмайдики, лекин ўқитувчи ҳақида у ҳали аудиторияга кириб улгурмасданоқ ҳамма нарсани билиб олган бўлади — ким, неча марта уйланган, бола-чақаси борми-йўқми, чап оёғининг синчалоги қанақа ўстган, бугун қайси ёнбоши билан турган — шунга ўхшаш маълумотларни истаганча сўранг, талаба жавобни қалаштириб ташлайди. Талабаларнинг симсиз телефонлари берган маълумотларга қараганда, Мирҳожиев энг ёш фан номзодларидангина эмас, у анча иқтидорли, қалами ўткир, фикрлаши ўзига хос, умуман, келажагидан кўп нарса кутса бўладиган умидли ёш олимлардан эди.

Домланинг маърузаларидан, ўзаро мубоҳасаларидан, баъзи бир мулоҳазалари ва луқмаларидан чиндан ҳам иқтидорли экани, бадиий адабиётнинг нафосатини, гўзаллигини нозик тушунишини, адабиёт тарихини чуқур билишини пайқаб олиш қийин эмасди. Адабиёт тарихини билмасликнинг иложи ҳам йўқ эди-да, чунки 30 йиллик оловли йилларни қамраб олувчи тарих ўзининг жамики бўронлари, тўғонлари, алғов-далғовлари, ҳалокатли гирдобрлари билан бирга бошдан-оёқ унинг кўз ўнгига кечган эди ва ҳатто айрим ҳолларда

домланинг ўзи бу тарихнинг фаол иштирокчиси ҳам бўлган эди. Албатта, Мирҳожиевнинг ўзи яхши кўрадиган адиллари, шоирлари ҳам бор эди. У айниқса, Ойбекни яхши кўрас, унинг ижодини ўтганда ҳар қандай беписанд гапларни, кесатик ва пичингларни йигиштириб қўяр, маърузани ҳам роҳатланиб, ёйилиб ўқирди. Унинг севган шоирларидан яна бири Шайхзода эди. Гарчи Шайхзода ижоди у пайтларда дастурларга кирмаган бўлса-да, Зикриё ака турли муносабатлар билан унинг номини тез-тез тилга олиб туар ва шеърларига юксак баҳо берарди.Faфур Фулом ҳам унинг севимли ижодкорлари қаторидан ўрин олганди. Домла Faфур Фуломни Шарқнинг буюк шоирлари сирасига киритар, унинг ижоди тўғрисида гапирганда эса шеърларининг сиёсий йўналишини кенг гапирарди (у пайтларда сиёсатни мадҳ этиш бадиийликнинг узвий қисми деб ҳисобланарди). Лекин ҳеч қачон бу билан чекланиб қолмасдан, Faфур Фуломнинг бадиий тафаккури тўғрисида кўпроқ гапирар, унинг поэтик образлари дунёси бениҳоя ўзига хос ва турфа хил эканини, айни ана шу ўзига хосликда шоир истеъдодининг кудрати яққол ифодаланишини уқтирарди. Мирҳожиев Faфур Фулом ижодини жуда яхши билар, ундан кўплаб шеърий парчаларни ёддан келтирарди.

Умуман, Мирҳожиев бирон марта маърузасини қозға қараб ўқиганини билмайман. У аудиторияга қоғоз кўтариб кирмас, доскадан ҳам фойдаланмас, аҳён-аҳён-дагина баъзан ижодкорларнинг 20 ва 30-йилларда нашр этилган ва аллақачон ноёб бўлиб улгурган китобларини талабаларга кўрсатиш учун кўтариб келарди. Кези келганда шуни айтмоқ керакки, Зикриё аканинг жуда бой кутубхонаси бор эди. Кейинчалик бирга ишлаган йилларимизда домла бизни уйига таклиф қылган эди. Ўшанда бир хона кутубхона қилиб қўйилганини, унда замонавий ўзбек адабиётининг кўпгина кутубхоналардан ҳам топиб бўлмайдиган китоблари мавжудлигини кўриб ҳайрон қолган эдим — чунки бизнинг замонамиизда муайян китобларни омон сақлаб қолишнинг ўзи жуда хатарли эди — бунинг учун одамдан катта жасорат талаб килинарди.

Ҳа, Зикриё ака ўзининг иқтидори ва билими билан

талабаларнинг хурматини қозонган домлалар сирасига киради. Аммо шу билан бирга, Зикриё аканинг педагогик фаолияти бир текис, равон кечган, маърузала-рида ҳам ҳамма нарса ҳамиша жойида бўлган эди, десак, эҳтимол, бу гап ҳақиқатдан бир оз йирокроқ бўлар. Домла айрим мавзуларни илҳом билан кўтаринки ҳолда ўқигани ҳолда, баъзи бир мавзуларни гоятда асабий кайфиятда, тажанглик билан пешонаси тиришиб ўқирди. Бундай пайтларда у гапларини ичидан зўрга сиқиб чиқараётгандай, ўзи гапираётган типлардан ўзининг энсаси қотиб кетаётгандай кўринарди. Масалан, Ҳамза Ҳакимзода ижодини ўтганда унинг ҳаёт йўлини, инқилобдан аввалги ижодини, шеъриягини апил-тапил гапирадиу драматургиясига ўтганда, «Бой ила хизматчи»ни кўрганмисизлар, деб сўрарди. «Кўрганмиз» деб жавоб бердик. «Кўрган бўлсаларинг яхши, кўрмаган бўлсаларинг театрга бориб, кўриб қўйинглар ёки китобдан ўқиб олинглар» дерди-да, шу билан маърузага якун ясарди. Домла нима учундир Садриддин Айний ижодини ҳам унча хуш кўрмас эдилар — унинг асарлари тўғрисида мақтov гапларни кўп гапирмас, аксинча, уларга беписандроқ муносабатда экани билиниб қоларди.

Баъзан Айний қаҳрамонларига шунаقا антиқа таърифлар берар эдики, бу таърифлар кейинчалик талабалар ўртасида машҳур бўлиб, тилдан-тилга ўтиб юрарди. Масалан, «Бухоро жаллодлари» қиссаси ҳақида гапиранда, домла ундаги образлардан бирига ғалати таъриф берганди. Бу — Ҳамраговбоз образи эди. Эсингизда бўлса, у ўғри ва ҳатто ўғрибоши бўлган, кейин жаллодлик қилган. Домла унинг таърифини келтиргандан сўнг, зўр ва абжир ўғри бўлганини кўрсатиш учун «Ҳамраговбоз ҳўқизнинг боласини қўлтиғига қисганича баланд девордан бир сакраб ўтиб кетарди», деди. Ўзининг одатига кўра, бу қаҳрамоннинг ҳам отини айтмай, уни «қора бола» деб атаган эди. Кейинчалик, «қўлтиғида ҳўқиз билан сакраб девордан ошиб ўтган «қора бола» деган ибора талабалар ўртасида машҳур бўлиб кетди.

Домланинг юраги торлиги, асаблари ўта толиққани, қаноатсизлик унга панд бера бошлагани яна бир воқеада яққол кўринган эди. Ўқув юртида амал қилувчи қоидага биноан курс бўйича маърузалар ўқиб, амалий машгу-

лотлар ўтказиб бўлингач, имтиҳон бўлади. Бизнинг гуруҳимиз ўн бир кишидан иборат эди. Имтиҳон куни етиб келди. Домла имтиҳон билетларини стол устига ёйиб кўйди. Мен оқсоқол сифатида баъзи бир юмушларини қилиб, домлага қарашиб турибман. Ниҳоят, билет олиб, жавобга тайёрланиб ўтирган талабалардан бири: «Домлажон, жавоб берсан майлимни?» — дея ижозат сўради. Домла бош иргаб рухсат берди.

Билетнинг биринчи саволи «Ҳамза Ҳакимзоданинг инқилобдан кейинги ижоди» деган савол экан. Талаба ўша даврнинг таомилига кўра гапни «бисмилло» дея бошлади.

— Улуғ Октябрь социалистик революцияси асрлар мобайнида эксплуатация кишанлари остида эзилиб ётган ўзбек халқи учун янги баҳтли ҳаёт эшигини очиб берди.

Жавобнинг биринчи сўзларини эшлиши биланоқ домланинг энсаси қотди, пешонасидаги ажинлар чукурлашиб, қора қошлари чимирилиб кўтарила бошлади. Ниҳоят, «очиб берди» деган иборагача чидади-да, талабанинг гапини кескин бўлди.

— Қисқароқ гапиринг!

Талаба негадир давом этиш ўрнига, гапини яна такроран бошлади. Бу гап «эзилиб ётган» деган иборага етганда домла янада асабийроқ оҳангда «қисқароқ» деди. Талаба учинчи марта гапини «Улуғ Октябрь инқилоби»дан бошлади. Домланинг сабр косаси лиммолим тўлиб бўлганди.

— Ҳа-я, Мамадали, биласанми ўзинг? — деб сўради у. Талаба комил ишонч билан «биламан» деб жавоб берди.

— Шуни айтмайсанми? Қани, зачеткангни бер, — деб буюрди домла ва зачеткага «аъло» баҳо кўйди. Кейин иккинчи талабани оғиз очишга қўймай, ундан ҳам «Биласанми?» деб сўради. У ҳам «биламан» деб жавоб берди ва «аъло» баҳога сазовор будди. Тўртинчи талабадан бошлаб, қолганлари домлани ортиқча уринтириб ўтирмай, билетни олишлари биланоқ, ундаги саволни ўқиб ҳам кўрмай, «Биламан!» деб хитоб қилишар ва дафтарчаларига «аъло» баҳони ёздириб олардилар. Имтиҳон рўйхатида биргина бола баҳо олмай қолди. «Бу қора бола

имтиҳонга келмадими?» — деб сўради домла. Мен унинг хастаҳонага тушиб қолганини айтдим. «Биладими ўзи?» деб сўради домла. «Ҳа, билади, ҳаммамиз яхши тайёрланганмиз» деб жавоб бердим мен. «Майли, бундай бўлса унга ҳам «аъло» деди-да, имтиҳон рўйхатига имзо чекди у. Имтиҳон тугади, у Гиннеснинг рекордлар китобига кирадиган даражада қисқа муддатда, бор-йўғи 25 минутда бўлиб ўтганди.

Бу гаройиб имтиҳоннинг довруғи дарҳол бутун факультеттага тарқади ва ундан чиқиб шаҳар бўйлаб ҳам ҳар хил миш-мишларга сабаб бўлди. Ниҳоят, газеталардан бирида олий ўқув юртларидағи ўқув ишларининг аҳволи тўғрисида бир танқидий мақола чиқди ва унда Мирҳожиевнинг номига ҳам аччиқ-тирсиқ гаплар айтилди. Лекин у бу галвалардан осон қутулди. Уни ишдан ҳам четлатишмади, бирон ҳайфсан ҳам эълон қилишмади.

Орадан йиллар ўтди. Мен Зикриё ака ҳақида, айниқса, унинг тажанглиги ва айрим маъruzalарига «масъулиятсиз» қараб, чала-ярим ҳолда ташлаб кетабериши тўғрисида жуда кўп ўйладим. Ахир, иқтидорли, ўз соҳасини биладиган бу одам нега шундай қиласарди? Бу савол бора-бора мен учун осонликча ҳал қилиб бўлмайдиган «Зикриё Мирҳожиев жумбоги»га айланди. Жуда кўп ўйлашлардан кейин ўзимча шундай бир хуносага келдим: Зикриё ака ақлли одам сифатида ўзи ўқиёттган «фан»нинг думи юлинган қушга айлантириб қўйилганини яхши тушунган, унда қатлиомлар туфайли пайдо бўлган бўшлиқлар ҳар хил мафкурабоп, лекин бадииятдан маҳрум асарлар билан тўлдирилганини ҳам яхши билган. Ҳеч шубҳа йўқки, мамлакат тарихидаги фожиалар билан ўтган ва эҳтимолки, у ўз кўзи билан кўрган, шахсан бошидан кечирган даврларнинг бугун оғиз кўпиртириб мақталиши ҳам унга жуда малол келган. У ҳақиқатни гапира олмаган, ёлғон гапиришдан эса ҳазар қилган. Ишни ташлаб кетиш ҳақида эса гап ҳам бўлиши мумкин эмас, чунки кўп зиёлилар ўқитувчиликдан бошқа ишга ярамайдилар. Мирҳожиев худди Исқандарнинг шохи борлигидан хабардор сартарошдай дардини кимга айтишни билмай, аҳволидан оғиз очишдан қўрқиб юраверган, маъruzalariда эса ҳақи-

қатни айтиш истагини пичинглар ва кесатиқлар билан хаспўшлашга интилган, бунинг иложи йўқ вақтида эса маърузани чала қолдириб, шартта аудиториядан чиқиб кетаберган.

Зикриё ака шахматни жуда яхши кўрар эди. Ўзи ҳам биринчи тоифали шахматчи кучида ўйнарди. У аввалига Ҳамза театрининг баъзи бир шахматчи артистлари билан улфат бўлди. Кейин эса Горький боғидаги чойхонада Хўжаев, Ҳожибеков, Улугбек Элбеков каби шахматчилар билан дона сурадиган бўлди. Менинг назаримда, шахмат Зикриё аканинг ҳамдарди, дил малҳами бўлган — у кўнглидаги айтилмаган галлар аламини шахматдан олган, сиқилганлари, асабийлашишлари хуморини шахматдан чиқарган. Албатта, шахмат, ундаги киши ёркини чекламайдиган имкониятлар, руҳият юксакликларига кўтарилиш, бемалол парвоз қилиш Мирҳожиевнинг безовта кўнглига қай бир даражада малҳам бўлган. Лекин уни бутунлай даволай олган эмас. Зикриё ака авжи қирчиллама ёшида ўпка касалига дучор бўлди. Афсуски, тиббиёт ўша кезларда бу хасталикни даволаш йўлини ўрганиб олганича йўқ эди. Бу ўзига хос идрокли, қобилиятли инсон ўн гулидан бир гули очилмай, бу дунёнинг нашъу намосини ҳеч қанча totmай оламдан ўтди. Унга Оллоҳнинг раҳматлари ёғилсин.

2002

## ТИЛ ИЛМИНИНГ ДАРФАСИ

Қулоқларни қоматга келтириб чинқирган қўнғироқнинг уни ўчмасдан, аудиториянинг эшиги очилиб домла кириб келди. Домла ҳали ёш, борган бўлса энди 30 ларга борган, лекин барваста, қомати тик, икки бети қип-қизил, соchlари тароқقا бўй бермай диккайиброқ турибди. У анча-мунча башанг кийинган эди — костюм-шими янги, ҳафсала билан дазмолланган, кўйлаги қордек олпок, ёқасига гард юқмаган, бўйнида бежиримгина бўйинбог. Унинг ўзига зеб бериб кийиниши яқъол сезилиб турарди. Ўша пайтларда уруш туфайли томир ёйган йўқчиликнинг излари. Талабалар бир ёқда турсин, домлаларнинг ҳам уст-боши юпун — ҳамма амаллаб топганини кияди. Шундай шароитда бу домланинг башанг кийингани, устига гард юқтирмаслиги, ўта саришталиги бир оз эриш туюлди. Домла синчков нигоҳи билан талабаларни кўздан кечирди, кейин ярим варап оқ қоғоз олди-да, унга бўрни ўраб, бош ва кўрсаткич бармоқлари билан ушлаганича дарс бошлади.

Бу домла — Аюб Гулом эди. У ҳозирги замон ўзбек тилидан маъruzалар ўқирди. Даставвал, бу одам ўзига бино кўйган бир олифтадек кўринди, уни «ҳа энди, бу киши ҳам кўпгина тилчиларнинг биттаси-да, нима қаромат кўрсатарди» деб беписандроқ кутиб олдик. Бундай қилишимизга бизда маълум даражада асос ҳам бор эди. Бунда гап домлада ҳам эмас эди. Яширадиган жойи йўқ — тилшунослик фанлар ичida энг зерикарлilаридан. Мана бу унли товуш, буниси — унсиз, мана буниси лаблашгану буниси лаблашмаган, бу товушни айтиётганда тилнинг ўргаси кўтарилиб, учи чўччаяди, сўз туркumlари қанақа бўлади, содда гапу қўшма гап, гапнинг бош бўлагию иккинчи даражали бўлаклари,

тусловчилар, турловчилар, даражалар, майллар, замонлар ва ҳоказо ва ҳоказо... Эҳ-хе, айтиб тамом қилиб бўлмайди. Буларни санашнинг ўзида одам нафаси қайтиб, энтикиб кетади. Энди уларни ҳафталаар, ойлар мобайнида дарсда, маъruzalardарда ўрганишни айтинг. Талабаларгина эмас, ҳатто баъзи бир тилшунос домлаларнинг ўзи ҳам баъзан маъруза қилаётib чукур ҳомузу тортар ва кўзини юмиб пинакка кетарди. Биз эса уни бехосдан уйғотиб юбормаслик учун шивир-шивирилизни тўхтатиб, тинчиб қолардик. Аммо ўша куни Аюб Фуломнинг биринчи дарсидаёқ мўжиза рўй берди — бизнинг тилшунослик илми тўғрисидаги тасаввурларимиз шамолда қолган қоқигулдек тўзиди-кетди. Биз ана шу биринчи дарсдан бошлабоқ бир нарсани фирашира англай бошладик — гап тилшуносликнинг зери-карли эканида эмас, балки бу фанни қандай ўқитиша экан. Аюб Фуломнинг ҳар бир дарсида тилшунослик тасаввуримиздаги жамики салбий сифатларини йўқотиб, бамисоли чинакам шеъриятга, бетакрор бир гўзал нарсага айланиб кетарди.

Аюб Фулом ўз соҳасини жуда чукур биларди. Тилшунослик унинг биринчи ва эҳтимолки, бирдан-бир муҳаббати эди. Шу муҳаббат туфайли у ўзбек тилининг ички қонуниятларини кашф этиб, уларни фан тилига кўчирап ва бу билан ҳам чекланмай, ўзбек тилининг нафосатини, жилоларини, бетакрор рангларини, беқиёс бойлигини очишдан толмас эди. Унинг маъruzalари туфайли она тилимиз сиру синоатга тўла жавоҳирлар сандигидай кўринарди.

Аюб ака бизга синтаксисдан дарс берган, лекин унинг дарслари ҳеч қачон кичкинагина бир соҳа билан чекланиб қолмасди. Зарур бўлиб қолганида у фонетикага ҳам, психологияга ҳам, умумий тилшунослик масалаларига ҳам, этимологияга ҳам бемалол мурожаат қила-верарди. Айниқса, унинг турли туркий тиллардан олинган мисолларни қиёслаб таҳлил қилишлари жуда ма-роқли бўлар эди. Бундай пайтларда биз нафақат тиллар ўртасидаги яқинликни, балки халқлар ўртасидаги тарихий яқинликни ҳам аён белгилар, конкрет фактлар асосида кўрар эдик. Ҳеч эсимдан чиқмайди — бир куни

қирғизлар танқидчини «синчи» деб аташларини билиб қолдим. Ҳайрон бўлдим, чунки илгари Гўрёли ҳақидаги достонлардан бирида «синчи» сўзини ўқиган эдим — унда тулпорнинг бурнидан қамиш тиқиб, қўлтиғида қаноти борлигини, вояга етса, учар от бўлишини башорат қиласиган одамлар «синчи» деб аталган эди. Бу «синчи» билан қирғизларнинг «синчи»си орасида нима алоқа бор? Ўзим жумбоқни ечолмай, Аюб акага мурожаат қилдим. Аюб ака уни осонгина ечиб берди: «Қозоқлар, қирғизларда ва яна бошқа бир туркӣ тилларда «синчи» ёхуд «шинчи» деган сўз бор. Бу сўз ўзбек тилида ҳам бор, фақат ўзбекларда у «чинчи» деб юритилади. «Чинчи» «чин» сўзидан олинган бўлиб, «ҳақиқатчи», «ҳақиқатпарвар» деган маънони билдиради. Демак, қирғизлар танқидчини «синчи» деб атар эканлар, уни адабиёт ҳақидаги ҳақиқатни юзага чиқарувчи одам деб ҳисоблашларини маълум қилишади». Домланинг ана шу қисқагина қиёси жуда катта ҳақиқатга кўзимни очгандек бўлди. Бунақа мисоллардан кўплаб келтириш мумкин. Домла тилга эҳтиёт билан муносабатда бўлиш кераклигини, акс ҳолда унга жиддий зарар етказиб қўйиш мумкинлигини таъкидлар эдилар. Мисол тариқасида ўша пайтда газеталарда босиладиган бир эълонни келтирап эдилар: «Йўқолган ўрта маълумот тўғрисидаги етуклик аттестати бекор қилинсин». Табиийки, бошида мен бу изборанинг хатоси нимада эканини англаёлмадим. Домла хуноб бўлди: «Нега англаёлмайсиз? Шу туришда гап йўқолган ўрта маълумот ҳақида кетяпти. Ҳолбуки, ўрта маълумот йўқолмайди, аттестат йўқолади. Изборани «ўрта маълумот ҳақидаги йўқолган аттестат» деб тузатмоқ керак».

Домланинг ана шунақа нозик кузатишлари гапирадиган гапларимизга, ёзадиган асарларимизга ғоятда эҳтиёткорлик билан муносабатда бўлишга ўргатди.

Аюб аканинг яна бир томони бизни қойил қолдирап эди — у киши дарсга дафтар ёхуд китоб кўтариб кирмас эди, ҳатто бирор марта лахтак қофозга гапирадиган гапини ёзиб кирганини билмаймиз. Лекин маърузаларда жуда кўп адабиётлардан матн парчалари келтирап эдилар. Парчани келтириб бўлиб, унинг қайси китобнинг

нечанчи саҳифасидан олинганини ҳам айтардилар. Талабалар анча қитмир халқ бўладилар — бир-икки марта домланинг айтганини атайин текшириб кўрдик — китобнинг номи ҳам, парча олинган саҳифа ҳам тўғри чиқди.

Аюб Фулом нафақат ўзбек тилини, балки ўзбек адабиётини ҳам жуда яхши биларди. У маъruzalарида ҳам, илмий ишларида ҳам ўзбек ёзувчиларининг асарларидан кўплаб мисоллар келтиради. Уларга қараб айтиш мумкинки, лоақал 60-йилларгача яратилган ўзбек асарларидан кўпчилиги Аюб Фуломнинг назаридан четда қолган эмас. У бадиий асарда тилнинг грамматик хусусиятларигина эмас, эмоционал таъсир қуввати ҳам қандай намоён бўлишига катта эътибор берар, тилнинг эстетик қимматини фоятда нозик дид билан таҳлилга тортарди.

Аюб Фуломнинг ажойиб сифатлари кўп эди. Биз унинг яна бир қобилиятига лол қолардик. Масалан, ҳозир бирор мавзуни ўтиб турганида дарснинг тугаганини билдириб қўнгироқ чалиб қолса, домла дарҳол маъruzani тўхтатарди, янаги дарсда эса — орадан неча кун ўтиб кетган бўлмасин — маъruzani айнан узилган жойидан давом эттириб кетаверарди. Ёки унинг яна бир бошқа сифатини эслайлик — умуман олганда, унинг талабаларга муомаласи яхши эди. Лекин ҳар қандай гуруҳда ҳам бўладиган ношуд, жон куйдириб ўқишини истамайдиган бир-иккита «толиби илм» ҳам бор эдики, домла уларни ошкора ёмон кўрар ва бу муносабатини яшириб ўтирмас эди. У баъзан уларни «лоақал доска ўчиришга яраб туринг» деган кесатиқ билан ишга соларди. Аюб Фулом, умуман, аудиторияда дарс тинглаб ўтирган болаларнинг ҳар бири қанақа одам эканини, унинг савияси, билими қай даражада эканини жуда яхши билиб олган эди. Имтиҳонларда домла деярли сўраб ўтирмай, ҳар бир талабага тегишли баҳосини кўйиб берар ва унинг кўйган баҳосига эътиroz билдириб талашиб-тортишмасдик.

Мен Аюб Фуломнинг дарсларини эслар эканман, унинг фавқулодда катта маҳоратга эга бўлганига ишончим комил бўлади. Мен аминманки, у дарс беришни

чинакам санъат даражасига кўттарган эди. Назаримда, олий ўқув юртларида дарс бериш методикасига бағишлиланган илмий асар ёзиладиган бўлса унинг марказий бобларидан бири Аюб Фуломнинг педагогик санъатига, унинг маъруза ўқиш услубига бағишиланмоғи керак. Мен кейин ҳам бу тўғрида кўп ўйладим ва унинг маҳорат сирларини ўзимча кашф этгандек бўлдим. Менимча, бу сир учта эди. **Биринчидан**, ўз касбини, ўз соҳасини том маънода фидокорларча севиш, унга садоқат, **иккинчидан**, бу соҳани миридан сиригача пухта эгаллаганлик, тугал билим, ниҳоят, **учинчидан**, ўз маърузаларини мукаммал бир драматик асардек кўра билиш унинг маҳоратли педагог бўлишини таъминлаган омиллар эди. Унинг ўзбек тилининг ички хусусиятлари, қонуниятлари, ривожланиш тамойилларини билиш, бу соҳада яратган илмий асарларига келсак, бу масалада ҳам комил ишонч билан айтиш мумкинки, у жаҳон туркшунослигига ўзига хос салмоқли ҳисса қўшди. Ҳарҳолда, бугунги кунда туркология илми билан шуғулланадиган бирор кимса Аюб Фулом асарларини четлаб ўтолмаса керак. Ҳа, Аюб Фулом XX асрнинг иккинчи ярмидаги туркийшунослик илмининг Боровков, Кононов, Баскаков каби атоқли намояндлари билан бир сафда тура оладиган олим ва педагог эди. Лекин бундай бўлмади. Ҳарҳолда, у ҳаётлиги чоғида расмий доиралар томонидан етарли қадрланмади, нафақат расмий доиралар, ҳатто тилшунос ва адабиётшунос олимларнинг ҳам бир қисми бу инсонга нисбатан ортиқча ишқ-муҳаббат алансасида ёниб-ўрганмади. Ҳўш, нима учун? Менимча, Аюб Фуломнинг ўзи ҳам расмий доираларни кўпда ёқтиравермас эди. Билмадим, нима учун — ҳарҳолда, уларнинг орасидан қачонлардир ола мушук ўтиб қолган-у, кейин бир-бирларига нисбатан кўнгиллари сира илиган эмас. Аюб Фулом сиёсатдан жуда узоқ туар, на маърузаларида, на турли-туман мажлисларда, на шахсий сухбатларда дахлдор бирор гап айтишдан ўзини тийиб юрарди. Баъзи бир текширилмаган гап-сўзларга қаранганд, Аюб Фулом сиёсат борасида 30-йилларнинг бошида оғзи қаттиқ бир куйган-у, кейин бутун умри давомида совуқ сувни ҳам пулфлаб ичадиган бўлиб

қолган. Биз кейинчалик Аюб Фулом билан бирга ишладик. Муносабатларимиз ёмон эмас эди — мен у кишини чинакамига ҳурмат қиласадим. Аюб ака ҳам гоҳида баъзи бир илмий масалаларда мен билан гурунглашиб турарди. Лекин мени ўзига яқинлаштирмас ва ўзи ҳам менга унчалик яқинлашмас эди. Ўзаро муомаламиз қанчалик яхши бўлмасин, у бирон марта кўнглидаги бирон гапни менга ёрилиб гапирмаган. Аюб Фулом ҳар қандай истеъодди одам сингари ўзига хос одам эди, у ўзи маъқул кўрган йўл-йўриқлар, ўзи тўғри деб ҳисоблаган қоидалар асосида ҳаёт кечирап эди. Назаримда, Аюб Фулом ўзининг кўнгил уйини мустаҳкам бир истехкомга айлантириб олган-у, унинг эшигини бировга очиш у ёқда турсин, бу уйга ҳеч кимни яқин йўлатмасди. Ўзи ҳам, юқорида айтганимиздек бировнинг кўнгил уйига кираман, деб суйкалавермас эди. Хуллас, Аюб Фулом қай бир даражада теварак-атрофидаги дунёдан биқиниб олган ҳолда яшарди. Лекин бу ҳолат унинг худбинлигини, бошқаларнинг манфаатини ҳисобга олмай умр кечиришини билдирамайди. Кундалик ҳаётда ҳеч кимни яқинига йўлатмаса-да, аудиторияга кириб, оқ қофозга ўралган бўрни кўлига олиши биланоқ бутунлай бошқача бўлиб қолар, илм толибларининг кўзини очмоқ учун, уларнинг қалбига илм нурларини жо этмоқ учун бутун истеъодини сарфлашга киришар эди. Аюб Фулом билан бирга ишлаш жараёнида бир-икки баҳслашишга ҳам тўғри келди. Масалан, 70-йилларнинг ўртасида илмий кенгашда бир масала муҳокама қилинди. Гап ўзбек тилининг ривожланиш йўллари ҳақида бораради. Аюб ака ўзбек тилининг рус тилидан кўпгина сўзларни ўзлаштириши кераклигини айтди, тилимизда эскириб қолган сўзлар кўпайиб кетганини, жумладан, фаввора сўзининг шунаقا эканини, унинг ўрнига фонтан сўзини ишлатиш зарурлигини маълум қилди. Табиийки, бу фикрга қўшилиб бўлмасди. Негаки, шундай ҳоллар ҳам бўладики, фонтан сўзини қўллаш мутлақо мумкин бўлмайди. Ахир, «Ҳазрат Навоий ўз боғидаги фонтанларни томоша қилди» деб бўлмайдику. Бундан ташқари, тилда ҳар икки сўзнинг ҳам мавжудлиги тилнинг бойлигидан далолат беради, холос.

Ахир, тил тарихидан маълум — халқ тили ҳеч кимнинг буйруғи ёхуд тақиқи билан ривожланмайди.

Бундай «даҳанаки» жанглар ташқаридан қараганда жиндай эриш туюлса-да, бизнинг муносабатларимизга кескин таъсир кўрсата олмас, баҳсдан кейин яна аввалий гидай иноқ бўлиб кетаверар эдик. Менинг бу масалага атайнин тўхтаб ўтаётганимнинг боиси бор, албатта. Кеъйинги пайтларда баъзи бир мақолаларда илмий муно-заралар вақтидаги фикрий тўқнашувлардан бир томон-лама хулосалар чиқариш, шу асосда тарафайнлардан бирига беписанд муносабатда бўлиш, унинг шаънига кинояли, кесатиқ гаплар айтиш расм бўляпти. Жумладан, «Ўзбекистон овози» газетасида босилган бир мақолада мен билан Аюб Фулом ўргасида бўлиб ўтган бир баҳс тилга олинган-у, домлага шунаقا қора рангларда таъриф берилганки, бу одамнинг олим бўлганига шубҳаланмай қолмайди киши. Ҳолбуки, воқеа бошқача бўлган эди. Тил ва адабиёт институтининг илмий кенгашида Муҳиддинов деган кекса одам «Санглаҳ» лугати бўйича диссертация ёқлади. Ҳимоя вақтида Аюб Фулом диссертация олдига кескинроқ талаблар қўйиб, уни қаттиқ танқид қилди. Мен Муҳиддиновни яхши билардим — у киши бағоят билимдон, форс ва араб тилларини яхши биладиган, кўпгина шарқ класикларининг, шу жумладан, Навоий ва Бедил каби шоирларнинг асарларини шарҳлайдиган иқтидорга эга эди. Шунинг учун бўлса керак,Faфур Фулом у кишига «лир» деб қўл берган, домланинг Ургутдаги боғига ҳар йили зиёратга бориб турар эди. Хуллас, мен домлани ҳимоя қилиб, Аюб Фуломга қарши гапирдим. Қутбиддин домланинг аллақачон илмга кириб келганини, ўзбек матншунослигига катта олим сифатида ўрин тутишини, бугун диссертация ҳимоя қилиш ҳар қандай тамадан, моддий манфаатдорликдан узоқ эканини таъкидладим. Илмий кенгаш домлани ёқлаб овоз берди.

Бир замонлар бўлиб ўтган бу воқеада ҳеч қандай фавқулоддалик йўқ. Аюб Фуломнинг танқидий чиқишида бирор ёвуз ниятни кўриш мумкин бўлмаганидай, Қутбиддин домлани ҳимоя қилиб чиқишини ҳам бирон-бир афсонавий қаҳрамонлик қаторига қўшиб бўлмайди.

Албатта, бизлар ҳаммамиз — ўтганлар ҳам, ҳозир умргузаронлик қилаётганлар ҳам одаммиз ва одам сифатида нафақат юксак фазилатларга, балки муайян айбларга, гуноҳларга, кусурларга ҳам эгамиз. Албатта, бир-биrimizning қусуримизни айтиб турганимиз кони фойда.Faқат шу билан бирга, айниқса, ўтганларниң ҳақиқий сифатларини айтиш ҳам, эслаб туриш ҳам савоб.

Аюб Фулом кимгадир манзурдир, кимгадир хуш ёқмас. Лекин нима бўлганида ҳам у катта олим эди, олим сифатида миллий онгимизнинг юксалишида, маданиятимиз ривожида катта ўрин тутади. У тилшунослик илмининг инжа заргари сифатида яшаща давом этмоқда.

2000

## ОДДИЙЛИКДАГИ УЛУГЛИК

Музайяна Алавия билан мен 50-йилларнинг охирида танишган эдим. Ўша кезларда ўзим дорилфунунда ишлассам-да, жиндай бўш вақтим бўлиб қолиши билан Тил ва адабиёт институтига югурадим ва у ерда бир-иккита қадрдоним билан бирга ўтириб олиб, адабий ҳаётнинг «ғийбат қозонига» роса ўт қалардик. Кўп ўтмай бу ишимиз даҳанаки жангта айланар, бир зумда теварак-атроф наизаларнинг синиқларига тўлиб кетарди. Билмадим, дўстларим бўлар-бўлмас «илмий мажлислар»да қадалиб ўтиравергандаридан сиқилиб кетишармиди, ҳар қалай, ўзимизнинг «даҳанаки» жанглардан кўпроқ мароқланишарди. Кунлардан бирида «жангимиз» авж паллага кўтарилган бир пайтда, эшик очилиб, хонага ўрта ёшлиардан ўтинқираган бир аёл кириб қолди, аммо унинг қадди-қомати шамшоддек тик эканини кўриб, ёшини аниқлашга қийналиб қолардингиз, лекин чеҳрасидан ёшлик нури бутунлай ариб битмаган бўлса-да, бир-икки оқ оралаган сочининг эскича турмакланиши, расмдан чиқиб қолган думалоқ гардишли кўзойнаги, устидаги кўримсизроқ тусдаги лиbosлари ҳақиқий ёшидан кексароқ кўрсатар эди. Бизни таништиришди – Музайяна Алавия экан. Мен унинг номини эшитган эдим, албатта. Ҳатто уни ҳеч қачон кўрмаган бўлсам-да, қиёфасини ўзимча тасаввур ҳам қиласдим: ҳархолда, олимга аёл ҳам навқирон, ҳам ақлли, ҳам жозибадор, ҳам жасур бир инсон бўлмоғи керак эди. Хуллас, Музайяна опа биринчи учрашувлар менинг «олима» ҳақидаги тасаввурларимга унча тўғри келмади – у анча-мунча жўн, тўпори ва ҳатто «дехқон форма» аёл кўринди. Бунақа аёллар кенг уйнинг келинчаги бўлиб, бағрига бешикни босиб, теша тегмаган аллаларни янгратиб ўтиrsa қандоқ ярашиқли!

Музайяна опа яқинда ўзбек халқ маросим кўшиқлари мавзусида диссертация ёқлаган экан. «Ҳа, энди, маросим қўшиқларини ҳам илм қилишибди-да! Тавба, бу даргоҳга кимларнинг ризқи рўзи сочилмаган!» – дея ҳайратланган бўлдим-да беписандгина манзират юазисдан бир-икки умумий гап айтиш билан чекландим.

Орадан йиллар ўтди. 60-йилларнинг ўргасида тўсатдан бир воқеа рўй бердию менинг Музайяна Алавияга муносабатимни тубдан ўзгартириб юборди. Йўқ, у менинг назаримда ҳусндорроқ ёхуд жозибадорроқ бўлиб қолгани йўқ. У, умуман, авваллари қандоқ бўлса ўша латофати ва жозибаси билан камтар, камсукум бир аёл сифатида кўз ўнгимда гавдаланишда давом этарди, лекин айни чоғда, менинг назаримда у бутунлай бошқа томонлари билан, мен ўйлаб, хаёлимга ҳам келтирмаган жиҳатлари билан намоён бўлди. Шу пайтга қадар мен Музайяна опани «биламан» деб юраверган эканман-у, унинг ҳақидаги тасаввурим ҳақиқатдан қанча йироқ бўлган бўлса, ҳозир ҳам ўшандоғича қолиб келаётган эди. Ҳолбуки, энди билсам, ана шу оддий, тўпори, камсукум ва камтар, ҳар бир гапини сизни безовта қилаётганидан хижолат чекаётгандай тортиниб, ийманиб гапирадиган аёл оддийлик либосига бурканган улуғликтининг тажассуми экан. Ҳа, жуда иродали, кўрқмас инсон, унинг жасорати ва мардлигидан ҳар қандай эркак ўрнак олса бўлади. У ўз касбини шу қадар севар эканки, бу севги фидокорликнинг энг олий намунасини туғдирган экан. Шунча йил салом-алик қилиб юриб, у билан қанчадан-қанча баҳслашиб, тортишиб унга гап уқтириб ва унинг гапини уқиб, шу мардлигию фидокорлигини билмаган эканман. Энг қизифи шу бўлдики, мен бу ҳақиқатни Тошкентдаги бирон маърузахонада ёхуд мажлисхонада эмас, пойтахтдан анча нарида, баланд тоғлар орасида йўқолиб кетган кўримсизгина Лашкарак қишлоғида кашф этдим.

Воқеа бундай бўлган эди.

Адашмасам, 1966 йил эди. Ангрен шаҳрида янги ташкил қилинган вилоят педагогика институти мени ўзбек адабиётидан маъruzalар ўқишига таклиф қилди. Рози бўлдим. Тўрт томони тоғлар билан ўралган шаҳар жуда баҳаво ва гўзал эди. Ҳар куни эрталаб маърузани ўқиб

бўлгач, бўш қоламан. Шундан фойдаланиб, ҳар куни машинамни миниб, шаҳарнинг теварак-атрофидаги далаларни, қишлоқларни, дарёларни ўргана бошладим. Ҳар куни бирор йўлни танлардим-да, унинг охиригача ёхуд машина бора оладиган жойгача борардим, хоҳлаган жойда тўхтаб, дам олардим ё табиат манзараларини томоша қиласдим. Бир куни йўл бир қишлоққа олиб келди. Унинг ўзи ҳам, номи ҳам жуда чиройлик экан. Қишлоқни Лашкарак деб аташар эканлар. Унинг чойхонасида тўхтадим. Чойхоначи бир зумда бир чойнак чой, бир жуфт нон ва бир сиқим қанд-курс келтириб қўйди. Чойхонада ҳеч ким бўлмагани учун у келиб ёнимга ўтириди. Сезиб турибман – у Лашкарак деган бу овлоқ тоғ қишлоғига нима юмуш билан келганимни, қанақа комиссия эканимни тезроқ билишни истаб, ичи қизиб кетмоқда эди.

– Йўқ, комиссия эмасман, ҳеч қанақа ишим йўқ, қишлоқда таниш-билишларим ҳам йўқ. Ўзим, шундоқ, томоша қилиб юрибман...

– Шунақа денг? – деди у чўзиб. Ҳозирги замонда бекордан-бекорга шунча йўлга от-улов, бензин, вақт сарфлаб келиб-кетадиган овсар одамнинг бўлишига сира ишона олмаётган эди. Ҳарҳолда, у мени бирон маҳфий топшириқ билан келган хуфия деб ўйлаётгани эҳти-молдан холи эмас эди. Ниҳоят, у суриштира-суриштира менинг адабиётга даҳлдор эканимни билиб олди ва бунга узил-кесил ишонч ҳосил қилиш учун бу овлоқ дарада ҳаддан ташқари ғалати эши билган саволини берди:

– Музайяна Алавияни танийсизми?

Ажабланиш навбати менга келди – Музайяна опани бу одам қаёқдан танийди – бирон танишими, хешими, қариндош-уругими?

– Йўқ, – деди, мен опани яхши танишимни айтганимда, курсанд бўлиб. – Қариндош-уруглимиз йўқ. Щунчаки, анча йиллар аввал бизнинг қишлоққа келиб кетганди.

Бир оз қистаганимдан кейин воқеанинг тафсилотларини айтиб берди:

– Бундан 30 йиллар муқаддам қишлоғимиздан Сафар

бахши деган одам чиққан эди (Китобхон мени кечирсин – бу ном түқима, бахшининг асл номини эсдан чиқариб қўйганман, ҳозир қайта тиклашнинг иложи бўлмади. – О.Ш.). Бир куни «Тошкентдан одам келяпти. Овозингни суғуриб олиб, алланимага ёзиб кетаркан. Ўласан!» дейишибди. Сафар бахши нима деярини, нима қиласини билмай қолди. Ахир, ҳазил гапми – ҳукумат билан олишиб бўладими? Ҳар қалай, қариндошлар билан маслаҳатлашиб, 3–4 кунлик овқатни олиб, бирон четдаги фор-порга бориб турганини маъқул кўришди. Шундай қилишди ҳам. Айтилган куними ё бир кун ўтибми ўша овозни «суғуриб» олиб кетадиган одам келди. Қай кўз билан кўрайликки, у эркак эмас, ёшгина бир жувон эди. Кўлида эмизикли боласи ҳам бор эди. У Сафар бахшининг уйига тушди, унинг хотинига қараб, «Бари бир поччам Келмагунларича ҳеч қаёқقا кетмайман! Бу ерларга осонлик билан етиб келганим йўқ!» деб, қўлидаги бўғасини бир четга қўйиб, айвоннинг соя жойига омонатгина ўтириб, боласини эмиза бошлади. Шу аҳволда тўрт-беш кун ўтди. Қарасак, унақа бирорнинг овозини суғуриб оладиганга ўхшамайди, туппатузук бир мусулмоннинг фарзанди. Меҳнаткашлигини, киришимлигини айтмайсизми? Бир-икки куннинг ўзидаёқ шу хонадоннинг тувишган фарзандидек бўлиб қолди. Буни кўриб, Сафар бахши ҳам тоғдан қайтиб келди. Ана шунақа гаплар бўлиб ўтган бизнинг қишлоқда!..

Бу ҳикояни эшитиб, ҳанг-манг бўлиб қолдим. Очигини айтсам, мен Музайяна опадан бунақа жасорат, бунақа довюраклик, ўз касби корига бунақа садоқатни сира-сира кутмаган эдим. Бунақа фазилатлар ялтироқ реклама қоғозларидек одамнинг кўринадиган жойларига ёпиштириб қўйилмас экан-да! Улар одамнинг ичиди – миясининг аллақайси пучмоғида ёки юрагининг бирон тубида вақт-соати келгунча кўздан нарида яшириниб ётаркан-да! Шу садоқат ва шу фидойилик эмасмикин инсон ҳаётига муайян маъно ато этадиган омиллар! Назаримда, бу гапларни ўқиб, баъзи бир ёшларимиз мийигида кулаётганга ўхшайди – домласи тушмагур тушовини урган тойчоқдай мақтов бобида жуда олиб қочяптилар-ку! Мақтов ҳам эви билан-да! Ахир, нима

бўпти? Фольклорчи мутахассис Тошкентдан бор-йўғи 120–125 чақирим нарида жойлашган бир қишлоқقا бориб келибди. Бунинг нимаси жасорату нимаси ҳаракмонлик?

Ҳа, бир қарашда шундай. Лекин бу воқеанинг 30-йилларнинг бошларида содир бўлганини эсланг. У пайтда ҳали умуман, Ангрен шаҳри таг-тути билан йўқ эди. Тошкент–Ангрен йўли ҳам йўқ, ҳали у пайтларда бу жойлар дастлабки ваҳшийлигини йўқотмаган бир аҳволда эди. Атоқли адаб Леонид Леоновнинг урушдан аввал ёзилган бир очеркини эслайман – у Ангрен кўмири ҳавзасига бағишланган. Адабнинг ёзишича, Ангрен шаҳрининг пойдеворига тош кўйилган замонлар бу ерларда ўтиб бўлмайдиган чангалзорлар бўлган ва унда ҳатто йўлбарсларни ҳам учратиш мумкин бўлган. Мен кейинчалик бу гапларда муболага ҳам етарли бўлса керак деб, шу ерда туғилиб ўсган маҳаллий одамлардан ҳам сўрадим. 1927 йилда туғилган Четсув қишлоғида истиқомат қилиувчи Абдуманноб aka ҳикоя килади:

– Сиз айтган ёзувчи ёлғон гапирмабди – йўлбарслар ҳам бўлган. Лекин тўнгизлар жуда кўп бўлган. Ҳаммаёқ ўрмон, чангалзор, қамишзор эди. Қамишзорлар орасидаги йўллардан юриш хатарли эди. У пайтларда бозор Облиқда бўларди. Бизнинг жойлардан 20–25 чақирим нарида. Бозорга бориб келиб турмаса бўлмайди. Эсимда бор – шу атрофдаги 5–6 қишлоқдан бозорга борадиганлар отлиқдир, эшакладир, Чинорга тўпланарди-да, кўпчиликлашиб,чуввос солишиб, теварак-атрофни шовқин-суронга тўлдириб, қамишзордан ўтиб олишарди.

Энди тушунгандирсиз – бундай шароитда Тошкентдан Лашкаракка келиб кетиш, бунинг устига аёл кишининг қўлда эмизикли бола билан келиб кетиши чинакам жасорат, жасорат бўлганда ҳам Шонолунгму чўққисини забт этишга баробар келадиган жасорат.

Шундан кейин Музайяна опага бутунлай бошқача қўз билан қарайдиган бўлиб қолдим. Аввалимбор, ўзимга ўзим жуда ёқмай кетдим. Ич-ичимдан келган алланечук овоз менга таъналар ёғдира бошлади: «Кўп бетамиз одам экансан-ку! Ким кўйибди сенга олифтагарчиликни? Ҳеч нарсани суриштирмай, ҳеч нарсанинг тагига етмай,

бурнингни жийираверасанми? Ахир, фольклорчи бўлиш, қайси бир пучмоқларда кўздан пана ётган халқ ижодининг дурдоналарини қидириб топиш, уларга етиб бориши, уларни ёзиб олиб китоб қилиб чиқариш, кейин уларни таҳлил ва тарғиб қилиш – эҳ-ҳа, игна билан қудук қазишининг айни ўзи-ку!» Кечаги жўн ва камсуқум аёл энди кўзимга бошқача кўрина бошлади. Синчиклаб қарасам, унинг гап-сўзларида ҳам ва, айниқса, халқ термаларининг таҳлилида жуда катта маъно бор эди. Маълумки, халқ термаларини ташкил қилувчи тўртликларнинг биринчи байти билан иккинчи байти юзаки қараганда ўзаро сира боғланмагандай кўринади. Масалан, машҳур халқ қўшиғи «Оқ илон, оппоқ илон, ойдинда ётганинг қани?» деган саволдан бошланади ва «Мен ёмондин айрилиб, яхшини топганинг қани?» дея тамом бўлади. Бир қараашда бу байтлар ўртасида ҳеч қандай ички боғланиш йўқ. Шунингдек, бу тўртлик бошқа тўртлик билан ҳам мазмунан узвий боғланмагандек кўринади. Хуллас, илмий анжуманлардан бирида Музайяна опа ана шундай «боғланмаган»дай кўринган тўртликлар ва байтлар орасидаги боғланишини, поэтик образнинг мантиқий яхлитлигини шу қадар чукур таҳлил қилиб бердики, қўяверасиз.

Шундан кейин мен бу аёлнинг ҳаёт йўлига яқинроқдан кўз ташлашга аҳд қилдим.

Музайяна опа 1909 йилда Пискент туманининг қишлоқларида бирида зиёлилар хонадонида таваллуд топган экан. Дастлабки маълумотни уйда олган. Унинг баҳтига Пискент қишлоқ жой бўлса ҳамки, уларнинг хонадонидан бир эмас, бир нечта етук зиёли чиққан экан. Шулардан бири Абдулла Алавий. Ўзаро сұхбатларимиздан бирида Музайяна опа Абдулла Алавийни «акам» деб таништирган эди. Яқинда Тил ва адабиёт институтида кўп йиллар давомида илмий ходим бўлган, Музайяна опани 30-йиллардан бери билган Маъсуд Расули «Иқрорнома» деган хотираларида Абдулла Алавийни опанинг «амакиси» деб атайди. Мен бу ўринда Музайяна опанинг илмий биографиясини ёзаётганим йўқ. Шунинг учун худди шу тобда, шу ўринда масалага ойдинлик киритишни лозим топмадим. Негаки, гап

бунда эмас эди, шунда эдикى, Абдулла Алавий Музайя-нанинг акаси бўлганми, амакисими – бундан қатъи назар, ўзидаň салкам ўн ёш кичик бўлган Музайянага жуда катта ғамхўрлик билан қараган. Абдулла Алавий жуда ёрқин, бетакрор истеъдодга эга бўлган ажойиб романтик шоир эди. Афсуски, у ўзининг тўпламини нашр эттира олмади. Лекин мен ўқиган шеърларда шоирона туйғулар ғоятда бегубор ва ранго-ранг эканидан, шеърий техника юксак савияда эгалланганидан далолат беради. Масалан, «Тифлис оқшоми» деган шеъри шундай. Афсуски, ана шу истеъдодли йигитнинг умри жуда қисқа экан – у сил касалидан 30 ёшида оламдан ўтади. Бироқ шунга қадар Музайянага меҳрини аямай сочади – уни ўзи ўқитиб, хат саводини чиқаради, мусиқа ўргатади, шеърият алифбосидан дарс беради. Алавийнинг ўзи ҳалқ ижодини яхши кўрар ва теварак-атрофидаги қишлоқларда тез-тез фольклор намуналарини ёзиб олиш билан банд бўларди. У бу сафарларига Музайянани ҳам олиб боради ва қизнинг қалбida ҳалқ ижодига, қўшиқлар ва термаларга нисбатан бир умр сўнмайдиган оташин муҳаббат пайдо бўлади. Кейин Музайянани Ўзбекистоннинг ўша пайтдаги пойтахти Самарқандга олиб боради. Шу тариқа Музайяна аввал Инпрос (Институт просвещения – номи «институт» дейилган бўлса-да, аслида «маориф техникими»)да, кейин Педакадемияда (ҳозирги Самарқанд дорилфунуни) ўқитди. Ҳозир «ўқийди» ёки «ўқиди» деган гаплар оғзимизнинг бир чеккасидан осонгина чиқиб кетаверади ва биронта одамда алланечук фавқулодда нарса сифатида, ўқийдиган толиби илмдан том маънода жасорат ва қаҳрамонлик талаб қиласидиган ҳодиса сифатида бирор ҳаяжон ёхуд кечинма туғдирмайди. Аммо Музайянанинг Самарқандда ўқиши 30-йилларнинг бошларига тўғри келган эди. Аввалимбор унинг ўқишига уйидагилар қарши чиқишиган. Айниқса, Абдулла Алавий вафот этгандан кейин қиз боланинг ёлғиз ўзи, уйдан ташқарида, бегона шаҳарда, мусофиричиликда ўқиб юриши сира тўғри келмайдиган ҳодиса-да! Шундай шароитда, уйидагилар унинг қайтишини қатъий талаб қилиб турган, акс ҳолда юзкўрмас бўлиб кетиш билан таҳдид солаётганда ўқишини танламоқ

учун, ҳатто туғилиб ўстган хонадонини тарк этишга ҳам тайёр бўлмоқ учун одам, албатта, бошқача бўлмоги керак. Ахир, Музайяна шу ҳаёт-мамот масаласини ўзи ҳал қилишга мажбур бўлган кезларда бор-йўғи йигирма яшар қизча эди. Афтидан, унинг қалбидаги Абдулла Алавий ёқиб кетган олов шу қадар кучли бўлганки, унинг шульгаси танлананаётган йўлнинг тўғрилигига уни узил-кесил ишонтирган. Афтидан, Музайянанинг ўзига хос томонлари ўша кезлардаёқ теварак-атрофидагиларнинг эътиборини жалб қила боцлаган. У Чўлтон билан танишади на Чўяпон Музайяна га бир шеър бағишлади. Афсуски, Чўлтон қамалгандан кейин бу шеърни шоир номи билан чиқариш мумкин бўлмаган – уни тадқиқотчилар бошқа шоирнинг бошқа одамга бағишлаган шеъри сифатида эълон қилишган.

Ўқиши йиллари Музайяна учун бекор кетмади – ундағи илмга, тўғрироғи, ҳалқ иходига, ҳалқ қўшиқларига бўлган муҳаббатни янада кучайтирди. Бора-бора Музайяна «Ўзбек ҳалқ маросим қўшиқлари» деган мавзуда номзодлик диссертациясини ёқлади. 1973 йилда эса бошқа бир қатор фольклорчилар билан бирга «Булбул куйлари» деган китобни нашр этгани учун Беруний мукофоти билан тақдирланганида мендаги эски беписандликлардан асар ҳам қолмагани учун жуда-жуда қувондим. Бир ҳамкасабамнинг меҳнати муносиб тақдирлангани учун бошим осмонга етди. Ахир, «Булбул куйлари» беш жилдан иборат бўлиб, ўзбек бахшиларининг сарвари, ўша «райони Нурота, тоғлар ораси, қаридимми деса кўнгли қоласи, оти Эргаш Жуман-буябул боласи»нинг асарлари эди-да. Кези келгандა шуни айтмоқ керакки, мен турли-туман ҳалқлар ва юртларда бўлиб кўрдимки, айрим ҳалқлар ўз фольклорчиларини, ҳалқ иходини йигиб нашр этадиган олимларини ҳаддан зиёд хурмат қиласр экан. Масалан, руслар уч жилдлик «Рус ҳалқ эртаклари»ни нашр этган Афнасьевни ёки тўрт жилдлик «Рус тилининг изоҳли луғати»ни, «Рус ҳалқ мақоллари»ни тўплаб нашр этган Вл. Дални ҳанузгача ёдлаб, бот-бот эъзозлаб туришади. Бир йили Ригага борсам, унинг марказий кўчаларидан бири «Кр. Барон» номига қўйилган экан. «Барон» унинг

унвони десам, фамилия экан. Унинг бутун миллат олдидаги катта хизмати – бир неча жилдлик латиш халқ қўшиқларини тўплаб нашр қилиш бўлган экан. Кейин 70-йилларда бизда ҳам ўзбек халқининг кўп жилдлик ижодини нашр қилиш бошланди. Бу қирқ жилдан иборат бўлмоғи керак эди, билмадим, унинг ҳаммаси нашр қилиндими-йўқми, ҳархолда, менда қирқ жилд тўла йигилган эмас. Ўша пайтларда бу ноёб ва нодир нашрни ким йигиб олган бўлса, унга ҳавасим келади, негаки, маърифатли одам учун ўз халқининг қирқта китобга жо қилинган ижод дурданаларидан кўра қимматлироқ бойлик бўлмайди. Музайяна опа шу хазинани вужудга келтиришда фаол роль ўйнаган инсон.

Пойтахт Тошкентга кўчгандан кейин Музайяна опа ҳам Тошкентга келди ва шу ерда хизматини давом эттира бошлади. Ниҳоят, ўқишилар тугаб, тинч ва хотиржам меҳнат йиллари бошланди. Агар сиз шундай деб ўйласангиз, адашасиз. Аввалига мен ҳам шундай деб ўйлаган эдим. Кейин билсам, бизнинг шўро жамиятимиз ғоятда ўзига хос жамият бўлганини назардан жиндай соқит қилган эканман. У шундай жамият эдики, бирорда бўлса кўролмас, йўқ бўлса беролмас эди. Опанинг кейинги тақдирини ўйлаб, бу дунёда бандасининг ишлари нечоғлиқ фаройиб эканини, ғам-гусса деган нарса унга ботмонлаб ажратилишини, шоду хуррамлик, қувонч, баҳт эса мисқоллаб берилишини ўйлаб ёқа ушлайман. Ахир, оддий, камсукум, ўз ишини билиб, борига қаноат қилиб умр кечириб юрадиган мўмин-ювош бир аёлнинг бошига шунчалар ғам-гусса тогини ағдарадими тақдир? Ўқишини битиргандан кейин Музайяна опа турмуш курди. У Лутфулла Алавий деган қариндошига тегди. Бу йигит ҳам тагли-тугли, меҳнаткаш, эс-хуши бутун инсон эди. Авваллари турмушлари яхши кечди. Ебичишлари шоҳона бўлмаса-да, орада туғилган гулдай-гулдай фарзандлар уларнинг турмушини безади. Лутфулла Алавий қайси бир аждодидан мерос қолган касбнинг – табибликнинг этагидан тутди. Хуллас, энди оғзим ошга етди деб турганларида... тўсатдан Лутфуллахон йўқолиб қолди. У бир кун келмади, икки кун келмади, уч кун ўтди, тўрт кун ҳам ўтдики, ундан дарак

бўлмади. Суриштиргмаган жойлари қолмади – ҳеч қаердан дараги чиқмади. Биронта расмий идора «биз биламиз» деган гапни айтмади. Туппа-тузук юрган, ишга бориб-келиб турган одам ғойиб бўлиб қолса қизиқ бўлар экан. Музайяна опа бу синовдан ҳам ўтмоғи керак экан. Бардош қилди, шайтонга ҳай берди, ёргуғ кунлардан умидини узмади. Чиндан-да, бир шоир айтганидек, бунақа метин иродали, темир бардошли одамдан мих ясаса, мангу чиrimайдиган мих бўларди. Ниҳоят, адок-сиз кўринган ўн йил ўтди ва кунларнинг бирида кўчадан... Лутфуллахон кириб келди. У анча озиб кетган, юзларини ажин босган, соchlари паққос оқариб кетган, кўзларидағи нур ҳам анча сусайиб қолгандай эди. Лутфуллахоннинг сирли ғойиб бўлиши энди маълум бўлди: олис Сибирь конларида унинг ҳам ўн йиллик ризқи бор экан. «Нима учун? Нима гуноҳ қилган эдингиз?» деган саволлар ортиқча эди. Бир-бирларининг дийдорларига тўймай, вақт кечга томон оғиб қолди. Ҳали ҳам ўн йиллик ҳижрондан ўзига келолмаган, бир оз ётсираб турган Лутфулла ўрнидан кўзголди. Қайноаси унинг ниятини сезиб, уришиб берди:

– Ўслим! Сиз ўз уйингизга келдингиз. Музайяна – ўз жуфти ҳалолингиз. Болаларингиз ўз пушти камарингиздан бўлган. Ҳар қанақа ҳардамхаёлларга бориб юрманг.

Бу гапдан кейин яна «кўш ҳўқиз»нинг бири бўлиб, рўзгор аравасини тортишга киришмоқдан ўзга илож қолмаган эди.

Ишлар юришиб кетгандек бўлди, айрилиқ яралари, ҳижрон дардлари унтуилаёттандай бўлди, Лутфуллахон ҳам, Музайяна опа ҳам диссертация ёқлаб олишди, болалар аста-аста катта бўла боришли. Фақат ҳамон бу заҳматкаш оила бошидаги қийинчиликлар аригани йўқ эди. Улар Тошкентда яшай бошлишди. Марказда. Бунақа жой отлиқда ҳам йўқ эди. Лекин турар хоналари битта эди, холос. Масъуд Расули бу хонани юқорида зикр этилган китобида шундай тасвирлайди: «Чор бурчак хонанинг бир томонида Лутфуллахоннинг ёзув столи, қарама-қарши томонда Музайяна опанинг ёзув столи, уларнинг ўрталиғида болаларнинг анжомлари, бўлса, яна бир-икки стул бор. Шароит ўта ғарифона». Ҳа,

Тошкент тиббиёт институтининг ётогидан уларга теккан бу хона ҳар қанча тор бўлмасин, Лутфуллахонга ҳар қанча карцерни эслатиб турмасин, аввалги кўрилган машиққатлар, чекилган азоблар олдида бу ҳолва зди. Улар сабр-қаноатни қалқон қилиб, сўнгти манзилларига етиб бордилар. Музайяна опа 1987 йилда вафот этди. У дардлари, аламларини, орзу ва умидларини ўзи билан олиб кетди. Ундан яхши шеърлар, ўзи тайёрлаган халқ қўшиқлари қолди. Яна – яхши ном. Яхши ишлар, яхши ибрат қолди. Баъзан ўйланиб қоламан-да, одамларга ҳайқиргим келади: «Ҳой, яхшилар. Теварак-атрофин-гизга қаранг – оддийлик қиёфасида, камсуқумлик либо-сида юрган улуғларга бефарқ бўлманг! Уларнинг қўлини олиб, суҳбатидан баҳраманд бўлинг!»

2002

## АКА-УКА ВОҲИДОВЛАР

Маҳамад Воҳидов – гуруҳимиздаги энг жуссаси кичик талаба эди. Қишида қўнғир тусли телогрейка кийиб юради. Бошидаги каттакон кетмон нусха кепкаси эса уни янада кичикроқ кўрсатарди. Бундан ташқари, юзи ҳам бир бурдагина, кўзлари қисиқроқ, бир кўзи эса филай эди. Лекин шунга қарамай гуруҳимизда ҳеч ким унга «жинқарча» ёхуд «филай» деб лақаб кўйишга журъат қилган эмас.

Ўқиши бошлангандан кейин 15–20 кун ўтмай, Маҳамад гуруҳимиздаги энг обрўли, ҳамманинг хурматини қозонган талабага айланди-қолди. Негаки, унинг жуссаси кичик бўлса-да, зеҳни жуда ўткир, ақли бениҳоя теран, фикрлари жуда чуқур эди. Гаплари ҳам бачканаликдан холи, мулоҳазалари кўпни кўрган одамларники сингари салмоқли ва маънодор эди. Кўп ўтмай гуруҳимиздаги катта-кичик талабаларнинг ҳаммаси бирон маслаҳатли гапи чиқиб қолса, Маҳамадга мурожаат қиласидиган бўлиб қолди. Маҳамад ёши биз билан тенг бўлса-да, қисқа ҳаёти давомида анча-мунча ташвишларни кўриб, ҳаёт қозонида тузуккина пишиб чиққан эди. Бунинг сабаби аён эди – Маҳамаднинг отаси Абдувоҳид ака ўз даврида ўзига тўқ, бақувват одамлардан бўлган. Аммо шўро ҳукумати ўзига тўқ одамларнинг ҳаммасини камбағал, қашшоққа айлантириш билан бутун халқни «тенг» қилиш йўлига қарагандан сўнг Абдувоҳид акани ҳам таъқиб остига ола бошлади.

20-йилларнинг охирига келиб, Абдувоҳид аканинг бошига ҳам қора кунлар ёғилди. У турар жойини тарк этиб, бир этак бола билан дарбадарлик ҳаётини бошлади. Маҳамаднинг бутун болалиги Мирзачўл даштларида қишлоқма-қишлоқ кўчиб юриб ўтди. Унинг болаликда тортган азобларини, кўрган-кечирган қийин-

чиликларини айтиб адо қилиб бўлмайди. Улар бир ўсмирни эмас, бир нечта катта одамни ҳам ээзib пачақлаб ташлаш учун кифоя қилар эди. Бироқ бу мислсиз қийинчиликлардан синмади, руҳи пачақланмади, юраги интиқом, ўч олиш туйғуларига тўлиб чиқмади. Унинг иродаси болалигиданоқ пишиқ, мустаҳкам эди. Маҳамад ёшлигиданоқ ҳаёт тегирмонидан бутун чиқмоқ учун тиш-тирноғи билан курашди. Бу курашда унга зеҳнининг ўткирлиги, фаҳм-фаросати, ҳамма нарсани тез илғаб олиши ёрдамга келди. У қишлоқма-қишлоқ кўчманчидай кўчиб юрган кезларидаёқ мактабда ўқиб юрар экан, одамларнинг ҳар хил аризаларини ёзиб берар, қишлоқ кенгашида котиблик ҳам қиласди.

Ҳадемай, биз жуда иноқлашиб кетдик. Кейин бу иноқлик бутун умр бўйи давом этадиган дўстликка айланди. Кейин Маҳамад бизнинг даврамизга укаси Матлабни кирилди. Матлаб ҳам гап-сўzlари, ақл-заковати билан ҳаммамизга манзур бўлди. У акасидан бор-йўғи бир йил, нари борса, икки йилга ёш эди, бироқ аллақачон математика факультетининг 2-курсида ўқирди. Маҳамад сабаби тирикчилик бўлиб, ўқишга кейинроқ кирган экан. Матлаб ҳам акасига ўхшаган зеҳни ўткир эди.

Баъзи масалаларда, ҳатто, Маҳамаддан ўтиб ҳам кетарди, баъзи бир математиклар каби фақат ўзининг соҳасига маҳлиё бўлиб, бошқа ҳеч нарсани тан олмайдиганлар хилидан эмас эди. Аксинча, унинг қизиқиши доираси жуда кенг бўлиб, ҳамма масалаларда бемалол фикрлай оларди, кўп ҳолларда эса ўзининг мустақил фикрига эга бўларди. Матлаб ҳам акасига ўхшаб ғоятда синчков бўлиб, бошқаларга ҳар жиҳатдан ҳал бўлган, силлиқ кўринадиган масалаларда бирон галати жиҳатини топиб келиб, ўртага қўярди. Қизиги шундаки, у математик бўлишига қарамай, бизнинг соҳамиизда, яъни тил ва адабиёт масалаларида бир мутахассисдай фикр юритарди.

Кўпинча у биз, хусусан, мен мутлақо хаёлимга келтирган жойлардан эътибор бериш керак бўлган жиҳатларни топарди. «Нега матбуотда жуда кўпол хатоларга йўл қўйишади? Нега ҳеч ким тузукроқ эътибор бермайди?» – деб сўтарди биздан Матлаб. «Қанақа хато қи-

лишар экан? Сен нимани билардинг тил масаласида?» дегандек маънода беписанд сўрар эдим. «Мана манави эълонни ўқи» дерди Матлаб. У пайтларда газеталарда эрхотиннинг қўйди-чиқдиси тўғрисида ҳам турли-туман эълонлар кўп чиқарди. «Йўқолган ўрта маълумот тўғрисидаги Етуклик аттестати бекор қилинсин» деб ўқийман мен. Бунаقا эълонларни ҳар куни ўнлаб ўқиймиз. Унда ҳеч қанақа файритабиилик ёки бирон хато сезмайман – ҳаммаси кўницилган, бир маромдаги гаплар, дердим. Матлаб: «Наҳотки сезмаётган бўлсанг, қанақа филологсан – шуни билмасанг?» деган маънода таъна қилгандек: «Ахир, ўрта маълумот йўқолмайди-ку?» дейди. Шунда ҳам матнадаги хатонинг нима экани менга стиб бора қолмайди. «Хўш, қандоқ бўлса, тўғри бўларди?» «Ўрта маълумот тўғрисидаги йўқолган Етуклик аттестати бекор қилинсин» деб ёзилмоғи керак, деб уқтирарди Матлаб ўзбек тилидан дарс берадиган домладек комил ишонч билан.

Дарҳақиқат, унинг гали тўғри эди – эълонда бир сўзнинг ўрни ўзгариб қолгани учун матнга пугур етганди. Мен Матлабга тан бераман ва ўйлай бошлайман: «Демак, жумлаларда сўз тартиби жуда муҳим экан-да? Истаган сўзни истаган ўринда ишлатиб бўлмас экан-да? Ҳар битта сўзнинг ўз ўрни, ўз вазифаси бўларкан-да!»

Кейин мен ҳам нафақат эълонлардаги, балки ўқиган матнларимдаги жумлаларда сўзларнинг қандай жойлашганини таҳлил қилиб кўришни одатга айлантираман. Маҳамад ҳам қолишмайди. У энди матнлардаги маъносизлик тўғрисида, матбуотдаги пуч гаплар ҳақида гапиради.

– Айтиб бер-чи, – дея талаб қиласарди у мендан, – қўйидаги жумлада нима маъно бор? Уни қандай англашкерак? «Агар жаҳон халқари тинчлик ишини ўз кўлларига олсалар, тинчлик иши ғалаба қозонади, агар жаҳон халқари тинчлик ишини ўз кўлларига олмасалар, империалист агрессорлар енгигб чиқицлари муқаррар!» Мен нима деб жавоб беришни билмай, гангиб қоламан. Талмовсираб, нималардир дея минғирлайман. Мен ҳатто кўрқиб кетаман – «бу иборага тил теккизишга Маҳамаднинг қандай ҳадди сиғди экан?» Ўша кезларда, яъни

1947 йилда собиқ шўро мамлакатининг ҳамма худудида бу ибора жуда машхур эди — ҳар куни газеталарда, радиода, ҳар хил маъruzalарда ўнлаб марта тилга олинар, ҳатто қизил алвонларга ёзилиб, шаҳарнинг гавжум жойларига осиб қўйиларди. Негаки, бу иборани Сталин айтган эди. Ака-укалар танқидий мулоҳазаларини изҳор қила бошлар экан, мен тиззам қалтираб, рангим ўчиб, қўрқув ичида уларни тингладим. Негаки, замон оғир эди. Сталинга тил теккизиб бўлмасди. Унинг бирон иборасини танқид қилиш бир ёқда турсин, тегишли органлар Сталиннинг сурати босилган мақолани бехосдан қўлидан тушириб юборган одамни ҳам нари олиб бориб-бери олиб келгандарини эшитган эдим. Шундоқ бўлгандан кейин қўрқмай бўладими? Лекин ака-укалар ҳар куни ҳам Сталинни танқид қиласкермас эди. Улар кўпроқ кундалик ҳаётини таҳлил қилас, «баҳтли» ёшлигимизнинг авра-астарини ағдариб ташлашарди.

Умуман, уларнинг фикрлашида танқидий йўналиш кучли эди, улар ҳамма нарсани синчилаб таҳлил ғалвиридан ўтказишарди. Шу маънода мен уларни устозларим, десам ҳам бўлади. Мен кўп ўқиган бўлсан-да, фикрларимда танқидий-таҳлилий йўналиш анча заиф эди. Мен у пайтларда ўзгаларнинг ҳамма гапига лаққа тушадиган, газеталарда босиладиган ҳамма гапларни чин, деб ишонадиган жуда содда, ҳатто гўл ва лақма бир йигит эдим. Мактабда ҳам, дорилфунунда ҳам бизнинг тафаккуримизда танқидий йўналишни шакллантириш ва тарбиялаш учун деярли ҳеч нарса қилинган эмас. Мен ҳеч муболагасиз айтишим мумкин, танқидий фикрлаш бобидаги биринчи сабоқларимни ака-ука Воҳидовлар билан бўлган гурунгларимдан, баҳслар ва тортишувлардан олганман. Ўша гурунглардан кейингина ҳаёт турфа хил ранглардан ташкил топишини, фақат бир хил — қизил рангдангина иборат эмаслигини англай бошлаганман.

Тўғри, танқидий фикрлаш малакаларини ўзлаштириш ва, айниқса, уларни ўзингда маҳкам сақлаб қолиши фоятда мураккаб жараён бўлар экан — у бутун умр бўйи давом этаркан, лекин унинг бошланиши ўша — бугун фоятда олисда қолган йилларда бошланган эди.

Ака-укаларнинг жуссаси билан боғлиқ куягили во-кеалар тез-тез рўй бериб турарди. Кўпинча, одамлар орқаворатдан қарабгина эмас, ҳатто юзларига қараб туриб ҳам уларни болалар ўрнида қабул қилишар ва шунга яраша муомала қилишарди. 1954 йилнинг баҳорида Матлаб бизнинг даврамиздагилар орасида биринчи бўлиб номзодлик диссертациясини ёқлади ва физикаматематика фанлари соҳасидаги энг ёш фан номзоди бўлди. У пайтларда фан номзоди бўлиши хийла мураккаб эди ва бу унвонга эга бўлган одамлар катта саналарди. Матлаб диссертация ҳимоясидан кейин бир ойлик таътилга чиқди-да, менинг олдимга – Москвага меҳмонга келди. Мен уни вокзалда кутиб олдим. Кутгани чиққанлар орасида беш-олтига тошкентлик болалар ҳам бор эди. Ҳаммамиз биргалашиб Малая Бронная қўчасидаги мен турадиган ётоқхонага келдик. Хонам беш қаватли иморатнинг тўртинчи қаватида бўлиб, унга ичкаридан ҳовли томондаги йўлакдан кириларди. Учинчи қаватда шундоқцина эшикнинг олдида дарбонлар ўтиради. Дарбонлар кўпинча нафақага чиққан кекса рус аёллари бўларди. Улар табиатан юмшоқ, ётоқда турадиган аспирантларга онадай меҳрибон бўлишса-да, ўзларининг асосий вазифаларига жуда жиддий қарашар – бегона одамни ичкарига киритишмас эди.

Биз бир тўда бўлиб кириб кетаётган эканмиз, дарбон аёлнинг кўзи Матлабга тушиб қолди-ю:

– Ты куда, мальчик? Иди гуляй, тебе нечего делать здесь! – дея унинг қўлидан ушлаб, ўшқириб қолди,

Мен дарҳол орага тушдим, унинг «мальчик» эмаслигини тушунтирдим, менинг дўстим, ҳозир поезддан тушганини айтдим. Дарбон аёл гапимга ишонмади.

– Неужели вот этот мальчик кандидат наук? – деб сўради у. – А удостоверение есть?

– Зачем вам удостоверение? Вот я же здесь?

Ниҳоят, у юмшади, киришга рухсат берди. Табиийки, мен бундай дўстларим билан ич-ичимдан фаҳрланар эдим. Уларнинг отаси Абдувоҳид ака келбатли, ҳазил-мутойибага мойил одам эди. Ўзига тўқ оиласдан чиққан бўлиб, турмуши анча оғир бўлган. Айниқса, юқорида таъкидланганидек, 20-йилларнинг охирида

шўролар зулмидан Тошкентдаги уй-жойини тарк этиб, Мирзачўл даштларида дарбадар юришга мажбур бўлган. Бироқ бу қийинчиликлар уни синдира олмади, руҳини эгиб, ундаги ҳақиқатсеварликни маҳв эта олмаган. У гоятда гапга чечан одам эди. Ҳар икки гапнинг бирида, албатта, бирон ривоятми, афсонами, жилла бўлмаса, бирон мақол ёки ҳикматли гапни қўшиб гапиради. Бу одам билан суҳбатлашган одам зерикмас, ундаги доноликни кўрганда, Маҳамад ва Матлабдаги ақл-заковат қаердан келиб қолганини сезгандай бўлардинг.

Ака-укаларнинг онаси Тошхон ая ҳам ўзига тўқ, бадавлат оиласдан чиқсан бўлиб, турмуш суронларини Абдувоҳид ака билан баравар тортишган, лекин унинг феъли торроқ, сиркаси сув кўтармайдиган аёллардан эди – у жуда серҳаракат, бир жойда бир зум туролмас, узлуксиз ҳаракатда бўларди. Бир қарасангиз, қўлида супурги – ҳовли супуряпти, бир қарасангиз, ҳовлида ўтириб сопол тоғорада кир ювмоқда, яна бир қарасангиз – уйларнинг бурчак-бурчакларида йиғилиб қолган исларни тозалайди, яна бир қарасангиз, кўрпаларни офтобга ёйиб, қатрон қилаётган бўларди. Хуллас, ҳамма ўзбек аёллари каби рўзгор тебратади. Буни кўриб бе-ихтиёр ўйлайсан киши, яхшиямки Худо ана шу меҳнаткаш ва заҳматкаш ўзбек аёлини яратиб қўйган. Оиласнинг бахти, тинчлиги, саришталиги, рўзгорнинг қимирлаб туриши, қора қозоннинг қайнаб туриши ана шу аёлларга боғлиқ.

Тошхон ая ана шундай меҳнаткаш аёл эди, бироқ... унинг жуссаси жуда кичик эди. У атиги эрининг белидан келарди, лекин шунга қарамай, улар жуда иноқ яшардилар.

Маҳамад билан Матлаб эгизак бўлмасалар-да, жуссалари бир хил – жуда кичик туғилишган эди. Баъзан уларга қараб туриб, шундоқ кичик жуссага шундай катта ақл-заковат сиққанига ҳайрон қолардим. Бу воқеанинг сабабини уларнинг ўзидан сўрашга ийманардим. Ниҳоят, бир куни Маҳамаднинг ўзи ёрилиб қолди:

– Озод, биласанми, мен ҳам, кейинроқ Матлаб ҳам жуда кичкина туғилган эканмиз. 500 граммдан ошиқ эканмиз. Онага тортган бўлсак керак...

Бундай болаларни қалпоққа солиб, бирор қозиққа илиб қўйишар экан. Уларни кўрган қариндошларининг ҳаммаси бир оғиздан «Йўқ, булар одам бўлмайди» дейишишаркан. Бу кароматлар рўёбга чиқмади. Уларнинг иккови ҳам кўп касалликларга чалинган бўлсаларда, ҳар қалай умр берган экан, катта бўлиб олишиди.

Майли, асосий ҳикоямизга қайтайлик. Ўшанда Матлаб Москвага келганида, бу ерда уч-тўрт кун тургач, икковимиз Ленинградга боришни режалаштирган эдик. Маҳамад Ленинградда машҳур бир психолог олимнинг қўлида аспирантурада ўқиётган эди. У кўпдан бери бизни Ленинградга келиб, бир меҳмон бўлиб кетишга чорларди. Бу ўринда, албатта, бир савол туғилиши мумкин: И-е, Маҳамад ўзбек филологиясини битирган эди-ку, қандай қилиб у психологиядан аспирант бўлиб қолди ва нечук Ленинградга ўқишига келиб қолди?

Гап шундаки, 50-йилларнинг бошларида ўрта мактабларга иккита янги фан киритилди. Улар – психология ва логика эди. Киритишига киритилди-ю, лекин на бу фандан мутахассис бор эди, на дарслик ёки қўлланмалар мавжуд эди. Шунинг учун бу икки фандан мутахассислар тайёрлаш мақсадида филология факультетида логика ва психология бўлимини очишга қарор қилишди. Бизнинг турӯҳимизда ҳаммаси бўлиб 25 талаба бор эди. Қизири шундаки, янги бўлим ташкил қилиниши биланоқ, 14 талаба шу бўлимга ўтиб кетди, биз – филологлар 11 киши қолдик. Янги бўлимга ўтганлар ичилада Маҳамад ҳам бор эди. Маҳамад янги бўлимга ўтиши билан гўё умр бўйи кўнглида сақлаб келган орзуси ушалгандек, психология фанига ошиқ бўлди-қолди.

Энди ўзаро баҳсларимизда, турунгларимизда унинг гапларининг асосий мавзуси психология бўлиб қолди. У аллақаердан академик Леонтьевнинг рус тилидаги «Психология» деган қалин китобини топиб олган ва уни қўлидан қўймай, узлуксиз ўқиб бораарди. Фақат ўқиб бораарди эмас, ундаги психологлар ўтказган турли тажрибалар ҳақидаги гапларни бизга гапириб ҳам берарди. Маҳамаднинг гапларига қараганда, психология фанининг истиқболи жуда катта эди – ҳадемай жуда кўп

фанлар, ишлаб чиқаришнинг йирик соҳалари психология фанига асосланиб иш юрита бошлайди, кўпгина ижтимоий ва ҳатто иқтисодий муаммоларни ҳал қилишда психологиясиз бир қадам ҳам қўйиб бўлмай қолармиш.

Маҳамад ўша пайтдаёқ бу борада етакчи капиталистик мамлакатларда олиб борилаётган ишлардан яхши хабардор эди. Масалан, у Англияда рўй берган бир воқеани кўп ҳикоя қиласарди: йирик завод эгаларидан бири катта пулга психолог ёллабди, психолог завода бир неча муддат иш жараёнини кузатибди, сўнг у завод ускуналарини бошқачароқ жойлаштириш тўғрисида тавсия берибди. Бу тавсияда шу ерда ишлайдиган ишчиларнинг психологиясидаги ўзига хосликлар ҳисобга олинган экан. Психологнинг тавсияси амалга оширилгач, ишлаб чиқарилиш унумдорлиги 15 фоизга кўтарилибди.

Ўша кезларда Маҳамаднинг оғзидан бол томиб, кўзлари ёниб гапириб берадиган бундай ҳикоялари бизга бир ошиқу мубталонинг хомхаёлларидек туюларди. Лекин кўп ўтмай, ҳаётда психология фани чиндан ҳам муҳим аҳамият касб эта бошлади. Маҳамад ҳақ бўлиб чиқди. Шу тарзда бу илм шайдоси психология фанининг йирик маркази бўлган Ленинградга аспирантурага борди...

Биз Матлаб билан бирга кечқурун поездга чиқиб, эргалаб тонг ёришар-ёришмас Ленинградга етиб бордик. Маҳамад бизга ёзган мактубларида ётоги қаерда эканини, унга қандай бориш йўлларини айтган эди. Шунинг учун биз Матлаб билан бораёттанимизни Маҳамадга билдирамай, унга сюрприз қилмоқчи бўлдик. Поезддан тушиб, вокзал майдонига чиқдик. Биз майдондан Невский проспекти деган шоҳкўча тўппа-тўғри чизиқ бўйлаб уфқа чўзилиб кетган. Биз ўзимизнинг юртимизда қингир-қийшиқ кўчаларга ўрганиб қолганимиз – уларнинг ҳам ўзига яраша жозибаси, алланечук илиқ таровати бор. Лекин мукаммал тўғри чизиқ бўйлаб курилган кўча ҳам ғоятда гўзал бўлар экан. Биз кўчани томоша қилиб, пиёда кетдик. Кўчанинг ҳар қадамида биронта машҳур ҳайкал ёки донғи оламга таралган машҳур иморатлар бор эди. Унинг бошланишида Екате-

рина И нинг маҳобатли ҳайкали. Шўролар замонида подшоларнинг суратию ҳайкалларини ҳамма жойдан олиб ташланган деб ўйлар эдим. Йўқ, бундай эмас экан, уларнинг баъзилари сақланиб қолган. Екатеринага қўйилган ҳайкал шу қадар маҳобат билан ишланганки, унинг олдидан кетолмай қоласан киши. Бир оз юргач, Сенная майдони келади – уни Сомон бозор ёки Беда бозори дейиш мумкин. Кейин «Астория» меҳмонхонаси. Кўчанинг ўнг томонидаги жуда катта муҳташам бир бино – китоб дўкони. У ҳам ҳавас қиласа арзийдиган кичик мўъжизалардан. Хуллас, бу кўчанинг ҳар қаричи жонли тарих. Унинг майдонларидан намойишларга чиққан одамларнинг ғала-ғовури ёки солдатларнинг турс-гурс қадам юришлари – тарихнинг сўнмас саботи эштилаётгандай бўлади. Сиз ўзингизни тарихнинг томошабини эмас, иштирокчиси деб ҳис қиласиз. Биз ётоқقا кириб борганда Маҳамад эндигина нонуштага ўтирган экан. Бизни кўриб жуда кувониб кетди.

– И-е, осмондан тушдиларингми? Нега хабар қилмадиларинг? Кутиб олардим-ку!

Кучоқлашиб кўришдик, ҳол-аҳвол сўрашдик, бирга нонушта қилдик. Кейин Маҳамад бизга деди:

– Мен дарсга боришим керак, қолдириб бўлмайди. Икковларинг соат биргача сайр қилиб, томоша қилиб туринглар. Мен қайтгач, бирга тушлик қиласиз-да, кейнги режаларни тузамиз.

Шундай қилдик. Маҳамад дарсга бориб келди. Кейнги икки кунда ҳар қалай дарси йўқ экан. Бизга раҳнамо бўлиб, Ленинградни обдан томоша қилдирди. Бормаган жойимиз қолмади. Сарой майдонини, ундаги Александр минорасини томоша қилдик. Нева бўйларида юриб, ёзги боғни ораладик, Мис чавандоз ҳайкалини кўрдик, Исаак жомеси ва Петропавловск қўрғони ҳам хўб кўрадиган жойлар экан. Маҳамад қачон бу жойларни беш кўлдай ўрганиб олибди? Бизга ички бир гурур билан уларнинг тарихини, улар билан боғлиқ ривоятларни тапириб берарди. Мана ўша ривоятлардан бири:

Петропавловск минораси осмонга бўй чўзган найзасимон узун минорага эга. Унинг учida подшо ҳокимиятининг герби – икки бошли бургут қўндирилган. У

шамолда ҳаракатланиб туради. Бир куни шамол қаттиқроқ бўлганми – бургутнинг бир қисми синиб тушибди. Уни тезда тузатмаса бўлмайди – ҳарҳолда давлат рамзи. Аммо қандай қилиб найзанинг учига етиб бориш мумкин? Бу ерга ҳавоза Қуришнинг имкони йўқ. Жамики, атоқли муҳандислар ва қурувчилар муаммони ҳал қилиш йўлини қидиришибди. Лекин топиша олмабди. Шунда Россиянинг аллақайси овлоқ бир қишлоғида яшайдиган уста бу ишни бажаришни зиммасига олибди. Унинг йўли шу қадар содда ва осон эканки, муҳандислар шунчалик оддий нарсани тополмаганларига роса ўкинишган экан. Уста эса найзасимон миноранинг асосига йўғон арқони белбоғ қилиб ўрабди. Кейин унинг юқорисидан яна бир ҳалқа ясабди. Шу тарзда миноранинг учига етгунича яна бир нечта ҳалқа ясабди-да, уларга тирмашиб, найзанинг учига етиб борибди ва синган бургутни бутунiga алмаштирибди. Мужик устанинг топқирлиги ва уддабуронлигига ҳамма қойил қолибди, унинг ҳунармандлик санъатини юқори баҳолаб, подшо уни катта совғалар билан сийлабди. Аммо моҳир уста инъомларнинг ҳаммасини рад этибди. «Менга бошқа бир инъом керак. Россиядаги ҳамма қаҳвахоналарга кириб, текин ичишимга ёрлиқ берсангиз», дея илтимос қилибди. Подшо унинг соддалигига кулиб, ёрлиқ берибди. Уста шунда ўн етти кун сурункасига ичиб, охирида жон таслим қилган экан.

Тарихда бунақа гаройиб ишлар ҳам кўп бўлган экан. Бир кунимизни Эрмитажни томоша қилишга бағишладик. Эрмитаж яна Қишки сарой деган ном билан ҳам аталади. Бир вақтлар бу ерда подшо хонадони яшаган экан. Табиийки, бу ерда энг асл буюмлар, энг ноёб расмлар ва ҳайкаллар тўпланган. Афсуски, уларни бир қур югуриб кўриб чиқаман десангиз ҳам ойлар эмас, йиллар керак. Биз бир кунда нимани ҳам кўра олардик. Фақат шундай буюк бойлиқдан ёлчитиб баҳраманд бўла олмаганимиз учун чуқур таассуф ҳиссигина қолади қалбларда. Лекин шундай бўлса ҳам Ленинград билан уч-тўрт кунлик танишиш бизда жуда чуқур таассурот қолдирди. Биз гўё шу бир кун ичида бутун бошли бир дорилфунунни тугатгандай ҳис қилардик. Бу ҳис ҳозирга қадар ҳам қалбларда яшашла давом этмоқда.

Матлабнинг таътил кунлари охирлаб қолган эди. Мен ҳам Москвага қайтиб, аспирантлик ишларимни давом эттиргомим керак эди.

Маҳамадга унutilmas меҳмондўстлиги учун ташаккурлар айта-айта Ленинграддан жўнаб кетдик.

Орадан бир-икки йил ўтиб, Маҳамад ҳам, мен ҳам муваффақият билан диссертацияни ҳимоя қилиб юртимизга қайтдик. Мен Тошкент давлат дорилфунунида қолдим, Маҳамад эса Андижон педагогика институтига кетди. Гап шундаки, у аспирантурада шу институт маблағига ўқиган эди. Бунда ҳимоядан сўнг камида икки йил шу институтда ишлаб бермоғи керак эди. Маҳамад зиммасидаги бу мажбуриятни бажарди. Домлалар билан ҳам тил топишиб, чиқишиб кетди. Қисқа муддатда у институтнинг энг обрўли домлаларидан бирига айланди, у ўқийдиган психология фани ҳам талабалар ўртасида обрў қозонди, бу фанга қизиқувчилар, психологиядан мутахассис бўлишни истайдиганлар кўпайди. Маҳамад шу ерда уйланди. Унинг уйланиши ҳам ўзига хос бўлган. Хотинининг отаси ўзбек, онаси рус, ўзи яхшигина шифокор эди. Шунинг учун ҳам у баъзи бир эскирган, малол келадиган анъаналардан дадил воз кечиб, жуда содда ва жўн тарзда тўй қилишга рози бўлган. Тўйда, асосан, келин томондан энг яқин қариндошларгина иштирок этган эди.

Маҳамад бир йилми-икки йилми мажбурий ҳарбий хизматни ўтаб бўлгач, Андижонда қандай ишлаган билмайман-у, лекин дорилфунунда жуда зўр иштиёқ билан, жонини жабборга бериб, ўзини заррача аямай, дам олиш нималигини билмай ишлади. Яна бир марта ҳаммамизга фанга, илмга садоқат қандай бўлишини кўрсатди. Унинг маърузаси ҳамиша жуда мароқли, янги фактларга бой бўларди. Уларда яна ўша гап – яқин келажакда психологиянинг ҳамма соҳаларда катта роль ўйнай бошлиши, психологиясиз бир қадам ҳам қўйиб бўлмай қолиши ҳақидаги гап олға суриларди. Бу маърузаларни тинглаган талабаларнинг анча-мунчасида психолог бўлиш нияти пайдо бўлди. У тинимсиз равишда мақолалар, рисолалар ёзди, қисқа муддат ичida «Болалар психологияси» деган дарслик ёзди. Афсуски,

бу қимматли дарслик фақат бир марта нашр қилинди, холос. Ҳозир бу китоб анқонинг уруғи бўлиб қолган. Тез орада республика психологлари ёрдам ва маслаҳатлар сўраб, унга мурожаат қила бошлади. Маҳамад сира эринмай уларниң рисолалари ёхуд диссертацияларини синчиклаб ўқиб чиқар, тегишли маслаҳатларини берар, ишни охирига етказмагунча, ундан хабардор бўлиб турарди. У жуда қаттиқ ҳаракат қилиб, ҳар хил катта-кичик идораларга қатнаб, министрларниң қабулига кириб, не-не машаққатлар билан университетда психология кафедрасини очди ва ўзи унга раҳбарлик қилди. У ҳар жиҳатдан бу лавозимга муносиб эди. У докторлик диссертацияси устида ҳам иш олиб борди. Эълон қи-линганд маколалари мазмун ва сони жиҳатидан ҳам ҳеч қайси профессорнидан қолишмас эди. Бунинг устига унинг Ленинграддаги раҳбари (кейинчалик, у дунёдаги машҳур психологлардан бири бўлиб қолди) Москвага ишга ўтган ва Маҳамадга тез-тез хатлар ёзиб, уни тезроқ профессорлик ишларини якунлашга ундаётган эди. Аммо университетдаги баъзи бир амалдорлар нима сабаб-данdir бошиданоқ Маҳамаднинг ишларига тўсқинлик қила бошлади — улар кафедра очишга ҳам тўсқинлик қилишган, энди эса унинг профессорлик унвонини олишига тиш-тирноқлари билан қарши туришган эди. Албатта, бундай совук муносабат унга ёмон таъсир қилди. Кунлардан бирида у кўчада Йиқилиб қолди. Ҳар қалай дунёда яхши одамлар ҳам кўп. Улар Маҳамадни зудлик билан шифохонага етказиб боришади. Врачлар ҳали авжга олмаган инсультнинг олдини олиб қолишади. Табиийки, врачлар унга камроқ ишлашни тавсия қи-лади, хотини Лена Шодибекова уни узлуксиз медицина кузатувида сақлайди. Аммо илм фидойиси учун севимли иши билан шуғулланишдан яхшироқ нарса борми?! Маҳамад врачларниң гапига «хўп» дейди-ю, кейин ўз билганидан қолмайди. Гўё табиат унга ажраттан муҳлат тугаётгандай яна ишлашга киришар, кўнглидаги ҳамма гапларини, билимини ҳам қофозга тушириб, одамларга қолдиришга интилаётгандек бошини кўтар-май, жуда қаттиқ ишларди. Ниҳоят организм чидаёл-мади — ҳали олтмишга кирмаган олимнинг паймонаси

тўлганди. Ундан икки ўғил, икки китоб ва кўплаб мақолалар мерос қолди.

Маҳамад ҳақидаги хотираларимга шу ерда нуқта кўйсам ҳам бўларди-ю, унинг яна бир сифатини айтмай ўтишнинг сира иложи йўқ. У илм билан қанчалик банд бўлмасин, қариндошлари ёхуд дўстларидан бироргаси унинг ёрдамига муҳтоҷ бўлиб қолса, биринчи бўлиб етиб келарди. Бағоят саховатли, бағрикенг, ҳеч кимдан ҳеч нарсасини аямайдиган инсон эди. Мен ўзим унинг саховатидан кўп марталаб баҳраманд бўлганман.

Мен Москвадан қайтиб, университетда ишлай бошлагач, оиласи ҳаётимда муаммолар пайдо бўла бошлиди. Оиласиз жуда катта бўлиб кетган – тоғам оиласи билан, синглим оиласи билан, аям, бувим, менинг оиласи шу ҳовлида истиқомат қиласр эдик. Бу уй-жой муаммоси эди. Шунда Маҳамад: «Бизниги кўчиб кела қолинглар, бир хона бўш ётибди», деди.

Авваллари бу хонада Матлаб билан ота-оналари турар эди. Яқинда Матлаб Яланғоч томондан жой олиб, ота-онаси билан бирга чиқиб кетган, бу ерда бир хонада Маҳамад билан хотини иккви қолган эди.

Мен Маҳамаднинг таклифини қабул қилишга хижолат бўлдим.

– Қандоқ бўларкан?

– Нимаси қандоқ бўларкан? Ҳеч қандоқ бўлмайди. Кўчинг кўлми? Кўчарга одам керакми?

Кўчим катта эмас эди – битта кигиз, битта темир каравот, уч-тўртта кўрпа, битта кийим жавони ва бир қанча китоблардан иборат эди.

– Йўқ, – дедим Маҳамадга. – Ўзим эплайман. Ўша куниёқ кўчиб келдик.

Маҳамадларнинг ҳовлиси Ўрдада – ҳозирги 84- завод корпусларининг ўрнида жойлашган бўлиб, уни Бодом маҳалла дер эдилар. Бир вақтлар бу маҳалла Ўрдага яқин бўлиб, у ерда ҳоким саройида хизмат қилувчи ҳар хил косиблар ва хунармандлар истиқомат қилган. Кейин ҳамма жойдаги каби бу ерда ҳам бирор кўчиб кетиб, бирор кўчиб келиб, аҳоли қурамол бўлиб қолган эди. Маҳамадларнинг ҳовлиси ичкари-ташқарили эди. Бироқ ташқарида ҳеч қанақа уй йўқ эди. Фақат ичкаридагина

икки уй ва бир айвон бор эди. Ҳовли торгина эди, унда дов-дараҳт, яъни бир неча қуриб қолган узум бор эди. Яқин қўни-қўшнилар ҳам жуда ажойиб, дилкаш одамлар эди. Айниқса, бўйдоргина Рашидхон ака ва унинг турмуш ўртоғи Мұҳтарам келинойи жуда очиқ, хушмуомала одамлар эди. Рашидхон ака молия идораларида ишлар, келин ойи уй ишлари билан банд эди. Биз улар билан тез-тез чақчақлашиб турар эдик. Бир-икки ҳовли нарида Абдуманноп ака деган йигит ота-оналари билан туришарди. Улар ҳам Маҳамадларга аллақандай узоқ қариндош эди. Абдуманноп ака биздан уч-тўрт ёш катта эди, шунинг учун у киши билан ҳамма вақт ҳам гапимиз-гапимизга қовушмас эди. Абдуманноп ака тузуккина рассом эди. Кейинчалик у Абдуманноп Сайдов деган Ўзбекистон ҳалқ рассоми бўлиб танилди. Лекин, бари бир, асосий сұҳбатдошим, сирдошим Маҳамад эди. Бу салкам бир йил давомида ишдан қайтгандан кейин кечки овқатни тановул қилиб бўлиб, ёзниг иссиқ оқшомларида ҳовлида, томнинг тагида, совуқли-қировли кунларда эса хона ичида гуриллаб ёниб турган «буржуйка» яқинида ўтириб гурунглашардик. Сұҳбатимизнинг белгилаб қўйилган бирон мавзуи бўлмас эди. Оддий гаплардан – бугун дуч келган воқеаларимиздан, бирордан эшитган қизиқроқ китобдан ўқиб билиб олган бирон янгилигимиздан бошланарди. Кейин жойидан аста қўзғалиб тезлаб кетган поезддек сұҳбат жонланиб қизиб кетарди. Гапни кавласанг, гап чиқади, деган мақол бор. Сұҳбат давомида албатта бирон муҳим мавзуга келардик-да, унинг теварагида тортишув бошланарди. Бу қизғин баҳслар, адоқсиз тортишувлар мени кўп нарсага ўргатди, ақлимни пешлади ва ҳатто қай бир даражада характеримни тоблади. Ҳозирга қадар мен уларни ниҳоятда мамнуният ва миннатдорлик билан эслайман.

1957 йилнинг охирида Ёзувчилар уюшмасидан менга уй тегиб қолди. Бу уй Чилонзорнинг марказида бўлиб, уч хонадан иборат эди. Кўп ўтмай яна бир фарзанд кўрдик – уйлар жуда торлик қилиб қолди. Шундай бўлса-да, тўртинчи қаватдаги бу кулбамиз бизга қасрдай кўринар эди. Биз бу уйда 1972 йилгача истиқомат қилдик.

Маҳамаднинг вафоти мен учун жуда оғир йўқотиш бўлди. Бир томоним бўшаб ҳувиллагандек туюлар эди. Анча вақтгача мен кўниколмай юрдим. Яхшиямки, Маҳамаднинг ўзига ўхшаган укаси Матлаб бор экан – унинг билан яқин мулоқот оғир айрилиқнинг аламини сенгиб ўтишга ёрдам берди.

60-йилларнинг бошига келганда Матлаб механика-математика факультетининг етакчи домлаларидан бирiga айланган эди. Талабалар унинг маъruzаларини катта қизиқиши билан тинглашарди. Негаки, Матлаб маъruzalariда соф математик масалалар билан чекланмасдан, ҳаётдан ҳам кўпгина қизиқарли мисоллар келтирас, ҳар хил математик жумбоқларни ўргага ташлаб, талабаларни янада қизиқтириб қўярди. Қисқа муддатдан кейин у доцент бўлди, анча йиллар мобайнида факультетга де-канлик қылди. У докторлик диссертациясини ёқламади-ю, лекин билими битта докторникичалик бор эди, фикрлаши эса ҳар қандай докторникидан ўткир эди. Ҳар сұхбати-мизда у мени бирон масала билан ҳайрон қолдира, бу масалалар мени ҳаётга янада соғломроқ қарашга ун-дарди. У физика ёки математиканинг асрлар давомида синаалган қонунларини ревизия қилишдан ҳам тап тортмас, бошқа соҳаларга алоқадор танқидий мулоҳа-заларни ҳам кўп айтар эди. Айниқса, халқаро масалаларда, сиёсатга алоқадор масалаларда у ҳеч чўчимай фикрларини дадил айтаверар ва тортишувларимизда кўпинча ҳақ бўлиб чиқар эди. Матлаб билан ҳам гу-рунглашиш жуда мароқли эди. Адабиётни кўп адабиёт-чилардан кўра нозикроқ тушунарди. Биронта бадиий асар ўқиса, унинг социологик жиҳатига унча эътибор бермас, образлигига, нафосатига, тилининг ўткирлигига эътибор берар, асардаги бунақа жойларини бир зумда топиб оларди.

Сира эсимдан чиқмайди – бир куни у Абдулла Қаҳ-ҳорнинг «Бемор» ҳикояси ҳақида тўлқинланиб гапирди: «Адиб сукунатни қандай ҳис қиласи, бу сукунат нақадар сермазмун, bemor ётган вазиятга ҳамоҳанг, унинг кай-фиятига мос. Бунинг устига тасвирнинг ихчамлигини қара, – шундай деб, у асардан икки деталга аҳамият беради, – «... пашиба ғинғиллайди, bemor инқиллайди».

Шу икки деталь ёрдамида тугал бир психологик манзара яратилган». Шунча йил бу тўғрисида маърузалар ўқиган бўлсам-да, унинг бундай нозик сифатларига – асарни чинакам санъат намунасига айлантирадиган жиҳатларига эътибор қилмаган эканман. Кейин Абдулла Қаҳҳорнинг тасвиридаги санъатига кўпроқ диққат қила бошладим. Табиийки, мен Матлаб ҳақида Абдулла Қаҳҳорга айтмай қололмадим. Матлаб Ўрозбоевнинг шогирди эди. Академик эса Абдулла Қаҳҳорнинг болалик дўстларидан эди. Билмадим, Абдулла Қаҳҳор Мамажон акадан сўраб-суришириб кўрганми-йўқми, ҳарҳолда бир куни – «Қани, олиб келинг, ўртоғингизни, бир гаплашайлик», – деб қолди. Биринчи учрашувда Матлаб ўзини гапдан тийиб, анча сиполик билан ўтиради. Кейинги учрашувларда қизиқ-қизиқ гурунглар бўлди ва Абдулла акага Матлабнинг фикрлаш йўсини ёқиб қолди, шекилли, уни тез-тез уйига ҳам, дала ҳовлисига ҳам таклиф қила бошлади. Матлаб Абдулла Қаҳҳорни жуда ҳурмат қиласарди, лекин ҳурматини, яхши кўришини ёзувчининг юзига тўғридан-тўғри айттолмас эди. Лекин бир куни айтадиган хонаси келиб қолди, шекилли. Бу гал ҳам тўкин дастурхон ёзилди, палов ёхуд Абдулла Қаҳҳорнинг тили билан айтганда «гумбаз» дамланди, овқатдан олдин иштача учун жиндай-жиндай олинди. Матлаб аввалги келганида ҳам ичмас, ичса ҳам номига бир-икки ҳўплаб қўярди-ю, мутлақо хушёр ўтиради. Бу гал уни нима жин урди – билмасдан бир-икки қадаҳ ароқни шартта ичиб юборди. Мен авваллари Матлабнинг кайф қилиб қолганини сира кўрмаган эдим. Бу гал гирт маст бўлиб қолиб чулдирай бошлади:

- Абдулла ака!
- Ҳа, нима дейсиз?
- Абдулла ака! Биласизми? Йўқ, билмайсиз. Сиз одам эмассиз!..

Мен ҳайрон бўлдим – нима деб валдираяпти Матлаб тушмагур? Мен унга имо-ишоралар қилдим, стол тагидан оёқларини босдим.

– Нега оёғимни босасан? – деб мендан ранжиди у ва яна дийдиёсини давом эттиради.

— Сиз одам эмассиз... Ҳа, одам эмассиз...

Мен ер ёрилмади, ерга кириб кетмадим. Абдулла ака эса гап нимада эканини тушунди, шекилли, мийигида кулиб ўтираверди. Матлаб бутунлай бошқа гапни айтмоқчи эди: «Абдулла ака, сиз одам эмас, сеҳргарсиз, сиздаги санъатни бир одам боласи яратмоғи мумкин эмас». Лекин қандай ҳаракат қиласин, бошини айтиб, у ёғига тили келмай қоларди.

Кейин Матлаб анчагача хижолат бўлиб Абдулла акага кўринишга бирмунча журъат қилолмай юрди. Кейин эса бу гаплар унут бўлиб кетди.

Ҳозир Матлаб ҳам 75–76 га кирди. Гоҳ-гоҳида қўнгироқ қилади, зерикаётганини, ичиди гапи кўпайиб кетганини айтади, фикри тиниқ, ҳозир ҳам ўткир фикрлайди, масаланинг одамлар эътибор бермаган томонларини дарров илғаб олади.

Уларнинг маҳалласида коммунал хизматлари бўйича ширкат тузилибди. Ширкат таъмирлаш бўйича қўлини совуқ сувга урмай, ҳадеб коммунал хизматлар нархини ошириш билан шуғулланибди. Бир куни ширкат мажлисига қатнашган Матлаб савол берибди:

— Нархларни ким ошири? Нега? —Ширкат катталари жавоб беришибди:

— Ким бўларди? Шаҳар ҳокимиятининг қарори чиқди. Шунга мувофиқ...

— Бизнинг ширкатда нарх-наво оширишга шаҳар ҳокимиятининг нима ҳаққи бор? Ахир ширкат бизники бўлса, тўловларни ўзимиз бўлсанак, бизнинг мулкимизга шаҳар ҳокимиятининг мутлақо дахли бўлмаслиги керак... У нега бу масалада каттаконлик қилади? Ахир бу маҳалла уставида очиқ-ойдин ёзиб кўйилган-ку?

Ҳамма ҳайрон бўлиб, индамай қолибди. Бу саволга ҳеч ким жавоб беролмабди. Матлаб бу гапни юридик жиҳатдан асослаб берибди. Шундан кейин бир ой ҳам ўтмай, маҳалла ширкатларини тартибга солиш тўғрисида фармон чиқди.

Бир-бир Матлаб бизниги келиб туради. Узоқ гаплашиб ўтирамиз. Ўтганларни эслашамиз. Гапимиз тамом бўлмайди. Матлаб кўчага кўп чиқмаса-да, ҳамма нарсадан воқиф бўлиб ўтиради. Шундай учрашувларимизда ме-

нинг мақолаларим ва суҳбатларимдаги хато ва камчиликларни айтарди. Мен номига тортишган бўламан, лекин кўп ҳолларда унинг гапига кираман. У энди Маҳамаднинг ўрнига менга суюнчиқ бўлиб қолган. Матлаб табиати Маҳамадникидан фарқланади. Маҳамад жўшқин, ҳамма вақт ҳис-туйгулари билан ёниб яшаган. Матлаб эса прагматик. Албатта, унда ҳам кекса одамга ёпишадиган хасталиклар бор. Лекин уларга фалсафий қарайди, ҳаммасига ҳам рўйхуш беравермайди. «Шунинг учун яшаб юрибман-да!» «Аканг яшаёлмаган умрини ҳам сенга берсин, дўстим», дейман мен.

2005

## АҶЛО ҲАЗРАТНИНГ ҲАСРАТЛИ КУНЛАРИ

Унинг исми шарифи аслида АҶло Ашрапов эди. Ўзи ҳазрат сўзини кўп ишлатгани учун биз ҳазиллашиб, уни «ҳазрат» деб атардик. Унинг болалик йиллари Эски шаҳар кўчаларида ўтган эди. Шунинг учун уни «Эски шаҳарча врачлар»дан бири деб атаса ҳам бўларди.

Мен бу йигит билан биринчи марта Лабзакдаги пионерлар саройида шахмат таҳтаси устида учрашгандим. У шахматни жуда яхши ўйнарди. Кўз очиб юмгуңча уч марта кетма-кет енгилган. Шундан кейин шу ерда ўқтин-ўқтин учрашиб турадиган бўлиб қолдик.

Мактабни битиргач, у педагогика институтига, мен эса университетта ўқишга кирдим.

Кейинги учрашувимиз 1951 йилда Москванинг Қозон вокзалида рўй берди. Ўша йили Москвага ўқишга келадиган ёшларнинг ҳаммаси бир ҳафтача олдин учрашган ҳолда битта поездда Москвага келиб тушишган эди. Мен бир ҳафтача кейин ёлғиз ўзим келдим. Москвага яқинлашган сари фақат бир нарсани ўйлаяпман – мени ким кутиб оларкин. Академиянинг президенти ҳойна-ҳой чиқмаса керак, кексайиб қолган одам, иши ҳам кўп бўлиши керак. Ҳай майли, ўзи чиқмаса биронта муовинини чиқарар. Лекин биз бир-биримизни қандай таниб оламиз? Хуллас, Москвага шундай ўйлар билан бўлиб, етиб келганимизни билмай қолибман. Радиодан дикторнинг жозибадор овози тантанаворлик билан «наш поезд прибывает в столицу нашей родины – в Москву» деганида бутун вужудим ҳаяжондан зириллаб кетди. Ниҳоят, мен ҳам перронга тушдим. Албатта, мени кутиб олгани биронта ҳам одам чиқмаган эди. Қаёқقا боришимни билмай, ҳар томонга жавдираб, чиқиш томонга юрдим. Шу пайт бирданига кимдир «Озодбек!» деб чақириб қолса бўладими? Мени бунақа тарзда фақат АҶло

ҳазрат чақирап эди. У бу ерда нима қилиб юрган экан? Лекин буларни ўйлаб ўтиришга имкон йўқ эди. Вақт алламаҳал бўлиб қолган, тезроқ бирор турар жой то-пишни ўйламаса, кечаси кўчада қолиб кетиш ҳеч гап эмас эди. Аъло ҳазрат ҳам кимнидир кутгани чиққан экан, у одам келмабди. Мени кўриб унинг хурсанд бўлиб кетгани сезилиб турарди. Аъло ҳазрат бир ҳафтгача аввал аспирантурага кириш учун қўпчилик билан бирга келган экан. Бир ҳафтанинг ичida у шаҳарни шунчалик ўзлаштириб олибди, худди шу ерда бутун умри ўтгандек. «Строминка», «Сокольники» деган сўзлар оғзининг бир чеккасидан чиқиб кетарди. МГУга имтиҳон топширадиган бўлибди. Унга университетнинг ётоғидан жой беришибди. Ётоқ – Строминка деган жойда экан. У вокзалдан трамвайга ўтирасангиз атиги беш-олти бекат нарида экан. Кечаси бўлишига қарамай, трамвайлар визиллаб юриб турибди. Бир зумда етиб бордик. Ётоқ шундай йўл юзидағи баланд иморатда экан. Мен буна-қангি баҳайбат иморатни илгари ҳеч кўрмаган эдим. Аъло ҳазратнинг турадиган уйи кенггина хона экан. Унинг тўрт томонига тўртта темир каравот қўйилган, ўргада оддий ёғоч стол, ўтирадиган курсилар, тўртта тумбочка бор экан. Талабалар кийим-кечакларини чемоданларига солиб, каравот остида сақлар эканлар. Ўша кунларда вақтинча битта каравот бўш экан.

– Ҳозирча мана шу ерда ётиб турамиз, Озодбек, – деди Аъло каравотлардан бирини кўрсатиб, – эгаси ҳали келгани йўқ. Келиб қолса, у ёгини кўраберамиз. Унгача эҳтимол жойингиз масаласи ҳам ҳал бўлиб қолар.

Аъло ҳазрат кўзимга худди алангадай иссиқ кўриниб кетди – мусофири юртда қаёққа боришингни, нима қилишингни билмай, гаранг бўлиб турганингда сенга бундай меҳрибончилик кўрсатган одам чиндан-да најоткордай, ўз паноҳига олган валинеъматдай кўринади.

Каравот жуда энсиз эди, бехосдан бир ёнбошга ағдарилсангиз, «пақ» этиб тушиб кетишингиз ҳеч гап эмас. Ноилож, вазият инжиқликни кўтармас, ундан ташқари, танлайдиган вариантнинг ўзи йўқ эди.

Эртасига эрталаб нонуштадан кейин ишларим билан чиқиб кетдим. Академиянинг президиумига бордим. У

ердан мени академиянинг аспирантура бўлимига жўнатишиди. Жаҳон адабиёти институтига боришим керак ёкан — шу ерда ўқир эканман. Бордим, қолган-күтган ҳужжатларимни кўришиди. Қабул имтиҳонларининг вақтини айтишиди. Шу билан ишим битди. Иш битди-ю, ётоқ масаласида институтдагилар лом-мим деб оғиз очишмади. Андишани йиғиштириб қўйиб, ўзим: «Ётоқ-чи? Ё тоқ бермайсизларми?» — деб сўрадим. «Бизда ётоқ йўқ, — деб айтишиди институтдагилар. — Мабодо берсак ҳам, шаҳардан ташқари жойдан берамиз. Истасангиз бориб, кўриб келинг». Айтган ётоқлари Зеленогорск деган жойда экан. Ям-яшил қарағайзор. Жуда баҳаво. Теварак-атроф озода, чиннидай ясаб қўйилганга ўхшарди. Сукунатни айтмайсизми? Фақат дараҳтларнинг баъзан кучаядиган, баъзан оҳиста шивирлашлари эшитилади. Жоннинг роҳати. Фақат Москваға бир ярим соатлик йўл эди. Бориб келиш уч соат. Ҳар куни йўлнинг ўзига уч соат сарфлайдиган бўлсан, хонавайрон бўлиб кетаман-ку! Воз кечишига тўғри келди. Бу орада уч-тўрт кун ўтди. Ётоқхонадаги янги ошналар ётоқ масаласида анча саводимни чиқариб қўйишиди. «Ховлиқма, — деб маслаҳат беришиди улар. — Аввал имтиҳонлардан ўтиб ол, аспирантурага кириб ол. Ундан кейин тузукроқ бирор жойни ижарага оласан. Ҳозирча шу ерда туравер» дейишгандай қилиб. Строминкада туриб қолдим. Имтиҳонларга ҳали бир оз вақт бор. Эрталабдан кечгача ётоқ қидириш ҳам йўқ. Бўш вақтдан файдаланиб, Сокольники боғини обдан сайр қилдим, унинг ён-беридаги иморатларни томоша қилдим. Ўша атрофда кинотеатр бўлиб, Америка фильмни кўрсатилаётган экан. Шу пайтга қадар мен бор-йўғи икки-учта Америка фильмини кўрган эдим. «Динки жаздан чиққан Жон», «Куёшли водий қўшиғи», «Вена ўрмонининг эртаги» каби фильмлар жуда ёққан эди. Уларни бемалол қайта-қайта томоша қилиш мумкин эди. Бу ерда яна бир Америка фильмини кўриш имконияти пайдо бўлганидан фойдаланиб, кинога тушдим. Фильм ўртамиёна экан. Лекин кулгили вазиятлари жуда кўп. Айниқса, унинг мазмуни мен учун ғалати бир янгилик бўлди. Воеа Америка парламентида бўлиб ўтади. Парламентда қандайдир бир қонунни му-

ҳокама қилиб бўлишган, овозга қўйилса ҳам бўлади. Аммо бир депутат сира минбардан тушмай, мажлис бошлангандан бери узлуксиз нутқ сўзлаяпти. Унинг гаплари пойма-пой, сўзлари пойинтар-сойинтар, маъно йўқ, жумлалар бир-бири билан боғланмайди. Ҳеч ким бу нотиқнинг гапига қулоқ ҳам солаётгани йўқ. Лекин у гапиришда давом этаверади. Бечора толиқиб, ухлаб қолади. Аммо бир-иккита шериклари уни туртиб-суртиб ухлагани қўйишмайди. У хушёр тортиб, сафсалаларини яна давом эттиради. Бу нутқий марафон эртасига 10 гача давом этарди. Қизиги шундаки, фильмда кўрсатилишича, Америка парламентида регламент деган нарса йўқ экан. Нотиқнинг нутқини бўлишга ёки тўхтатиб қўйишга ҳаққи йўқ экан. Бир фирма ҳозирги қонун эртага соат 10 дан олдин қабул қилинса, жуда катта зарар кўрар экан. Шунинг учун фирма ўз вакилига эртага эрталабгача узлуксиз нутқ сўзлашни топширган экан.

Билмадим, Америка палатасида шундай қоида чиндан-да борми ёки бу киночилар хаёлининг маҳсулими? Лекин ҳар қалай бир фильмга етадиган қизиқарли бир сюжет берибди.

Ётоқда ҳар куни кечки овқатдан сўнг гурунгашамиз, Аъло ҳазрат билан шахмат майдонларида муросасиз жанг қиласиз.

Шу аснода Тошкентдан бир куни Сиддиқ Фузаилов келиб қолди. У филология факультетини уч йилча аввал битириб кетган эди. Аъло ҳазрат билан анчадан бери иноқ эканлар. Сиддиқ aka аспирантурага кирган, ҳатто унинг икки йиллик курсини ўтиб, ишнинг анча қисмини қоралаб ҳам кўйган экан. Энди уни охирига етказиб қўймоқ учун Москвага келган экан. Бу ерда бошқа таниши йўқлигидан, Сиддиқ aka тўғри Строминкага келаверибди. Аъло ҳазратнинг хонасида бўш каравот қолмаган эди. Аъло таниш йигитлар яшайдиган бошқа хоналардан ҳам суриштириди – ётоқ эгаларининг ҳаммаси келиб бўлган, бўш жой йўқ. Буни қарангки, у пайтда, яъни 1951 йилда ҳали йиғма каравотлар йўқ. Нима қилмоқ керак? Кўп ўйлаб ўтирмасдан, бир тўхтамга келдик – Сиддиқ aka иккаламиз бир каравотда

ётаверамиз. Боя айтганимдек, каравотимиз тор эди. Икки киши фақат ёнбоши билан ётгандағина сиғишимиз мүмкін эди. Кўйинг-чи, амалладик. Ўзга ерларда бир-бирига бегона бўлган икки бола бир онани эмиб катта бўлишса, уларни кўкалдош деб аташади. Назаримда, Аъло ҳазрат баҳонасида Сиддиқ ака иккимиз кўкалдош бўлмасак ҳамки, ўшандаги бир ҳафта-ўн кун бир каравотда ётиб, кўкракдош бўлдик. Шу ҳолат кейинги йилларда бир-биrimiz билан аҳил бўлишимизда анча роль ўйнади, шекилли.

Бир ҳафта-ўн кунлардан кейин институтдан менга ҳам жой тегиб қолди – Горький кўчасидаги «Лангар» деган меҳмонхонадан жой беришди. Мен Аъло ҳазрат ва Сиддиқ ака билан қуюқ хайрлашиб, қақир-қукурларимни орқалаб, янги манзилга йўл олдим.

Орадан бир ңеча йиллар ўтгач, Аъло ҳазрат ҳам бизнинг кафедрамизда хизмат қила бошлади. Кунлар бир маромда ўтиб бораётган эди. Биз дарсларга кириб чиқар, керакли миқдорда мажлислар қиласидик. Ҳар хил талабнома, ҳисобот ва анкеталарни тўлдиришга анча вақтимиз кетарди. Бир оз қўлимиз бўшаши билан гурунглашиб ўтирап ёки шахмат тахтасига кўл чўзар эдик. Аъло ҳазрат дилкаш инсон эди. Ҳар хил қизиқ гапларни топиб келиб бизни ажаблантиришга, кўнглимиизни овлашга ҳаракат қиласиди. Ўша кезларда ҳам кафедра аъзосида машина йўқ эди. Фақат Аълодагина қўлда бошқариладиган ногиронлар машинаси бор эди. Улфатчилик қиласидиган бўлсак, унинг машинасидан бозор-ўчар ишларида фойдаланаар эдик. Аъло ҳазрат бунақа хизматларни жондили билан бажо келтирарди.

Биз кўпинча дам олиш сафарларида ҳар хил юмушларни бараварига бажариб кетаверар эдик. Бир йили Угам дарёсини ёқалаб юқорига сафар қиласидик. Сафарда Фулом Каримов, Субутой ака, Аҳмад Алиев, Аъло ҳазрат ва мен иштирок этдим. Бизнинг сафаримизга шогирдимиз Ортиқбой Абдуллаев ва унинг отаси Абдулла ака раҳнамолик қиласиди. Абдулла аканинг шу теварак-атрофда билмаган жойи, юриб ўтмаган сўқмоғи йўқ. У Угамнинг икки томонидаги қоялар ва чўққиларнинг ҳаммасини номма-ном билади. Уларда содир бўлган воқеаларнинг

шоҳиди. У жуда камгап, сўрамасангиз ўзи гапирмайди, жуда камсуқум ва тортингчоқ. Икки кун давомида у бизни паст-баланд сўқмоқлардан бошлаб ўтар экан, ҳатто ҳар бир бутанинг тарихигача батафсил гапириб беришга тайёр эди. Тоғда сўқмоқдан бошқа йўл йўқ. Шунинг учун уловни ҳам Абдулла аканинг ўзи тўғирлади. У йифиб олган иккита от ва етти-саккизта эшак хўп жонимизга ора кирди. Йўллар жуда хатарли эди. Хумсондан чиққанимиздан кейин сўқмоқ юқорига ўрлаб кетди ва манзилга етиб боргунимизча шундай қолди. Ўрни-ўрни билан сўқмоқ жуда тиккайиб кетар, шунда бир-икки жойда тик сўқмоқдан отнинг думини ушлаб олиб кўтариладик. Шунақада бир марта от тойиб кетди, лекин у бир амаллаб ўзини тутиб қолди. Иккинчи марта мен ҳам қандайдир бир мўъжиза билан зовга учмай, омон қолдим. Агар от ёрдамга келиб улгурмаганда, ўша жойда, эҳтимол, «Озод учган» деган бир зов пайдо бўлармиди. Абдулла ака жуда босиқ ва оғир одам – майда-чуйда тойиши, сирғанишларга пинагини бузмасди. Жуда зўр келса, мийигида бир кулиб қўя қоларди. Уни бу ердаги егерлар ва ўрмончилар ҳаммаси жуда яхши танишар экан. Уни кўришлари билан саломни қуюқ қилиб, ҳол-аҳвол сўрашишлар бошланарди. Бошқача бўлиши ҳам мумкин эмас эди-да. Абдулла ака бу ердаги ширкат хўжалигига қирқ йилдан ортиқроқ раислик қилган. Хуллас, йўлда Экспедиция деган жойда бир кечча тунаб, эртаси куни жуда ажойиб бир жойга етиб бордик. Кенг майсазор – охир-кети кўринмайди. Чап томонда адирлар тизилиб кетган. Биринчي адир тепасида иккита чиройли оқ ўтов. Ўнг томонда ярим чақиримча нарида Угам вашиллаб оқиб ётибди. Ундан ҳам нарида баланд-паст тоғлар бир-бирига мингациб кетган. Биз икки кун юриб, олтмиш чақирим йўл босиб, Коржонтов тизмаларининг этагига келиб қолибмиз. Коржонтов кулогимизга жуда совуқ эшишилди. Чунки 1966 йилда бўлиб ўтган даҳшатли Тошкент зилзиласининг маркази шу ерда эди. Яна бир оз юргач, жуда бетакрор гўзалликка эга бўлган жойга дуч келдик. Бу ерда дарёдай, эни ўн метрлар келадиган, бир километрга чўзилиб кетган қўлтиқ чиққан экан. Угамнинг сувига қўл суқиб бўл-

майди – кесаман дейди. Бу қўлтиқнинг суви илимилиқ. Фақат қўл тиқиши эмас, сувга тушсанг ундан чиққингиз келмайди. Бунинг устига бу қўлтиқ курорт вазифасини ҳам ўтайди, шекилли. Кейинчалик бу ер биз учун балиқ захираларимиз турадиган табиий маскан бўлиб қолди.

Шу ерга қароргоҳ қурдик. Бирпасда учта чайла тикланди. Бир чеккага кичкинагина ўчоқ қазилиб, қозон осилди. Гулом ака одатига кўра ўтовлар томон кетди ва бир соатга қолмай ярим саноч қимиз кўтариб келди. Шу тарзда дам олиш кунларимиз бошланиб кетди. Чой-пой, овқат-повқат қилишни ҳар куни бир кишига юклаб кўйсак, малол келиши мумкин эди. Маслаҳатлашиб ҳар куни бир кишини навбатчи қилиб тайинлайдиган бўлдик. Ичимизда навбатчи ошпазликка сира ярамайдиган одам Субутой ака экан. У киши ҳатто иккита тарашани ҳам ўт олдиролмас эканлар. Аъло ҳазрат бўлса, амал-парастлик микроблари билан узил-кесил заҳарланганлигини шу ерда рўйирост намойиш қилди. Биз унинг қилиқларини масхаралаб кулсак, у ҳам қўшилишиб кулар эди-да, яна билганидан қолмай давом этаверар эди. Қозон осиш вақти келиши билан Аъло ҳазрат ўзи навбатчилик қиласидиган куни даврада ҳангомалашиб ўтирган Абдулла акага мурожаат қиласиди.

– Қани, Абдулла ака, ўчоққа ўт қалаб, қозонни ювинг-чи...

Абдулла ака билан Ортиқвой ўринларидан туриб, буйруқни бажаришга киришар эдилар. Хуллас, зирвакни капкир билан кавлаб туз солишгача бўлган ҳамма жараёнда Аъло ҳазрат ўнг қўлини бўксасига қўйиб, чап қўлини ҳаракатлантириб, буйруқ бериб турди. Абдулла ака эса унинг айтганларини гап қайтармай бажариб турди. Нихоят, гуруч сувини тортиб дамлашга тайёр бўлди.

– Абдулла ака! Ўчоқни оловини тортинг. Гуручни бир жойга тўпланг. Дам товоқни ёпинг, деган сўнгги буйруқ берилди.

Шундан кейингина Аъло ҳазрат қўлини бўксасидан олди-да, бир оз оқсоқланиб улфатлар ўтирган даврага келди. Биз ҳаммамиз уни қийқириқлар ва чапаклар билан қарши олдик, негаки, шу бугун кўхна Коржон-

товнинг сулув этакларида пазандаликнинг янги бир тури – қўлни совуқ сувга урмай ош қилиш санъати на-мойиш қилинган эди.

Ана шу кенгликларда роппа-роса 17 кун дам олдик. Яна бирор ўн кун турсак бўларди, лекин орамиздан қай биримиз «Дарҳол кетмасак бўлмайди, уйда тўйим бор» деб туриб олди. Ҳарҳолда улфатимизнинг раъига қарамасак бўлмайди.

Қайтишда Абдулла ака билан Ортиқвойга жавоб бердик. Улар келган йўлимиздан қайтишди. Ўзимиз эса бошқа йўлдан қайтдик. Адиrlар устида оқариб кўриниб турган ўтовларга ҳар 15–20 кунда пастдан машина келиб турар экан. Унда озиқ-овқат, ўтин, кўмирлар олиб келинар, қайтишда эса машина деярлик бўш қайтар экан. Ҳайдовчи – икки гапнинг бирида кулиб турадиган, кувноқ қозоқ йигити билан тез тил топишдик. У бизни Янгибозордан ўтказиб, Шаробхонагача етказиб қўядиган бўлди. Аъло ҳазрат билан бирга ўтказган бир ёзги таътилимиз ана шундай мароқли ўтган эди.

Аъло ҳазрат ҳам менга ўхшаб қанд касалига дучор бўлган. Касаллик уни енгид, оёғи оғриб, ишга боролмай қолди. Кафедра аъзолари унинг беморлигини билинтиришмай, дарсларига кириб туришди. Касал эса борган сари оғирлашиб борарди. Кейин қанд унинг кўзларига асорат берди. Ҳар гал уни кўргани борганимизда, кўзларида умидсизлик порлар, бу ёруғ дунёни бошқаларга ташлаб кетаётган одамнинг тубсиз андуҳлари ифодаланарди. Биз қўлимиздан келганича унга тасалли беришга интилардик. Лекин бу тасаллилар унга кор қилмаёттанини кўриб турардик. Ниҳоят, у оламдан кўз юмди. Яна бир ям-яшил барг чирт этиб бандидан узилди.

## НУРГА ЙЎФРИЛГАН УМР

— Шабот Хўжаев 80 га кирибдилар. Шу киши тўғрисида бир мақолача ёзив берай, — деб таклиф қилдим муҳаррирга.

— Нима? — деди муҳаррир ҳайрон бўлганини яширмай. — Шабот Хўжаев дейсизми? 80 га кирибдиларми? Йўғ-е, бунақа эмасдир...

Дарҳақиқат, Шабот Хўжаевни кўрган бирорта одам унинг қиличдай тик қоматига, ҳали ажин изини кўрмаган юзларига, юлдуздек чақнаган кўзларига, эндиғина битта-яримта оқ оралаган соchlарига, бардам кайфиятига, ҳар бир гапни дона-дона қилиб бийрон гапиришларига қараб, чиндан-да унинг 80 ёшга кирганига ишонмайди.

Мен уни салкам эллик йилдан бери танийман. Ўшандада у эндиғина докторлик ишини ҳимоя қилган ёш тиббиётчи олим эди. Шундан бери ўтган йиллар мобайнада кўп сувлар оқиб кетди. Кўп қадрдонларимиз оламдан ўтиб кетди, ўзимиз ҳам мана — қарилик «гаشتини» сурисиб юрибмиз. Лекин Шабот Хўжаев ҳамон ўшашула, бардам, тетик. Шу йиллар мобайнада мен унинг бирон марта ҳам «вой, белим» деб инқиллаганини, «юрагим ёмон» деб зорланганини, «шошмай туриңг» деб гапини бўлиб, дори ичиб олганини билмайман. Домланнинг бу тетик-бардамлигини кўрганимда бир ўй миямда чарх уриб айланаверади. Домла қандай қилиб бунга эришли — у инсон учун энг буюк, энг тансиқ, энг қадрли неъмат бўлган соғлик-саломатлигини қандай қилиб бу даражада кўз қорачиғидай авайлаб-асрайди? Врачлар ёрдамидами? Дорилар воситасидами? Йўқ, бундай эканига ишонгим келмайди. Менимча, бу ўринда гап Шабот Хўжаевнинг ўзида, унинг шахсиятида, унинг қунтида, ҳафсаласида. Энг муҳими — унинг бир ақидасида.

Менимча, домла ҳар қайси инсоннинг саломатлиги унинг ўз кўлида, унинг бу йўлда қиласиган саъй-ҳаракатларида, деган ақида билан яшайди. Буни айтиётганимнинг боиси шундаки, биз — ўзбеклар ҳамма нарсани қадрласак қадрлаймизки, ўз соғлиғимизни қадрламаймиз, ўз организмимизга ваҳшиёна муносабатда бўламиз, йиқилиб, тўшакка ётиб қолмагунча врачга мурожаат қилмаймиз. Ҳолбуки, арзимаган ҳаракат билан бошга тушиши мумкин бўлган кўп касалликларнинг олдини олишимиз мумкин. Бу ҳаракатлар биздан ҳеч қанақа чиқимни талаб қилмайди. Одам ўзини болаликдан мунтазам чиниқтириб бориши, нафсини тийиб, расамади билан овқатланиши, жисмоний иш билан шуғулланиши, кўпроқ пиёда юриши, меҳнатни маромида қилиб, дам олишни ҳам ўрнига қўя олиши керак. Шу ишларни қилсангиз, мен аминманки, сиз ҳам 80 ёщингида аталадай ёйилиб кетмай, ўқланган милтиқдай ҳар ишга шай турасиз. Лекин, минг афсуски, биз шахсий гигиена бобида ўз соғлиғимизга инсоний муносабатда бўлиш масаласида ҳам дурустроқ бир маданиятта эта эмасмиз. Шабот Хўжаевнинг умр йўли биринчи навбатда бизга ана шундай сабоқ беради.

Юқорида айтиётганимдек, мен биринчи марта Шабот Хўжаев билан 60-йилларнинг бошида, Абдулла Қаҳдор уйида танишган эдим. Юзидан табассум аримайдиган, суҳбатдошининг гапларини жон қулоги билан тинглайдиган, мулоҳазалари теран, сийقا гаплардан қочадиган, истараси иссиқ бу йигит дарҳол менга маъқул тушди. У мендан атиги 4–5 ёшлар чамаси катта эди, лекин аллақачон докторликни ёқлаган, таниқли олим сифатида донг қозонган эди. Ўша кезлардаёқ не-не атоқли арбоблар унинг бир оғиз маслаҳатини эшитишга мунтазир, тавсияларига муштоқ эди. Шабот Хўжаев ниҳоятда хушфеъл, камтар ва камсуқум, айни чорда теран бир олижанобликка эга эди. У баъзи бир номдор врачларга ўхшаб бу дунёning «кўзир»лари олдида ялтоқланмас, унга шоху гадо баробар эди. Кейинчалик бунга мен кўп марталаб амин бўлдим. Мен ўзим — ҳали номи чиқмаган, бирор-бир амалга эга бўлмаган, борйўқ давлати, шавқати Абдулла Қаҳорнинг шогирди

деган унвони бўлган инсон унга бир неча марта тиббий ёрдам сўраб мурожаат қилганиман ва ҳар гал у менинг илтимосларимни пайсалга солмай, дарҳол бегараз бажо келтирас, қимматли тавсиялар берарди. 80-йилларнинг охирида қаттиқ бетоб бўлиб қолганимда эса иккита машҳур профессорни уйга бошлаб келиб, ўз ташаббуси билан консилиум ўтказган эди — кўп ўтмай мен оёққа туриб кетдим.

Шабот Хўжаев Ўзбекистонда тиббиёт илмининг ривожига катта ҳисса қўшган олим. Унга бежиз Республикада хизмат кўрсатган фан арбоби деган унвон берилган эмас. Лекин биз кўп йиллик танишилигимиз давомида неча марта лаб катта-кичик сұхбатлар курган бўлсак-да, бу одам бирон марта, бирон хизматини айтиб мақтанганини эслай олмайман. Фақат яқинда Шабот Хўжаев тўғрисида ёзилган биографик маълумотномани ўқиб, унинг хизматлари ҳар қанча мақтанса арзигулик эканига амин бўлдим. Менинг кўз ўнгимда ўз касбини чин дилдан севадиган, унга ихлос билан, вижлонан хизмат қилган фидойи бир зиёлиниң ёрқин сиймоси гавдаланди. Баъзан одамлар, шу жумладан, ўзим ҳам, ҳозирги ўзбек зиёлиларининг фаол эмаслигидан, жамиятни олга элтувчи байроқдорлар бўла олмаётганидан, баъзан лоқайдлигидан нолиб қоламиз. Эҳтимол, бу фикрда ҳам жон бордир. Лекин Шабот Хўжаевга ўхаш одамларнинг мисоли зиёлиларининг ҳаммаси ҳам бир хил эмаслигидан, улар орасида миллатнинг фаҳри дейишга арзигулик шахслар ҳам кўплитидан далолат бериб турибди.

Шабот Хўжаев — иммунолог, эпидемиолог, вирусолог олим: у юқумли касалликлар соҳасидаги катта ишлари билан ном чиқарган. Бироқ мендан мазкур мақолада унинг қайси касалликни қандай муолажа килиш йўллари, қандай вакциналар кашф қилгани ҳақида хикоя эшитмоқчи бўлганлар адашади. Мен тиббиёт илмидан узоқ одамман, бу илмнинг ички нозикликларига тишим ўтмайди. Лекин мен ўқиган маълумотномада ноң шуни англадимки, Шабот Хўжаевнинг ярим асрлик врачлик фаолияти бошдан-оёқ том маънодаги илмий жасоратга, улуг мақсадлар йўлида фидойилик билан

хизмат қилишга тўла бўлган экан. Бу ажойиб инсоғ ўзининг билими ва фидои ишлари билан нафақат бизнинг юртимизда, балки хорижий мамлакатларда ҳам ўн минглаб эмас, юз минглаб одамларни ўлим чантага лидан кутқариб қолган. Шунинг учун уни ҳар қанчай алқаб, кўкларга кўттарсак арзиди. Мен бу фикримни исбот қилиш учун олимнинг кўп қиррали сермазмут фаолиятидан 2–3 та мисол келтириш билан чекланаман

60-йилларнинг ўрталарида республиканинг бавзи жойларида вабо тарқаганмиш, деган совуқ хабар эшистилди. Бу жуда таҳликали, умумий ваҳима ва саросималик туғдиришга сабабчи бўладиган хабар эди Зудлик билан чоралар кўрилди, қатновлар чекланди вабо тарқалган жойдаги одамлар ўша жойлардан чиқолмай, бир неча ойга қолиб кетди. Бундай қымасли мумкин эмас эди. Гарчи сўнгги 40–45 йилда вабо балосини кўрмаган бўлсан ҳам, унинг даҳшати атом бомбасиникидан ҳам кучлироқ эканини, ўтмишдаги ваболар ўлатлар, чечаклар юз минглаб, балки ундан ҳам ортиқроқ одамларнинг ўлимига сабабчи бўлганини билардик.

Эпидемия — гиёҳдари қовжираб ётган чўлу биёбонда юз берган ёнғинга ўхшайди — бир зумда у ҳаммаёқни қоплайди ва унинг ҳудудидаги хўлу қуруқ баравар ёна бошлайди, фақат фарқи шундаки, ўт ўчирувчи оловдағ берироқда туриб уни сув ёки бошқа воситалар билағ ўчиради, врач эса оловни ўчирмоқ учун аланганини ичига, ўчоқнинг марказига кириб бориши керак. Яъни вабо теккан юзлаб, минглаб одамлар билан бевосите мулоқот қымасли лозим. Табиийки, бундай шароитда бўярамас касал врачнинг ўзига юқмаслигига ҳеч ким кафолат беролмайди.

Аҳволни чигаллаштирган яна бир масала — ўша йили вабони оддий иҷкетардан ажратса оладиган врачларнин ўзи йўқ эди. Тоза сув танқис эди, касалхоналарда каравотлар етишмас эди. Лекин нуқсонлар тўғрисида гап сотишга, нолишга вақт йўқ — ўлим тўшагида ётган одамларга тез ёрдам бериш, вабонинг тарқалишига йўл кўймаслик керак эди. Салкам 60 кун мобайнида вабога қарши курашга сафарбар қилинган врачлар кунни тунг:

уаб, дам олиш нималигини билмай меҳнат қилишади ва ниҳоят, бу кўрқинчли оғатнинг устидан ғалаба қоюнишади. Лекин тантана қилишга ҳали эрта эди.

Қорақалпоғистондан кейин вабо ўчоқлари Одессада, Тирасполь ва Кишинёв шаҳарларида пайдо бўлди. Булар ҳам бор кучни сафарбар қилиб, фидокорона кураш олиб боришни тақозо қиласди. Шабот Хўжаев бу ишларда ҳам стакчи роллардан бирини ўйнади, нисбатан қисқа муддатда кам қурбонлар бериб, вабо ўчоқларини тугатишга муваффақ бўлинди. Ёмонликнинг яхшилиги ҳам бор, деб бежиз айтилмаган — Шабот Хўжаев дунёдаги энг кам ўрганилган ва энг хатарли бўлган вабо хасталигига қарши курашда бебаҳо тажриба тўплади ва малака ортириди, бу соҳадаги йирик мутахассислардан бирига айланди. Шу туфайли уни дунёнинг вабо хуруж қилган бошқа жойларига ҳам юбора бошладилар. Қизик, 70-йилларда аллақачон унтутилиб кетган вабо Осиёда ҳам, Оврупода ҳам, Африкада ҳам бош кўтариб, одамлар ҳаётига жиддий хавф туғдира бошлади. Шабот Хўжаев Индонезияда, Болгарияда, Яманда, Саудия Арабистонида ва яна бошқа бир қатор мамлакатларда эпидемия ўчонини йўқотишда иштирок этди. Хорижий мамлакатларда ишлашнинг янада оғир томонлари бор эди — ҳар нима бўлганда ҳам бегона юртлар, бегона шароит. Мутахассислар, дори-дармон бўлиши, «Йўқни йўндириш» талаб қилинади. Шабот Хўжаев Яманда бўлган бир воқеани сира унутолмайди. Овлоқ қишлоқлардан бирида юзлаб одамлар ўлим тўшагида ётибди. Аммо уларни даволаш учун хастахоналар, каравотлар, тиббий асбоб-ускуналар, жиҳозлар йўқ. Беморларни бошқа шаҳарга кўчиришнинг ҳам, бошқа жойлардан ёрдам кутиб ўтиришнинг ҳам имкони йўқ. Шунда врачлардан бирининг калласига қулинг ўргилсин фикр келиб қолади. Яъни, каттагина бир дараҳтзор тепаликда, bemорлар ерга тўшалган бўйра устига ётқизилади, томчи дориларнинг системасини эса дараҳтга илиб қўйиб, bemорлар томирига қўйилади. Албатта, нормал шароитларда биронта ҳам шифокор бундай «янгилик»ни қўллашга мутлақо рози бўлмасди, лекин фавқулодда ҳолатларда, одамларнинг ҳаётини сақлаб қолиш устида гап кетаётганди...

Билмадим, даҳшатли оғатдан омон қолган хорижлик одамлар бугун қаерларда юришганин? Лекин қаерда юришган, нима иш билан банд эканларига қарамасдан улар «фойдага қолган умрлари»ни ўйлар эканлар, бот-бот олис ўзбекистонлик, истараси иссиқ, хушмуомала, ўз ишини пухта биладиган докторнинг ҳақига дуо қилиб юрган бўлсалар, ажаб эмас.

Шабот Хўжаевнинг касбиға фидойилигини, садоқатини яна шунда ҳам кўриш мумкинки, у ўз билимларини бошқа врачларга ҳам улашди, уларнинг малакасини ошириш йўлида тинмай хизмат қилди ва бу мақсад йўлида бир эмас, бир нечта кафедралар ташкил қилди. Кафедра дегани илмнинг бирор соҳаси билан чуқурроқ шуғулланадиган кичик илмий жамоа. Шабот Хўжаев ташкил қилган кафедралар ҳозир ҳам муваффақият билан ишлаб турибди.

Шабот Хўжаев яна бир ғоятда ёқимсиз ва ғоятда баттол бир хасталикка қарши курашда жуда катта жонбозлик кўрсатди. 70-йилларнинг иккинчи ярмида Ўзбекистонда бирданига ичтерлама, ошқозон касалликлари ва, айниқса, сариқ — гепатит касали жуда авж олиб кетди. Ўшанда далаларда пахтадан юқори ҳосил олиш учун жуда кучли заҳарли кимёвий дорилар қўлланилар эди. Бу заҳар ўсимлик билан одамни фарқ қилас мас эди. Тўргта ҳашаротни ўлдирса, яна битта одамини қулатарди. Энг ёмони — бу тўғрида ошкора гапириб, ёзиб бўлмас эди. Бизда ҳамма нарса жойида, ҳеч қандай муаммо йўқ, мабодо, дехқоннинг тоби қочган бўлса, унга шабада-пабада теккан, деб ҳисобланарди. Қишлоқ врачларининг ҳаммасига ташхисларни яшириб, заҳарланиш билан боғлиқ бўлмаган навбатчи хасталикларни анкетага ёзиш буюрилган эди. Саратон жазирамасида шақиллаб қайнаб турган дошқозон қопқоғи пахтаю гербициду пахтакори билан ёпиқлигича қолмоғи керак эди.

Бундай шароитда ҳақиқий аҳволни очиқ айтиб, касалликларнинг номини аниқлатиб, уларни даволаиш учун маблағ топиб ҳаракат қўлмоқ керак эди. Ҳолбуки, гепатитга қарши курашда уни даволашда зарур бўлган вакциналар ҳам етишмас эди. Шабот Хўжаев бу масалалар

фоятда мураккаб, фақат энг олий ҳокимият табақаларида ҳал қилиниши мумкинлигини яхши биларди. Бироқ ўша пайтдаги ҳукмдорларимиз ҳадеб зорланаверадиган, айниқса, ҳалқ учун бирор нарсани талаб қиласидиган, маблағ, пул сўрайдиган мутахассисларни ёқтириласди. Шунга қарамай, Шабот Хўжаев қишлоқда вужудга келган ҳаққоний вазиятни кўрсатиб, хориждан вакциналар сотиб олмоқ учун маблағ сўраб «юқорилар»га мурожаат қилишдан чўчимасди. Ниҳоят, марказ бу мақсадларда сарфлаш учун бир миллион сўм ажратиш тўғрисида қарор қабул қиласди. Тўғри, бу маблағ муаммони тўла ҳал қилишга кифоя қиласди, лекин ҳархолда тараанг вазиятни, бир оз бўлса-да, юмшатишга ёрдам берди.

Мустақиллик йиллари Шабот Хўжаев учун фаолиятини янада кенгроқ қўламда олиб бориш имконини яратди. Энди у бир вақтлар ўзи ташкил этган ва ўзи раҳбарлик қилаётган Вирусология маркази ишини яхшиламоги керак эди. Мустақил республика ҳокимияти унинг бу интилишларини қўллаб-куvvатлади, унга катта маблағ ажратди. Натижада, Юнусобод даҳасида ўзининг лабораторияларига, муолажа хоналарига, маъмурий биноларига, конференция залларига ва 126 та ўринли клиникасига эга муҳташам бино қад кўтарди. Бугун Ўрта Осиёда ятона бўлган Вирусология институти Шабот Хўжаев раҳбарлигида вазифаларини муваффақият билан бажариб келмоқда.

Ҳар гал у билан суҳбатлашганимда кўнглимдан бир фикр кечади — аслида, бу одам адабиётчи бўлмоги керак эди. Негаки, у чукур илдизларга эга бўлган зиёли оиласида дунёга келган. Унинг бобоси Асадуллаҳўжа бир неча тилни яхши билган, адабиёт ва тарих илмидан хабардор, фикри очиқ, миллатпарвар инсон ўтган эди. Унинг ўғилларидан бири Убайдуллаҳўжа Асадуллаҳўжа ўзбеклардан чиққан биринчи олий маълумотли ҳуқуқшунос эди — 1938 йилда у қатағон қурбони бўлган. Шабот Хўжаев адабиётга жуда зўр муҳаббат билан улгайди. Кейинчалик Расул Ҳамзатов, Чингиз Айтматов, Абдулла Қаҳҳор, Шайхзода каби буюк ижодкорлар билан дўстлашди. Абдулла Қаҳҳор 1968 йили Москвада

академик Вишневский клиникасида сўнгги кунларини ўтказаётган пайтда Шабот Хўжаев унинг ёнида бўлган, қўлидан келганича бу улуғ инсоннинг дардини енгиллатишга уринганди.

Шайхзода «Мирзо Улуғбек» трагедиясини тугатиб, қўлёзмани Шабот Хўжаевга ўқишга берганида, уни ўқиб чиқиб, бир чеккасига: «Буюк бобомиз Улуғбек вафотларидан кейин яна 800 йил умр кўрган эдилар. Энди сизнинг моҳир қаламингиз сеҳри билан яна 500 йил яшайдиган бўлибдилар» деб ёзиб қўйган экан.

Хуллас, Шабот Хўжаев ана шунаقا, адабиётга яқин одам. Лекин у адабиётчи бўлмади, шифокор бўлди. Эҳтимол, у мактабни битирмай Охунбобоев номидаги техникум остонасига биринчи бор қадам қўйганидаёқ шифокорлик билан элу юртга, миллатга хизмат қиласман, деган олий ниятни кўнглига тушиб қўйган куни бу олий ният тўла вожиб бўлганини таъкидламоқ жоиз. Мабодо бу ажойиб инсоннинг салмоқли ва мазмунли ҳаёт йўлини бир иборада ифодалаш зарур бўлса, уни нурга йўғрилган умр, деб атаган бўлардим.

2004

## СҮНГТИ ЖАДИД ҚИССАСИ

Ўртоқлари ҳазиллашиб уни шундай деб аташарди. Дарҳақиқат, Бегали Қосимов илмий фаолиятининг ҳаммасини тўлалигича жадидлар мавзуига бағишилаган, уларнинг маърифатпарварлик соҳасидаги, миллатни уйғотиб ҳозирги замон цивилизациясига эш қилиш йўлидаги ҳаракатларини давом эттирган эди. Деярлик ярим аср давом этган бу иш жараёнида Бегалининг ўзи ҳам жадидларнинг қай бир хислатларини ўзлаштириб олгандай кўринарди. Шунинг учун «Сўнгти жадид» деган лақаб унга жуда мос тушган эди.

Бегали Қашқадарё вилоятининг Касби туманига қарашли кичикроқ бир қишлоқда туғилиб ўсан эди. Унинг болалиги уруш йилларига тўғри келди. У кезлари, айниқса, қишлоқларда шароит оғир эди. Шунинг учун Бегали ҳам бошқа қишлоқ болалари каби болаликнинг кўпгина қувончларидан маҳрум бўлиб ўсан. Қишлоқ аҳли чорвачилик билан шуғулланар эди. Кўй-кўзиларнинг кетидан юриш, уларни парвариш қилиш, вақти келганда улоқлар билан қувлашмачоқ ўйнашлар қишлоқ болаларининг ягона овунчоги эди. Бундан ташқари она табиат Бегалининг қалбida илк марта ватан туйғусини уйғотди. Қашқадарё адирлари, айниқса, баҳор кезларida бетакрор бир гўзаллик касб этади. Адирлар ям-яшил либос кияди, ўт-ўланлар, майсалар кишига хуш ёкувчи муаттар ҳидлар таратиб гуркираб ўсади, теварак-атрофдан узлуксиз эшитилиб турадиган кўй-кўзиларнинг маъраши адирлар бағрида ёқимли музика садоларидек туолади. Тип-тиниқ ложувард осмон кишида аллақандай номаълум ҳис-туйғуларни уйғотади. Бу гўзаллик ичида яшаб, улғайиб уни севиб қолмаслик мумкин эмас. Бегали она қишлоғини, унинг теварагидаги паст-баланд адирларни жуда яхши кўрарди. У 50 ёшга кирганида бир

гуруҳ дўстларини қишлоққа таклиф этганди. Қишлоқ озода, саришта, фоятда файзли эди. Бегали ўзи ўқиган мактабни, болалиги ўтган қишлоқдаги кўчалар ва манзилларни қандайдир ички бир ғурур билан бизга кўз-кўз қилди. Кейин бизни туман марказидан унча олис бўлмаган қабристонга етаклади. Қабристон қадимий бўлиб, жуда катта эди. Ҳар бир мақбара таъмирланган, супуриб-сирилган. Одамларнинг бу қабристонга ихлоси ва ҳурмати фоят баландлиги аён кўриниб турарди. Бу қабристонда жуда кўп улуғ уламолар ва олимларнинг жасади кўйилган экан. У пайтлари Ўзбекистон мустақил ривожланиш йўлидаги биринчи қадамларини кўймоқда эди. Шунинг учун ҳали шўролар замонидаги баъзи удумлар бекор бўлмаган, ўтмишда яшаган буюк алломалар ва уламоларни, азиз-авлиёларни зъозозлаш, ҳурматини жойига қўйиш кўнгилдагидек эмасди. Лекин Касби яқинидаги қабристон бундан мустасно ҳолатда жуда яхши парваришланган эди. Мени ҳайрон қолдирган нарса шу бўлдики, Бегали ҳар бир мақбарадаги азиз-авлиёларнинг кимлиги, қайси даврда яшагани, қандай ишлар билан халқ ўргасида донг чиқаргани, улар тўғрисида қандай эски-эски китобларда маълумот берилганини жуда яхши билар эди. Бегали бу тўғрида тўлибтошиб гапирап экан, биз гўё олис тарихнинг садоларини эшитаётгандек ҳис қилдик ўзимизни. Мен Бегалидан бу гапларни қаердан билишини сўрадим.

— Болаликда уйимизда ҳам, мактабда ҳам кўп галиришар эди. Неча марта қабристонни зиёрат қилиб, бу ерда ётган азиз-авлиёларни тавоғ қилганман. Қолган гапларни ҳар хил китоблардан ўқиб билиб олганман.

Суҳбатдошимга яна бир бор қойил қолдим — мен унинг билимдонлигини билар эдим, аммо ўз қишлоғини, унинг тарихини, қадриятларини бу қадар зъозозлашини билмас эдим. Демак, унинг ёшлик йиллари шунчаки ўйинқароқлик билан ўтмаган экан. Бегали болалик кезлариданоқ синчков, ҳар нарсага қизиқадиган, ҳар нарсани таг-туғи билан чуқур билиб олишга интиладиган одам бўлиб ўсташ экан. Хуллас, бу синчковлик, юрт тарихига, маданиятига қизиқиш уни ҳозирги Миллий университет даргоҳига олиб келди.

Бегали ўз гуруҳидаги талабалар ичидаги энг жуссаси кичиги эди. Эркин адирлар бағрида, ўт-ўланлар салтанида бир чўпончалик қўй-кўзилар кетидан югуриб ўстган Бегали нега бунчалик кичкина бўлиб қолган, билмадим. Лекин бир-икки йил ўқигандан кейин спорт билан астойдил шуғулланиб, бу қусурини анча тўғирлаб олди. У университет командасида 15–20 йил муттасил волейбол ўйнади. Жуда эпчил ва чаққон эди. Жуда қийин тўпларни ҳам ўйинга қайтара олар, умуман яхши ўйинчилардан бири ҳисобланарди. Бегали дурустгина шахмат ҳам ўйнарди. Кафедрамиз аъзолари ёзги таътил вақтларида ҳар хил сафарлар ва саёҳатларга кўп бориб турарди. Бегали бу сафарларнинг доимий иштирокчиси эди. У билан Қашқадарёning тоғлиқ ҳудудларига сафар қилганимиз. Ҳисорак шоввасини, Қизилэмчак тоғини, Филон деган афсонавий масканни бирга кезганимиз. Узоқ Шарққа, Бадаҳшонга, Арошон бува булоғига, Сурхон воҳасига бирга борганимиз. Бегали жуда дилкаш йигит эди. У кўп гапирмас, лекин индамас ҳам эмас эди. У ҳадеб бўлар-бўлмасга кулавермас, бироқ кулса, чин дилдан куларди. Бирон нарсадан ранжиса ёки жаҳли чиқса, дарғазаб бўлиб, бақириб-чақирмас, балки бирон оғиз заҳарханда гап айтиб ёки бирон пичинг билан қошлини чимириб, муносабатини маълум қиласарди.

Бегали жуда яхши ўқиди. У айниқса, эски ўзбек тилини, араб ёзувини мукаммал ўрганди, бу унинг мумтоз адабиёт билан шуғулланишига имкон берди. У семинарларда, илмий конференцияларда жуда мазмунли маърузалар қиласа, ўрни келганда илмий масалаларда мунозара қилишдан қочмасди. Унинг ҳар бир чиқишида, албатта қандайдир янгилик бўларди.

Бегалининг фаоллиги ва ғайрати, илмга астойдил берилгани домлаларнинг назаридан четда қолмади. Айниқса, профессор Фулом Каримов унга алоҳида эътибор билан қарай бошлади. Кўп ўтмай улар ўртасидаги муносабат устоз-шогирдлик муносабатига айланди. Кейин Бегали Фулом Каримовнинг аспиранти бўлди. Албатта, унинг номзодлик иши ҳам жадидчиликка бағишланган эди. Лекин Бегали – эҳтимол Фулом Каримовнинг мас-

лаҳати билан бўлса керак, жадидчиликнинг умумий муаммолари устида эмас, бу ҳаракатнинг атоқли вакили Мирмуҳсин ижоди устида иш бошлади ва «Мирмуҳсин Шермуҳамедов(Фикрий) ва унинг адабий мұхити» мавзудаги номзодлик диссертациясини муваффақият билан якунлади. Натижада унинг номи тикланди, ўзбек адабиёти ўзининг яна бир йирик сиймосини қайтадан бағрига қайтарди. Бу Бегали Қосимовнинг илмий жасорати эди. Шундан кейин Бегали докторлик диссертацияси устида иш бошлади. Табиийки, бу тадқиқот ҳам жадидизм масаласига бағишланган бўлиб, энди Бегали уни катта кўламда, ҳамма назарий жиҳатлари билан бирга ёритишни мақсад қилиб қўйган эди. Бироқ, бу пайтга келиб, мафкурамизда яна бир эврилиш содир бўлди – энди жадидлар масаласини умуман тилга олиш мушкул бўлиб қолди. Маҳаллий «доҳийлар» имиздан аллақайсиси, билса-билмаса, «Жадидлар синфий душманимиздир», деган ҳикматни айтибди. Шўролар даврида, айниқса Ўзбекистонда мафкура ана шунаقا аҳволда эди. Нима қилмоқ керак? Бу мавзудан воз кечиш – ўзбек адабиётининг чорак асрлик тарихидан воз кечиш демак эди. XX аср биринчи чорагидаги адабиёт тарих саҳифаларидан ўчириб ташланса, адабиёт ривожида узилиш рўй берар, унинг тадрижий ривожланиш йўлларини изоҳлаш мумкин бўлмай қоларди. Бунинг устига, материаллар жадидчилик ҳаракатининг халқчил, демократик ҳаракат бўлганидан далолат бериб турган бўлса, ундан қандай воз кечиш мумкин? Хуллас, бу ерда мавзуни тасдиқлатиш учун анчагина муғамбирлик ишлатишга тўғри келди. Бегали ишнинг мавзунини «Ўзбек инқилобий поэзиясининг майдонга келиши ва тараққиёти (1905–1917)» деб белгилади. Албатта, биринчи қараашда жадид адабиётини «инқилобий» адабиёт деб аташ эриш туюлади. Бироқ масаланинг моҳиятига назар ташланса, бу ерда ҳеч қандай муболага ёки сохталик йўқ эди. Негаки, эски тартибларга, феодал муносабатларга, қотиб қолган расм-руsumларга қарши чиққан жадидлар ўзбекларнинг турмуш тарзини замонавийлаштириб, бутунлай янги йўлга солиб юбориш гоясини олға сурган эдилар. Бу эса, шубҳасиз, инқилобий ғоя эди. Шундай қилиб диссер-

тация мавзуи тасдиқланди ва Бегали ғайрат билан ишга кириши. Иш жараёнида Бегалининг олим сифатидаги муҳим бир хислати намоён бўлди ва камолга етди. Бу – академизм эди. Шўро замонида илмдаги академизм мактаби у ер-бу ерда сақланиб қолган бўлса-да, илмда енгил-елпи йўлларни қидирган ва осонгина фан чўққи-ларига кўтарилиб, шон-шуҳрат ортиришни истаган одамлар академизмни қоралай бошладилар. Улар ака-демизмни услубий жиҳатдан мураккаб, деб эълон қил-дилар. Бу йўл билан яратилган асарлар кенг халқ ом- масига тушунарли эмас, деб даъво қилдилар. Ҳолбуки, бу академизмдан халос бўлган тадқиқотлар адабиёт- шуносликдаги саёзликни, масаланинг моҳиятига чукур кира билмасликни, фактларни умумлаштириш сало-хиятининг заифлигини оқлар эди. Бегали бу йўлдан қочди ва тадқиқот услубида Фулом Каримов каби акаде- мизмга содик қолди. Бироқ бу тадқиқот устига бир неча баравар кўпроқ ва қаттиқроқ меҳнат қилишни, ишдаги ҳар бир факт, тилга олинган ҳар бир исм, унинг тўғри- сидаги маълумотлар аниқ бўлишини талаб этарди. Бу усулда иш кўрувчи олим баландпарвозликдан, юзаки- ликдан қочмоғи, олдинга суроётган ҳар бир фикрини, ҳар қандай ғоясини ҳар томонлама далиллаши керак эди. Абдулла Қаҳдор таъбири билан айтганда, ўз фикрини олға суроётган олим бу фикрни деворга мих қоққандек қоқиб, бу михнинг қалпогини узиб ташламоғи лозим эди, шунда бу михни, яъни фикрни ҳеч ким жойидан суғуриб ололмайди. Бегалининг докторлик диссера- цияси материаллари тарқоқ ҳолда эди. Бу тадқиқотчи олдига қўшимча қийинчиликлар қўярди. Жадидлар гарчи XX асрда, яъни нисбатан яқинда яшаб ўтган бўлса-да, шўро ҳукуматининг сиёсатида қоралангани важидан асарлари деярли унутилаётган эди. Бегали бу борада ҳам чинакам матонат ва ғайрат билан иш юритди.

Олим Тошкент ёки Самарқанд кутубхоналаридағи материалларни аниқлаш ва тўплаш билангина шуғул-лангани йўқ. У материал тўплаш учун қўшни респуб- ликаларга илмий сафарлар қилди, айниқса, Татаристон ва Бошқирдистон кутубхоналарида кўп ишлади. Айтмоқ керакки, Уфада ва Қозонда XX аср бошидаги ўзбек

адабиёти намуналари Тошкентдагига қараганда кўпроқ сақланиб қолган. Масалан, мен ҳам Чўлпоннинг Ўзбекистондан топилмаган биринчи шеърий тўплами «Булоклар»ни Қозон университетининг фундаментал кутубхонасидан топган эдим. Ва, умуман бу кутубхона каталогидан ўзбек адабиётининг менга маълум бўлмаган 400 га яқин намуналари номини ёзиб олган эдим. Хуллас, Бегали материалларни мисқоллаб йиғеди. Ниҳоят, материал излаш жараёнида у Кримнинг Boқчасарой шаҳарчасига ва унинг яқинидаги Гаспрали қишлоғига ҳам борди. Бу қишлоқда бутун туркийлар дунёсини уйғотган, маърифат ғояларини тарқатган Исмоилбек Гаспрали туғилиб ўсан ва ижод қилган эди. Бегали бу буюк инсоннинг уй-жойи, унинг хотираси билан боғлиқ жойлар, шу жумладан, унинг қабри ҳам қаровсиз, хароб бўлиб ёттанини кўриб қаттиқ изтиробга тушди ва бу тўғрида мақолалар ёзди. Албатта, Бегали йиллар давомида тўплаган материаллар уни бу соҳанинг зукко билимдонига айлантирди. Бутун Ўзбекистондаги Миллий уйғониш даврини, унинг адабиётини ўрганишни истаган ёшлар Бегали атрофига уюша бошлади, бутун бир илмий мактаб шаклланди. Бу эса кейинчалик Миллий университет таркибида Миллий уйғониш даври адабиёти кафедрасини ташкил қилишга имкон берди. Кафедрага тўпланган илмий жамоа қисқа муддатда катта ишларни амалга ошириди. Жумладан, ҳозир «Маънавият» нашриёти чоп этаётган «Истиқлол қаҳрамонлари» туркумida биринчи марта жадид адиблар ва шоирларининг асарлари нисбатан тўла равишда дунё юзини кўрди. Бу китоблар, шунингдек, жадидларга бағишлиланган монографиялар, рисолалар, мақолалар Бегалини фақат бизда эмас, чет эл илмий доираларида ҳам танилди. Америка, Франция, Германия олимлари билан унинг ўртасида ёзишмалар вужудга келди, улар манба сифатида Бегали чоп қилган асарларга мурожаат эта бошладилар. Туркиядаги туркшунос олимлар эса туркий халқлар адабиёти бўйича ўнлаб жилдни ташкил этувчи тадқиқотлар матнларини нашрга тайёрлаш ва чоп этиш ишига Бегалини муаллиф ва муҳаррир сифатида таклиф қилишибди. Бегали бир неча марта Туркияга таҳрир ҳайъатининг мажлис-

ларига борди. У ерда нутқлар сўзлади. Бегалининг айтишича, бу улкан нашрнинг ўзбек адабиётига бағишлиган жилдлари лойиҳасида парокандалик ва юзакилик мавжуд. Уни тузганлар ўзбек адабиётини яқиндан билмасликларини ошкор этиб қўйганлар. Албатта, катта меҳнат сарфланиб тайёрланган лойиҳанинг танқид қилиниши ҳеч кимга ҳам ёқмайди. Унинг устига, адабиётлар бўйича янгидан лойиҳага яна нималарни дир киритиш ҳақидаги таклифлар ҳам жуда катта қийинчилик билан қабул қилинади. Чунки ҳажм чекланган ва уни ҳадеб кенгайтираверишнинг имкони йўқ. Бегали бу масалаларда принципиал позицияда турди ва турли мамлакатлардан келган туркшунослардан ташкил топган таҳрир ҳайъатига ўзининг танқидий фикрларини ва таклифларини ўтказишга муваффақ бўлди. Натижада лойиҳадаги ўзбек адабиётига бағишлиган жилд анча тўла, илмий жиҳатдан асосланган ҳолда нашр этилди. Фақат афсусланадиган жойи шундаки, бу қимматли китоб Ўзбекистонга 2~3 донағина этиб келди, холос! Бегали бу жилдни менга кўрсатган, ҳатто бир неча кунга бериб ҳам турган эди. Мен у билан танишиб чиққач, бу китоб ҳақида тақриз ёзишни буюрдим ва уни «Жаҳон адабиёти» журналида эълон қилдик.

Бегали Қосимов нафақат етук истеъоддли тадқиқотчи олим эди, у айни чоғда ўқитувчилик санъатини пухта эгаллаган моҳир педагог ҳам эди. Талабалар уни жуда яхши кўришар ва унинг теварагидан аrimас эди. Бегали ҳам талабаларни ғоятда ҳурмат қиласди. Бироқ бу ҳурмат ҳар нарсада уларга ён босища, уларни етаклашда эмас, аксинча, мърузаларнинг сифатида, уларда ҳар гал қандайdir илмий янгиликларга интилишида, уларнинг адабиёт тарихидан олинган мароқли ҳикояларга бойлигига кўринарди. Бегали талабаларни ҳар қанча ҳурмат қилмасин, уларга нисбатан талабчанликни асло бўшаштирмас эди. Унинг фанидан имтиҳон топшириш ғоятда қийин эди, бироқ бу қийинчилик домланинг ўринсиз инжиқлигидан туғиладиган сунъий қийинчилик эмасди. Талаба материални Бегалининг кўнглидагидек тўла ўзлаштирмаса, буюрилган бадиий адабиётларни ўқиб чиқсан бўлмаса, Бегали унга ижобий

баҳо кўимас эди. Албатта, кўпгина нўноқ талабаларнинг кетидан юрадиган «илтимосчи» одамлар кўп бўларди. Улар кўрқа-писа Бегалидан ҳам илтимос қилишарди. Бироқ Бегали уларнинг кўпчилигига рад жавобини бе-рарди. У ҳатто менга ҳам шунаقا муомала қилган. Мен ким тўғрисидадир илтимос қилган эдим. Бегалининг энсаси қотди, қошларини чимириб, истеҳзо билан:

— Ўқиб келсин, майли, қўйиб берарман, — деди.

Бегали талабчан бўлса-да, адолат билан иш тутар, имтиҳонни талабадан ўч олиш қуролига айлантирмас эди. Эҳтимол, университетда бунақа талабчан домла жуда кам бўлгандир, ҳарҳолда талабаларнинг Бегалидан ўқиган фанидан билимлари пишиқ-пухта бўларди. Бегалининг талабчанлиги ўз фанини жуда яхши кўрганидан, унга садоқатидан туғилган эди. Қани эди ҳамма домлалар шундай бўлса. Менимча, таълим сифатини ошириш, биринчи навбатда ўқитувчининг талабчан-лигига боғлиқ.

Сўнгги марта биз Бегали билан 2004 йилнинг июль ойида кўришдик. Яхши мутахассис ва ажойиб инсон Омонулла Мадаев ўқитувчиларнинг таътилга чиқиши олдидан яқин дўстларига маҳалла чойхонасида ош қилиб берадиган расм чиқарган. Бегали ҳам шу йигинларга келарди, лекин ҳар доимгидай бардам ва ҳаракатчан эмас эди. Ранги ҳам сўлғин, кайфияти паст. Ҳеч нарса емайди ҳисоб. Факат домлалар билан гаплашиб, нима гаплигини сўрасак, ошқозони безовта қилаётганини айтди. Кейин орадан бир ой ҳам ўтмасдан, Бегалининг касали жиддий эмиш, операция қилмаса бўлмас эмиш, деган гап тарқади. Лекин маълум бўлишича, операция учун 250 минг сўм тўлаш керак экан. Шунда университетнинг аввалги ректори академик Тўрабек Долимов валламатлик қилди. У университет ҳисобидан керакли пулни ўтказиб берди.

Мен операциядан кейин 5–6 кун ўтгач, уни кўргани бордим. Бегали мени кўриши билан ётган жойидан турмоқчи бўлди. Мен албатта, «қимирламанг, ётаверинг» деб уни тинчитдим ва бунақа пайтларда bemorga айтиладиган тасалли сўзларни айтдим. Унинг кайфияти яхши эди — унга ҳам, менга ҳам операция муваффақиятли

ўтди, ҳадемай тузалиб кетади, дейиши. Биз Бегали билан келажакдаги илмий режаларимиз тўғрисида гаплашдик. Бегали Уйғониш даври адабиёти деган илмий дарсликни нашриётга топширганини айтди. Кўп ўтириш мумкин эмас эди. Бирор ўн дақиқадан сўнг қўзғалдим. Кейин менинг ўзим ҳам шифохонага тушиб қолдим.

Кейин Бегалини уйига жавоб беришганини, анча мазаси қочганини айтиши. Юрагим «шув» этди. Уни операция қилган доктор Бегалини рак эканини айтди. Қаттиқ қайғурдим, лекин бандасининг қўлидан нима ҳам келарди. Мен телефонда видолашдим. Йифи босиб гапларимни айта олмадим. Бегали ҳам жуда ҳаяжонланиб кетди, икки марта «Раҳмат, Озод ака! Раҳмат, Озод ака!» — деди. Бу унинг менга айтган сўнгти сўзлари бўлди.

Профессор Бегали Қосимов шу тарзда ҳаётдан кўз юмди. Шубҳа йўқки, бу ажойиб инсоннинг номи тарихдан муносиб ўрин эгаллади.

2006<sup>1</sup>

## БАҲОДИР ФУЛОМОВНИНГ ҲАНГОМАЛАРИ

Баҳодир Фуломов қип-қизил дарвеш эди, лекин ҳар қанча дарвеш бўлмасин, ўз ишига пишиқ эди. Баҳодир ака бир вақтлар мактабда дарс берарди. Кейин у 50-йилларнинг бошида Москвага аспирантурага ўқишга кетди. У ерда ўз вақти соатида диссертациясини ҳимоя қилиб қайтди. Шундан кейин университетда XX аср ўзбек адабиёти кафедрасида ишлай бошлади. У ҳеч ҳам дарс қолдирмас, кеч қолмас, талабалар доимо гала-гала бўлиб унинг теварагида уймаланиб юришарди. Ҳархолда унинг дарсларидан шикоят қилинган эмасди. Баҳодир ака кафедра ишларига ҳам фаол иштирок этар, бирор кўлёзма ўқиш ёхуд бирор илмий муаммонинг муҳокамаси бўлса, сира йўқ демас, албатта белгиланган вақтда ўқиб берарди. Олий ўқув юртининг домласи маърузалар ўқищдан ташқари, албатта илмий ишини ҳам қилмоғи лозим эди. Баҳодир ака бу жиҳатдан ҳам анча фаол ва олдинги қаторда турарди. Унинг театр танқидчилигига бағишлиланган ўндан ортиқ катта-кичик китоблари эълон қилинган, булардан ташқари республика матбуотида ҳар йили ўн-ўн беш мақоласи босилиб турарди. Баҳодир ака бу борада ҳам жуда ноёб бир фазилатга эга эди – у республиканинг фалон шаҳрида фалон куни янги спектакль қўйилармиш деб эшишиб қолса, Абдугафур Расуловгами ёхуд Ўткир Ҳошимовгами «Кани юринг ўртоқ, фалон шаҳарга бориб келайлик, баҳонада спектаклни кўриб келамиз» дерди ва икковлон ёхуд учовлон бўлиб томоша кўргани жўнашарди. Режиссерлар, актёрлар, муаллифлар ҳам Баҳодир акани қучоқ очиб кутиб олишарди. Таниклироқ мунаққидлар бунақа сафарларни ўзларига муносиб кўришмасди. Шунинг учун янги спектакль қўйган жамоа ўз меҳнатини тақдирлаб, узоқ йўлдан келган камсуқум мунаққидни бошларига кўтарарди. Икки-уч кундан кейин эса янги спектакль тўғрисида

тақриз чиқар, ундаги илиқ сўзларни эшитган ижодий гуруҳларнинг қувончи янада жўш уради. Хўш, шундоқ бўлса, бу одамнинг дарвешлиги нимада эди? Баҳодир ака улфатчиликни, дўстлари билан ҳазил-мутойиба қилишни яхши кўрарди. Айни чоғда, у ҳазиллашаётган дўстларининг кўнглини олишга ҳаракат қиласади. Бунинг учун у ўзини ўртоқларининг ҳамма гапига чиппа-чин ишонаётгандай қилиб кўрсатарди. Яна билмадим, эҳтимол, ўзини кўрсатмас, гўлликка солмас, балки чиндан ҳам ақл бовар қилмайдиган ёлғон-яшиқларга чинданда ишонгандир. Ҳар қалай, шу асосда кўпгина кулгили ҳазил-мутойибалар туғилар ва улар улфатларга ош бериш билан якун топарди.

Бир куни мен, Абдуғафур Расулов ва Бегали Қосимов Баҳодир акани кўргани уйига бордик. Ҳовлида ҳеч ким йўқ, супанинг устида Баҳодир аканинг ўзи чой ичиб ўтирган экан. Ҳонтахта устида турли ноз-неъматлар, шу жумладан, «Плиска» деган болгар конъяги ҳам турибди. Конъяк очилган, ҳатто ундан жиндайи ичилган ҳам. Баҳодир ака бизни кўриб хурсанд бўлиб кетди, дастурхон тўкин бўлса-да, меҳмонлар шарафига уни янгилаш учун дик этиб ўрнидан туриб, ичкарига кириб кетди. Баҳодир ака уй ичига кириши биланоқ, мен «Плиска»ни олдим-да, учта пиёлага қолган конъякнинг ҳаммасини қўйдим ва учаламиз учта пиёладаги конъякни пақкос ичиб юбордик. Ҳонтахта устидаги катта чойнакда тўла совиган чой ҳам бор экан. Мен уни конъяк шишасига солиб қўйдим. Чойнинг ранги ҳам айнан конъякниги ўхшар экан – уларни фарқ қилиб бўлмас эди. Бу орада Баҳодир ака ичкаридан майдачуйда кўтариб чиқиб келди. Супадаги кўрначага ўтириб, нонлардан ушатди, «қани, қани олинглар» деб бизни дастурхонга даъват этди ва шишадаги конъякни тўрт пиёлага баравар қилиб қўйди. Пиёлаларни уриштириб, конъякни олдик. Олдиг-у, бир қултум ҳам ичмасдан ерга қўйдик. Ҳаммамиз таажжуб ва савол қарashi маъносини билдирадиган қараш билан бир-биirimizга қарадик. Кейин мен Баҳодир акага ўқрайиб қаҳр билан сўрадим:

– Бу нима?

– Конъяк, – деди Баҳодир ака зўрға тили гапга келиб.

— Конъяк? Шу конъякми?

— Йўқ, йўқ. Конъяк эмас, лекин шишада конъяк бор эди.

— Бор бўлган бўлса қани? У буғланиб учиб кетдими? Хўп, майли у учиб кетган бўлса, ичаёттанимиз нима-а?

— Шуни билолмаяпман-да, — деди Баҳодир ака таҗанглашиб. — Тунов куни қайнам келган эди, шу конъякни ичиб, ўрнига бошқа нарса қўйиб кетдимикин?

Баҳодир аканинг қайниси машхур ўзбек актёри Обид Жалиловнинг ўғли бўлиб, у ўзбеклар ўртасида жуда кам учрайдиган бир ҳунарнинг эгаси эди. У театр гrimmchisi эди. Яхши гrimmchi эди, ўз доирасида катта ҳурматга сазовор эди. Жуда келишган, қош-кўзи чиройли, зўр, шинаванда йигит эди. Баҳодир аканинг гапи тамом бўлмасдан эшикдан келинойи кириб келди. У Баҳодир аканинг Суръатжон ҳақидаги гапини эшитган эди. Жанжалнинг каттаси энди бошланди.

— Нималар деб валдираяпсиз, қайнингиз ўлмади, мен кутулмадим-да. Ойда-йилда бир келади, шунда ҳам боши таъна-дашномлардан чиқмайди. У сизнинг конъягингизга зормиди? Ичаман деса, чўнтағи тўла пул, олиб ичаверади. Эссиз одам кетинг-а, конъягингиз билан кўшмозор бўлинг.

Биз «ҳай-ҳайлаб» келинойини инсофга чақирдик. Баҳодир аканинг ўзи ҳам аллақачон пластинкани ўзгартирган эди.

— Йўқ, йўқ, буни Суръатжон қилган эмас. Бу ўғлимнинг фото дориси бўлиши керак.

— Нима-а? — дедим мен важоҳатимни ўзгартириб. — Фото дори? Биласизми, фото дори дегани — химия-я! У учига чиқсан заҳри қотил! Кейин жуда бир нарса эсимга тушгандек, салмоқлаб сўзладим: — Менга ўзи маҳсус идоралардан уч кун бурун маҳфий кўрсатма келган эди — «Эҳтиёт бўл, сени заҳарлаб ўлдиришга тайёргарлик кетяпти!» Шундай дейишиди-ю, лекин ким, қачон ва қандай йўл билан заҳарлашини айтишмади. Гап бу ёқда экан-да? Мана энди ҳаммаси аён бўлди. Мен сизга нима ёмонлик қилган эдимки, жонимга қасд қилмоқчи бўлдингиз? Бегали билан Абдугафур нима ёмонлик қилди? Биз аҳмоқ бўлиб, сизни яқин дўст деб ҳисоблаб юрган эканмиз-да? Минг раҳмат сиздай дўстта! Қайси разведка сизни ёллаган?

Баҳодир ака жуда қўрқиб кетди – масала борган сари жиддийлашиб, сиёсий тус олмоқда. У суиқасдга алоқадор эмаслигини, бу душманларнинг иғвоси эканлигини айтиб, ўзини оқдай бошлади. Бироқ бизда рад қилиб бўлмайдиган далил – «фото дори» бор эди. Аҳволни тегишли жойларга хабар қилиш бурчим эканини айтиб, сёқтираб туриб олдим. Баҳодир ака эса «Жон дўстим, ҳар нима қилсангиз қилинг-у, гап шу ерда қолсин» дея ёлворишда давом этарди. Ниҳоят, мен ўзимни унга муруват кўрсатайтгандай тутдим:

– Бўлмаса, Баҳодир ака, уч кишилик ош қиласиз. Бу гаплар шу ошнинг тагига кўмилиб кетсин.

– Мана бу бошқа гап! Шундай қиласиз, – деди Баҳодир ака.

3–4 кун ўтгач Чимбой маҳалласидаги чойхонада паловхонтўра катта сопол лаганларда сузилиб ўртага кўйилди. Ошга қўл уришдан аввал, Субутой домла қитмирлик билан:

– Қани, хўш бу кимнинг оши? Нима муносабат билан бўлди? – деб сўраб қолди.

Абдуғафур жавоб берди:

– Тунов куни Баҳодир ака бизни заҳарламоқчи бўлдилар. Шу воқеани ҳеч кимга айтмаслигимиз учун қилинган ош бу.

– Ҳа, шундай, шундай... – деб унинг гапини тасдиқлади Баҳодир ака.

Кунларимиз шу тарзда ҳазил-мутойибалар билан кувноқ ва хушнуд ўтарди. Бироқ бу Баҳодир аканинг ҳаёти бутунлай фамсиз, беташвиш ўтган деган маънони билдирмайди.

Унинг ҳам бўйнида каттагина рўзгори бор ва унинг аравасини тортиб юриш осон эмас эди. Болалари ултрайиб, мактабларни ҳам битириб олишди – уларни институтларга жойлаш керак эди. Деярлик ҳар ҳафта пишириладиган паловларнинг ҳисобини қилмоқ керак. Булардан ташқари Баҳодир акани жинидан ёмон кўрадиган ва ўз навбатида Баҳодир акани кўргани кўзи йўқ, отгани ўқи йўқ одамлар ҳам бор эди. Шулардан бири Бердиали Имомов деган профессор эди. Бу одам уруш қатнашчиси. У ярим ҳарбий формада юрар, ҳархолда жанговар ўтмиши билан анча фахрланарди.

Урушда олган жанговар мукофотларини тақиб юрмас, фақат биргина уруш қатнашчиси нишонини ва бошқа орденларнинг ленталари қадалган икки-уч қатор колдкаларни тақиб юришни қанда қилмас эди. Албатта, ҳар хил йифинлар ва мажлисларда минбарнинг тўри уничи эди. У айтадиган гапи бўлса-бўлмаса, албатта, сўзга чиқар ва кўп насиҳатлар қиласа эди. Унинг нутқларидан кейин ҳаммамиз ўзимизни анча ақлли бўлиб қолгандек ҳис этардик. У ҳам адабиётшунос бўлиб, болалар адабиёти ва драматургия масаласи билан шуғулланар, бу борада ҳам бир қанча мақолалар ва китобчалар эълон қилган эди. Шу масалада Баҳодир Гуломов билан унинг ўртасида баъзи бир ихтилофлар чиқадиган бўлиб қолди. Уларнинг ҳар қайсиси ўзиникини маъқуллар, бир-бирига ён беришни истамас, шу туфайли баъзан «сен-менга» ҳам бориб туришарди. Баҳодир ака табиатан анча юмшоқ одам эди, унинг профессор билан тенгма-тeng олишадиган сиёғи йўқ эди. Профессор эса анча қаҳри қаттиқ, гап келганда отасини ҳам аямайдиганлар хилидан эди. Баҳсолар ва тортишувлар шунга олиб келдики, бора-бора профессор Баҳодир акани жиловлаб олди. Баҳодир ака унинг айтган гапидан, чизган чизигидан бир қадам ҳам четта чиқмайдиган бўлиб қолди. Бундай аҳвол узоқ давом этиши мумкин эмас эди. Бир куни портлаш юз берди. Баҳодир ака исён кўтарди, бўйнидаги бўйинтуруқларни, қўл-оёғидаги кишанларни парчалаб, улоқтириб ташламоқчи ҳам бўлди. Бунга у жиндай муваффақ ҳам бўлди. Бир-икки кун эркинлик ҳаволаридан тўйиб-тўйиб нафас олди. Аммо бир неча кундан сўнг аҳвол ўзгарди. Бутун умри давомида кишанбанд бўлиб, кимнингдир этагида юрган Баҳодир ака ўзига теккан эркинликни нима қилишни билмай қолди. Профессор эса шўринг курғур бу хокисор одамга қарши курашнинг янги ўрамини бошлади. Аммо бу гал энди анча-мунча хуфия гийбатлар, ёлғон-яшиқ тухматлар ишга солинди. Зарба сира кутилмаган томондан берилди. Бу воқеа 1984 йилда рўй берган эди, шекилли. Адашмасам, ўшандা мен факультетда партбюронинг котиби эдим. Бу шунақа ишқи, соғ партия-вий-ташқилий ишлар билан бир қаторда ходимлар устидан тушадиган ҳар хил шикоят ва аризалар билан

ҳам шуғулланишга тўғри келарди. Бунақа ишлар баъзан ғоятда ифлос бўларди. Улар тўғрисида эшитишинг ўзи кўнгилни айнитиб юборар, сиз гё бироннинг яғири чиқиб кетган, ҳар балолар билан булғанган ички кийимларини титкилаётгандай бўлардингиз. Менинг ҳузуримга бир аёл кириб келди – унинг сўхтаси совуқ, гавдасининг йўғонлигидан зўрга лапанглаб юрар, оёқлари гавдасини зўрга кўтариб тургандай. Чақиртика нақдек ботадиган сўзлари ҳам совуқдан-совуқ, жиндай индамай турсангиз ҳаммаёқни бошига кўтариб, шовқин-сурон солишга тайёр, олтмишлардан ошиб қолган аёл. У ажин босган қўллари билан менга тўрт букланган қоғоз узатди.

– Ариза, – деб изоҳ берди у. – Сизларда ишлайдиган домла Баҳодир Ғуломовнинг ахлоқий бузуқлиги тўғрисида...

– Нима? – дедим қулоқларимга ишонмай. Баҳодир Ғуломов ахлоқий бузуқ эканми? Нима деяпсиз ўзи? Бунақа туҳматлар учун кесилиб кетишингиз мумкин-а!

– Бу ҳеч қанақа туҳмат эмас, ҳаммаси рост. Соқолинг чуриб кўксингга тўқилгур бу чол мени зўрлади...

– Нима? – дедим ҳанг-манглигим ортиб.

– Сизни қанақасига зўрлар экан? Зўрайдиган жойингиз қолмаганга ўхшайди-ку..

– Нега ундоқ дейсиз... Мана, кўринг, ҳали баданимда намим кўп...

– Эрингиз бор, шекилли...

– Э, эримнинг бунақа ишлар билан иши йўқ.

– Хўш, қаерда, қандай қилиб зўрлади? Бу ёқقا юрдеса, кетавердингизми? Лоақал зўрлаётгандан ёрдам сўраб бақирмадингизми?

– Бақирганим йўқ. Овоз етадиган жойда ҳеч ким йўқ эди.

– Қачон рўй берди бу воқеа?

– Бундан уч йилча аввал.

– Нега шунча вақтдан бери келмадингиз?

– Ўзи кўяр бу номаъқул ишини, унга ҳам ақл кириб қолар, дедим.

Иш борган сари чигаллашиб бормоқда. Қаттиқ ғазабим келди. Аввало Баҳодир акадан хафа бўлдим. Ахир, бу аёлнинг нимасига учди экан? Йилт этган жозибадор жойи бўлмаса? Ҳар бир имо-ишораси кишида фақат

ижирғаниш ҳиссини уйғотади. Унинг устига 60 дан ошган аёлнинг бунақа шикоят билан келиши, уялмайнетмай ораларида бўлган ишларнинг ҳамма тафсилотларини айтиб ўтиргани ҳаёсизликнинг учига чиққани эди.

— Менга қаранг, опа, — дедим ўзимни тутишга ҳаракат қилиб. — Мана аризангиз — мен уни ололмайман. Чунки Баҳодир Фуломовнинг бунақа одам эмаслигини яхши биламан. Умуман кулоққа айтадиган бу ишингиздан ҳеч нарса чиқмайди. Фақат ўзингиз шарманда бўлиб қоласиз...

— Шунақа дейишингизни билардим. Сиз ҳам уни ёнини оласизми? Ўртоқсиз-да... Мен бу ишни шу ахволда қолдирмайман. Ҳали жавоб берасиз...

— Боринг, ўша кучала еган жойингизга бориб туринг.

Шундай деб, эшикни қарсилатиб ёлиб чиқиб кетдим.

Машмашанинг давоми 1986 йилда бўлди. Партиярога янги котиба келди. У ҳам ёши ўтинқираб қолган, бунақа ишларни титкилашга ўч экан. Бир куни портбюорога Баҳодир акани чақириб келишди. Котиба ундан ишнинг тафсилотларини қайта-қайта сўради. Қачон? Қаерда? Неча марта? Кейин чаласини даъвогар аёл тўлдирди. У ҳар гал қўлини пахса қилиб, Баҳодир акага қараганида, у шўрлик ерга кириб кетай деб, гужанак бўлиб оларди. Ниҳоят, профессорнинг кескин ва аёвсиз гаплари янгарили:

— Бу разолат! Бунақа бузуқликка чидаб туролмаймиз. Бундайларни темир супурги билан супуриб ташламоқ керак.

Домла энди нутқини авжига кўтармоқчи бўлиб, овозини баландлатган эди, тўсатдан даъвогар аёлнинг фарёди эштилди:

— Вой дод! Баҳодир ака!

Ҳамма Баҳодир ака томонга қаради. У узун стол устига, бир бетини қўйиб, бир қўли стол устида, бир қўли столдан пастда осилган қўйи ҳаракатсиз ётарди. Баҳодир ака бу туҳматлар ва бўхтонлар зарбига чидолмай, аллақачон бу дунёдан кўз юмган экан.

Ха, бағритошлиқ ёмон нарса. Бағритошлиқ одамни ўқсиз жароҳатлашга, пичоқсиз кесишга қодир экан. Фақат зиёлilarнинг, китоб кўрган одамларнинг, жангга бориб, жон олиб, жон бериб келган одамларнинг бағритошлиги минг чандон хунук ва ёмон бўлар экан.

## **СОФИНСАМ, НУРИДДИНЖОН, ИЗЛАЙИН ҚАЕРЛАРДАН?**

Бу ҳазин мисрани Нуриддин Бобохўжаев отаси қазо қилганда унинг хотирасига бағишилаган шеърида ёзган эди. Бугун эса унинг ўзига нисбат бериб айтяпман...

Нуриддин менинг шогирдим ҳисобланарди. Дар-ҳақиқат, мен унинг номзодлик ишига илмий раҳбар бўлганман. У Зулфиянинг бадиий маҳоратини тадқиқ қилди, ўзи ҳам шоир бўлгани учун бу мавзуни ич-ичидан ёрита олди. Кейин диссертациясини китоб қилиб чиқарди. Зулфия опа уни ўқиб жуда мамнун бўлган эди. Нуриддинни Тошкентга чорлаб, у билан суҳбатлар курган эди. Менинг устозлигим — шу илмий ишни охирига етказишда кўмаклашишдан иборат бўлган эди, холос. Аслида эса у менга кўп жиҳатдан устозлик қилган эди. Эҳтимол, мен унга адабиёт илмининг қай бир жиҳатларини ўргатгандирман, у эса менга ўз вилоятининг бор-будини, жамики бойлигини, ҳусни-тароватини ўргатди.

1959 йили Фарғона шаҳрида узоқ хизмат сафарида бўлган вақтимда мени биринчи марта қўярда-қўймай Наманганга олиб борган Нуриддин бўлган. Шундан кейин ўнлаб марта Наманганга ёлғиз ўзим ёки дўстларим билан бордим ва ҳар гал Нуриддин бизни goҳ Чортоққа, goҳ Учқўргонга, goҳ Чустга, goҳ Уйчига, goҳ Янгиқўргонга, goҳ Норинга, goҳ Попга, goҳ Тўракўргонга бошларди. Қаерга бормайлик, ҳамма жойда унинг қадрдон дўстлари бор эди. Одамлар Нуриддинни иззатикром билан кутиб олишар ва бизга ҳам домланинг меҳмонлари дея эҳтиром кўрсатар эдилар. Нуриддин эса ўзини жуда камтарона тутган ҳолда турли-туман гўзал инсонларни бизга кўз-кўз қилишда давом этарди.

У Наманганни жуда севарди, унинг гулларини,

расм-русумларини, ширин-шакар меваларини жонидан яхши кўрарди. Ҳар гал бу сафарлар унинг уйида, ҳовлисида ўтказилган кечалар билан тугарди. Бу кечаларда шоирлар, домлалар, хўжалик ходимлари, раислар иштирок этишар, гурунглар бениҳоя қизғин бўлар, ҳазил-мутойиба, кулгилар жаранглаб турарди. Ва кўпинча, ўғилларидан бирортаси: «Дидо, дидо, манави вентилятор кўшнимизникими?» деб Нуриддинни хижолатга солиб кўярди. Ҳа, бир замонлар унинг кўли қисқалик қилиб, эҳтимол, вентилятор олишга ҳам кучи етмагандир. Бироқ бу камсукум йигит ўшанда ҳам ҳаммамиздан бой эди, чунки унинг қалбida элу юрт муҳаббати, инсоний гурур, одамгарчилик мавж урад эди.

Нуриддин яхши одам, яхши ота, яхши дўст эди. У ҳали анча яшаса бўларди, аммо наилож. Ўлим ҳақ! Ўлим Аллоҳнинг иродаси. Куни кечагина унинг кенжа ўғли Баҳтиёржон йўли Тошкентга тушиб, бизнигига келган ва отасидан салом етказган эди. Шу куни биз яқин ўрталарда Нуриддиннинг таваллуд тўйини ўтказиш маслаҳатини қилдик. Водариг, насиб қилмаган экан. Бирдан-бир тасалли шуки, Нуриддиндан яхши шеърлар, яхши фарзандлар, яхши хотиралар қолди. Унинг ўзи экиб кетган гуллар, дараҳтлар қолди. Бу камсукум ва айни чоғда улуг Инсоннинг ёди ҳамиша унинг қариндош-уруглари, ёру дўстлари қалбida сақланади. Бу дунёда унинг ўрни ҳамиша билиниб туради.

**Қадрдоним, азизим, дўстим Нуриддин!  
Аллоҳнинг раҳматлари ёғилсин сенга!**

## **КИЧКИНА ДЕМАНГ БИЗНИ ЁКИ САТТОР ҲАЙДАРОВ ҚИССАСИ**

Саттор Ҳайдаров чиндан ҳам домлаларимиз ичиде жуссаси энг кичкиналардан эди. Лекин у жуда пишиқ, унча-мунча одамга куч бермайдиган, «кичкина деманг бизни, кўтариб урамиз сизни» хилидан эди. У жисмонан толиқиши нималиги билмас, зарур бўлганда, бир ўзи 3-4 кишининг ҳам ишини қилаверарди. Унинг зуваласи болалигиданоқ меҳнатда пишгани кўриниб турарди. Унинг ёшини ҳеч ким айтиб беролмасди. Юзига қараб аниқ бир тўхтамга келиш қийин эди. Бир қарасангиз Лазиз Қаюмовга тенгкурдай кўринар, яна бир қарасангиз ҳали жуда ёш, мўйлаби энди сабза уриб келаётган йигитчага ўхшарди. Асли келиб чиқиши Намангандан – Тошбулоқ қишлоғидан. Бу қишлоқ Абдулла Қодирий таърифлаган Фирвон қишлоғининг ён-берида жойлашган эди. Эсингизда бўлса, Абдулла Қодирий таърифига кўра фирвонликлар жуда содда ва тўғри одамлар бўлишган. Уларнинг соддалиги шу даражадаки, биринчи марта Фирвонга темир йўл келганда, улар паварозни кўриб, «бу жонивор жуда баҳайбат экан, хойнаҳой анча-мунча ўт керак» деб, унинг қаршиисига бир арава хашак билан пешвоз чиқишган экан. Саттор Ҳайдаров, албатта, бунақа даражада содда эмасди. Лекин унинг табиатида фирвонликларга хос самимият ва тўғрилик кучли эди ва у табиатан ёки истасангиз тутма меҳнаткаш одам эди. Илмий иш қиладими ёхуд биронта жисмоний иш билан шуғулландими – бари бир – бошлаган ишини чала қолдирмайдиган, охиригача етказиб бажарип қўядиган одам эди.

Унинг диплом иши Ҳамза Ҳакимзода ижодига башнишланган эди. Ташқи кўринишига қараганда Саттор архивларда қунт қилиб ўтириши учун, кутубхоналардаги

китобларнинг чангини ютиб, ўпкасига азият етказиш учун яратилганга ўхшамас эди, лекин шундай бўлса-да, унинг диплом ишида архив материаллари ҳам, қай бир йўллар билан топилган эски ҳужжатлар ҳам, кутубхона китобларининг нафаси ҳам сезилиб турарди. Одатда диплом ишлари 50–60 бетлар орасида бўлади. Сатторнинг эса Ҳамза прозасига бағишлиган иши салкам диссертацияга етишиб қолган эди. Бу саҳифалар шунчаки қуруқ гап билан эмас, самарали илмий кузатишлар ва мулоҳазаларга бой эди. Шунинг учун ҳам ишга юқори баҳо берилди ва уни кафедрада олиб қолишга қарор қилинди. Кейин у профессор Фулом Каримов раҳбарлигига Дурбекнинг «Юсуф ва Зулайҳо» достони бўйича илмий иш олиб борди. Саттор Ҳайдар диссертация иши устида зўр иштиёқ билан ишлай бошлади. У мавзуга таалуқли адабиётлар билан танишар экан, унинг кўз ўнгига жаҳон адабиётида Юсуф ва Зулайҳога бағишлиган асарлар бениҳоя кўплигини кўриб, лол қолган эди. Биз Саттор билан диссертация ишининг бориши тўғрисида тез-тез гаплашиб турар эдик.

— Вей, менга қаранг! — дерди у ҳайратини ошкор қилиб. — Бу мавзу чиндан ҳам тубсиз бир қудуқ экан — унинг тагига етиб бўлмайди-я! Инжилда ҳам, Куръони каримда ҳам бу қисса берилган экан. Шарқ адабиётида бу мавзуга бағишлиган ўнлаб асарлар бор экан. Кейинроқ эса Фарбнинг машҳур ёзувчилари ҳам Юсуф алайҳис-саломга бағишилаб бутун бошли эпопеялар яратган эканлар. Мен немис ёзувчиси Томас Маннинг «Юсуф ва унинг акалари» деган икки жилди романини айтяпман.

— Нимасини айтасиз, Сатторжон, баъзан сира кутмаган бирор адабиётдан Юсуф ҳақидаги ажойиб асар чиқиб қолади. Масалан, сиз латиш шоири Ян Райнисни эшитганмисиз? Шу шоир ҳам Юсуф тўғрисида драма ёзган экан.

— Йўғ-е? Буни эшитмаган эдим.

Орадан беш-үн кун ўтгандан кейин Саттор мени йўлда тўхтатди:

— Сиз айтган асарни топдим. Нихоятда зўр экан. Ишимга ёрдам берадиган бўлди.

Шу тарзда Саттор бу муҳим мавзуни ишида анча

кенг ёритди ва муваффақият билан диссертациясини ҳимоя қилди. Ташқи кўринишига, юриш-туришига қараб ҳукм қилганда Сатторнинг китобга иштиёқи унчалик зўр эмасди. Лекин бу масалани ташқи белгиларга қараб ҳал қилиб бўлмайди, шекилли. Мен ўзим Сатторнинг китобларини кўрмаганман-у, лекин қўни-қўшнилари унда унчалик кўп бўлмаса-да, анча-мунча ноёб китоблари бор, деб гапиришганини эшитганман. Дарҳақиқат, бир воқеа бўлдию, мен бунинг тўғрилигига амин бўлдим. Бир куни ректоримиз Саъди Ҳасанович мендан Насимийнинг шеърлар китобини сўраб қолди. Менда у китоб йўқ эди. Танишларимдан сўраб-суриштира бошладим. Насимий – озарбайжон шоири. Шунинг учун Тошкентда унинг китобини топиш қийин бўлди. Уни топишдан умидимни узган эдим. Энди Саъди Ҳасановичга айтаман деб турсам, тўсатдан Сатторжон:

– Сиз қидираётган китоб менда бор, – деб қолди. – Мен бераман-у, лекини бор-да.

– Тушундим, Сатторжон, тушундим. Кўнглингизни тўқ қиласеринг. Саъди Ҳасанович сиз айтган одамлардан эмас. Китобингизни албатта қайтариб беради.

Саттор китобни келтириб берди. Китоб аксига олиб Саъди Ҳасановичнинг қўлида узоқ қолиб кетди. Бу орада Саттор безовталана бошлади. Мени ҳар кўрганида, қошларини чимириб: «Китобдан дарак йўқми?» деб сўраб кўярди. Ниҳоят, бир куни мен минг андиша билан Саъди Ҳасановичдан китобни сўрадим. У киши қайтариб беришга кечикканлари учун узр сўраб, эртасига ёқ китобни менга етказдилар. Саттор ректорнинг миннатдорлигини эшитиб, китоби унинг корига ярагани учун курсанд бўлди. Шунингдек, китоби билан яна дийдор кўришганига гоятда боши осмонга етди. Шунда мен бу одамнинг китобга лоқайд эмаслигига амин бўлдим.

Саттор жуда истеъодди одам эди, фақат унинг истеъоди шеърият соҳасида ёки хонандалик билан боғлиқ эмасди. У ташкилий-хўжалик ишларини ҳам дўндирапди. Факультет ҳаётидаги ҳамма ташкилий ишлар Сатторнинг бўйнида эди. Факультетни безаш, ётоқларни саришта тутиш, ҳар хил келди-кетдилар, катта-кичик йингиларни уюштириш усиз ўтмас эди. Бунаقا ишларда

унинг ўрнини босадиган ҳеч ким йўқ эди. Саттор ишларга бош-қошлигидан мағрурланар, дарров ижрочилар гурӯҳини ташкил қилас, уларга билиб-билиб буйруқлар берар, бирига дўқ-пўписа қилас, бошқасига яхши гапирав, хуллас, нима қилиб бўлса-да, ишни дўндиради. Унинг ташкилотчилиги туфайли анча-мунча одамнинг иши енгиллашар, белгиланган тадбирлар яхши ўтарди.

Ўша кезларда талабалар ҳар йили 2—3 ойга пахтага сафарбар қилинар эди. Бу ишда ҳам Сатторнинг хизмати бекиёс бўларди. Аввало у деканатнинг топшириги билан ёнига икки-учта талабани олиб, талабалар борадиган колхоз ва совхозларга чиқиб кетишарди. Улар пахтага келадиган 250—500 одамга жой тайёрлашлари керак эди. Табиийки, маҳаллий раҳбарлар то дўппи тор келмагунча бу ишларни хаёлларига ҳам келтирмас эди. Саттор елиб-югуриб, мутасаддиларни «ака», эчкисини «така» деб юриб, ётоқларни тайёрлар, уларнинг дераза-эшикларини, ўйилиб кетган полларини, умуман, тириклик учун зарур бўлган ёрдамчи хоналарни, ўчоқбошиларни, озиқ-овқат омборларини, қозон, чўмичдан тортиб ўтингача ҳаммасини таҳт қилиб қўярди. Бу анча қийин иш эди.

Саттор юқори курсларда ўқиб юрганида пахтада бухгалтерлик вазифасини бажариб юрди. Ҳар беш кунда ҳисоб-китоб қилинар, теримчиларга терган пахталари учун ҳақ беришарди. Бунинг учун ведомость тузиларди. Бу унчалик қийин бўлмаса-да, жуда майда иш эди. Бирор жойда жиндай адашиб кетсангиз, рақамлар бир-бирига тўғри келмай қолар ва кўпинча бутун ведемостни қайтадан тузиб чиқишига тўғри келарди. Саттор ўқишига келгунга қадар ўз қишлоғида ҳисобчилик қилганми — билмайман, лекин ҳарҳолда факультетда ҳисобчилик қилас экан, бирор талаба ундан бирор марта норози бўлганини, оладиган меҳнат ҳақи нотўғри ҳисобланганидан ранжиганини билмайман.

Кейинчалик Саттор пахтада факультетнинг ҳамма хўжалик ишларига раҳбарлик қиладиган бўлди. У ҳар ҳафтада туман марказидаги бозорга қатнар ва бир ҳафталик озиқ-овқат маҳсулотларини олиб келар, фақат бу билан чегараланмас, керак бўлса, ошпазлик ҳам қила-

верар, ўчоққа ўт қалар ва умуман, ҳеч қанақа ишдан ҳазар қилмас, ишлаб чарчамас эди. Талабалар ҳам унинг ишчанлиги ва меҳнаткашлиги учун ҳурмат қилишар, бирор иш буюриб қолса ҳеч қайсиси йўқ демай адо этишарди. Домлалар одатда пахтада 15–20 кундан навбатма-навбат бўлишарди. Саттор эса кампания бошланганидан охиригача туриб берар, ҳатто талабалар шаҳарга қайтиб кетганларидан кейин ҳам яна 2–3 кун қолиб, колхоз ёки совхоз билан ҳамма ҳисоб-китобини якунлаб кетарди.

Саттор бундан ташқари ҳам бир қатор ажойиб фазилатларга эга эди. У жуда камсуқум, хокисор эди, у мутлақо иззатталаб эмас, бирор рўйхатдан тушиб қолса ёхуд бирор маъракага айтилмай қолса, хафа бўлмас, гина ҳам қилмас, аразлаш нималигини билмасди. Аксинча, қўни-қўшни ёхуд ҳамкасларининг уйида бирон йигин бўлиб қоладиган бўлса, у ерга ҳаммадан олдин етиб борар, «Бизга нима хизмат бор?»деб сўрар ва ўзи билиб иш қилиб кетаверар эди: йигинлар ҳовлида ўтадиган бўлса, қай тарзда қилишни аниқлар, маҳалладан стол-стуллар, чойнак-пиёла, лаган ва кося каби зарур нарсаларни олдириб келар, ўчоқ кавлар, қозон-ўчоқда қилинадиган овқатларнинг масаллигини таҳт қилиб кўярди. Саттор овқат қилишни жуда яхши кўярди. Овқат қилганда ҳам ўтин ёришдан бошлаб, овқатни сузгунча ҳамма ишни ўзи бажаришга ҳаракат қиласди. Унинг овқати йигиндагиларга манзур бўлса ёхуд чойхонадаги улфатлар мақтаб-мақтаб еса, қандайдир бир ички мамнунликдан унинг юзлари ёришиб кетар, ажинлари ёйилгандай бўлиб, бир неча ёшга яшариб кетарди. Сирасини айтганда, у гуурланишга ҳақли эди. Негаки, Саттор чиндан ҳам паловга жуда уста эди. У пиширган ошларда биронта ҳам пишмай қолган гуручни қидириб топиш қийин эди. Гўштлар жуда оби-тобида, ошнинг тепасига босилган саримсоқ пиёз баайни иликдек килкиллаб туради. Бунақа ошни ёзда редиска, қишида Олтиариқнинг ям-яшил турпли билан қўшиб есангиз, тўймайсиз. Каттакон сопол лаганга гумбаздай қилиб сузиб келинган паловдан буралиб-буралиб буғи кўтарилиб турар ва ундан тарқалган ёқимли хушбўй ҳид иштаҳани

карнай қилиб юборарди. Бундай пайтларда Фулом Ка-  
римовнинг «Ош ейиш ҳавасми?» деб янграйдиган даъва-  
ти ошга маҳлиё бўлиб қолган улфатларни дарров хушёр  
торттирас ва биз ошдан аввал қилинадиган расм-русум-  
ларни апил-тапил бажо келтириб, аҳиллик билан ўзи-  
мизни ошга урадик. Ош шунаقا хуштаъм, шунаقا ма-  
зали бўлар эдики, назаримда, ўлик еса, тирилиб кетар-  
ди. Ҳаммамиз Сатторнинг пазандалигига тан бергандик,  
биронта бошқа паловни уникига ўхшатмас эдик, ҳатто  
уни бошқа паловлардан фарқ қилмоқ учун «палови Сат-  
торий» деб ном ҳам қўйиб олган эдик. Хуллас, Саттор  
билан бирга кўпгина кунларимизни хушнудлик ичida  
ўтказган эдик. Улар қувончли ва ёрқин кунлар сифатида  
хотирамизда қолди. Саттор – шу хушнудликнинг асосий  
сабабчиларидан бири эди. Шунинг учун уни ҳаммамиз  
хуш кўрардик.

2004

## ҚАЛБИМИЗГА ЯҚИН ОЛИМА

Олмон адабиётшуноси Ингеборг Балдауф илк бор Тошкентта келганида дорилғунун талабалари билан учрашган эди. Мен уни аудиторияга бошлаб кириб, таниширдим. Балдауф хоним кенг ва ёруғ хонани тұлдириб ўтирган талабаларни күздан кечирди-да, маъруzasини бошлади. Мен унинг XX аср бошидаги ўзбек адабиёти билан ва, айниқса, жадидлар ижоди билан шуғулланишидан хабардор эдим, лекин олима гапни қадимий ривоятдан бошлади.

Эмишки, Оллоҳ Арши аълодаги жамики малоика ва фаришталарига дўзахни томоша қилдирибди. Дўзахдаги бир жой уларни ҳайрон қолдирибди – бу ердаги гулхан каттароқ, олов янада гуриллаган, дўзахилар дучор бўладиган қийноқлар минг чандон даҳшатлироқ экан.

– Бу жой кимга аталған, Парвардигори олам? – деб сўрашибди малоикалар.

– Чаламуллаларга! – деб жавоб берибди Оллоҳ. – Негаки, чаламуллалик гуноҳлар ичиде энг баттаридир. Бу чаламулланинг касри минглаб одамларга уради.

Ривоятни эшитиб, бошимдан ҳушим учиб, ҳангманг бўлиб қолдим. Аввало ўшкуи, мен ўнча йил адабиётшунослик қилиб юриб, бу гўзал ҳикояни сира эшифтмаган эдим. Иккинчидан, Ингеборг ривоятни соғ ўзбек тилида, бирон жойида тутилмай, эзмаланмай ҳикоя қилиб берди. Унинг талаффузи шу қадар тиниқ ва тоза эдики, кўзингизни юміб тингласангиз, гапираётган одамнинг ўзбек эмас, бутунлай бошқа миллатга мансуб эканига сира ишонмас эдингиз. Ривоятдан сўнг олима ҳар бир инсон учун билимнинг нақадар зарур экани, билим маънавий камолот эшигини очиб берадиган бирламчи қалитлиги тўғрисида гапирди. Шундан кейингина у ўзининг асосий мавзусига ўтди. У жадидлар

тўғрисида тўлқинланиб гапирди. У Мунаввар қори тўғрисида гапирадими, Авлонийдан баҳс юритадими, Беҳбудийни тилга оладими, бари бир, уларнинг шахсиятига, қолдирган асарларига, миллат манфаатлари йўлида кўрсатган жасоратлари ва фидокорликларига нисбатан теран бир ҳурмат билан гапиради. Бу ҳурмат замирида эса шу буюк сиймоларни берган халқа, унинг маданиятига, иқтидорига муҳаббат жўш ураётганини сезмаслик мумкин эмас эди. Шуларни ўйлаб ўтирас эканман, беихтиёр ана шу ўрта бўй, истараси иссиқ, юзидан маъюс табассум аримайдиган, қўнгир кўзларидан теранлик ила жиндай кинояомуз нигоҳ уфуриб турган олимага меҳрим товланиб кетди. Тўғри, Ингеборгдан аввал ҳам ўзбек адабиётини ўргангандан хорижлик олимлар кўп бўлган, лекин уларнинг орасида ўзбек шоирлари ва адиллари, алломалари ва мутафаккирлари ҳақида билганинни ўзбек халқига, ўзбеклар диёрига бўлган муҳаббат туйғусига ўраб бера билгандар кўп эмасди. Беихтиёр Чўлпоннинг «совуқ эллардан муз кийиб келганлар» шаънига айтган гиналари эсга тушади. Ахир, бўлар экан-ку... Мутлақо бошқа бир минтақада туғилиб ўсан, мутлақо бошқа бир ирқقا, миллатта мансуб, мутлақо бошқа бир маданият сарчашмасидан сув ичган одам ўзбек тилидаги китобларни ўқиш учун эски араб ёзувини ўрганибди. Ва бунинг оқибатида ўзбек халқига, унинг расм-русумларига, маданиятига нисбатан қалбida теран бир муҳаббат туйғуси жўш урибди. Шундоқ экан, бу ажойиб олимага, бу гўзал инсонга қалбимиз тўридан жой бермаслигимиз мумкинми? Ундан меҳримизни дариф тутмоғимиз ўринлими?

Лекин гап фақат бундагина эмас. Ингеборг Балдауфнинг олима сифатидаги яна баъзи бир сифатларини айтмасликнинг иложи йўқ.

Ингеборг хоним Тошкентга қилган илк сафаридан юртига қайтар экан, менга Беҳбудийнинг «Саёҳат хотиралари» мақоласининг немис тилига қилинган таржимасини ва унга ёзган шарҳларини тухфа этди. Мен улар билан танишиб чиқдим. Кейинчалик мен унинг бошқа мақолаларини ҳам ўқиш шарафига мусассар бўлдим. Улар билан танишиш жараёнида Ингеборгнинг

чинакам олимлигига тан бердим. Чиндан ҳам, чала-муллалик ҳақида тасодифан гапирмаган экан. Унинг мақолаларида ҳақиқий илмий тадқиқотларга хос бўлган теранлик ва салмоқ бор. Олиманинг фикрлари осмондан тушган ёхуд тасодифан эсга келиб қолган ҳавои фикрлар эмас – уларнинг бари биринчи манбаларни чукур ўрганиш асосида, асар матнини атрофлича тадқиқ қилиш оқибатида пайдо бўлган. Унинг асарларида қандай факт тилга олинмасин, қандай ҳодиса тавсиф қилинмасин, оима бу факт ва ҳодисаларни қаердан олганини, қайси матнга асосланганини аниқ кўрсатади. Унинг асарларидағи саналар қайта-қайта текширувдан ўтказилган, жойлар, одамлар, асарларнинг номлари синчковлик билан аниқлаштирилган. Хуллас, оима бирон мақоласида чаламуллаликка, билиб-бilmай гапиришга, оддий ҳаёт ҳақиқатини баландпарвоз гаплар, ранговар бўёқлар билан алмаштиришга йўл қўймайди. Буларнинг бари чинакам илмийликнинг бирламчи шартидир. Мен бу сифатларни Ингеборг услубининг фавқулодда хусусиятлари сифатида кўрсатмоқчи эмасман, лекин шунга қарамай, уларни таъкидлаётган эканман, бунинг сабаби бор, албатта. Биз, собиқ шўро адабиётшунослари, ўзимизни «адабиётшунос оим» деб атаб, гердайиб юраверган эканмиз-у, олимлик учун энг зарур сифатлар нимадан иборат эканини ўйлаб ҳам кўрмаган эканмиз. Ўзимдан қиёс: мен, албатта Беҳбудийнинг номини мактабда ўқиб юрган кезларимдаёқ эшитган, ҳатто унинг «Падаркуш»ини урушдан аввал нашр қилинган аллақайси адабиёт дарслигидан ўқиган ҳам эдим. (Бу ўринда дарсликнинг муаллифию қачон, қайси нашриётдан чиққанини аниқ айтмаётганим учун узр, 30-йилларда чиққан тўрт-бешта адабиёт дарслиги ва хрестоматияларини Асқар Зуннун докторлик диссертациясини ёзаётганда минг таваллолар билан, ялиниб-ёлвориб, иши битиши билан қайтариб беришга вайдалар қилиб, олиб кетганча, ҳали қайтариб беради!) Кейинчалик унинг биографиясига оид баъзи материаллар билан танишдим, айrim узуқ-юлуқ хотиралар эшитдим ва шуларнинг ўзи билан қониқдим. Буни қарангки, салкам ярим аср мобайнида на Самарқандга

бориб, на Тошкент кутубхоналарида Беҳбудийнинг «Ойна» журнали ва Самарқандда нашр этган газетаси билан танишиб чиқишига қунт қилибман. Ҳолбуки, бу журнал ва газетанинг нусхаларидан суратга олиб Америкага жўнатишган ва у ердан бошқа мамлакатларга тарқалган экан. Боя тилга олганим «Саёҳат хотиралари» билан ҳам мен немис олимасининг асарлари туфайли танишдим. Шунинг учун Ингеборгнинг талабалар билан учрашувда айтган ривоятининг бир учи келиб менга ҳам текканди.

Ингеборгнинг илмийлик принципига қатъий амал қилишини, ўзининг олимлигига жуда юксак талаблар кўйишини кўрсатадиган мисоллар келтириш мумкин.

Учрашувларимизда мен Ингеборг хонимдан сўрадим:

— Ингеборг хоним, нечундир сизнинг жадидлар ва жидидчилик ҳақидаги мақолаларингизда Боймирза Ҳайит асарларига кам мурожаат қиласиз. Сиз у кишининг асарларидан хабардормасмисиз?

Олима бу саволга хушламайгина жавоб қилди:

— Биласизми, у кишининг асарларини ўқиганман, албатта. Лекин у киши кўпгина фактларнинг манбаларини кўрсатмайди. Шунинг учун айрим гапларига ишонолмай қоламан.

Бошқа бир учрашганимизда бугунги Германиядаги немис туркийшунослари ҳақида «Жаҳон адабиёти» учун мақола ёзиб беришини сўрадим. Бу илтимосим ҳам олимага маъқул тушмади.

— Бунақа мақоланинг кимга кераги бор? Бундай мақола куруқ ахборотдан иборат бўлади.

Хуллас, бу гал ҳам у ўзининг синалган меъёрларидан чекинмади, яна ўша жиддийлигини сақлаб қолди.

Ингеборг Балдауф ҳозирча фақат XX асрнинг биринчи чорагида яшаб ижод қилган ёзувчилар фаолиятини тадқиқ этяпти. Унинг Фитрат, Беҳбудий, Чўлпон ҳақидаги мақолалари бугунги жадидшуносликда сезизларли воқеа бўлди. Олима нафақат салмоқقا интилади, балки ҳар бир мақолада ижтимоий тафаккур ривожидаги босқичлар ҳақида, ўзбек адабиётининг ўзига хос томонлари тўгрисида жуда теран ва самарали фикрлар айтади. Масалан, «Маҳмудхўжа Беҳбудий Фаластинда» деган

мақоласида Беҳбудийнинг И smoил Гаспралидан таъсирланганини айтиб, айни чоғда унга айрим масалаларда шарҳ қилганини ҳам, ўз йўлида собит турганини ҳам таъкидлайди. Олима ёзади: «Маҳмудхўжа И smoилбей Гаспралини ҳар қанча ҳурмат қилмасин ва ислом дунёсига қанчалар умид боғламасин, бари бир, Гаспралиниң исломий қараашларини, мақсадларини маъкулламайди. Аксинча, у бутунлай бошқа, жадидча принципларга садоқат ила риоя қиласди. Беҳбудийнинг «Саёҳат хотиралари»да унинг асосан дунё билан ҳамжиҳатлик, маърифатга юз буриш, маданий муассасаларни кенгайтириш, хўжалик юритишида илгор фан ютуқларидан фойдаланишга алоҳида эътибор берганлиги яққол кўзга ташланади».

Ингеборг хонимнинг ўзбек ҳалқига меҳри, ўзбек диёрига муҳаббати шунчаки бир мавҳум туйгу эмас. У деярли йил оралаб юртимизга келади, ҳар келганида Самарқанд ва Бухоро каби қадимий масканларни зиёрат қиласди, конференция ёхуд симпозиумларда иштирок этади, талабаларга маърузалар ўқииди. Ўзбек адабиёт-шунослари билан гурунглашади, сұхбатлар қуради, илмий режаларини ўртоқлашади. Унинг ўзбек зиёлилари билан дўстлиги йил сайин мустаҳкамланиб боряпти. Бегали Қосимов, Суннатилла Аҳмедов каби олимлар Ингеборгнинг таклифи билан бир неча мартараб Германияга боришганда Ингеборг хоним олмон олимдининг меҳмондўстлиги ўзбекларницидан сира қолишмаслигини намойиш этишга ҳаракат қиласди. У энг майда нарсаларда ҳам меҳмоннинг кўнглини олишга, бехосдан ранжитиб кўймасликка интилади. Бу интилишда унинг ақл-заковати ҳам, зийраклиги ҳам, фаҳм-фаросати ҳам яққол намоён бўлади.

Яқинда Берлинга бориб келган Суннатилла Аҳмедов ҳикоя қиласди:

— Бир куни Ингеборг бизни уйига меҳмонга айтди. Бордик. Эри билан бирга кутиб олди. Шинам хонасида тўкин дастурхон ёзибди. Авваллари немисларнинг тежамкорлиги, немисча ҳисоб-китоб тўғрисида ҳар хил ривояту ҳикоятларни кўп эшигтан эдик. Лекин бу гал унаقا «ҳисоб-китоблар» кўринмади. Аксинча, дастурхон

устида ҳар хил тансиқ овқатлар шу даражада бисёр эдики, столнинг бели майишиб кетай, дерди. Бир маҳал лагандада хушбўй ҳидларини таратиб қовурилган гўшт келди. Ўзингиздан қолар гап йўқ – Оврупо томонларда қўй гўштидан маъкулроқ кўриладиган гўшtlар ҳам бор. Иштаҳа жунбишга келган бўлса-да, ҳеч кимга билдирамай гўштга зимдан қараб қўйдим. Ингеборг буни сезибдими – дарҳол мени тинчлантирди: «Хавотир олманг, Суннатилла Аҳмедович, қўй гўшти, бисмилло, деб сўйилган. Мусулмон қассобдан олганман!» Ана шунақа, Балдауф хоним нафақат илмда, балки кундалик турмушда ҳам ўта зийрак аёл!

Суннатилланинг гапларига нима қўшимча қилиш мумкин? Дарҳақиқат, бу баркамол олима, олижаноб инсон, бекаму кўст беканинг фазилатлари унинг ҳар бир ҳаракатида, ҳар бир ишида яққол сезилиб туради. Ингеборг хонимнинг илмий фаолияти ҳақида муайян тасаввур берувчи мақолалардан таркиб топган китобчаси ўзбек тилида ҳам чоп этилган. Аминманки, бу мақолалар нафақат бугунги ўзбек китобхонига катта фойда келтиради, унинг тасаввурларини бойитади, балки муаллифга унинг меҳрини ҳам уйғотади, яна аминманки, шу китобчаси туфайли Ингеборг Балдауф ўзбек китобхонининг юрагига янада яқинроқ бўлиб қолади.

2001

## **УМАРАЛИ НОРМАТОВ ҲАҚИДА БИЛГАНЛАРИМДАН БИР ШИНГИЛ...**

Умарали ҳақида гапириш маълум маънода бугунги ўзбек танқидчилиги ҳақида гапирмоқ демакдир. Бугунги ўзбек танқидчилиги ҳақида гапирганда эса беихтиёр қалбимиз фуур ва ифтихор туйғуларига тўлади. Бунинг боиси бор, албатта. Сўнгги йигирма-ўттиз йил ичидаги ўзбек танқидчилиги илмийлиги ва обьективлиги, ёзувчига талабчан ва самимий муносабати, адабий жараёнга салмоқли таъсири, китобхонлар оммасининг юксак дидини шакллантиришдаги хизматлари билан поэзия, проза, драматургия каби адабиётимизнинг тўла хукуқли мустақил бир соҳаси бўлиб қолди. Бугун ёзувчи ҳам, китобхон ҳам танқидий сўзга мунтазир. Танқидчилик савияси ортиши билан унинг мавқеи мустаҳкамланиб, обрўйи ортиб бормоқда. Эҳтимолки, бу – ўзбек танқидчилари эришган энг салмоқли ютуқдир. Адабий танқидни бугунги мартабага кўтаришда Иzzat Султонов, Ҳомил Ёқубов, Матёкуб Кўшжонов, Лазиз Қаюмов каби кўпни кўрган, тажрибали аллома танқидчилар билан бирга С. Мамажонов, И.Faфуров, П. Шермуҳамедов, Н. Худойберганов каби нисбатан ёшларнинг ҳам хизмати foят катта. Умарали Норматов шулардан бири. Мана, салкам чорак асрдирки, у ўзининг салмоқли китоблари, теран мақолалари билан адабиётимиз ривожига муносиб ҳисса қўшиб келмоқда. Ижодкорнинг қадри ва мартабаси, обрўси ва мавқеи унинг маънавий ҳаётимизга қўшган ҳиссаси билан белгиланса, Умаралини ҳеч иккilanмай, бугунги ўзбек танқидчилигининг етук вакили деб аташ мумкин.

Умарали 50 ёшга кирди. Унинг ярим асрлик ҳаётининг teng ярми – 25 йили менинг кўз ўнгимда кечди. Шунинг учун ҳам унинг ҳаётидаги айрим нуқталарга

назар солиши: а, менинг назаримда муҳим бўлган баъзи ҳодисаларни эслашга жазм қилдим. Ўйлайманки, улар Умаралининг ижодкор ва инсон сифатидаги қиёфасини тўлароқ тасаввур қилишга ёрдам беради. Мен биринчи марта Умаралини 1955 йил сентябрь ойининг бошида кўргандим. Умарали у пайтларда Тошкент давлат университетида филология факультетининг IV курс талабаси эди. Мен эса эндиғина Москвада ўқишни битириб, кандидатлик диссертациясини ҳимоя қилиб қайтган эдим. Олий ўкув юритидаги биринчи иш куним Умаралилар группасидаги лекциядан бошланган. Шуниси ажабланарли эдики, бу группадаги студентларнинг кўпчилиги ёши деярли мен билан тенгдош йигит-қизлар эди. Шунданми, мени уларнинг салобати босиб, лекцияни қандай ўқиганимни билмайман. Одатдагидек, лекция охирида талабаларга «Савол борми?» деб мурожаат қилдим. Озингина, хушбичим йигит кўл кўтарди. Бу – Умарали эди. Менга маъқули шу бўлдики, Умарали баъзи шум болалардек ўқитувчини мот қилиб ҳузурланиш учун ёки «Биз ҳам чакана эмасмиз. Кўриб қўйинг» деб мақтаниш учун савол бермади. Лекцияда айтилган гаплар унинг фикрини уйғотганини, у баъзи масалаларнинг тагига етмоқчи эканлиги сезилиб турарди. Кейинчалик маълум бўлишича, бу хусусият Умаралининг қонида бор экан – у ўта синчков, ҳамма нарсани тагига етмай қўймайдиган, эшитган гаплари, илмий холосаларини ҳамма томондан обдан ўйлаб кўриб, сўнг эътиқодига айлантирадиган одамлардан экан. Тез орада Умарали билан ҳам, группадаги бошқа студентлар билан ҳам иноклашиб кетдик. Мен Умаралининг диплом ишига раҳбарлик қилдим. Диплом иши жараённида Умаралининг яна бир фазилати билан танишдим – у ўта меҳнаткаш, ўз илмий ишига доир фактларни биринчи бўлиб манбалардан қидириб топиб, ўз кўзи билан кўрмагунча қўймайдиган, ишига доир жамики илмий адабиётларни синчилаб ўрганиб, уларга муносабатини аниқлаб олгандан кейингина енг шимариб ишга киришадиган одам экан. Буни ўқиб ҳайрон бўлишингиз мумкин – ахир, ҳар қандай олимнинг биринчи сифати шу эмасми, деб. Илмнинг қора меҳнатидан қочкан одам

олим бўладими? Ҳа, шундай. Лекин шундай бўлишига қарамай таъкидлар эканман, бунинг боиси бор. Яқинда шогирдларимдан бири менга мурожаат қилиб, катта илмий иш қилмоқчи эканини, бунинг учун у кишининг ишига тааллуқли китоблардан бериб турсам, иши осон кўчишини айтди. Бу гапни эшитиб, ичимда қаттиқ ранжиридим – йўқ, китобларим учун эмас, албатта. Ахир, катта иш қилмоқчи бўлган одам бу ишнинг риёзатини ҳам чекиши керак-да! Афсуски, кейинги пайтларда диплом ёзувчи студентлар ўргасида ҳам, диссертация ёқловчилар орасида ҳам, ҳатто айрим танқидчи ва адабиётшунослар ичida ҳам ана шундай қора ишдан қочадиганлари, қўлини совуқ сувга урмай иш битирадиганлар кўпайиб қолган. Ҳолбуки, «тоққа чимасанг дўлона», жон чекмасанг жонона қайдা» деган гап олим ва танқидчининг меҳнатига авваллари нечоғлиқ таалуқли бўлган бўлса, ҳозир ҳам шунчалик тааллуқли ва бундан кейин ҳам шундай бўлиб қолаверади. Илмий-техник революция, эҳтимол, қалам аҳлининг ҳам ма-шаққатли меҳнатини енгиллаштириш йўлларини топиб берар, лекин бари бир, шунда ҳам ҳар қайси олим ўз соҳасининг қора меҳнатини ўзи бажаради.

Умаралига қайтайлик: билимдонлиги, меҳнаткашлиги, синчковлиги биринчи ишидаёқ яхши самара берди: давлат имтиҳон комиссияси аъзолари яқдиллик билан унинг диплом ишини юксак баҳолашди ва нашрга тавсия этишди. Орадан кўп ўтмай, 1959 йилда «Ўзбек адабиёти масалалари» тўпламида бу иш «Faafur Fулом поэзиясининг эстетик принциплари» деган ном билан босилиб чиқди. Гарчи 1959 йилдан аввал ҳам Умаралининг тақриз ва мақолалари матбуотда эълон қилинган бўлса-да, унинг илмий-танқидий фаолияти-нинг бошланиши шу мақола билан белгилангани маъқул. Чунки бу иш ҳажми билангина эмас, фикрий теранлиги, умумлашмаларга бойлиги, илмийлиги билан ҳам жамоатчилик эътиборини ўзига қаратган мақола эди.

Бу мақола чиқсан кезларда Умарали университетни тутатиб, ўзи туғилиб ўсган қишлоғидаги мактабда муаллимлик қиласарди. Унинг таклифи билан мен Рапқонга меҳмонга бордим. Умаралининг ота-онаси, акаси, бош-

қа қариндош-уруғлари, дўсту ёронлари билан яқиндан танишдим. Рапқонга келгунга қадар мен бу қишлоқ ҳақида республикамиизда ҳамма билган нарсани билардим, яъни:

Рапқон ажойиб жой экан,  
Бир кўча кетган сой экан,  
Салқин супа ҳой-ҳой экан,  
Ким кўрса ҳанг манг экан.

Кўрганларим билганларимдан юз чандон ортиқ чиқди. Тоғ этагида жойлашган бу қишлоқ, ҳақиқатан ҳам, Муқимий таърифлагандек, фоят хушманзара, соя-салқин жойлари кўп эди. Унинг бир ёнидан айқириб Катта Фарғона канали ўтади. Канал бўйларида, айниқса, баҳор пайтларида жуда чиройли тус оладиган катта мевазор боғ. Қишлоқдан сал нарироқда адирлар этагида сўлим дарахтзор. У ерда ёз пайтлари пионерлар дам олишар экан. Қишлоқ марказида ажойиб чойхона, дўконлар, ҳаммом, пахта пункти. Кўп қаватли мактаб. Қишлоқ катта, обод, аҳолиси кўп. Шу қадар кўпки, бир колхозга сифмаганидан бу ерда иккита колхоз ташкил қилинган. Албатта, Муқимий ҳаёт бўлиб, бугунги Рапқонга бориб қолганда, унга бағишлаган бандларини анча кенгайтирган бўларди. Эҳтимолки, бугун у Рапқоннинг хушманзара жойларидан ҳам ортиқроқ одамларига қойил бўларди ва тажрибали, донгдор пахтакорлар ҳақида ёхуд олис бир қишлоқда яшаб туриб, бутун дунё миқёсида ўйлай оладиган билимдон, зукко ва айни чоғда сермулозамат зиёлилар ҳақида ёзган бўларди.

«Куш инида кўрганини қиласди» деган гап бор. Менинчча, бу гап одамга ҳам тааллуқли. Болалик кечган оилавий муҳит, олам ҳақидаги илк тасаввурларни шакллантирадиган дастлабки муҳит истасангиз-истамасангиз сизга таъсир кўрсатади, характеристингиздаги маълум хислатларни вужудга келтиради. Мен Рапқонда меҳмон бўлиб юриб, бу қишлоқнинг сўлим табиати Умарали қалбida гўзаллик туйғусини уйғотган, бу эса адабиётта илк муҳаббатни туғдирган бўлса керак, деб тахмин қилдим. Назаримда, ундаги меҳнаткашлик бутун умри дехқончилик билан ўтган отасидан мерос қолган. Ума-

рали аввал қишлоғида, кейин Конибодомда педагогика техникумидა ўқиди. Унинг баҳтига техникумда бирга ўқишган болаларнинг ҳам кўлчилиги билимга ташна, қобилиятли, синчков болалар эди. Бундай чоқларда улар ўртасида дўстлик вужудга келади, бу дўстлик эса яхши маънода рақобатни туғдиради. Умаралининг шундай қадрдан дўстларидан бири – Худойберди Тўхтабоев эди. Ҳозир у асарлари ўнлаб тилларга таржима қилинаётган атоқли адиб.

1959 йилда кафедрамизга аспирантурадан ўрин берилди. Бу ўринга Умарали Норматовни таклиф қилди. Сира кутимагандан унга илмий раҳбарлик қилиш менга топширилди. Мен бу ишда сира тажрибам йўқлигини айтиб, эътиroz билдирган эдим, кафедра мудири Фулом Каримов «Ҳечқиси йўқ. Сузишни ўрганиш учун сувга кириш керак. Ишлайверинг» деб гапни қисқа қилди. Билмадим, менинг раҳбарлигимдан Умаралига қанчалик наф тегдийкин, лекин мен учун бу иш яхши мактаб бўлди. Уч йил ўтгач, Умарали «Ҳозирги ўзбек ҳикоячилиги ривожининг асосий тенденциялари» деган мавзууда номзодлик диссертациясини муваффақиятли ҳимоя қилди ва Тошкент Давлат университетининг филология факультетида ишлай бошлади. Аввал у ўқитувчи бўлди, кейин доцент бўлиб ишлади. Бундан бир неча йил мұқаддам ўзбек адабиёти кафедраси иккига ажralиб, ўзбек совет адабиёти кафедраси ташкил қилинганда ҳаммамиз яқдиллик билан Умаралини кафедра мудири қилиб сайдадик. Бу орада у докторлик диссертациясини ёқлаб, профессор бўлди. Кези келганда Умаралининг педагогик фаолияти ҳақида ҳам икки оғиз айтиб ўтay. Мана, йигирма йилдирки, у студентларга адабиётдан лекциялар ўқыйди. Шу йиллар давомида у студентлар ўртасида бакувват обрў ортириди, уларнинг мұхаббатини қозонди. Бунинг асосий сабаблари шундаки, унинг лекциялари ҳамиша ижодий характерга эга. У ҳеч қачон маълум нарсаларни такрорлаш билан чекланмайди, аксинча, ҳар бир лекцияда тингловчиларга бирон янги гап айтишга, уларнинг фикрини уйғотишга, шу орқали уларни бадиий адабиёт гўзалликларини каашф этишини ўргатишга интилади. Умаралининг билимдонлиги,

адабиётни бутун қалбидан эҳтирос билан севиши лекцияларининг мазмунан теран, эмоционал таъсирчан чиқишини таъминлайди.

Шу йиллар ичida Умарали Норматов танқидчи ва адабиётшунос сифатида жуда актив иш олиб борди. Унинг «Жанр имкониятлари», «Маҳорат сирлари» (М. Кўшжонов билан ҳамкорликда), «Насримиз уфқлари», «Гўзаллик билан учрашув», «Насримиз анъаналари», «Саид Аҳмад» «Шуҳрат» каби китоблари босилди. Улардан ташқари «Ўзбек адабиёти масалалари» (1962), «Адабиётимизнинг ярим асри» (1967, 1975), «Ўзбек жангномаси» (1977) каби тўпламларда мақолалар элон қилиш билан чекланмай, бу китобларнинг айримларини барпо этишда тўпловчи сифатида ҳам иштирок этди. Ниҳоят, Умаралининг йигирма йил ичida вақғли матбуотда эълон қилинган мақолаларини санайдиган бўлсак, икки юздан ортиқ номни ўз ичига оладиган каттакон рўйхат пайдо бўлади. Булар ичida тақризлар ҳам, адабий портретлар ҳам, баҳслар ҳам, проблематик мақолалар ҳам бор. Кўринадики, Умарали Норматов танқидчи ва адабиётшунос сифатида йигирма йиллик фаолияти давомида анча салмоқли иш қилиб қўйибди. Бироқ санъатнинг ҳамма турларида бўлганидек, адабий танқидчиликда ҳам асарнинг ҳажми ёхуд мақолаларнинг сони ҳал қилувчи аҳамиятга эга эмас. Ҳамма гап – сифатда, китоб ёхуд мақолаларнинг гоявий салмоғида, уларда айтилган гапларнинг янги-эскилигида, ҳаётийлигида. Танқидчи сермаҳсул бўлгани билан, мақолаларни қалашибдириб ташлайвергани билан унинг адабиётдаги мавқеи мустаҳкамланиб қолмайди. Ёзувчилар назарида ҳам муҳим обрў қозониши учун танқидчи билимдон ва теран бўлишдан ташқари, принципиал, ҳалол ва объектив бўлмоғи, адабиётни чин юракдан севмоғи, яъни унинг ютуқлари учун суюниб, қусурлари учун куюниб ёза билмоғи керак. Умаралида шу фазилатларнинг анча-мунчаси мавжуд. Китобхон бу жумладаги «анча-мунча» деган иборага таажжубланиши мумкин: бинобарин, баъзи фазилатлар йўқ экан-да? Умаралининг танқидчилик фаолиятида қусурлар ҳам бор экан-да? Ҳа, албатта, бор. Ахир, ҳар тўқисда бир айб, дейишади. Қусурсиз одам танқидчи бўладими? Ҳам-

мамизда ҳам озми-кўпми қусур бор. Умаралидаги күсурни шунда кўраманки, у баъзан чинакам илмий талабчанликни заифлаштириб қўяди, натижада ўртамиёналиги шундоққина ошкора кўриниб турган асарни чунонам мақтай бошлайдики, буни кўриб ҳайрон қолади, киши. Мабодо, бўш асарни танқид қилгудай бўлса иложи борича мулоимлик билан, озор бермайдиган қилиб танқид қиласди. Бу унинг кўнгилчанлигидан бўлса керак, ҳар қалай, ҳеч кимнинг кўнглини қолдирмасликка уринишидан. Балки бу йўл ҳам тўғридир. Лекин мен бу йўлни бари бир маъкулламайман. Негаки, танқидчилик касбининг моҳияти ўзи шунаقا – истасанг истамасанг озор берасан. Ҳатто ҳеч кимни танқид қилмай, ёзувчиларни мақташ билан банд бўлсанг ҳам, бу ҳали навбати етиб келиб мақталмаган ёзувчиларга оғир ботади. Лекин чинакамига адабиётнинг юксак савиаси учун курашаман десанг, хом-хатала, палапартиш ёзилган ўртамиёна асарларга қарши сира тортинмасдан курашиш керак. Бундай асарлар адабиётимизда етарли даражада топилади. Бахтимизга, бу нуқсон Умарали ижодида ҳамма вақт ҳам учрайвермайди. Аксинча, унинг мақолалари ва китобларида фазилатлар устунлик қиласди. Баъзи бирларини кўриб чиқайлик.

Умаралидаги фазилатлар ичida энг маъкулларидан бири ҳозиржавоблиқдир. Бу, менимча, танқидчи учун энг зарур сифат. У адабиётимизни доимий тарзда кузатиб боради, ундаги биронта салмоқли асар ёхуд жиддий воқеа танқидчининг эътиборидан четда қолмайди. Бир вақтлар адабиётимизда икки-уч йиллар ичida битта роман, икки-учта қисса, тўрт-бешта достон пайдо бўлган кезларда бу осон эди. Энди аҳвол ўзгарди. Адабиётимизда ҳар йили ўнлаб йирик асарлар, юзлаб шеърий тўпламлар, туркумлар, достонлар яратилмоқда. Бу кувонарли ҳол, албатта. Лекин бу танқидчининг ишини ғоят қийинлаштиради. Китобхон бу асарларни танлаб, саралаб, ёққанини ўқиши мумкин. Ундан фарқ қиласроқ, танқидчи уларнинг яхшисини ҳам, ёққанини ҳам, ёқмаганини ҳам ўқиши керак. Улар ҳақида биронта такриз ёхуд биронта мақола ёзиш-ёзмаслигидан қатъи назар, ўқиб чиқмоғи керак. Ўқимаса, у адабий жара-

ёндан узилиб қолади, адабий ҳаёт ҳақидаги фикрлари чала бўлиб қолади. Умарали шу машаққатли меҳнатни бажаради, бажарадигина эмас, бирон жиҳати билан йилт этган ҳар бир асар ҳақида, адабий жараёнда бирон фазилати билан из қолдирувчи асар ҳақида албатта тақриз ёзади. Ўз вақтида чиққан объектив тўғри ёзувчи учун қанчалик руҳий мадад бўлишини, бинобарин, адабиётимизга катта фойда келтиришини, унинг ютуқларидан кенг китобхонлар оммасини тезроқ огоҳ қилишини айтиб ўтирувчи масак ҳам бўлади. Адабиётимизда Умаралининг синчков назаридан ўтмаган биронта ҳам жиддий, салмоқли асар йўқ десак, хато бўлмас. Яна шуниси муҳимки, у асосан, бугунги проза масалаларига кўпроқ қизиққан ҳолда драматургия, поэзия, танқидчиликдаги янги асарларни ҳам эътибордан соқит қилмайди.

Умарали ижодининг менга маъқул яна бир қирраси борки, у ҳозирги ўзбек танқидчилигининг энг муҳим фазилатларидан бири билан боғланиб кетади. Бу – ёзувчи шахсиятига теран ҳурматдир. Ҳа, бу – шундай. Афсуски, бир вақтлар адабий танқид шу хислатлардан маҳрум эди. Қўлига қалам олиб, тақриз ёхуд мақола ёзишга киришган ҳар бир одам камида ўзини ёзувчининг устози деб билар, унга қандай ёзиш кераклигини уқтириб, сюжетни қандай қуриш лозимлиги, характерларни қанақа ишлаш зарурлиги тўғрисида кўрсатма берар эди. Баъзи ҳолларда эса ёзувчини камситадиган, иззат-нафсига тегадиган гаплар ҳам аямай ишлатила-верарди. Ҳозир шароит тубдан ўзгарди. Биз танқиднинг моҳиятини ҳам, вазифаларини ҳам анча чуқурлаштириб оляпмиз. Шунинг оқибати ўлароқ, бугунги танқидчилар адабиётдаги объективга нисбатан талабчан мулоҳазаларни сусайтирган ҳолда, ҳар бир мақоланинг яхши чиқиши учун курашмоқда. Бунинг натижаси ўлароқ мақолаларимиз заминида ижодкор шахсиятига теран ҳурмат пайдо бўлди. У тақризларида ҳам, мақолаларида ҳам ва, айниқса, Саид Аҳмад, Шуҳрат, Худойберди Тўхтабоев каби ёзувчилар ҳақидаги ишларида ҳам шу каби принципларига қатъий амал қилади. У асарларида ёзувчиларга юқоридан қарамайди, уларга ақл ўргат-

майди, айни чоғда, улар қаршисидан қўл қовуштириб, ҳамма нарсага «маъқул» деб бош иргаб ҳам турмайди. Умаралининг энг муҳим қуроли таҳдил – у асар ҳодисаларини ҳаёт ҳодисалари билан чоғиштириб таққослаб, ўз фикрини ишончли далиллар, мантиқ кучи билан ошкор этади. Натижада, унинг мақолаларида бир томонламалик йўқолиб, объективлик пайдо бўлади. Бу эса танқидчининг сўзи салмоғини ортишига, танқидчилик обрўйининг ортишига хизмат қилади.

Умарали ижодидаги менга маъқул фазилатлардан яна бири ундаги илмий чуқурлик, фикрий теранлик ёхуд ҳозирги расм бўлган ибора билан айтсан, концептуалликдир. Бу ҳам ғоят муҳим фазилат бўлиб, танқидчиликнинг энг катта муаммоларидан бирини тўғри ҳал қилишга ёрдам беради. «Танқидчи ким? У ҳам адаб, шоир ёки драматург каби ижодкорми ёхуд бошқаларнинг маҳсулини таснифлаб, изоҳлаб берадиган тафсирчими?» деган масала устида кўп замонлардан бери тортишув боради. Кейинги пайтларда «танқидчи – ижодкор» деган фикр тарафдорлари устун кела бошлади. Лекин танқидчининг мустақил ижодкор эканини эътироф этиш билан иш битмайди. Танқидчининг ким бўлиши, биринчи навбатда, унинг ўзига боғлиқ. У ижодкор ҳам бўлиши мумкин, оддий тафсирчиликдан нарига ўтмаслити ҳам мумкин. Ҳўш, танқидчини ижодкор деганимизда нимани тушунамиз? Менимча, даставвал, танқидчининг фикрлашини. Унинг фикрлари янги, теран, умумлаштирувчи бўлмоғи керак. Танқидчи адабиёт баҳонасида адабий жараён ҳақида ҳам, ҳаётдаги тенденциялар ҳақида ҳам фикрлаш иқтидорига эга бўлмоғи керак. Умаралининг кўпгина мақолалари шу жиҳати билан қимматли – уларда мунакқид фактларга асир бўлиб қолмайди, адабий ҳодисалар ортидан бормайди, балки ҳар гал адабий ривожимиз учун муҳим бўлган йирик-йирик масалаларни ўртага ташлайди, ҳар гал адабий ҳодисаларга бирон оригинал нуқтаи назардан қараб, жуда чукур ва салмоқли хуносаларга келади.

Умарали доимо иттифоқ миқёсидаги адабий баҳслар ва мунозаралардан яхши хабардор, лекин уларда олға сурилган янги-янги фикрларни бизнинг адабиётга меҳа-

ник татбиқ қилмайди, балки уларга таянган ҳолда адабиётимизнинг ички ҳаётидан келиб чиқиб, янги масалалар, проблемаларни кўтаради. Умарали ёзувчининг ижодий индивидуаллигини тадқиқ қиласар экан, кўп масалалар билан бирга ўхшаш темаларда ёзилган нарсаларни қиёсий ўрганиш мумкинлигини таъкидлайди. Унинг фикрича, бундай асарлар турлича ижодий индивидуалликка эга ёзувчиларнинг бир-бири билан мунозараси оқибатида пайдо бўлади ва ёзувчининг ўзига хослигини аниқлашда жуда бой материал беради. Мунаққиднинг ўзи «Навоий» романи ва «Алишер Навоий» драмаси, «Мирзо Улуғбек» трагедияси ва «Улуғбек хазинаси» романи, «Болалик», «Ўтмишдан эртаклар», «Кўрган кечиргандарим» каби бир-бирига яқин қиссаларни қиёсан таҳлил қилиб, уларнинг муаллифлари ижодий индивидуаллиги ҳақида жуда ўринли ва қимматли мулоҳазалар айтган.

Ижодкор ўз услубига эга бўлиши керак. Кўпинча ижодкор, шу жумладан, танқидчи ҳам бутун умри давомида ўз услубини излаб ўтади. Бу – табиий, чунки услуб – ижодий индивидуалликни намоён этишнинг шаклидир. Уни мунтазам равишда шакллантириб, мукаммаллаштириб бориш керак. Бинобарин, доимий изланиш, янги-янги ифода усулларини қидириш танқидчининг ҳам муҳим вазифаси. Бизнинг ҳозирги танқидчилигимизда изланиш руҳи ҳоким. Айрим танқидчilar энг жiddий назарий проблемаларни ҳам, ўқувчига тезроқ етиб боришига имкон берадиган янги шаклларни ҳам изламоқдалар. Бизнинг ўзбек танқидчилиги бугунги кунда ана шундай самарали изланишлар йўлидан боряпти. Унинг бу йўлдаги муваффакиятларини таъминлашда Умарали Норматовнинг ҳам алоҳида ҳиссаси бор. Унинг мақолалари сохта илмийликдан холи, яъни у оддий нарсаларни чалкаштириб, узундан-узоқ қилиб, мурракаб шаклда ифодалаб, ўзининг «доно»лигини намоийиш этмайди, аксинча, мақолаларида соддаликка, ихчамликка интилади. У мақолаларини қизиқарли қилиши учун сийقا латифалар, ўринсиз ривоятлар, арzon-гаров сўз ўйинларига ҳам мурожаат этмайди, балки фикрий теранлик, баҳснинг ўткирлиги билан асарнинг ўқишли

чиқишига эришади. Ниҳоят, бугунги танқидчиликни янги шакллар билан бойитиш борасида ҳам Умарали самарали меҳнат қилмоқда. Мен бу ўринда танқидчининг ёзувчилар билан баҳсини назарда тутяпман. Уни «диалог» деб ҳам аташади. Албатта, диалог мутлақо янги шакл эмас, у рус адабиётида, танқидчилигида аср бошлиаридаёт маълум эди. Қолаверса, жаҳон адабиётида бу шакл кўпдан бери қўлланилаётганини айтиш мумкин. Лекин бу форма бизнинг танқидчилигимиз учун янги бўлди. Уни жорий қилишда Умарали биринчилардан бўлиб жонбозлик кўрсатди. Лекин бу ўринда ҳам гап фақат шаклда эмаслиги, шу шаклга сингдирилган мазмун мухимлигини таъкидлаш керак. Бу жиҳатдан ҳам Умаралининг баҳслари ижобий баҳога муносаб. Қўлингиздаги китобдан танқидчининг Назир Сафаров, Ҳамид Фулом, Мирмуҳсин, Асқад Муҳтор, Саил Аҳмад, Пиримкул Қодиров, Шукур Холмирзаев билан қилган сұхбатлари ўрин олган. Уларнинг ҳар бири бугунги адабий жараённинг жуда мухим масалаларига бағишиланган. Бу баҳсларнинг бирида адабиётнинг ижтимоий бурчи ҳақида фикр юритилса, иккинчисида адабиёт ва инсоний камолат проблемалари тилга олинади, учинчисида маҳорат масалалари тадқиқ қилинса, яна бирида ёзувчи – танқидчи – китобхон муносабати масаласи ўртага ташланади. Бу масалалар ҳақида баён қилинган фикрлар эса бугунги танқидий фикр ривожига ҳам, ижтимоий онгининг ўсишига ҳам актив таъсир кўрсатади.

Умаралининг асарлари ҳақида яна кўп гапларни айтиш мумкин. Лекин назаримда айтилганларнинг ўзиёқ уни адабиётимизнинг истиқболи ҳақида тинимсиз қайгурувчи етук олим, истеъдоли мунаққид, моҳир педагог сифатида таърифлаш учун кифоя қиласи.

Олис Рапқонда, оддий деҳқон оиласида туғилган гўдакнинг ўзбек адабиётшунослигининг етук намояндаларидан бирига айланишида чуқур ижтимоий маънобор. Бугунги танқидчилигимиз сафида Умарали Норматов билимдон, объектив, ҳалол ва талабчан истеъдол эгалари бор экан, унинг эртасига комил ишонч билан қарашимиз мумкин.

## ОЛИМ ҲАЁТИНИНГ САҲИФАЛАРИ

Наим Каримов нима учун бошқа бирон соҳани эмас, айнан адабиёт соҳасини танлаган, унинг қалбида бу соҳага меҳр қачон ва қандай пайдо бўлиб қолган – буни аниқ билмайман. Лекин ўйлайманки, унинг бу йўлни танлашида отасининг таъсири катта бўлиши керак. Мен Наимжондан олдинроқ унинг отаси билан танишган эдим. Уруш йиллари, адашмасам, б-синфда ўқиб юрган кезларим. Бирдан шеър ёзгим қистаб кетди, биринки кун ўтириб, уч-тўртта шеърни қоралаб ҳам ташладим. Кейин уларни чиқариш ҳаракатига тушиб қолдим. Бу борадаги изланишларим мени Маориф халқ комиссарлигига олиб келди – у ерда аллақайси бўлимнинг бошлиғи бор экан. Ўзи хипча бўлса-да, қадди қомати келишган,чувак юзли, очиқ чехрали, ўзига ярашган кўзойнак таққан бўлим бошлиғи жуда бағри очиқ, фамхўр, хушфеъл одам экан. Унинг фамилияси Фотиҳ Каримий эканини кейин билиб олдим. Менга ижод бобидаги илк масалаҳатларни шу одам берган эди. Буни қарангки, кўпгина эски зиёлилар сингари бу одам жуда кенг маданий савияга эга эди. У ўзи физика ўқитувчиси бўлса-да, адабиётни яхши билар, кўп ўқиган, кўп ёзувчилар ва шоирлар билан шахсан таниш эди. Эҳтимол, ана шу меҳрибон одам ўғли Наимжонни адабиётшунослик соҳасига йўллаган, болалигиданоқ унга адабиёт ишқини юқтирган бўлса ажаб эмас.

Ҳарҳолда нима бўлганда ҳам Наимжон дорилфунунда ўқиб юрган кезлардаёқ жуда синчков, илмга ташна, қизиқкан нарсасининг тагига етмагунча қўймайдиган бир талаба сифатида танилди. Наим Каримов 1955 йили дорилфунунни битирди. Шундан бери Алишер Навоий номидаги Тил ва адабиёт институтида хизмат қилиб келмоқда. У ўнлаб китоблар, юзлаб мақолалар яратди,

турли конференциялар ва симпозиумларда маърузалар қилди, ёрқин илмий фаолияти учун Беруний номидаги республика давлат мукофоти билан тақдирланди, филология фанлари доктори, профессор бўлди. Хуллас, салкам ярим асрлик ижодий фаолияти натижасида Наим Каримов ўзбек адабиётшунослигининг ўзига хос, бетакрор намоёндаларидан бирига айланди. Менимча, биринчи навбатда унинг матншунослик соҳасига қўшган ҳиссасини алоҳида таъкидлаш керак. Бу ўринда мен XX асрдаги ўзбек ёзувчиларининг асарларини тайёрлаш ва нашр қилиш ишини кўзда тутяпман. Маълумки, кейинги йилларда Ойбекнинг 20 жилдли, Ҳамид Олимжоннинг 10 жилдли,Faфур Гуломнинг 12 жилдли мукаммал асарлар тўпламлари нашр этилди. Уларнинг ёнига Ҳамза Ҳакимзоданинг 5 жилдли асарлар тўпламини кўшиб кўймоқ керак. Бу ишларнинг ҳаммасида Наим Каримов ё илмий раҳбар сифатида ёхуд фаол иштирокчи сифатида қатнашган. Ёки бўлмаса, Наим Каримовнинг ёзувчилар ҳақидаги монографияларини олайлик. Маълумки, Ойбек, Ҳамид Олимжон, Faфур Гулом каби ёзувчилар ҳақида Наимдан аввал ҳам монографиялар ёзилган эди. Бу ўринда, масалан, раҳматли домламиз Ҳомил Ёкубовнинг Ойбек, Faфур Гулом ҳақидаги китобларини эслаш мумкин. Шунга қарамай, Наимжон бу ижодкорлар тўғрисида яна ёзишга журъат этди ва ўз сўзини айтишга муваффақ бўлди. Масалан, у Ҳамид Олимжон маҳоратини зукколик билан тадқиқ қиласди ва унинг шеърий соҳаси тўғрисида жуда кўп ўринли кузатишлар ҳамда мулоҳазаларни ўргатга ташлайди. Олимжоннинг Ойбек ҳақидаги китоби ҳам илмий кузатишларга бойлигидан ташқари, жуда эмоционал кўтаринкиликка эга. Наимжон бу муаллифларни жуда яхши кўради ва муҳаббатини китобхондан яширмайди, балки, аксинча, улар яратган чинакам санъат асарларидан олган эстетик завқларини бошқалар билан баҳам кўришга ошиқади.

Наим Каримов ким тўғрисида ёзмасин, китобида, рисоласида ва ҳатто мақолаларида, албатта, бирон янги гап айтишга, ёзувчининг ижоди билан боғлиқ биронта муҳим тафсилотларни баён этишга уринади. Масалан, унинг Ҳамза Ҳакимзода вафотига бағишлиланган кичкина

мақоласида илмий жиҳатдан анча кенг ёритилган бу ҳодисага бутунлай янгича ёндошади ва унинг ўлими тасодифий бўлмаганлиги тўғрисида тахминни олдинга суради. Ёки олимнинг Усмон Носир ҳақида иккита рисоласи ҳам янги материаллар асосида ёзилган.

Наим Каримов Чўлпон тўғрисида ҳам анча юксак савияда рисола яратди. Бу илк рисоладан бири эди. Мен ҳам «Чўлпон» деган танқидий-биографик очерк ёзган эдим. Наимжоннинг китобида меникидан фарқ қиласроқ, шоирнинг туғилган жойи Андижон эмас, Ёрқишлоқ экани тўғрисидаги тахмин олдинга сурилади ёки унинг яқин қариндош-уругларининг (жумладан, Фоқа аянинг) хотираларидан кенг фойдаланилади. Уларнинг бари китобга ўзига хос ранг берган ва уни Чўлпон ижодини ўрганишдаги қимматли манбалардан бирига айлантирган.

Мустақиллик йилларида олим истеъодининг янги қирралари намоён бўла бошлади. Унинг профессор У. Норматов, академик Б. Назаровлар билан бирга яратган 9-синф ўқувчилари учун «Адабиёт» китоби танловда голиб чиқди ва нашр қилинди. Айни чорда олий ўқув юртлари учун яратилган «XX аср ўзбек адабиёти тарихи» деган китоби ҳам (бошқа муаллифлар билан бирга) бу соҳадаги тадқиқотларни умумлаштирувчи асар бўлди.

Мустақиллик йилларида Наим Каримов ижодида жуда муҳим аҳамиятга эга бўлган янги бир мавзу пайдо бўлди. Бу шўро замонидаги оммавий қатагон мавзуси бўлиб, Наим Каримов унинг адабиёт билан боғлиқ жиҳатларини ёритишга ва шу билан яқин тарихимизнинг ўқилмай қолган ёхуд нотўғри ўқилган саҳифаларини қайта тиклашга ҳаракат қилди. Бу интилиш унинг ижодида, айниқса, 1991 йилдан бошлаб жуда кенг кўламда кўрина бошлади. Масалан, ўша кезларда оммавий бўлган «Фан ва турмуш» журналида «Наркомпрэсс иши», «Чўлпон учун кишан», «Ассалому алайкум, дорнинг оғочи», «Қодирийнинг боши – янги йил совғаси», «Тош экан бу бошим» каби мақолалари босилдики, улардан анча ихчам шаклда бўлса ҳам адабиётимизнинг шу пайтгача мутлақо тилга олинмай келган жиҳатлари очилди. Шунингдек, Наимжон сўнгги бир

неча йиллар мобайнида «Ўзбекистон адабиёти ва санъати» газетаси ва бошқа газеталарда ҳам адабиёт, санъат ва маданиятимизнинг ёрқин намояндлари тўғрисида кўпгина жажжи портретлар эълон қилди.

Наим Каримов бир неча йилдан бери мустамлакачилик даври қурбонлари хотирасини агадийлаштириш комиссиясининг раиси сифатида ишлаб келмоқда. У, айниқса, «Шаҳидлар хотираси» ёдгорлик мажмунини бунёд этишда, шунингдек, «Қатагон қурбонлари хотираси» музейини ташкил этишда катта жонбозлик кўрсатди.

Ўйлайманки, юқорида айтилганлар гарчи Наим Каримов фаолиятини тўла ёритишга жуда-жуда ожиз бўлса-да, унинг бутун умри адабиёт воситасида эл-юрга хизмат қилиш билан ўтганидан далолат беради. Шунинг учун ҳам унинг кўксини «Эл-юрг ҳурмати» ордени безаб турибди.

2002

## БАЛОФАТ

60 ёш инсон учун балофат ёшидир. 60 га кирган одам анча-мунча кўйлакларни кийиб тўзитган бўлади, анча-мунча иссиқ-совуқларни бошидан кечирган, ҳаёт қозонида қайнаб пишган бўлади. Энди унинг ақли анча пешланган, турмушнинг паст-баландларига, довонлари ва ўнқир-чўнқирларига етадиган қудрат касб этади. Кўзларда қарилликнинг ilk нишонлари пайдо бўлса-да, нигоҳи янада ўткирроқ бўлиб қолади – энди у одамларни ҳам, воқеа ва ҳодисаларни ҳам bemalol кўра оладиган қудрат касб этади. Энди у ўз фикр-мулоҳазаларида кўрган-кечиргандарини, юриб ўтилган йўлларни математик формулалардек ихчам ва лўнда ҳикматларда умумлаштиришга мойиллик сезади. Бу ҳикматлар эса теранлиги ва донолиги билан одамларнинг эътиборини ўзига жалб этади, уларнинг ҳаёт сўқмоқларида туртимай, равон юришларига кўмак беради. Хуллас, 60 га кирганда инсон теранлик ва камолот юксакликларини забт этади, шунинг учун ҳам бу ёш кексаликнинг ilk фасли ҳисобланса-да, шу фазилатлари билан ҳар қандай одам учун ҳам foят ардоқли ва тансиқ туюладиган кутлуг ёшdir.

Дўстимиз, укамиз, ҳамкасбимиз Иброҳимжон Фофуров олтмишга тўлиби. Унинг соchlаридаги оқлар кўпайиброқ қолибди, пешонасидаги ажинлар жиндай чукурлашибди, ҳамиша ўйчан бокадиган кўзларидаги маънодорлик ортибди. Бугун унинг ҳар бир асарида, гапирадиган гапларида, хатти-ҳаракатларида теранлик ва камолот, саришталик ва ҳикматга мойиллик барқ уриб турибди. Лекин бир нарса қизиқ – йигирма йил аввал ҳам, йўқ, ўттиз йил аввал ҳам, кўйинг-чи, ижод майдонига кўйилган биринчи қадамларданоқ Иброҳимжон худди шу сифатлари билан танилган ва обрў қозонган эди. Агар бугун Иброҳимжоннинг ижод

майдонида жавлон ураёттанига қирқ йил тўлган бўлса, бинобарин, қирқ йилдан бери унинг ана шу фазилатлари ўсиб, улғайиб, қаймоқ боғлаб келмоқда.

Иброҳимжоннинг босиб ўтган йўллари ҳақида ўйлар эканман, мени яна бир нарса ҳайратга солади ва ҳаваслантиради – у шу пайтга қадар жуда ҳалол ва жуда покиза ҳаёт кечирди. Ахир, биз ҳаётни ҳар қанча мақтаб улғаймайлик, унинг жозибадор томонларини айтиб алқамайлик, унинг ўта шафқатсиз томонлари, дош бериш қийин бўлган синовлари ҳам бор. Инсон умри узун йўлга ўхшайди, бироқ бу узун йўл чаман-чаман очилган гулзорлардан иборат эмас, унинг паст-баландликлари, ўнқир-чўнқирлари, лойқалар ва ҳатто нопокликлар бор. Бу лойқалар оёғингизга чирмашишта, баданингизга ёпишишга, юзингизда бир умрга кетмайдиган шармандалик доги бўлиб муҳрланиб қолишга интилади. Бу йўллардан кирланмай ўтишнинг ўзи катта фазилатдир. Иброҳимжон бирон жойини лойга булғатмай, покизалигини сақлаб ўта олди. Йўқ, мен Иброҳимжонни бутун умрида бирон марта ҳам хато қилмаган, адашмаган, бенуқсон, бекаму кўст инсон деб айтмоқчи эмасман. Негаки, адашмаслик, нуқсонсизлик фақат Аллоҳга хос. Беайб – Парвардигор. Бандасики бор, албатта, адашади. Аммо адашишда адашиш бор. Иброҳимжон эсини таниб, улғайиб одамлар жамиятига қадам қўйганидан бери шу пайтга қадар бирор одамнинг тагига сув қўйгани йўқ, бирор одамнинг гийбатини қилиб, уни туҳмат, бўхтонларга қўйгани йўқ, бирорнинг молини тортиб олгани, бирорнинг оғзидаги луқмасини еб қўйгани, бирорни қон қақшатгани йўқ, ҳasad ва баҳиллик кўчасига киргани йўқ. Ҳалоллик, поклик деганлари шунинг ўзи эмасмикин? Унинг чехрасида барқ уриб турадиган доимий нуронийлик шундан эмасми? Қизик, мен ҳар гал Иброҳимжон билан кўришганимда унинг кўзларидаги алланечук таъна аралаш кинояли нигоҳ қаршисида, ундаги сўз билан ифодаланмаган, лекин яққол сезилиб турадиган талабчанлик қаршисида сал-пал довдираб қоламан, қилган ишларимни, гапирган гапларимни бирма-бир хаёлдан ўтказиб, боримдан кўра яхшироқ бўлишига чоғланаман. Иброҳимжоннинг нигоҳигина

эмас, асарларида ҳам шу хислат бор – уларни ўқига-нингда шу талабчанликни яққол ҳис қиласан ва бўй-ингни Иброҳимжон белгилаган юксаклик билан ўлчашга интиласан. Унинг асарлари бошқа сифатлардан ташқари ўқиётган одамни покизалик ва ҳалоллик синовидан ҳам ўтказаёттандай бўлади. Шунинг учун Иброҳимжонни ҳеч иккиланмай адабиётимизнинг виждони, деб атасак хато бўлмас.

Аллоҳ «бераман» деган одамга қўш қўллаб берар экан. Иброҳимжонга Аллоҳ неъматларни бисёр қилган. Мен бу ўринда унинг кўп қиррали истеълод эгаси экан-лигини назарда тутияпман – мунаққид, таржимон, шоир, публицист, журналист, зўр ташкилотчи, депутат... Қизиги шундаки, бу соҳаларнинг биронтасида Иброҳимжон зиммасидаги ишларни чала қилгани йўқ, ҳар бир соҳада шундай салмоқли ва мазмундор ишлар қилдики, улар умуммаданиятимизнинг ривожига катта ҳисса бўлиб қўшилди. Масалан, у кўп йиллар мобайнида нашриётда ишлади, ўнлаб китобларнинг туғилишига доялик қилди, анча вақт адабиёт газетасига раҳнамолик қилганлардан бири бўлди. Сўнгги йилларда эса «Миллий тикланиш» газетасига бош муҳаррир бўлди. Бу газета аслида йўқ эди, у янги ташкил қилинди. Иброҳимжон уни йўқдан бор қилди. Бу ишнинг нақадар машаққат эканини, кичикроқ бир тоғни ўрнидан силжитишдек гап эканини фақат бош муҳаррир бўлган одам билади. Иброҳимжон бу ишни уддасидан чиқди – ва қисқа вақт ичida бу газета ўзбек зиёлиларининг севимли газеталаридан бирига айланди. Унда босиладиган мақолаларнинг кўпчилиги ҳам назарий жиҳатдан, ҳам маърифий жиҳатдан юқори савияда. Газетада тез-тез бош муҳаррир қаламига мансуб шарҳлар, қайдлар, мақолалар ҳам босилиб туради. Улар ҳажман кичкина бўлсада, ҳар бирида бир янгилик, янги бир фикр, ўтқир мулоҳаза бўллади. Улар эса бугунги ўзбек жамиятининг фикрий улгайишига, «жаҳон стандарти» даражасига кўтарилишига ёрдам беради.

Иброҳимжоннинг шоирлиги-чи? Мансуралари-чи? Китоб бўлиб босилганидан бери қўлма-қўл юрган «Илтижо»си-чи? Иброҳимжон мумтоз адабиётимиз анъ-

аналарини яхши билади – у унутилиб кетаётган мансура жанрини меросимиз сандиқларидан кавлаб топди ва уларга янгидан жон ато қилди. Иброҳимжоннинг мансуралари ҳам чинакам шеърий дурдоналар каби юракнинг энг теран пучмоқларидан чиқиб келган ғоятда самимий гапларгина эмас, мукаммал шаклга эга бўлган, ихчам, муҳтасар, гапнинг пўскалласини ифодалайдиган ажойиб ҳикматлар ҳамдир. Бундай юксак асарлар фақат зукко ва фикрлайдиган одамнинг қаламидангина тўкилмоги мумкин. Бугун мансуралар қанчадан-қанча ёшлиrimиз маънавиятини бойитяпти, ҳатто уларга ижодда ҳам ёрдам бермоқда.

Иброҳимжоннинг таржималари-чи? Билмадим, ҳозир мендан унинг таржималарини бирма-бир санаш талаб қилинса, бунинг уддасидан чиқолмасман. Лекин гап таржималарнинг саноғида эмас, сифатида. Иброҳимжон бу ишни ҳам шу даражада юксак савияда бажардики, унинг хизматлари туфайли ўзга адабиётларнинг анча-мунча намуналари ўзбек китобхонининг кўнгил мулкига айланиб қолди. Таржимонлик фаолиятида ҳам Иброҳимжоннинг олижаноб инсоний фазилатлари ярқ этиб кўриниб туради. Авваламбор, у жуда танлаб таржима қиласи, китобхонга керакли асарларни, унга маънавий-эстетик жиҳатдан бой озуқа берадиганларини ўзбек тилига афдаради. Хемингуэй, Мопассан, Фолкнер... Шунда ҳам таржимаси осон асарларни эмас, услуги мураккаб, чукур фалсафий мазмунга эга, мавхумият соҳасини кенгроқ қамраб олган асарларни танлайди. Достоевский, Айтматов романларини эсланг. Уларни таржима қилиш таржимонга ҳузур бағишлишидан ташқари кони машақват ҳамдир. Бу романларда шундай жумлалар, шундай иборалар борки, улар баъзан ярим сахифани ташкил қиласи. Жумла эмас, яхлит бир гранит тош! Аввало унинг маъносини ўзингиз чақиб олмоғингиз керак. Кейин эса шу гранит – жумлани ўзбек китобхони тушунадиган қилибгина эмас, унинг жилоларидан ҳузурланадиган қилиб афдариш лозим. Бунинг ўзи бўлмайди.

Шу ўринда яна бир мулоҳазани айтиб ўтай. Баркамол таржимон бўлмоқ учун оригинал тилини билишнинг ўзи

кифоя қилмайди, балки ўзининг она тилини ҳам билмоқ зарурдир. Бу оддий ҳақиқатни таъкидлаётганимнинг боиси бор, албатта. Афсуски, йиллар ўтган сайин, ҳатто ўзбек тилига ўзбек тили мақоми берилганидан кейин ҳам зиёлиларимиз ўртасида ўзбек тилини биладиганлар, она тилида фикрини ифодалаб беришга курби етадиганлар борган сари камайиб кетяпти. Телевидениени кўриб ўтириб, турли-туман шифокорлар, олимлар, давлат арбоблари, муҳандислар, молиячилар, солиқ идорасининг ходимлари ва ҳоказо-ҳоказоларгина эмас, ҳатто сухандонлар, муҳаррирлар ва бошқаларнинг ҳам пойинтар-сойинтар жумлаларини эшишиб, эга-кесимни мувофиқлаштира олмаётгани, жумланинг боши билан охирини қовуштира олмаётганинга гувоҳ бўлиб, сочинг тикка бўлиб кетади. Буларнинг бари элу юртнинг кўз ўнгida она тилимизни таҳқиrlащдан ўзга нарса эмаску! Тилни менсимаслик миллатни менсимаслик, ватанни менсимасликни кўrsатадиган ўта ноxуш бир ҳолдир. Бундай шароитда асар тили устида заргардек кунт билан ишлайдиган, шу билан тилимизнинг имкониятлари нақадар чексиз эканини намоён қиладиган ҳар бир ижодкорнинг фаолияти таҳсинга сазовордир. Бу маънода Иброҳимжоннинг таржимонлик фаолияти жуда ибратли ва самарали эканини кўrsатадиган битта мисол келтираман.

Бир-икки йил аввал у «Тафаккур» журналида буюк файласуф Фридрих Ницшенинг асаридан парча эълон қилди. Асар «Так говорил Заратустра» деб аталади. Хўш, қани, буни ўзбекчага нима деб афдараардингиз? Мен бўлсан «Зардушт шундай деди» деб қўя қолардим. Бунда, албатта, қай бир даражада маъно ифодаланган, лекин жумла тўмтоқ, ўзбекча эмас, нафосатдан маҳрум! Иброҳимжон эса бошқача йўл тутган. У «Зардуштнинг таваллоси» деб ўгирибдики, бу ҳам маънодор, ҳам тагдор, ҳам рангдор. Билмадим, уни топгунча Иброҳимжон неча кун эмас, неча ойлар изланди экан? Ёхуд ўша китобда «Сверх человека» деган атама бор. Хўш буни нима дейсиз? Умуман, ўзбекчада бундай ибора борми? Наҳотки, Навоийлар тили, Абдулла Қодирий бу иборани муносиб ифодалашга ожиз бўлишса? Иброҳимжон

эса «Аъло Инсон» деб ўгирибди. Бу ибора бирорга ёқиши, бирорга ёқмаслиги мумкин, лекин нима бўлганда ҳам «Сверх человека» мавҳумини тўла ифодалаб берган-ку! Иброҳимжоннинг таржимонлик фаолияти ана шундай кашфиётларга бой. У таржима жараёнида ўзининг хаёлот оламига ҳам тўла эрк бериб қўяди ва бу фақат яхши самаралар беради.

Албатта, Иброҳимжоннинг шоирлиги, таржимонлиги, журналистлиги жуда муҳим. У адабиётимизга мунаққид сифатида кириб келган эди ва мунаққид сифатида унинг адабий ҳаётда ўйнаган роли бекиёсdir. У 60-йиллар ўртасида ижод қила бошлади, ўшандан бери ўнлаб китоблар, юзлаб мақолалар ёзди. Албатта, бизнинг адабиётимизда танқидчи кўп. Айниқса, 60-70-йилларда танқидчилик ҳаракатига бош-кош бўладиган куч қолмаганди шекилли, унинг ланг очиб қўйилган дарвозасидан танқидчиликни даъво қилган одамлар тўда-тўда бўлиб кириб келишаверган эдилар. Албатта, Иброҳимжон улардан ажралиб турарди. У туғма танқидчи, у танқидда адабиётнинг тўла хуқуқли бир бўлагига айлантиришдагина эмас, унинг иззат-эътиборини, қадрини юксак сақлаб қолишида, социалистик хуружи авж олган йилларда танқиддаги профессионал юксакликни таъминлашда жонбозлик қилганилардан бири. Бу ўринда, албатта, Иброҳимжоннинг танқидчи сифатидаги ҳамма хислатларига батафсил тўхташ имкони йўқ. Шунинг учун айримлари ҳақидагина гапираман. Аввалимбор, у адабиётни чукур биладигина эмас, жуда яхши ҳис этади ҳам. У наср ҳақида гапирадими, шеърият ёхуд драма тўғрисида фикр юритадими, ҳар гал адабиётнинг санъат эканига, унда гўзаллик ва нафосат мужассам эканига алоҳида ургу беради. Мақолаларида асарлардаги ана шу гўзаллик нуқраларини қидиради, топади ва ўз кашфиётларини китобхонга тақдим этади. Китобхон ҳам ўз ақлинни пеш қилмай, панароқда туриб, адабиёт гўзаллигидан баҳра олишга ундаётган мунаққиддан миннатдор бўлиб, унинг кашфиёти билан мароқланиб танишади.

Иброҳимжоннинг танқидий асарларида ҳамиша янги фикрлар бўлади. Маълумки, зиёлилар ўртасида дунёни

идрок этишда «Одам ҳақиқатлари» деб аталган нарсани қабул қилишда икки хил йўл бор. Биринчи йўл шуки, ҳаёт қандай бўлса, шундайлигича қабул қилинади, ҳаёт ҳақиқати қандай тушунтирилса, айнан шунинг ўзи қабул қилинади. Иккинчи йўл эса бошқачароқ – айтилган нарсаларнинг ҳаммаси ақл тарозисига солиб кўрилади, таҳлил чиғириғидан ўтказилади, турли-туман синов-ларга солиб кўрилади, кейин хulosса чиқарилади. Бундай хulosалар илмийроқ, бинобарин, тўғрироқ бўлади ва кўпинча илмий муомалада ўрнашиб қолган хатоларни тузатишга йўл очади. Биргина мисол: кўп йиллар мобайнида Ойбек ҳақида гапирганда «Унинг илк ижоди ғоявий чекланган, миллатчилик руҳидаги ижод анчадан кейингина у «ўроқ-болғалар сафида» боришга жазм қилган», деган қараш мақолалардан-мақолаларга, китоблардан-китобларга кўчиб юарди. Иброҳимжон биринчи бўлиб «Юрак – аланг» деган китобида бу фикрнинг нотўғрилигини ва Ойбекнинг 20-йиллардаги шеърияти инжа лириканинг ёрқин намуналари эканини исбот қилди.

Афсуски, қайта қуришлар замони бўлиб кўп нарсалар алғов-далғов бўлиб кетди. Бу жараёнда баъзан биз кўп қийинчиликлар, мashaқатлар эвазига эришган бойликларимиздан ҳам кеча бошладик. Жумладан, танқидчиликка муносабатимизда ҳам бу ҳол бот-бот кўриниб келмоқда. Бунда баъзан шундай бир мантиқ асосида фикр юритилади: бадиий ижод учун истеъдод керак. Истеъдод эса туғма бўлади. Ҳеч қандай мунаққид йўқ истеъдодни бор қилиб бера олмайди. Бинобарин, мунаққиднинг кераги йўқ, у ортиқча нарса. Бу гап умуман олганда тўғрига ўхшайди. Ҳақиқатан, танқидчи йўқ истеъдодни яратиб бера олмайди, аммо бор истеъдоддан фойдаланиш йўлларини, истеъдодни парваришилаш имконларини, уни жувонмарг қилиб қўймаслик чораларини ўргатади. Иброҳим Фофуровнинг китоблари ва мақолалари ҳам шу жиҳати билан ардоқли.

Иброҳим Фофуров ижодидан чиқиб келадиган яна бир ибратли сабоқ бор – ижодкор ҳамиша жуда бақувват ички фууррга эга бўлмоғи лозим. Ялтоқлик билан, ҳар қадамда таъзим келтириш билан ижодда бирор мар-

рани эгаллаб бўлмайди. Фақат қаддини ғоз тутадиган, бошини тик тутадиган ижодкоргина олис-олисларга назар ташлаши, уфқларни кўра олиши мумкин. Шундагина у сўз орқали инсон маънавиятининг чароғон соҳилларини кашиф қилмоғи мумкин. Шундагина унинг Сўзи бошқалар қалбida садо бериб, уларни олға чорлаши мумкин.

Азиз дўстим, муҳтарам ҳамкасбим Иброҳимжон! Олтмишбойлар даврасига хуш келибсиз!

Сизга даврамизнинг тўридан жой олиб қўйганмиз. Келинг, жиндай дам олинг. Бир-икки қўл шахмат сурайлик. Тўйиб бўлмаса ҳамки, миртемирона тарзда анави сабилдан чойга қўшиб олайлик. Кейин эса яна кўп йиллар қатордан хато бўлмай, халқимиз учун, ватанимизнинг фаровонлиги учун енг шимариб ишлашда давом этайлик.

Ёзди Озод Шарафиддинов, эшитди Иброҳимжон Софуров.

2004

## ҲАР ИНСОН БИР МҮЪЖИЗА

Бизнинг кафедрамизда унчалик кўп домла ишламасди, лекин ишлайдиганларнинг ҳар бири ўз феълатворига, сиёғига эга бўлган одамлар эди. Уларнинг ҳар бири билан кўпроқ ҳамсуҳбат бўлиб, яқинроқдан танишсангиз ўзига хос жозибага эга эканига, ҳар қайсиси ўзига яраша бир мўъжиза эканига амин бўлардингиз. Шулардан бири Санжар Содиқ эди – у профессор, филология фанлари доктори, XX аср ўзбек адабиётининг йирик мутахассиси, ўнлаб китоблар, юзлаб мақолаларнинг муаллифи. Аммо ҳозирги замонда нима кўп – фан доктори, профессор. Шунинг учун илмий даражалару уивонлар, катта китоблару мақолалар билан одамларни қойил қолдириб бўлмайди. Санжар Содиқнинг ҳам яна бир бошқа жиҳатлари борки, айни шу жиҳатлари билан унинг бутун туриш-турмуши, босиб ўтган ҳаёт йўли ажойиб мўъжизадек таассурот қолдиради. Бироқ мен Санжар ҳақидаги ҳикоямни бир оз олисроқдан, унинг отаси ҳақидаги гаплардан бошлимоқчиман. Мен Санжарнинг ўзини кўрмасам-да, анча аввал унинг отаси билан танишган, ҳатто уч йил бир жамоада ёнма-ён меҳнат ҳам қилган эдим.

Воқеа бундай бўлган эди – 1948 йилнинг сентябрьда – ҳали III курс талабаси эканимда мени 59-мактабга дарс беришга таклиф қилишди. Мактаб Хадрада – Қоратош маҳалласининг рўпарасида бир-бирига мингашиб кетган катта-кичик лойсувоқ уйлар орасида мағрут қад кўтариб турган уч қаватли бинода жойлашган эди. Бу бино ҳозир ҳам бор, лекин ҳозир унинг теварагига турфа хил кўп қаватли замонавий иморатлар тушиб, уларнинг орасида аввалги салобатини йўқотиб, анча кўримсиз бўлиб қолган.

Мактабга келиб биринчи танишганим ўзбек тилидан

дарс берадиган Мириди Содиқов деган домла бўлди. Элликлардан ошиб қолган, аллақачон соchlарига оқ оралаган, кўркам чеҳрали бу одам мактабда тил-адабиётчилар секциясининг бошлиғи эди. Кейинчалик мен у киши ҳақида анча-мунча нарсани билиб олдим. Мактаб жамоаси бу кишини жуда хурмат қилас, нафақат тилчи ва адабиётчилар, балки бошқа домлалар ҳам ўзларининг ҳар хил муаммоларини у кишига айтар ва унинг маслаҳатлари билан иш юритишарди. Мактабда ҳамма у кишини «Домлажон» деб атар, лекин бу лақабда қандайдир беписандлик эмас, аксинча, у кишига нисбатан теран бир эҳтиром сезилиб турарди. Домлажон чиндан хурмат қилса арзийдиган одам экан. Ўша пайтларда Тошкент мактабларида фаолиятини инқилобдан олдин бошлаган, камида 30 йиллик педагогик тажрибага эга Тўхтанизар Шермуҳаммедов, Тоҳир Содиқов каби ўзбек тили ўқитувчилари бўларди. Мириди Содиқов ҳам шуларнинг бири экан – у бой тажрибаси, чукур билими, теран ақл-заковати ва дилкашлиги билан ўз ҳамкасларининг меҳрини қозонган экан. Биз жуда тез тил топишиб кетдик. Мен ўқитувчиликни энди бошлаган нўноққина бир шогирдман – Домлажон мени дарров қанотига олди ва аста-аста ўқитувчилик сирларини ўргата бошлади. Жиндай бўш вақтимиз топилди дегунча дарҳол суҳбат бошлар, шунда иш ва турмуш жараёнида пайдо бўладиган ҳамма муаммоларимизни муҳокама қиласдик. Домлажон яқинда Кўкчадан жой қиласган эканлар, бизнинг уйимиз ҳам уларнига яқин жойда эди. Кўпинча мактабда чала қолган суҳбатимизни уйга кетаётib, 8-трамвайда давом эттирадик. Айтмоқ керакки, кўпни кўрган Домлажон бағоят бамаъни, ширинсуҳбат одам эди. Лекин баъзан гап айланиб, оила, бола-чака масалаларига тақалиб келса, Домлажон бирдан хомуш тортиб қолар, унинг чехрасини гусса пардаси қоплаб олгандай бўларди. Бу парда ортида эса Домлажоннинг алланечук адоқсиз ҳасрати, бедаво дарди сезилиб қоларди. Кунлардан бирида Домлажоннинг ўзи ёрилиб қолди:

– Э-э, Озоджон, бу дунё бири кам дунё – унда одамнинг баҳти сира бутун бўлмас экан. Одамлар бор –

тирноққа зор, битта фарзанд учун жону жаҳонини беришга тайёр, одамлар бор, Яратған унга қўша-қўша фарзандлар ато қиласди.

Кейин у ўзининг жуда серфарзандлигини айтди – ҳозирга қадар у ўн битта фарзанд кўрибди, лекин фарзандлари турмас экан. Ҳозир унинг бор йўғи иккита фарзанди ҳаёт экан. Лекин ўлим ҳақ, кимдир олдин, кимдир кейин бу оламдан кўз юмади. Унинг ўн бир фарзандидан тўққизтаси оламдан кўз юмган экан, бу Оллоҳнинг иродаси, бунга норози бўлиб, исён кўтариб бўлмайди. Аммо Домлажонга тинчлик бермайдиган, доимо чақириканакдек ботиб, бутун аъзойи баданини зирқиратиб оғритувчи бошқа бир гап бор экан.

– Фарзанд яхши нарса, лекин аёл киши кетма-кет туғаверса, унга ҳам оғирлик қиласди экан. Ҳуллас, ўзинчи фарзанд бўйида бўлганида келинойингиз жуда қийналиб кетганидан нолиб қолди. Мени ҳам нима гафлат босибди-ю, «Ҳа, майли, бир иложини қила қол» дебман. Хотин дори ичди. Лекин ҳаммага таъсир қилган дори бизнинг хотинга заррача кор қилмади. Билмадим, Соҳиби Кудратнинг катта китобида бу боланинг албатта туғилиши ва пешонасига битилган қисмат йўлини ўтиши кераклиги ёзиб қўйилган экан, шекилли, ҳомила кун сайин улғая борди ва вақт-соати етганда, хотиннинг кўзи ёриди. Лекин буни қарангки, ўша дорининг таъсирими ёки бошқа ғойибона кучлар аралашганми, ҳар қалай, туғилган бола ногирон эди – уруғимизда кўзи ожизлар бўлган эмас, аммо чақалоқнинг иккала кўзи ҳам ожиз эди. Бот-бот ўйланаман – нега шундоқ бўлди? Бу ҳам бизга юборилган бир синовмикин? Ёхуд менинг ношукурлигимга жазо тариқасида шундай бўлдимикин? Нима бўлганда ҳам ўзинчи фарзандимнинг шундай туғилганига мен ўзимни қай бир даражада айбдор деб биламан ва сира кечиролмайман.

Норасо дунёнинг бу номардлигини кўринг – бир қараганда ҳар жиҳатдан тўқис, еб-ичишда кам-кўсти йўқ, баҳтиёр бўлишига ҳеч нарса халақит бермайдиган одамнинг бошида шунча кам, шунча ҳасрат, шунча дард! Мен Домлажонга ҳамдардлик билдиридим – қўлимдан бошқа нима ҳам келарди? Кейин эса... Мен Москва-

га ўқишига кетиб қолдим, ўз ишларим, ўз ташвишларим билан бўлиб, Домлажоннинг ташвишлари хотирамдан кўтарилиди.

1960 йилда мен университетга кириш имтиҳонларида иштирок этдим. Филология факультетига кирувчи-ларнинг иншоларини алоҳида дикқат-эътибор билан текширдим. Бир иншо дикқатимни жалб қилди – у жуда теран фикрларга бой, адабиётни чукур ҳис қилиб, бехато ёзилган бакувват иншо эди. Бунақа иншолар одатда кам учрайди ва унга шак-шубҳасиз «5» баҳо қўйилади. Мен иншо ёзган боланинг исми шарифини аниқладим – Санжар Содиқов эди. Лекин бу ном менга ҳеч нарса дегани йўқ, кейинги имтиҳонларда уни назардан қочирмаслик учун эслаб қолдим, холос.

Бу орада мени бир киши сўраб келганини айтишди. Келган Мириди Содиқов экан. Қуюқ кўришдик, ҳолаҳвол сўрашдик. Кейин Домлажон мақсадини баён этди:

– Ўғлим Санжар Содиқов сизга имтиҳон топширган экан. Шундан хабар олгани келдим,

– Шошманг, Санжар Содиқов сизнинг ўғлингизми? Ўша ўнинчи фарзандингиз-а? Сиз уни ногирон деган эдингиз-ку?

– Ҳа, ҳали ҳам ногирон, лекин жуда қобилиятли. Мактабни олтин медаль билан битирди.

Мен дарҳол Санжарнинг иншосини эсладим, унга «5» баҳо қўйилганини маълум қилдим. Домлажон хурсанд бўлиб уйига қайтди. Кейинги имтиҳон ҳам адабиётдан оғзаки имтиҳон эди. Шунда мен Санжарни биринчи марта кўрдим. Очигини айтганда, уни биринчи марта кўрганда одам беихтиёр сесканиб тушарди. Унинг кўзи ожизлигидан ташқари, бўйи ҳам пастроқ, жуссаси кичкина, қалласи эса гавдасига нисбатан жиндай каттароқ эди. У имтиҳон столи олдига келиб, билет олди. Билетни унга ўқиб беришди. У саволларни эшишиб бўлиши биланоқ, «Жавоб берсам майлими?» деб рухсат сўради. Сўнг жавоб бера бошлади. Биринчи мўъжиза ўшанда рўй берган эди. Санжар саволларга бурро тил билан шунақа батафсил жавоб бера бошладики, орадан 5 дақиқа ўтар-ўтмас унинг ногиронлиги ҳам, жиндай кўримсизлиги ҳам паққос эсдан чиқиб кетди. Унинг

теранлиги ва зукколиги унга тенг кўриб муомала қилишни тақозо этар эди. Одатда, ногиронлар атрофдагилардан ўзлари учун имтиёзлар сўрашади. Санжар бундай қилгани йўқ. Умуман, уни таниганимга қирқ йилдан ошди – лекин бу йиллар мобайнида бирон марта ҳам у ўзининг ожизлигини рўкач қилиб, бирон-бир имтиёз олишга ҳаракат қилганини билмайман. Фақат бир марта гина у бу қуролга мурожаат қилган эди – қайси бир йили университет штатларини қисқартириш керак бўлиб қолди. Шунда келиб-келиб, кўзлари Санжарга тушди. Бизнинг елиб-юурганимиз, «уни ишдан бўшатиш учун ҳеч қандай асос йўқ» деб қилган иддаоларимиз раҳбарларга таъсир ҳам қилгани йўқ. Шунда мен Санжарга юқори ташкилотларга ариза билан мурожаат қилиб, ахволни тушунтириши кераклигини айтдим. Санжар шундай қилди. Юқоридагилар: «Ёмоннинг кучи япалоқقا етдими?» деган маънода қаттиқ дакки бериши, шекилли, шу-шу иккинчи марта Санжарни бўшатиш ҳақида ҳеч ким оғиз очишга журъат этмади.

Кириш имтиҳонларига қайтайлик. Мактабларда олтин ва кумуш медаллар бериш биринчи марта 1945 йилда жорий қилинган эди. У пайтларда мактабни медаль билан тутатганлар катта имтиёзга эга эди. Улар истаган олий ўқув юртига имтиҳонсиз қабул қилинарди. Кейин бу масалада суистеъмоллар кўпайиб кетди, шекилли, медалларнинг имтиёзи бекор қилинди. Бу қоида биринчи марта 1960 йилда жорий қилинди. Шундай қилиб, ўн йил мактабда фақат «аъло» баҳоларга ўқиган ва «олтин медаль» олган Санжар адабиётдан ёзма ва оғзаки имтиҳондан ташқари, яна тарих, рус тили ва чет тилларидан ҳам имтиҳон топширди ва 25 балл тўплади. Бунинг ўзи фавқулодда ҳодиса эди, негаки, ҳамма фанлардан ҳамиша «5» олишга қурби етадиган болалар, умуман, камайиб кетган эди. Ногиронлар ҳақида-ку гапирмай қўя қолса ҳам бўлади.

Шундай қилиб, Санжар Содиков университет талабаси бўлди. Одатда, уни кимдир етаклаб келиб, етаклаб олиб кетарди. Лекин дарс вақтларида муқим ўтирас, дарсларга диққат билан қулоқ солар, маҳсус дафтарига игна билан қитир-қитир ёзиб, конспектлар оларди, ҳар

бир дарсда маърузадан кейин саволлар берар ва бу саволлар узоқ ўйлашнинг самарасигина бўлиб қолмай, ҳаммани, шу жумладан, домлани ҳам узоқ ўйлашга мажбур қиласидан саволлар бўларди. Санжарнинг қандайдир фавқулодда иқтидорга эга эканига, кўп нарсаларни соғлардан яхшироқ кўнтил кўзи билан кўра олишига эътиборимни биринчи марта Абдулла Қаҳҳор жалб қилган эди. Ўшанда Санжар ҳали талабамиди ёки ўқишини тугатганмиди – ҳозир аниқ эсимда йўқ. Кунлардан бирида «Тобутдан товуш» комедиясини жамоа бўлиб томоша қилдик, кейин асар муаллифи иштирокида муҳокама қилдик. Кўпчилик қатори Санжар ҳам сўз сўради. У асар ҳақида анча жўяли фикрлар айтди ва ролларни ижро этишда айрим артистларнинг маҳоратини мисоллар билан таъкидлadi. Жумладан, Сухсупров ролини ижро этган Саъдихон Табибуллаев тўғрисида жуда чиройли гап айтди. Маълумки, Сухсупров порахўр, ҳаром йўллар билан катта бойлик ортирган нопок инсон. Текшир-текширлар бошлангандан кейин у данғиллама участкасини хотинининг укаси Обиджон номига ўтказиб қўйиб жон сақламоқчи. Обиджон оддий меҳнаткаш йигит, дабдабаларга ўрганмаган, ҳалол. Сухсупров унинг шаънига кичикроқ зиёфат уюштириб, унда столнинг тўрида туриб олиб, қадаҳ сўзини айтади. Гаплар ҳавойи, баландпарвоз, осмону фалакда. Обиджон, «пастроқ тушинг» (яъни, «одмироқ гапираверинг одамга ўхшаб») деган маънода танбеҳ беради. «Шунда, – деди Санжар муҳокамада, – актёр столнинг тўридан чиқиб, ён томонидаги, яъни пастроқдаги стуллардан бирига ўтади». Санжарнинг бу гапини эшишиб, Абдулла Қаҳҳор ёқа ушлади: «Воажаб, мен асарнинг муаллифи бўлиб, тўрт кўз бўлиб спектаклни кузатиб туриб актёрнинг бу ҳаракатини сезмабман, Санжар эса сезибди. Қойил-ей!»

Мен ҳам Санжарга яна бир бор тан бердим ва унга бошқачароқ қарай бошладим. Орадан кўп ўтмай, Санжар ўқишини тугатди, табиийки, яхши ўқигани учун аспирантурада олиб қолинди. Мен унга илмий раҳбар бўлдим. Матбуотда унинг мақолалари чиқа бошлади. 1967 йилда «Шарқ юлдузи» журналида менинг мухтасаргина бир тавсияномам билан унинг ўша давр насрига бағиши-

ланган каттагина мақоласи чиқди. Мақола жамоат чиликнинг эътиборини тортди – янги мунаққид туғилаётгани тұғрисида гаплар бўлди. Сўнгра Санжар мұваффақият билан номзодлик диссертациясини ёқлади ва факультетда ўқитувчи қилиб ишга олиб қолинди. Тұғри аввалига баъзи бирорлар томонидан «Қандоқ бўларкин талабалар ёмон қитмир-да, эплай олармикин?» деган шубҳалар билдирилди. Йўқ, мана ўттиз беш йилдирки, бинойи deck энлаб келяпти. Тұғри, аввалига баъзи бир талабалар турли найранглар ишлатиб кўришди – баъзилари дарсга келмайди, баъзилари имтиҳонга ўзининг ўрнига ошнасини киритади, баъзилари ўқимаган китобини ўқидим дейди, баъзилари шпаргалкадан фойдаланишга ҳаракат қиласди. Кўйинг-чи, талаба халқининг ҳам маккора аёлга ўхшаган ҳийла-найранги қирқ эшакка юк бўллади. Лекин Санжар қандай бу қалбакиликларни кўради – билмайман-у, фирибгар талабани бир зумда фош қиласди-кўяди. Ҳозир бу йўл билан уни алдамоқчи бўлганлар деярли йўқ. Ҳамма талабалар уни бирдай ҳурмат қилишади. Билим масаласига келсак, айтмоқ керак, унга тенг келадигани йўқ. Адабиётшунослик касбининг энг асосий талаби – кўп китоб ўқиш, матнни билиш, фақат бугунги адабиётдан эмас, кечаги ва ўтмишдаги китоблардан ҳам хабардор бўлмоқдир. Санжар буларнинг ҳаммасини ўқиди. Тұғрироғи, унга ўқиб беришади. Бироқ шунақа китоблар борки, уларни биринки ҳафтада ўқиб тамом қилиб бўлмайди. «Анна Каренина», «Уруш ва тинчлик», «Тинч Дон»... бу рўйхатнинг охири йўқ. Бундай пайтларда Санжар магнит тасмасига ёзиб олинган ёхуд маҳсус машиналарда овоз чиқариб ўқиб берадиган воситалардан фойдаланаар экан. Чинданда, имкон қидирган имкон топар экан. Чиндан-да, яхши ниятлар билан ҳаракат қилсанг, Соҳиби Кудрат қандай йўллар билан бўлмасин сенга мададга келар, сени қўллаб-қувватлар экан. Шу тарзда Санжарнинг ақл бовар қилмайдиган қобилиятлари кўз ўнгимда секин намоён бўлаверди. Аввало, унинг фавқулодда хотираси тұғрисида гапириш керак. Билмадим, Парвардигор кўздан маҳрум қилишга қилиб қўйиб, ўзи бир оз хижолат чекканми – ҳарҳолда, кўзниңг эвазига унга бениҳоя ўт-

кир хотира ато этган. У бир эшигтан нарсасини сира унумайди, «Ўн йил аввал фалон куни нима бўлганди, фалончи нима деганди ёки фалон романнинг фалон жойида нима бўлади?» деб сўрасангиз, савол оғзингиздан чиқиб улгурмай, жавобни қалаштириб ташлайди. Афтидан, Санжар ўзининг «хотира» деб аталган омборининг қайси токчасида нима туришини жуда яхши билса керак.

Санжарнинг ўқиши, ёзиши, билимининг чуқурлигини ҳам қўя турайлик – унинг росмана уста эканини айтмайсизми? Ҳа, у радиоприёмниклар ва магнитофонлар тузатади, тузатганда ҳам унча-мунча профессионал усталар унинг олдидаги эшолмай қолишади. Менинг «Спидола» деб аталган радиоприёмнигим бўлар эди. Бузилиб қолди. Икки-уч устага олиб бордим – тузалмади. Бир куни шундан гап очилиб қолган эди, Санжар: «Олиб келинг, мен кўрай-чи», – деди. Ишон-қирамай, олиб бордим. Уч-тўрт кундан кейин: «Олиб кетаверинг, тузалди», – деди. Дарҳақиқат, ишга ярайдиган аҳволга келиб қолибди.

У бақувватгина радиожурналист сифатида ҳам фаолият юритади, бу тўғрида мақолалар ҳам ёзган, шунинг учун бўлса керак, уни Жаҳон тиллари университетига халқаро журналистика факультетига радиожурналистика курсидан маъruzалар ўқишига таклиф қилишган. Хуллас, Санжарнинг туриш-турмушига разм солсангиз, унинг ҳеч кимдан кам бўлмаган даражада ҳаёт кечираётганига, кўп қиррали фаолият билан шуғулланаётганига, чинакам инсон сифатида умргузаронлик қилаётганига ишонч ҳосил қиласиз. Одамларга нимаики хос бўлса, уларнинг ҳеч қайсиси Санжарга ҳам ёт эмас. У бир кишичалик шахмат ўйнайди. У улфатчилик қиласи, тўй-томушаларга айтилса, қолмайди, маъракаларга бориб туради. Замондан орқада қолмаслик учун ҳозир компьютер билан ишлашни ўрганиб олган, интернет билан боғланган. Уйланган. Унинг рафиқаси Лобархон ҳамма ўзбек аёллари каби эрининг атрофида гиргиттон, унинг саришта, бадастир бўлишини ўйлайди, рўзгорни бошқаради. Уларнинг турмуш курганларига салкам ўттиз йил бўлиб қолди, учта бир-биридан гўзал қизлари, сухсурдек ўғиллари, неваралари бор.

Хуллас, уларга, бу оиласдаги шойисталикка ҳар қанча ҳавас қылса арзийди. Ҳавас қылса қилгудекку-я, лекин Санжарни ўйласам, хаёлимга яна бошқа фикрлар келади. Бу дунёда одамнинг қандай бўлиши унинг ўзига боғлиқ эмасми? Нима учун батъзан тўрт мучаси соғ девдек-девдек йигитлар алланечук қадди-басти эгик, руҳи тушкун, иши унмайдиган бўлади, нима учун улар ҳаётдан тўйиб кетгандек, ҳамма нарса жонларига теккандек, толиқиб ҳоригандек ҳаёт кечиришади. Санжарни ўйлаганда, одамнинг бардамлиги, тетиклиги фақат жисмоний соғломлигига боғлиқ эканми деб ўйлайман. Ҳа, гап йўқ, саломатлик туман бойлик. Бироқ одамнинг одам бўлмоғи, одамдай тўлақонли ҳаёт кечирмоғи, ҳаётнинг мазмунга тўлиқ бўлмоғи учун биринчи навбатда, руҳий тетиклик муҳим эмасми? Ҳар қанақа кемтикларга қарамай, инсон ўзини чинакам Инсон деб ҳис қылса ва шунга муносиб ҳаёт кечиришга жаҳд қылса, унинг ожизлигию ногиронлиги билинмай қолиб кетавермайдими? Ўзининг заифликларидан устун келиб, уни енгиб, росмана инсондек тўлақонли ҳаёт кечиришнинг ўзи бир мўъжиза эмасми? Назаримда, Санжар ҳатто тўғри йўлда ҳам йўлини этлаб юра олмайдиган кўзи очиқларига қаратилган тирик таъна бўлса керак.

2003

## ЮРТ ҚАЙГУСИДА ЁНГАН ЮРАК

«Шарқ» нашриётида чоп этилган «Туркистон қайгуси» китобини варактрай бошлигининг билан китоб аввалида асар муаллифининг суратини кўрасиз. Унда тасвирланган сиймо биринчи қарашдаёқ ўзининг улуғворлиги ва нуронийлиги билан сизни ўзига жалб қиласди. Унинг чехрасида ифодаланган теранлик ва донолик, матонат ва қатъият бу зоти муборакнинг жуда ёрқин ва кучли шахс бўлганидан далолат беради.

Мен Алихонтўра Соғуний тўғрисида биринчи марта 80-йилларнинг ўртасида Эркин Воҳидовдан эшитган эдим. Бир воқеа муносабати билан Эркин Алихонтўра билан ҳаммаҳалла эканини, жуда билимдон ва зукко инсон эканини, салом-алик қилиб юриб, унинг назарига тушиб қолганини аллақандай ички гурур билан гапириб берганди. Эркиннинг гапи билан мен бу кишига қизиқиб қолдим ва у тўғрисида бир қадар тасаввур ҳосил қилдим.

Алихонтўра Шокирхўжа ўғли 1885 йилда Тўқмоқ шаҳрида туғилган, Макка ва Бухоро мадрасаларида таҳсил кўрган. У ислом динининг тарихи ва фалсафасини жуда чукур биладиган, Туркистон тарихини мукаммал ўрганганди, адабиёт ва санъат соҳасида катта иқтидорга эта бир инсон эди. У ўз фаолиятининг биринчи қадамлариданоқ ўз юрти ва ҳалқи учун ифтихор туйғулари руҳида тарбияланди. Жумладан, у ёшлиқ йилларида Боласогун шаҳрига боради ва у ердаги Юсуф Хос Ҳожиб мақбарасини зиёрат қиласди. Маътумки, Юсуф Хос Ҳожиб жаҳон адабиётининг дурдона намуналаридан бўлмиш «Кутадгу билиг» асарини яратган эди. Бу зиёрат Алихонтўрада жуда кучли таассурот қолдиради ва у буюк ижодкор яшаб ўтган шаҳар номини ўзига тахаллус қилиб олади. Ўшандан кейин Алихонтўра Соғунийнинг номи

ижтимоий ва маданий ҳаётнинг турли соҳаларида тез-тез учраб туради. Зеҳни ўткир, иқтидорли Алихонтўра Соғуний бир замонлар буюк бир цивилизация яратган, жаҳонга буюк алломалар, шоирлар, мутафаккирлар, саркардалар берган, ўз юртини яшнатиб обод қилган халқининг бугун noctor бир аҳволда эканини, бегоналар зулми остида эзилиб ётганини кўради ва унинг қалбидаги норозилик туйғулари алангаси исёнга айланади. Табиийки, унинг исёнкорлиги ҳукмрон доираларга ёқмади ва у узлуксиз таъқиблар, қувғинлар азобида яшашга мажбур бўлади. Чор амалдорлари ўрнига ҳокимият тепасига келган большевиклар ҳам миллий зулмни, таъқиблар ва сургунларни оширса оширадиларки, асло камайтирмайдилар. Алихонтўра Соғуний улардан қочиб Шарқий Туркистонга кетади ва у ердаги миллий озодлик ҳаракатида фаол қатнашади. Бу ҳаракат муайян бир даврда катта самарага ҳам эришади – 1944 йилда Шарқий Туркистон жумҳурияти эълон қилинади ва Муваққат ҳукуматнинг биринчи раиси қилиб Алихонтўра Соғуний сайланади. Бироқ кўп ўтмай, ҳукумат тормор қилинади. Алихонтўра Соғуний қочиб Тошкентга келиб қолади ва бу ерда ўзининг илмий ва ижодий фаолиятини давом эттиради. Бу даврга келиб Алихонтўра Соғуний нафақат Шарқий Туркистонда, балки бутун Марказий Осиёда йирик жамоат арбоби сифатида танилган эди. Табиийки, Шўро ҳукумати бундай атоқли сиймони ўз томонига оғдириб олишдан, уни ўз тарғиботчисига айлантиришдан манфаатдор эди. Шунинг учун Алихонтўра Соғунийни ўзига оғдириш учун унга ҳар хил илтифотлар кўрсатишга ҳаракат қиласиди: унга умрбод нафақа тайинламоқчи, ҳовли-жой билан таъминламоқчи, Фанлар академиясига сайлашмоқчи бўлишади. Бироқ большевикларнинг ҳам, улар яратган тузумнинг ҳам асл башарасини ўша кезлардаёқ чукур кўра олган Алихонтўра Соғуний бу илтифотларнинг ҳаммасини рад этади ва ўзининг хур фикрини сақлаб қолади. Ўз-ўзидан аёнки, бундай «шаккоклик» нафақат шўролар ҳокимиятини менсимаслик эди, балки унинг сиёсатига қарши ошкора исён ҳам эди. Махсус органлар унга нисбатан репрессив усувларни қўлламаган бўлсалар-да,

унинг ҳар бир қадамини таъқиб остига олишади ва фаолиятини ҳар томонлама чеклаш йўлини тутишади. Алихонтўра бу йилларда, асосан, ижодий иш билан шугулланади. У «Темур тузуклари»ни, Аҳмад Донишнинг «Наводир ул-вақоэ» ва Дарвеш Али Чангийнинг «Музика рисоласи» каби китобларини ўзбек тилига таржима қилди, «Девони Соғуний» китобига тартиб берди. Афсуски, олимнинг бу таржималари ҳанузга қадар дунё юзини кўрмай келмоқда. Шу йилларда Алихонтўра «Тарихи Муҳаммадия» деган икки жилди китобини ҳам ёзиб тутатган. Бу китоб 90-йилларда — республикамиз мустақиллик касб этган йилларда босмадан чиқди. Ўша кезларда мен пайғамбаримиз Муҳаммад алайҳисса-ломнинг ҳаётига жуда қизиқиб қолган эдим ва бу тўғрида ўзбек, татар, турк ва рус тилларида мавжуд китобларнинг ҳаммасини ўқиб чиқкан эдим. Ҳатто Америка ёзувчиси Вашингтон Ирвингнинг «Муҳаммаднинг ҳаёти» деган ва XIX асрнинг биринчи чорагида (1825) Санкт-Петербургда босилган китоби ҳам эътиборимдан соқит қолмаган эди. Ҳеч муболағасиз айтиш мумкинки, «Тарихи Муҳаммадия» пайғамбаримиз ҳақидаги мен ўқиган китоблар ичida энг мукаммаларидан биридир. Алихонтўра Соғунийнинг бу китоби босилиб чиққандан кейин кўп ўтмай, унинг муборак номи ислом дунёсида яна машҳур бўлиб кетди.

Ва ниҳоят, 2003 йилда Алихонтўранинг яқин қариндош-уруғлари ва биринчи навбатда набираси Увайс-хонтўра...<sup>1</sup>

2005

<sup>1</sup> Мақола туталланмай қолган (~ муҳ.).

## ТҮПЛОВЧИДАН

Хурматли китобхон! Кўлингиздаги китоб таниқли адабиётшунос олим, Ўзбекистон Қаҳрамони, падари бузрукворимиз Озод Шарафиддиновнинг узоқ йиллик ижод маҳсули. Бу инсон 45 йилдан зиёдроқ умрини ёш авлоднинг илму маърифатини оширишга бағишилади. Зотан, Озод Шарафиддинов билим олиш ва маърифат тарқатишни ҳаётининг мазмуни ҳисобларди. Ана шу ташналиқ уни ҳаётининг охиригача тарқ этмади.

«Домлалар» туркумини яратиш нияти бундан бир неча йиллар аввал туғилган бўлиб, бунинг заминида олимнинг тинимсиз меҳнати ётади. Бундай дейишимизнинг сабаби – у кишининг архивидаги «Домлалар» туркумига оид рўйхатлар, уларнинг қайта-қайта тузилган, тўлдирилган вариантларидир.

Инсоннинг шаклланишига ўзининг бекиёс ҳиссанни қўшадиган Устоз образини яратиш муаллифнинг биринчи галдаги вазифасига айланниб, Устознинг қандай фазилатларга эга бўлиши лозимлиги, ички дунёси китобнинг ҳар бир саҳифасида ўз аксини топган. Бу туркумни яратища О. Шарафиддинов ўқувчига давр руҳини етказиш масаласига ҳам алоҳида эътибор билан қараган. Мазкур тўпламдаги воқеалар ўтган асрнинг 40-йилларидан то умрларининг охиригача бўлган даврни ўз ичига қамраб олган. Дастлабки бадиада муаллифга мактабда таълим берган илк муаллимлари, у кишининг вояга етишида катта хизматлари сингтан устозлари ёдга олинади. Нафақат илм-фан, балки одамийликдан ҳам сабоқ берган Кудрат Аҳмедов, Собит Комилов каби инсонларга нисбатан олимнинг хурмати чексиз бўлган.

Туркумнинг кейинги саҳифаларида муаллиф одамларнинг нақшига айланган домлалар, ҳаётда кўп мураккабликларга дуч келган, лекин халқ ардоғида бўлган сафдошлар, ифтихорга лойик ҳамкаслар, ҳар бири

ўзига хос шаксга, ўзига хос истеъдодга айланган шо-тирдлар ҳақида сўз айтиши шарафини чукур ҳис қилган олим тарихнинг биз билмаган ҳаёт саҳифаларини очиб беради. Тўплам аввал матбуотда эълон қилинган ва архивларида қўлёзма шаклида сақланган бадиалардан жамланган.

Минг афсуски, рўйхатга кўра муаллиф бир нечта домлалар ҳақида ёзиш ниятида бўлган бўлса-да, аммо бунга улгура олмаган. Булар Субутой Долимов, Сиддиқ Фузайлар, Ҳомил Ёқубов, Лазиз Қаюмов, Абдуҳафиз Фаниев, Алихон Соғунийлардир<sup>1</sup>.

Китоб жуда қизиқиш билан ўқилади. Домлаларнинг тоҳ қувонч, тоҳ қайғуга тўла ҳаёти, чеккан мاشаққатлари, ҳар бир бадиа қаҳрамонининг илмга, ўқитаётган фанига содиклиги, талабага бўлган эътибори, ички туйгулари ва бой маънавий дунёси китобхонни чукур ўйга толдиради. Кўз ўнгимизда Тоҳирий домла, Солиҳ Қосимов, Абдураҳмон Саъдий каби устозларнинг мураккаб ҳаёт йўллари намоён бўлади.

Тўпламдаги Фулом Каримов бошчилигидаги ТошДУ (ҳозирги ЎзМУ) «Ўзбек адабиёти» кафедраси аъзоларининг фаолиятига багишлиланган бадиалар алоҳида таҳсинга сазовор. Сабоқ беришни чинакам санъат даражасига кўтарган, ўз касбига содик иктидор ва истеъдод соҳибларининг умр йўли китобхон учун катта мактабдир.

Олим таълим, ижод эркинлиги борасидаги муаммолар, бюрократизм машинасининг шафқатсиз тазиики, инсонларнинг мураккаб ички олами ҳақида баён қилар экан, китобхон кўз ўнгига буларнинг ҳаммаси кино тасмасидек ўтади. Дастрраб илим масканига эндиғина қадам қўйган талаба, кейинроқ шу маскандада иш бошлиган ёшгина домланинг гувоҳлигига кечган воқеалар ривожида университетнинг салоҳиятига асосий ургу берилган.

Ушбу китобнинг яна бир қиммати шундаки, унда ёшларнинг нафақат билим олиш, айни пайтда маънавий

<sup>1</sup> «Юрт қайғусида ёнган юрак» – Алихонтўра Соғуний ҳаёт йўлига багишлиланган хотира туталланмаганига қарамай, биз уни шу ҳолда тўпламга киритишни маъкул деб топдик (– М. Ш.).

жиҳатдан етук ва баркамол инсон бўлиб етишишларида устозларнинг ролига ҳам алоҳида эътибор берилган. Олим илм чўққиларига поғонама-поғона кўтарилиб борар экан, илм уммомининг ҳақиқатан ҳам тубсиз эканлиги таъкидланади. Бадиа қаҳрамонлари келажак авлоднинг миллий фурурини шакллантиришда, улар онгига адолат ва ҳақиқат туйгусини сингдиришда жонбозлик кўрсатган ҳақиқий фидойилардир.

Тўпламнинг ўзига хос хусусиятларидан бири шундаки, унда университетнинг ташкил топиши, Тошкентга Москва ва Ленинграддан Д. Д. Благой, Е. Ф. Бертельс, В. М. Жирмунский каби йирик олимларнинг ташрифлари, шунингдек, М. Аvezov, М. Шайхзода, Ойбекларнинг фаолияти ҳақида ҳикоя қилинади. Бундан ташқари, Тоҳирий домла (педагог), Турсун Иброҳимов (тилшунос) мисолларида 40-йилларда адабиётшунослик, тилшунослик ва педагогика фанлари бўйича бўлиб ўтган катта-катта баҳслар ҳақида қимматли маълумотлар бериб ўтилади. Бу мунозаралар оқибатида қанчадан-қанча олимлар, домлаларнинг четта сурилгани, ўша даврларда СССР Фанлар академиясида бўлиб ўтган йиғилишлар, шафқатсиз танқид ва ишдан четлатишлар, уларнинг фожиалари ҳақида тарихий далиллар баён этилганки, буни ўқиган китобхоннинг кўз олдида 30–40-йилларда – қирғину қатағон ҳукм суреб тураган бир пайтда ҳокимият зулмидан азият чекмаган биронта зиёли қолмаганилиги яққол намоён бўлади. Домлалар тақдири ҳақида гапириб, муаллиф ўша давр мамлакатимиз тақдири хусусида ҳам фикр юритади. Тоҳирий домла, Турсун Иброҳимов, Зикриё Мирҳожиев ва бир қатор бошқа домлаларнинг аламли тақдирини тасвирлар экан, ўтган асрда мамлакатимиз бошидан қанчалик қора кунлар кечганини, уларнинг қаноти қайрилмагандан, эҳтимол, бугунги авлод кўп нуқсонлардан холи бўлиб, аллақачон дунёнинг етук миллатлари қаторидан ўрин олиши мумкинлигини алам билан ёдга олади.

Ўкувчи эътиборини жалб қиласиган жиҳатлардан яна бири ўша даврда (40–50-й.) домлалар ўқиган маърузалар мазмуни муаллифнинг хотирасида муҳрланиб қолгани. Ўкув дастурларнинг тор ва бир ёқлама тузишларни эътироф этилиб, талабаларнинг ўзбек адабиёти

ҳақида бир томонлама тасаввурга эга бўлиб қолмаслиги учун домлаларнинг олиб борган саъй-ҳаракатлари, бундай иш эса ўз даври учун жасорат эканлиги тилга олинади. Масалан, бирон-бир домла реакцион шоирлар ҳақида гапира туриб, уларнинг шеърларини таҳлил қиласр экан, шу йўл билан асарнинг қанчалик таъсири-чанлиги, юксак бадий савияси, юморга бойлиги, ўйноқи қофияларга эгалиги ҳақида талабаларда тасаввур уйфота олганлиги таъкидланади. Китобда баъзи бир тарихий ёки замонавий асарларнинг, адабий сиймоларнинг рўёбга чиқиши нақадар оғир кечгани, хусусан, Юсуф Хос Ҳожибининг «Кутадфу билиг» асарининг чоп этилиш тарихи, туркий халқларнинг ёдгорлиги бўлмиш бу буюк асар китобхон қўлига қай тариқа етиб борганлиги жонли лавҳаларда баён этилади. О. Шарафиддинов А. Саъдийнинг Чўлпон ҳақидаги мақолаларини таҳлил қиласр экан, бу таҳлилда бугунги китобхоннинг юксак шоирга бўлган муносабати ўз аксини топган. ВКП (б) Марказий Комитетининг «Звезда» ва «Ленинград», «Драматик театрларнинг репертуарлари» ва «Катта ҳаёт» кинофильми тўғрисидаги қарорлари хусусида сўз борар экан, бу қарорларда ижод аҳли социалистик жамиятни кўкларга кўтариб мақтashi, уни камчилик ва зиддиятлардан холи жамият сифатида тараннум этиши лозимлиги, бу вазифани ёмон бажараётган Анна Ахматова ва Михаил Зощенко каби ижодкорлар қаттиқ танқид қилингани, бундай кампаниябозликнинг оқибати ўзбек зиёлиларига ҳам салбий таъсир қилгани батафсил ёритилади. Кўриб турганимиздек, бу китобда бугунги кунда ҳеч бир дарсликка кирмаган ноёб тарихий маълумотлар ўрин олган.

Устозлар ҳақида гапирганда, олим нафақат уларнинг ташқи кўриниши, уларга раҳбариятнинг муносабати, адабий жараёндаги ўзгаришлар тўғрисида фикр билдиради, айни пайтда, уларнинг ички дунёси, фожиавий тақдири ҳақида сўзлаб бериш орқали даврнинг инсонларга, хусусан, зиёлилар тақдирига таъсирини теран ёритиб берган. Бинобарин, айрим домлалар (масалан, А. Саъдий) шўро мафкураси қурбони бўлгани афсус билан қаламга олинади.

Озод Шарафиддинов китоб ва мақолалари, бадиаларини номлашда ҳам алоҳида иқтидор эгаси эди.

Китобга киритилган кўпгина мақолаларнинг номлариданоқ унинг кимга бағишлангани, қаҳрамоннинг ўзига хос қирралари аён бўлади. Масалан: «Иzzатга муносаб отахон ижодкор», «Аъло ҳазратнинг ҳасратли кунлари», «Сўнгти жадид қиссаси», «Софисам, Нуриддинжон, излайнин қаерлардан?», «Тенгқурларнинг сарвари», «Кичкина демант бизни ёки Саттор Ҳайдар қиссаси» ва ҳоказо.

Муаллиф маҳоратини намоён қилувчи хусусиятлардан яна бири – унинг кичкина-кичкина деталларгача хотирада сақлаб қолиш қобилиятига эга бўлиб, ижодий фаолиятда бундан унумли фойдаланганлигидир. Жумладан, ёшлиқда пионер лагерларида бўлган спорт мусобақаларида кимлар билан шахмат ўйнагани, айрим домлалар билан биринчи марта қаерда, қачон учрашгани, қачонлардир кўрган фильмларининг мазмунни бир-бир ёдга олинади. Бу ўз навбатида бутунги китобхонда ўша давр ҳақида тўлароқ тасаввур ҳосил қиласди.

Домлаларнинг туғилган йили, вояга етган жойи, қайси мактаб ва олийгоҳларда таълим олганликлари, ёзган дарслуклари, жамиятдаги ўрни, қандай лавозимларда ишлаганлиги, ёзган диссертацияларининг мавзулари ва шунга ўхшаш тафсилотларга алоҳида ургу берилган. Умуман олганда, ҳар бир бадиада унинг қаҳрамони бўлмиш олим, домлага хос яхлит ва бетакрор қиёфа – Устоз образи бор бўйи билан намоён бўлади.

Китоб саргузаштлар, кулгили ва қайгули воқеалар, хотирага михланиб қоладиган сербўёқ лавҳаларга, юмор ва қочиримларга бой, тили эса ғоят ширали, халқона, содда ва равон бўлиб, шу каби фазилатлари учун ҳам у худди бадиий асар каби завқ-шавқ билан ўқиласди. Муаллиф фактлар, лавҳалар, қаҳрамонлар характеристини холисона ёритиб борар экан, зимдан китобхоннинг ана шу фактлар, воқеалар ва қаҳрамонларга муносабатини шакллантиради, ўқувчини йирик ҳаётий, адабий-фалсафий хуносалар сари етаклаб боради.

## **МУНДАРИЖА**

Фикрлаб яшамоқ саодати .....	3
Дорилфунун менинг тақдиримда .....	7
Илк муаллимларим .....	13
Аспирантура сабоқлари ( <i>Корнелий Зелинский</i> ) .....	21
Фан тўзалик ҳисси билан тирик ( <i>Тўрабек Долимов билан сұхбат</i> ) .....	32
Одамлар нақши ( <i>Сайди Сирожиддинов</i> ) .....	50
Олимнинг сурати ва сийрати ( <i>Шоислом Шомуҳамедов</i> ) .....	58
География илмининг сардорларидан бири ( <i>Нуғмон Долимов</i> ) .....	69
Тоҳирий ким эди? .....	79
Тилшуноснинг тилсимили қисмати ( <i>Турсун Иброҳимов</i> ) .....	85
Янги адабиётшунослигимизнинг тўнгич вакили ( <i>Абдураҳмон Сайдий</i> ) .....	94
Иzzатта муносиб отахон ижодкор ( <i>Иzzат Султон</i> ) .....	104
Алвидо, Устоз .....	111
Баркамол инсон ( <i>Ғулом Каримов</i> ) .....	113
Мерғанликдан академикликка ( <i>Матёқуб Кўшжонов</i> ) .....	127
Хаёллар бандаси ( <i>Солиҳ Қосимов</i> ) .....	136
Зикриё Мирҳожиев жумбоги .....	145
Тил илмининг дарғаси ( <i>Люб Ғулом</i> ) .....	154
Оддийликдаги улуғлик ( <i>Музайяна Алавия</i> ) .....	162
Ака-ука Воҳидовлар .....	173
Аъло ҳазратнинг ҳасратли кунлари ( <i>Аъло Ашрапов</i> ) .....	191
Нурга йўғрилган умр ( <i>Шабот Хўжаев</i> ) .....	199
Сўнгти жадид қиссаси ( <i>Бегали Қосимов</i> ) .....	207
Баҳодир Ғуломовнинг ҳантомалари .....	216
Софинсан, Нуриддинжон, излайин қаерлардан? ( <i>Нуриддин Бобоҳўжаев</i> ) .....	223
Кичкина деманг бизни ёки Саттор Ҳайдар қиссаси .....	226
Қалбимизга яқин олима ( <i>Ингеборг Балдауф</i> ) .....	231

Умарали Норматов ҳақида билганиларимдан	
бир шингил .....	237
Олим ҳаётининг саҳифалари ( <i>Наим Каримов</i> ) .....	248
Балогат ( <i>Иброҳим Фофуров</i> ) .....	252
Ҳар бир инсон бир мўъжиза ( <i>Санжар Содик</i> ) .....	260
Юрт қайгусида ёнган юрак ( <i>Алихонтўра Соғуний</i> ) .....	269
Тўпловчидан .....	272

*Адабий-бадиий нашр*  
**ОЗОД ШАРАФИДДИНОВ**  
**ДОМЛАЛАР**

*Тошкент «Маънавият» 2009*

Муҳаррирлар: С. Аҳмедов, У. Кўчкоров  
Мусаввир Н. Попов  
Техн. муҳаррир Т. Золотайлова  
Мусаҳҳиҳ О. Богоррова  
Компьютерда тайёровчи Г. Отаскевич

Босишга 09.02.2009 й. да руҳсат этилди. Бичими 84×108/<sub>12</sub>. Times гарнитураси.  
Офсет босма усулида босилди. Шартли б. т. 14,70 + 0,42 вкл. Нашр т. 12,91 + 0,4 вкл. 5000 нусха. Буюртма № 09-527. Нархи шартнома асосида.  
«Маънавият» нашриёти. Тошкент, Буюк Турон, 41-үй. Шартнома 01-09.  
Ўзбекистон Матбуот ва ахборот агентлигининг «Ўзбекистон» нашриёт-  
матбаа ижодий уйида чоп этилди. 100129. Тошкент, Навоий кўчаси, 30-  
үй. 2009.